

საქართველოს მეცნიერებათა აკადემია  
ივ. ჯავახიშვილის სახ. ისტორიის, არქეოლოგიისა და ეთნოგრაფიის  
ინსტიტუტი

აღ. ოჩიაური

ქართული ხალხური დღეობები  
აღმოსავლეთ საქართველოს მთიანეთში  
(ფუხავი)



თბილისი  
„მეცნიერება“  
.1991

ქართული ხალხური კალენდარული დღესასწაულების შესახებ მასალები შეკრებილია ჩვენი საუკუნის 30—40-იან წლებში და დაცულია საქართველოს სსრ მეცნიერებათა აკადემიის ისტორიის, არქეოლოგიისა და ეთნოგრაფიის ინსტიტუტის ეთნოგრაფიის არქივში. ფშაური ხალხური დღეობების ამსახველი მასალა, რომელიც ალ. ოჩიაურის მიერ არის შეკრებილი და აღწერილი, გამოირჩევა მრავალმხრივობითა და სიზუსტით. მასალის დიდი ნაწილის ფიქსაცია დღეს შეუძლებელია, ამდენად წინამდებარე წიგნის მნიშვნელობა მეტად დიდია ქართველი ხალხის ეთნოგრაფიული ყოფის შესწავლაში.

რედაქტორი ისტორიის მეცნიერებათა დოქტორი

თ. ო ჩ ი ა უ რ ი

რეცენზენტები: ისტორიის მეცნიერებათა დოქტორი

ჭ. რ უ ხ ა ძ ე

ისტორიის მეცნიერებათა კანდიდატი

ნ. ა ბ ა კ ე ლ ი ა

სერიის სარედაქციო კოლეგია: ნ. აბესაძე, ნ. აზიკური, ვ. ითონიშვილი, ო. ონიანი, თ. ოჩიაური, | ალ. რობაქიძე, | ჯ. რუხაძე (მთავარი რედაქტორი), ი. სურგულაძე, ნ. ყიფიანი (მდივანი).

## რ ე ლ ა ქ ტ ო რ ი ს ა ბ ა ნ

1987 წელს გამოქვეყნდა ალ. ოჩიაურის მასალები ქართულ ხალხურ დღესასწაულებზე, სადაც შევიდა ხევსურული მასალების-ნაწილი (არხოტის თემი). მომდევნო გამოცემად ივარაუდებოდა პირაქეთ ხევსურეთისა და შატილ-მიღმახევის მასალები, მაგრამ გარკვეული დაბრკოლების გამო მათი გამოქვეყნება დროებით შეფერხდა. ამჯერად იბეჭდება ფშაური დღეობები და რელიგიური ხასიათის სხვა მასალები.

ალ. ოჩიაურმა თავისი სიცოცხლის ძირითადი ნაწილი ფშავში გაატარა; იქ უხოვრობდა და მოღვაწეობდა. კარგად იცნობდა ფშაველთა ყოფას, მონაწილეობდა მათ ჭირსა და ღვინში, ახლო ურთიერთობა ჭქონდა მცოდნე, ყველასაგან პატივცემულ ხალხთან, რომელთაგანაც არის ძირითადად ჩაწერილი აქ წარმოდგენილი მასალა.

ალ. ოჩიაური არ იფარგლება მხოლოდ დღეობათა აღწერილობით. მისი მიზანია, რაც შეიძლება ამომწურავად დაახასიათოს ესა თუ ის მოვლენა, ან ფაქტი. თხრობის დროს გადახვევას არ ერიდება, თუ სიტყვამ მოიტანა, იქვე გვაძლევს სათანადო აღწერასა თუ განმარტებას.

დღეობების აღწერილობასთან ერთად წიგნში წარმოდგენილია ხატ-სალოცავებთან დაკავშირებული თქმულება-ლეგენდები, რელიგიური შეხედულებები, სახატო მეურნეობის წესები, რელიგიისა და სოციალური ყოფის ურთიერთობის საკითხები და სხვ.

აღსანიშნავია, რომ იგი ერთსა და იმავე რიგის საკითხებს ეძიებს სხვადასხვა თემებსა და სოფლებში. ამიტომ ზოგჯერ მასალა ერთგვაროვანია, მაგრამ ის სხვაობა და სპეციფიკაც ჩანს, რომელიც მათ შორის არსებობს. ამ მეთოდით მოპოვებული მასალა ერთმანეთს ავსებს, საშუალებას იძლევა აღდგეს რიტუალის თავდაპირველი სახე, ტრადიციული წესები.

ამ მასალის გამოქვეყნების მნიშვნელობაზე არაფერს ვიტყვი, დაინტერესებული სპეციალისტი და მკითხველი თვითონ მიაგებს მისაგებელს წიგნსაც და მის ავტორსაც.

## დღეობები ხოშარის თევზი

ხოშარა \* არის პატარა სოფელი, ცხოვრობს 6 კომლი, ძველ დროს კი აქ ბევრ ხალხს უცხოვრია. ხოშარლებს წინათ ორგან ჰქონიათ ადგილი: ღელეს და ხოშარაში. სულ წინწინ ხოშარაში არ ცხოვრობდნენ. ცხოვრობდნენ მარტო ღელეს, რადგან ხოშარაში დევები ხალხს აშინებდნენ. აქ დასაარსებლად მოსულა წმინდა გიორგი, მაგრამ დევებს ბრძოლა დაუწყიათ მისთვის. წმინდა გიორგის ლახტი და სხვა ჯამე საბრძოლი იარაღი არ ჰქონია; მაშინ ერთი ძელისათვის მოუვლია ხელი და იმით გაუმართავს დევებთან ომი. უბრძოლავ დილით — წუხზამდინ და ამ ძელით სულ დაუხოცია დევები. თვითონ კი დაარსებულა ამ ადგილზე. გაუგავ გაბილოურგბს (გაბილოური ხოშარლების ძველი გვარია. ახლა აქვს ყველას ქვეგვარები), რომ დევები რამამ ამასწყვიტა და თვითონ დაარსდაო, წამოსულან და ამ ადგილზე აუშენებიათ კვრივი კოშკი. პირველად არ სცოდნიათ, ვინ იყო დევების ამომწყვეტი და მოაქვივნეს (დაარქვეს) კოშკის ანგელოზი. ასე იტყოდნენ ლოცვაში: „ხოშარის კოშკის ანგელოზო“. მერე მკითხავი გააქადაგა და გამოაცხადა თავი წმიდა გიორგიმ. ამის შემდეგ მოაქვივნეს: გიორგი კოშკის ანგელოზი ან მეორე სახელი — ს ა ხ უ თ მ ე ტ ო ძ ე ლ ი ს ა ნ გ ე ლ ო ზ ი .

წმინდა გიორგიმ რომ დევები დახოცა, ერთი დევი გაექცა, ავიდა სოფლის პირდაპირ მთაზე, რომელსაც ართაჯურის გორი ჰქვია, და იქიდან ესროლა წმინდა გიორგის ქვა. ვერ მოარტყა კი, მაგრამ იქვე ახლოს მიწაში დაეფლო, დაშალა ნაზირზენი, ერთი ნაზირზენი გიორგის თვალში მოხვდა და თვალი დაუზიანა, თვითონ კი გაიქცა და გადაიკარგა. ამის შემდეგ აქ გაამწესეს დასტურები და ხევისბრები. დაიკირა ხატმა სანადო მამულები აქვე ხოშარაში სოფლის აღმოსავლეთ მხარეს. სანადოები დაყოფილი ჰქონდა სოფელს. ყველას ეჭირა თითო სრელი; ის უვლიდა, გაღორღავდა, მოხნავდა, დასთესავდა და დაჰფარევდა (თესლი ითესებოდა სახატო პურიდან). ზაფხულშიც თავ-თავიანთ მოხნულს თვითონ უვლიდნენ, იცავდნენ საქონლისა

\* მიამბო ბიჭუა ხახაშვილმა, მცხოვრებმა სოფელ ხოშარაში, 76 წლისამ, 1946 წელი. დეკემბერი.

და ცნვრისაგან, გამარჯვდნენ. როცა სამკალად მოვიდოდა, მომკიდნენ მარტო კაცები (დედაკაცები ხატის სამკალში ან ლეწვაში არ მოეხმარებოდნენ). მოიტანდნენ ხ ა ტ ი ს კ ა ლ ო ზ ე, რომელიც იქვე იყო გაკეთებული და წმინდად დაცული (დედათ წესიანი ხატის მამულკალოზე ვერ გაივლიდა და თუ ძალიან არ გაუჭირდებოდა, კალოზე სულაც არ გაივლიდნენ ქალები). მერე თავ-თავის ძნას კარგად ააგებდნენ და გადასცემდნენ დასტურს. როცა ძნებს ყველა მოიტანდა, დასტურები გალეწავდნენ, პურს იქვე ხატის ბეღელში ჩაყრიდნენ, რომელიც ქვითკირისაგან იყო აშენებული, და ჩალა-ბზეს თვითონ გაიყოფდნენ.

დასტური აქ ორგვარი იყო: ერთნი ხატისაგან არჩეულნი მომიზეზებით ან მკითხავის თქმით. ეს დასტურები მარტო გალეწავდნენ და ინახავდნენ ხატის პურს. მეორე დასტურები იყვნენ, რომლებიც თითო დღეობას „იზამდნენ“, ორნი იყვნენ, დასტურობა მირგენილი ექნებოდათ ხალხისაგან. მათ პურს მისცემდნენ პურის შემნახველი დასტურები ხატის ბეღელიდან იმ რაოდენობით, რამდენიც განსაზღვრული იყო ხევისბრებისა და თვით ხალხისაგან ამა თუ იმ დღეობისათვის. დასტურები, რომლებიც რიგ-რიგობით დგებოდნენ და თითო დღეობა ჰქონდათ დავალებული, ფ ო რ ს (ალოს) გააკეთებდნენ, გაახმობდნენ, დაფქვავდნენ და ადულებდნენ ლუდს ჩვეულებრივ (სვეს მოტანაც ევალებოდათ ამ დასტურთ). ჯერ ფქვილს ჩაყრიდნენ და ორ წყეს წყალს დაასხამდნენ (ხატის სალუდეში გამართული იყო ყველა ხელსაწყო, რაც ლუდის მოხარშვას სჭირდებოდა: სალუდე გობი, ხის ჩხუტი ტკბილისა და სისწვნის გადასატან-გადმოსატანად, ტომარები, რომლებიც იქსოვებოდა თხის ბალნისაგან. მატყლის ტომარა ილესებოდა ნადულარი ფქვილით და ტკბილს აღარ უშვებდა; სხვა წვრილი ქვაბები, ლათბა სპილენძისა და სისწვნის დასაყენები, როცა იწურებოდა). ფქვილი და წყალი რომ ერთ ჯიგვიან ხელს ჩაიდულებდა, მერე გადმოიღებდნენ ჩხუტით და ჩაასხამდნენ ლათბის თავზე დაკიდებულ ბალნის ტომარებში. ტკბილი გაიწურებოდა და ხ ო ტ ი ტომარებში რჩებოდა. სალუდე ქვაბი რომ დაიცილებოდა, მორეცხდნენ ცივი წყლით და ლათბიდან ისევ ქვაბში გადაიტანდნენ ტკბილს, დაყრიდნენ იმდენ სვეს, რამდენიც ფქვილი იყო აწყული, ან, თუ სვე არ ჰქონდათ საკმარი, ცოტა ნაკლების დაყრაც შეიძლებოდა, ოღონდ სვე თუ ნაკლები იქნებოდა, ვერ გამოდიოდა კაი ლუდი. სვეს და ტკბილს ერთიმეორეში ადულებდნენ და იმასაც ერთ ჯიგვიან ხელს ან ცოტა მეტს ჩაადულებდნენ. მერე გაწურავდნენ სამწყულით. ერთ პირში ლათბას ხეს გაუყრიდნენ და ჩაუწყობდნენ ჯერ ფიჩხს და მერე ყარტს (სვილის ანუ ქვავის ჩალა, ხელით გაბერტყილი), რომელსაც

სამწყულს გაუყეებდნენ. ლათბა შეორე მხარისაკენ იყო დახრილი. ამოიღებდნენ ქვაბიდან ნამგოლიან სისწვენს და ჩაასხამდნენ სამწყულში. სვე იქ რჩებოდა, გაწურული სისწვენი კი ლათბის მეორე მხარისაკენ გადადიოდა. თუ ლუდი ბევრი სჭირდებოდათ, ლათბაში არ ჩავიდოდა და ნაწილი გადაჰქონდათ სხვა სპილენძის ქვაბებში. აქ გაცივდებოდა იმდენად, რომ ხელს რომ ჩაყოფდნენ, ძირში სითბო ეტყობოდა, საზალტეეზე (მაჭაზე) კი ხელს ცივად ხვდებოდა (ეს ზამთარში, ზაფხულში კი გააცივებდნენ, რამდენადაც შეიძლებოდა). როცა გაცივდებოდა, დასტურები მიუტანდნენ სისწვენს და ხევისბერი, რომელსაც ხატისაგან კოდ-საფუარი ჰქონდა დავალებული (ე. ი. მეკოდსაფუერე ხევისბერი ანუ ხევსურულად მესაფუერე) ჩაასხამდა კოდში და ჩააგდებდა საფუარს (ფშაურად ჩამა, ხევსურულად ჭიჭი). სისწვენის ჩასხმის და საფუერის მიცემის დროს იტყოდა: „ღმერთო და გიორგი კოშკის ანგელოზო, შენი სადიდებელია და შენ წაიყვანე წალმა და მოახდინე შენ საკადრის ზედაშე“. მერე პირზე გადააფარებდნენ ფარდას და შემოუჭირებდნენ საბელს. ზამთარში გარშემო მიაღებდნენ ბევრ ჩალას, რომ არ გაცივებულიყო და არ გატანჯულიყო საფუარში, ზაფხულში კი კოდს გარედან ცივ წყალსაც ასხამდნენ, თუ სიცხე იყო, რომ არ ეწყინა სიცხეს და ლუდი არ დამჟავებულიყო. ამას ყველაფერს ასრულებდნენ ის დასტურნი, რომლებსაც სოფლიდან რიგით შეხვდათ მოვალეობა, ხატისაგან აყვანილი დასტურნი კი მარტო ლეწავდნენ და პურს ინახავდნენ (ფშავში ზოგიერთ ხატში წლობით იყვნენ დასტურები და მათ წლისბერებს ეძახდნენ. ამაზე შემდეგ გვექნება ლაპარაკი). ოთხ-ხუთ დღეს იფუვლებდა ლუდი. მერე მესაფუერე ახდიდა, ჩაიხედავდა და შეატყობდა, როგორ იფუვლა ლუდმა. თუ სიცივისაგან იყო ნაწყენი, ერთ დიდ ხელთქვაბს გაათბობდა, ჩაასხამდა კოდში და დახურავდა თბილად. თუ სიცხისაგან იყო ნაწყენი, მაშინ ცივ წყალს ასხამდნენ გარედან კოდს, ან გადაიტანდნენ სპილენძის ქვაბში, თუ საკმარისად იყო ნაფუარი და მჟავდებოდა. ქვაბში ფულილი შეიჩერდებოდა და ლუდი დამჟავებას გადარჩებოდა.

პირველი დასტურნი იწყებდნენ გიორგობას. აქ ცალკე იყო საბერო, სადაც ხევისბერების გარდა სხვას არ შეეძლო შესვლა. ლუდსაც აქ ცალკე საკოდეში აყენებდნენ ხევისბერები. მეორე იყო დარბაზი. აქ სოფლის ხალხი და მოსული მლოცავიც შედიოდა. პირველ მოსვლაზე დასტურები მოიყვანდნენ თითო საკლავს — უიმისოდ ხატში ვერ შევიდოდნენ. საკლავებს მოიყვანდნენ საღამო ხანზე, ხევისბერი იხუცებდა და დახოცავდა. სისხლს ჩააყენებდნენ პატარა თასში და ხევისბერი იმ სისხლით დანათლავდა დარბაზს, საბეროს და გარეშამოს. ერთ საკლავს სოფელი მოიყვანდა და დაკლავდა, რომელსაც სასოფ-

ლოს ეძახდნენ. საკლავი მორიგეობით მოუდიოდათ. ხევისბრები თითო საკლავს დაკლავდნენ და ინათლავდნენ ხელ-მხარს (ხევისურეთში ეწოდება განათვლა, ფშაურად კი ხელ-მხარის ნათვლა), საკლავის სისხლს იცხებდნენ გულზე და შუბლზე ჭვარის სახედ, აგრეთვე ხელებსაც შეიღებავდნენ. ასე იქნებოდნენ თითქმის ნახევარ დღემდინ, მერე კი სუფთა ადგილას დაიბანდნენ სისხლიან ხელებს და შუბლს. სასოფლო საკლავის ხორცს აქ ჩაჰყრიდნენ და მოხარშავდნენ, ხელ-მხარის სანათლავისა კი შინ მიჰქონდათ. დასტურთ დაკლული საკლავების ნახევარი რჩებოდა ხატში. მას დასტურ-ხევისბრები ჰამდნენ, მანამდინ აქ იყვნენ.

საკლავების დაკვლის შემდეგ ხევისბერი ანთებდა სანთელს და ხსნიდა ლუღს. გახსნის დროს ხევისბერი ლოცავდა დასტურ-ხევისბრებს და სოფელს (ამის მოამბემვერ ჩამაწერინა დალოცვა. ეს სხვა ხატებში იქნება ჩაწერილი, რაც ერთიმეორისაგან უმნიშვნელო რამეებით განსხვავდება). კოდის გახსნას რომ მორჩება, მერე თასს იღებს ხელში და მოკლედ კიდევ დაილოცება: „გაუმარჯოს ნახსენებ-ნადიდებ ზთიშვილებს, გაუმარჯოს სახუთმეტო ძელის ანგელოზს, გიორგი კოშკის ანგელოზს, იყოს მწყალობელი ყმათი, დასტურთი მსახურთი, საყმოთი, ქალთი, ქალიშვილთი, დაგასწვრასთ მრავალს ამ დროს, ამ დღეს, სთველ-გაზაფხულს, ერთ-ურთის სიცოცხლით, კარგად ყოფნით. მე გლოცავთ, ზთისამც პირით დაილოცებით“. დაღევდა ხევისბერი. მერე ამავე სიტყვებს გაიმეორებდნენ სხვებიც და დაღევდნენ ლუღს... აქ ღამისამთელი-ჟამსაწირი არ სცოდნიათ, სამაგიეროდ იცოდნენ ქადა-პური. დასტურები მიიტანდნენ თითო ქადას, ქადაზედ ეწყო სამი პატარა პური, რომელსაც ეძახდნენ კვერს. ქადა იყო ხავაწიანი; ხევისბერი დადებდა ქადას ან სიპზე ან ფიცარზე და დაილოცებოდა: „გაუმარჯოს სახუთმეტო ძელის ანგელოზს, გიორგი კოშკის ანგელოზს, იყოს მწყალობელი ამ სეფეს მომტანისი, ნუ შაანანოს სამსახური, ჯანით მთლით და გულით მზიარულით შეასრულებონოს ანგელოზთ დავალებული სამსახური. დაუტანოს მთელი ბარაქა თავის ნაშრომ-ნაამაგარსა, კარის ნაწნავსა, ფურის ნაწველსა, ნუ შაანანოს და კვლავ უკეთესი გულით მოჰკერძოს მისი ქსენება-დიდება“.

ლოცვას რომ შეასრულებდა, ქადის ერთ მეოთხედს მოსჭირდა და დასტურ-ხევისბრებისთვის გადასდებდა, სამ მეოთხედს კი ქადის პატრონს მისცემდა. ქადის პატრონი შინ გაგზავნიდა, ან დასჭირდა და დაურიგებდა ხალხს. ასეთივე ქადები სოფლელებსაც და შორიდან მოსულ მლოცავებსაც მოჰქონდათ. ისინიც ასეთივე წესით დაიჭრებოდა. მოსულები ქადას თითო ბოთლ არაყს მოაყოლებდნენ და ქადის ჯაჭრის შემდეგ დააღვივებდნენ ხალხს. ქადაზე რომ ვკერები ეწყო,

რჩებოდა ხატის მსახურთ. ისინი უფრო მეტწილს ურიგებდნენ ბავშვებს და, თუ რჩებოდა, თვითონ ჰკამდნენ.

ქადისტვის გამოჭრილი მეოთხედიც ხატის მსახურთა იყო, დაუჭრიდნენ და აჭმევდნენ იქ მყოფ ხალხს. საკლავებს ღვიძლს ამოაცლიდნენ, ცეცხლის ალზე დადებდნენ და ისე შეწვავდნენ; მერე დაუჭრიდნენ ხალხს და ჩამოურიგებდნენ. იტყოდნენ, რომ ალზე შეწული ღვიძლი გემრიელია („ღვიძლივ ალითავ“). მერე მოხარშავდნენ სასოფლო საკლავის ხორცსა და იმასაც ხელზე ჩამოურიგებდნენ ხალხს; დასტურ-ხევისბრები სუფრას დაიდგამდნენ. ხალხი, ე. ი. სოფელი და გარედან მოსული მლოცავი-ისხდა დარბაზში დასტურებთან ერთად, ხევისბრები კი საბეროში. ხევისბრებს ყველას ჰქონდა საბეროში თავისი ადგილი ქვისაგან გაკეთებული სკამი. ჯერ სათავეში იჯდა თავხევისბერი და მერე იმაზე მიყოლებით სხვები. თავხევისბერი იყო ის, რომელსაც ევალებოდა საკლავს დაკვლა, ის იცავდა ყველა სახატო წესრიგს და მის სიტყვას ყველა ემორჩილებოდა ხვან-თესვიდან მოყოლებული დღეობის გათავებამდინ. სასოფლო წესრიგის დაცვაშიც ის იყო მბრძანებელი, სალაშქროდ წასვლაშიც ყველა მისი სიტყვა სოფელში კანონი იყო. დანარჩენ ხევისბრებსაც ებარა თავ-თავისი საქმე — ერთს დროშა, მეორეს კოდ-საფუარი, მესამეს ჯვარის განძი და სხვა. ყველა უძღვებოდა თავის საკუთარ საქმეს და ერთიმეორესაც ეხმარებოდნენ საქმეში. ამათ საბეროში საწოლიც თავ-თავის ადგილზე და რიგზე ჰქონდა მიჩენილი.

„ღიდი ხევისბერი აქ იყო სახელგანთქმული ხახა\*\*. ხახა ყოფილა მეფე ერეკლეს ნაბიჭვარი და იმიტომ სახელგანთქმული კაცი გამოსულა. ყოფილა ერთი ქისტი — სახელად გეზელი. ამ გეზელს ქისტი შემოჰკვდომია და გამოქცეულა ქისტეთიდან. შეზინულა და უცხოვრია სოფელ კაწალხევს. ჰყოლია ძალიან ლამაზი ცოლი. ერთხელ კაწალხევში სტუმრად მისულა მეფე ერეკლე. პური რომ უჭამია, დაუძინია. მხლებლებს კაწალხევლებისათვის უთქვამს: მეფე რომ გაიღვიძებს, დედაკაცს მოიკითხავს და ლამაზი დედაკაცი გყავდესთ მზადაო. გეზელის ცოლი ყველაზე ლამაზი იყო და კაწალხევლებმა იმას უთხრეს: „ტანთ გამაიცვალე, გაიბანე და მეფესთან უნდა მიხვიდეო“. მეფეს უარს ხომ ვერ ეტყოდა, მომზადებულა და მიუყვანიათ მეფესთან. დაორსულებულა და გაჩენილა ხახა. გაზრდილა ძალიან კარგი კაცი. მერე დასდგომია ხატის მიწეზი და გადასულა ხოშარაში, გამხდარა თავხევისბრად. ისე ავად გამხდარა, რომ ლაშარს საკაცით მიუტანიათ, იქ მომრჩალა და დასახლებულა სოფელ ხოშარაში. აქით ის ხევისბრობდა ლაშარის ჯვარში, ღელესა და ხოშარაში-

\*\* ბიჭუას სიტყვა-სიტყვით ნაამბობი.



ერეკლეს სცოდნია, რომ ხახა მისი შვილი იყო და თურმე ძალიან დაახლოვებული ჰყავდა. ერეკლეს ხახასთვის მამულებიც უჩუქებია — ხოშარაში რაც კაი მამული იყო, ღელეს და გომბორში. ხახას იქ თავისი ერთ-ერთი შვილი, სახელად გიორგი, დაუსახლებია და აქ ისაც თავკაცად ყოფილა არჩეული. ხახა ხომ ფშავში პირველი კაცი იყო, ერეკლემ ის დაიახლოვა და საქვეყნო საქმეების გადაწყვეტაში იბარებდა. როცა ომი იმართებოდა და საქართველოს სჭირდებოდა, ერეკლე ხახას შეატყობინებდა. ხახაც ხალხს შეჰყრიდა და მეფესთან ჯარით ჩავიდოდა. ის როცა ფშაველთ ლაშარის ჯვარის ბრძანებას გამოუცხადებდა — საომრად წასვლას ბრძანებდნენ, მეტი არ უნდოდათ, ხალხი მზად იყო და გაჰყვებოდნენ მას. მეფე ერეკლეს მიუცია იმისთვის მამულების ქაღალდები და ფშავში თავკაცობისა. ეს ქაღალდები, როცა ხახა მოკვდა, არ ვიცი როგორ და მისრიათ ბეწინტურას ჩაუვარდა ხელში. ჩვენებმა რომ მოითხოვეს ქაღალდები, ბეწინტურამ დაუშალა იმიტომ, რომ ხახასთვის მიცემულ კარგ მამულებს ღელეს ისინი იყვნენ დაპატრონებული. ბოლოს გამოირკვა, რომ ის ქაღალდები ერთ მღვდელს მისცეს. — ფარნაოზ ზაბახიძეს და არ ვიცი, იმან სად წაიღო. როგორც ვთქვი, ჩვენი ხალხი ორ ადგილზე ცხოვრობდა: ხოშარაში და ღელეს. ღელეს ჯერ სალოცავი არ ყოფილა, მაგრამ როცა ლეწავდნენ, ხარებს რქებზე ცეცხლი უჩნდებოდა თურმე. ბოლოს მკითხავმა უთხრა: აქ თამარ მეფის სალოცავი დაარსდა და უნდა აიყარნეთ, რქებზე ცეცხლი იმის მიზეზი არისო. ბოლოს აიყარნენ და ყველანი ხოშარაში გადასახლდნენ. მამულები დარჩა სანადოდ თამარ მეფის ხატისათვის.

ხახა ისეთი სახელგანთქმული იყო, რომ არხოტამდინ გადავიდა მისი ქება-დიდება. იმ დროს სახელიანი კაცის მოკვლა სასახელო იყო და არხოტივენი თორმეტი კაცი წამოვიდა ალუდი კურდღელაიძის ხელმძღვანელობით ხახას მოსაკლავად. საღმურთობა დღეს მოვიდნენ და ჩაუსაფრდნენ სახატო იფნებთან ხატში. იცოდნენ, რომ ხახა თავხევისბერი იყო და აუცილებლად გამოვიდოდა აქ. უნდა დასხმოდნენ თავს, ხმლებით მოეკლათ და დიდ სახელს წაიღებდნენ არხოტს. მზე რომ ამოვიდა, გამოვიდა ხახა საბეროდან და არხოტივენებს თორმეტსავე კაცს შეაკრა ხელ-ფეხი, ვეღარ გაჩუქუნდნენ. ხახამ ეს ხატისაგან გაიგო და უთხრა ხალხს: აგერ იქ გიორგის პატიმრები არიან, ადით და აქ ჩამორეკეთო. მივიდა ხალხი და ნახეს, თორმეტი ვაჟ-კაცი დაბლუნძვილი ზის — ვერც ნელს აჩუქუნებენ, ვერც ფეხს. ხალხმა მათი იარაღი აიღო და მოუტანეს ხახას. მერე ხახა თვითონ მივიდა მათთან და ჰკითხა მოსვლის მიზეზი. ალუდმა არ დაუშალა და უთხრა: სახელიანი კაცი გამეგონე და სახელის გულისად მინდოდა. შენი მოკვლა და იმით მოვედიო. ხახამ უთხრა: რა დაგიშავე, სახე-

ლის გულისად რომ იქით აქ წამოხველ ჩემს მოსაკლავად, ცოდვა მაინც არ გაშინებდაო? აპატია და სალოცავს სთხოვა მათთვის შენდობა. მერე ყველას გაეხსნა ხელ-ფეხი და ჩამოვიდნენ ხატში, მისცეს ფიცი ძმობაზე და დაპირდნენ: ამა და ამ დღეობაში მოვალთ, ხარს მოვიყვანთ და ძმად გავიფიცნეთ ჩვენ და ხოშარლებიო.

დანიშნულ დღეობაში არხოტიენები მოვიდნენ, მოიყვანეს ერთი ხარი, ლუდი წინასწარ აქ იყო დამზადებული, დაკლეს და დაიფიცეს ძმობაზე. არხოტიენებმა თან მოიტანეს ფიჭვის მასალა; ააშენეს ერთი კოშკი და დახურეს ამ მასალით, რომელიც წელობამდინ იყო. ჩადგეს მაღალი ქვა — „ძმობის სამანაი“ და ჩამოაცვეს ზედ სპილენძის ქვაბი — ესეც წელობამდინ იყო; სამანი კი ისევ არის, ქვაბი დაიკარგა. გადაიხადეს დიდი დღეობა და მას აქეთ არხოტიენების და ხოშარლების ძმობა მომდინარეობს. არხოტიენები ყოველთვის მოდიოდნენ ხოშარას სალოცავად, მოჰყავდათ საკლავები, მოჰქონდათ სასმელი და აქაც დიდის პატივით ხვდებოდა ხალხი. პირველად რომ ძმობაზე დაიფიცეს, მაშინ ხოშარაში ცხოვრობდა ერთი თავმომწონე კაცი, ფოცხვერა მახინცაური. მახინცაურმა აიღო ფანდური და შამღერნა არხოტიენებს:

ფოცხვერას მახინცაურსა გავლა სწადიან გზისაო,  
არხიეს (ახიელს) ჩასვლა სწადიან, ევრება დროშისაო,  
ცოლად წამაყვან სწადიან ქალისა განძისაო.  
გატეხა გაუტეხლისა იმ ბაჯათ ქაეციხისაო,  
გამატანა და წატანა ჭიგრაულაის კმლისაო.

მემრე არხოტიონმა ალუდმა აიღო ფანდური და შამღერნა:

შორით ნუ მექად, ფოცხვერაე, ერთხელ ჩამახყევ მზირსაო.  
შენ წამაიყვან ვერასა, იმედი თოთაისაო,  
მალევედ შემაგეწევა ცირკლოვან წვერის ძირსაო.  
ძმობილისიეულს გესროდეს, ჰეხა გეგონოს ცისაო,  
ალუდ ორ კურღლეულის ძე, არ დაგიფერებ სხვისასა,  
ჩაგისხამ მალულ-მალულსა, არ დაგიჩქამებ ქეიშასა,  
თოფი მაქე ავის პირისა, გინდ ტერლას ხეითხე ნადირთა.

მახინცაური მეტად ამაყი კაცი იყო, იწყინა ალუდისაგან ესეთი მუქარის დათხოვა და უთხრა: შენ ჯერ ის შეგერჩა, რომ ხახაის მოსაკლავად მზირით აქ ჩამოხვედი, ახლა კიდევ მუქარას ითხოვები, ის არ შეინანე. იცოდე, აქით რომ წამოხვალ, მაგას ყველას განანებო. რა თქმა უნდა, არც ალუდი დაუთმობდა. ხახა გაუჯავრდა მახინცაურს: ხართა და ქვაბით მოვიდნენ, ხატსაც პატივი დაგვიდგეს და ხალხსაც გაგვეფიცნენ ძმად, შენ კიდევ რასამ სწარამარაობო, და გაჩუმდა ფოცხვერაც.

არხოტივების შერიგების და მათგან გაკეთებული კოშკის შე-  
შდევ ამ ადგილს დაერქვა „კოშკის კარი“.

ხოშარის ძელის ანგელოზს ახმეტაში ჰქონდა ვენახი. ეს ვენახი  
ყოფილა შეწირული. არ ვიცი, სადაური კაცი იყო, მხოლოდ სა-  
ხელად ბაკუტანა ქვივებულა ვენახის შემწირველს. აქვე ჰყოლია  
მეზურე და ჰქონია მარანი. სხვა დღეობაშიც კი იცოდნენ ცოტ-ცოტა  
ღვინის მოტანა, საღმურთობას კი კულუხი მოდიოდა. წავიდოდა რამ-  
ღვინივე კაცი, აჰკიდებდნენ ცხენებს ღვინოს და მოიტანდნენ ხატ-  
ში, რომელი ქვევრიც საღმურთობის კულუხისათვის იხსნებოდა, მის  
გახსნაში ერთი საკლავი უნდა დაეკლა მეკულუხეს. მეკულუხესთან  
ერთად ერთი ხევისბერი აუცილებლივ იყო. დღე იცოდნენ, როცა მე-  
კულუხე მოვიდოდა და აქაც მოდიოდა მლოცავი. მოუდიოდათ საკ-  
ლავი, საწირი, მოჰქონდათ ღვინო და ქადა-პური. მუკულუხეც თავისი  
ღვინით და პურით უმასპინძლებოდა მლოცავებს და იმართებოდა  
დღეობა. ერთ ღამეს მლოცავიც და მეკულუხეც იქ რჩებოდა, მეორე  
დღესაც საღამოხანამდე იყვნენ და მერე გამოემართებოდა მეკულუ-  
ხე. მლოცავს ზოგს მათთან ერთად ჰქონდა გზა და დანარჩენებიც კარ-  
გა გზას გამოჰყვებოდნენ სასმლით. მეკულუხე ქვევრიდან ნათავარს  
ცალკე რუმბებში ჩაასხამდა ზედაშედ და იმას ხელუხლებლივ მოიტან-  
დნენ ხატში. სახარჯო საგზაო ღვინო ცალკე მოჰქონდათ და ვინც  
კი გზაში ნაცნობი შეხვდებოდათ, ასმევდნენ. ღამით სოფელში და  
სახლში ვერ დადგებოდნენ, შეათვალეარებდნენ ბალახიანს და შე-  
შიან ადგილს, დაანთებდნენ ცეცხლს, შესწვავდნენ მწვადს, ხევის-  
ბერი პურ-ღვინით ადიდებდა ხატს და მერე იმართებოდა სმა. ამ  
ამბით მოვიდოდნენ პირდაპირ ხატში. აქ ზედაშე ღვინო ჩაბარდებოდა  
ხევისბერებს, რომელიც დღეობა დღეს ხატის გადიდების შემდეგ გა-  
მოჰქონდათ ხალხში. აქ დადგამდნენ ერთ დიდ ღვინით საცხე თასს.  
ხევისბერი ანთებდა სანთელს და ამ თასით ხატს ახვეწებდა საყმოთ  
და მლოცავთ, დასტურთ, მსახურთ და კულუხის მომტანთ. მერე  
პირველად თავიხევისბერი ჩავიდოდა საყვენოში, ჩააგდებდა შიგ  
ვერცხლის ფულს და დაღვედა თასის ხელში აუღებლად, მუხლზე  
დამჯდარი. ფული, ვისაც რამდენი შეეძლო, იმდენს ჩააგდებდა,  
მხოლოდ ვერცხლი უნდა ყოფილიყო ორი შაურიდან მოყოლება მა-  
ნეთამდე. მერე ჩადიოდა ხალხი საყვენოში თავისი სურვილით. ერთხელ  
ფულით ჩამსვლელი ერთხელ დაღვედა, რამდენიც შეეძლო. თუ კი-  
დეც უნდოდა დაღვეა, კიდევ ჩააგდებდა ფულს. ერთიმეორის დაპატი-  
ყებაც იცოდნენ საყვენოში. ჩააგდებდნენ ფულს და ვისი დაპატიყებაც  
უნდოდათ, იმას ეტყოდნენ: მიდი, დალიეო. ფული გროვდებოდა თას-  
ში. ღვინო, როცა დანაკლულდებოდა, უმატებდნენ. თასს ხელში არ

იღებდნენ სმის დროს, მისი მხოლოდ გადმოხრა შეიძლებოდა მიწიდან აუღებლად. დაპატიყებული რომ ერთხელ დაღვედა, რამდენიც შეეძლო, დაპატიყებულს, თუ სურდა, რომ უფრო მეტი პატივი ეცა, კიდევ ჩაუმატებდა ფულს და შესთავაზებდა — კიდევ დალიეო; მოიგონებდა ვინმეს — ის დამილოცე, ან ისაო — და ასე რამდენჯერმე იმეორებდა.

დაპატიყებული ასე ილოცებოდა: „გაუმარჯოს თავადს სახუთმეტო გიორგი ძელის ანგელოზს (სახუთმეტო, მთქმელმა არ იცოდა, რატომ ეწოდებოდა), მწყალობელი იყოს ყმათიც და (მაგ. გიორგი ეპატიყება) გიორგი შენის თავისი და შენი ჯალაფობისიცა. მრავალი საღმურთობა მშვიდობისი გალოცვიოს თავის ცოლშვილით, გცეს პატივი ჩემი პატივისცემისათვის“. ბოლოს იტყოდა: „გაუმარჯოს“. ახლა სხვები ეტყოდნენ: „გაუმარჯოს, გაუმარჯოს“ და, ვიდრე არ დაანებებდა სმას თავს, ზოგიერთები სულ „გაუმარჯოს“ ყვიროდნენ. ამნაირად თასში კარგა ბლომად ვერცხლის ფული გროვდებოდა. ბოლოს თასი მიჰქონდა საბეროში ხევისბერს, ვისაც თას-განძი ებარა; ფული ინახებოდა სახატო თანხაში. ამ ფულს იყენებდნენ ხატის საქმისათვის, რაც დასჭირდებოდათ — სალუდე ქვების გაკეთება ან სხვა რაიმე.

აქ ყველა ღლეობა ერთი სახით და წესით იცოდნენ. გარჩევა იყო უფრო საღმურთობაში. ეს ღლეობა მოდიოდა მკათათვეში. ამ დროს კულუხიც მოჰქონდათ და მლოცავიც მეტი მოდიოდა. დანარჩენი ღლეობები არ განირჩეოდა ერთიმეორისაგან. იწყებოდა გიორგობიდან — გიორგობა, ქრისტე, წელწადი, აღება, ახვსება (აღდგომა), ამ აღება, სერობა, საღმურთობა, მარია-ნობა. (ხევსურეთში ღლეობები ერთსა და იმავე დროს იცოდნენ. ზოგიერთი ღლეობები ფშავშიც ასე სრულდებოდა მხოლოდ ზაფხულში ე. ი. თიბათვის ბოლოს და მკათათვეში, საღმურთობა-სერობას მოაყოლებდნენ რიგ-რიგობით, გადადიოდნენ ერთი ხატიდან მეორე ხატში და თითქმის ორ კვირამდინ გრძელდებოდა ხატობები, რაზედაც შემდეგში გვექნება საუბარი).

ზემოთ ლაპარაკი გვექონდა ღლეოდან ხოშარლების აყრაზე და თამარ მეფის სალოცავად გამოჩენის შესახებ. ხოშარლები რომ აიყარნენ, მათი მამულები დარჩა სანადოდ. სანადო მამულებს ხალხი ხნავდა (ფშავურად სანადო, ხევსურულად ხოდაბური), თავთავისთვის ჰქონდათ სრულებად დაყოფილი. ყველა კომლი თავის ხვედრ მამულზე მოყვანილ ძნას იქვე ხატის კალოზე მიიტანდა და დასტურები გაღეწავდნენ. პური ინახებოდა იქვე სახატო ბეღელში, ჩალას დასტურები იყოფდნენ. აქვე იყვნენ ხევისბერებიც და წლის ბერებიც (ე. ი. დასტურები). აქ იყო ექვსი დასტური წლობით; ორი დასტური იყო სოფელ ჭიჩოდან, ორი დასტური სოფელ ახადიდან და ორი დასტური გაბიდოურებიდან, ე. ი. ხოშარიდან.

სახატო სამსახურში ყველანი ეხმარებოდნენ ერთიმეორეს. მათ დღეობები დაყოფილი ჰქონდათ ლუდის სვე-ფორის დასამზადებლად; დანარჩენ შემთხვევაში კი ერთიმეორეს ეხმარებოდნენ. აქ იყო საბერო, დარბაზი, სადასტუროები სამ ადგილას: საზარე, ხატის ბელელო და ხატის კალო. სადასტუროები შორი-შორს იყო, დანარჩენი კი ყველა ახლო-ახლო იყო ერთიმეორესთან. აქ ქალები ისეც ვერ გაივლიდნენ და მრევლი ქალებისაგან ხომ ეს მხარე სულ დაცული იყო. სადასტუროები იყო ცალ-ცალკე: ხოშარლების სადასტურო იყო ხატის ზემოთ, სამხრეთ-დასავლეთისაკენ. კიჩოვლების სადასტურო იყო უფრო მოშორებით, ხატის დასავლეთ მხარეს, კიჩოსაკენ გადასვალ გზაში. ახადლების სადასტურო იყო ახადის ძირას, სახელდობრ ბოჩოხადს. ეს ხატიდან უფრო შორს იყო, ახადისაკენ აღმოსავლეთ მხარეს.

წლის ბერები ცხოვრობდნენ მუდმივად თავ-თავის სადასტუროებში. ისინი ერთი წლის განმავლობაში ვერ მივიდოდნენ ვერც თავიანთ სახლში და ვერც სხვაგან, ვერც ნალახ გზაზე გაივლიდნენ. სასმელ-საჭმელი თავისი ჰქონდათ, პურსაც თვითონ აცხობდნენ; სხვის გამოცხვარ პურს ვერ შეჰკამდნენ, დაფქვევდნენ თვითონ, მხოლოდ იმ დროს წისქვილში მრევლი ქალები არ მიდიოდნენ. წლის ბერებს წვრილმანი საქმე იქვე ჰქონდა, შორს სამუშაოდ არ წავიდოდნენ. მუშაში მიეშველებოდნენ, თუ იქ მრევლი ქალები არ იქნებოდნენ, სანარდო სამუშაოსაც აიღებდნენ — სათიბს, სამკალს და სხვა. ამათ სამყოფელს სადასტუროს ქალები აწმიდებდნენ. მრევლი ქალი ძალიან შორს გაუწირავდა გზას. ისედაც ქალები სადასტუროსთან არ მივიდოდნენ. რითაც ხალხი სვამდა, იმ ყანწით არაყს არ დალევდნენ. საქმის მუშაობაში ოფლს ადვილად არ მოიყვანდნენ და თუ მოუვიდოდათ, ტანს დაიბანდნენ, რადგან ხატს ოფლიანი კაცის სუნი ეჭავებოდა.

ღელეს თამარ მეფეს თავისი საკუთარი ცხვარი ჰყავდა, ხუთას-ექვსასი მუდამ. მწყემსებიც იყვნენ. თავ-ხევისბერი ხელმძღვანელობდა ამ საქმეს. ერთი მთავარი ბინა ხატხევის იყო თამარ მეფისა. (ხატხევი ივრის სათავეშია). აქაც ისევე ლოცულობდნენ, როგორც ღელეს, მაგრამ იქ უფრო მთავარი ბინა იყო, ცხვრის შემოსავალიც იქ ინახებოდა. იქვე იყვნენ ხატის ქალები, რომელთაც ჰყავდათ ძროხები თავისი მწყემსებით. ძროხის შემოსავალიც იქ ინახებოდა. მას ხმარობდნენ ხატის ქალები და ხევისბრები. მთხრობელს უკანასკნელი ხევისბერი და ცხვარ-ძროხის ხელმძღვანელი ახსოვს დარჩია მისრიაშვილი. ახსოვს აგრეთვე უკანასკნელი ხატის ქალებიც. ერთი ქუშხევიდან მოსულა და მეორე შარახევიდან. მათი სახელები არ ახსოვს. ხატის ქალები იყვნენ უქმარშვილო, ხატისგან ძალით მიყვანილნი. პირ-

ველად ხატისქალად გახდომამდინ ქალი დაიწყებდა ავადმყოფობას, ან ქადაგობას და სხვა ასეთებს. ხატი მანამდინ აწვალებდა, სამან ხატისქალად არ შეეწირებოდა. მერე დარჩებოდა მუღმივად იქ. ხატხევს დიდი მამულებიც იყო ხატისა და ამის ნალალურით ცხოვრობდნენ ხატის ქალები; აგრეთვე ცხვარ-ძროხის შემოსავალსაც იყენებდნენ. მატყლი, ყველი და გაყიდული საკლავი ხმარდებოდა ისევ მწყემსებს, მწველავეებს, სხვა მომკვლელებს და თვით ხატის მსახურთ. დღეობებში თავისი ცხვრიდან ხოცავდნენ საკლავებს განსაზღვრული რაოდენობით. ხორცს კი იყენებდნენ აქვე მსახურნი. დღეს წლის ბერებისთვის, ხატხევს ხატის ქალებისთვის და მათ ხელმძღვანელო ხევისბრისთვის სოფლებიდან იცოდნენ პატივისცემა: მოჰქონდა სასმელი, საკმელი და ჩასაცმელ-დასახური; ჩასაცმელ-დასახური მარტო ხატისქალებისათვის.

ხატობა აქაც პირველი დასტურთ შესვლით იწყებოდა და მთავრდებოდა მარიანობას. ხატის ვენახი ახმეტაში თამარ მეფესაც ჰქონდა. კულუხი მოდიოდა სერობას იმ სახით, როგორც აიწერა ხოშარას ძელის ანგელოზში. ოღონდ დასტურ-ხევისბრების წყობაში იყო გარჩევა; ხოშარას წლის ბერები არ იყვნენ, ისე უძღვებოდა ორი კაცი თითო დღეობას. დღეს თამარმეფეში კი ექვსი წლის ბერი იყო და ერთიმეორეს ეხმარებოდნენ. მაგალითად, დღეს წყალი შორსა აქვს და ექვსივე დასტური ანუ წლის ბერები ერთად ზიდავდნენ სალუდე წყალს, ექვსივენი ერთ დღეს ძლივს მოიტანდნენ ლუდის სადღუღებლად საკმარს. დღეს ხატში ქალის მისვლა არ შეიძლებოდა; თუ ქადას არ მიიტანდა, თუნდაც საკლავი და სხვა შესაწირავი რამე ჰქონოდა (ქადაყოველთვის იგულისხმება ხავიწის გულიანი, სხვა რამის გულიანი ქადა აქ არ იცოდნენ).

### გოგოლაურთის მთავარმოწამე \*\*\*

#### დღეობები

მთავარმოწამე არ ყოფილა ნახორცივლარი, ის არის ცით ჩამოსული (ზოგნი ხთიშვილნი ნახორცივლარნი არიან, ჯერ წმინდა ხორციელნი ყოფილან და მერე გადაქცეულან ხთისშვილებად. ხთის ბრძანებით, რაკი ხთის მლოცავნი და თავდადებულნი ყოფილან). პირველად ის ჩამოსულა ცით სვეტად და დაარსებულა გოგოლაურთის:

\*\*\* მიაბზო და ჩამაწერინა ხევისბერმა ლევან ნაღირაშვილმა, აქვე მცხოვრებმა, 69 წლისამ.

სოფელ ხიშმუს პირდაპირ, კადაჩლის ბოლოს, სახელდობრ მასთალას. ის ჩამოსულა ადრევე თამარ მეფემდინ. იმის ჩამოსვლა და დაარსება ჯერ გაუგიათ ხელწმინდა კაცებს (ხევისბრებს, ხთიშვილთან დაახლოებული პირებს), მერე იმათ გამოუცხადებიათ ხალხისთვის. ააშენეს საზარე და დარბაზი. საზარეში დაჰკიდეს ზარი და დაიწყეს ლოცვა, მასთალის მთავარმოწამის სახელით. ძველი ხევისბრები მთავარმოწამეს პირად ელაპარაკებოდნენ და მის ბრძანებას გადმოსცემდნენ ხალხს. რადგან მთავარმოწამე გოგოლაურთის ადგილში დაარსდა, ყმად ხელი დასდო გოგოლაურთის მცხოვრებთ. რა თქმა უნდა, ხეთისშვილთ თავს ვინ გაუხრიდა და დაეყმენნენ გოგოლაურნიც. აქ მამულებიც იყო და სანადოდ გადააქციეს, ხოლოდ ხალხი რომელ მამულებსაც ნადით ხნავდა, ამ მამულებს ნაყვერალები ერქვა. ხევისბერი გამოუცხადებდა მთავარმოწამის ყმათ, რომ ამა და ამ დღეს უნდა მოიხნას მთავარმოწამის ნაყვერალებიო. ხალხი ერთბაშად გავიდოდა და მოხნავდა. თესლი იყო ხატისა, დასთესავდა ის, ვისაც პური და ბელელი ებარა, ეს იყო ერთ-ერთი წლის ბერი, რომელსაც ხატი აირჩევდა. დათესილს თვითონ ხალხივე დაფარავდა, ოლონდ დასტურებს ანუ წლის ბერებს ევალებოდათ მისი პატრონობა მომკამდინ და გალეწვამდინაც. როცა მამულზე ყანა დამწიფდებოდა და სამკალად შემოვიდოდა, მაშინაც ხევისბერი მთავარმოწამის ბრძანებას გამოუცხადებდა ყმათ, რომ ამა და ამ დღეს უნდა მოიმკასო. ხალხი ერთ დღეს გავიდოდა და მომკიდა ყანას. სამკალში ქალებიც გავიდოდნენ, მხოლოდ ბოსლობის შემდეგ ვისაც ხუთი დღე ჰქონდა შესრულებული, ანდა სულ არ ბოსლობდა. ყანას ხალხი ერთობით მომკიდა, ძნას ააგებდნენ და გადასცემდნენ წლის ბერებს. წლის ბერები ძნას უვლიდნენ ჯერ ყანაზე. ძნები წერაად იყო გადაგებული, მერე გადაჰკუთულავდნენ, მერე მიიტანდნენ კალოზე, ააგებდნენ მუხლის ძნებს და როცა მიწა გაიყინებოდა, ვალეწავდნენ. პურს ჩაყრიდნენ ბელელში და ჩალა დასტურებს მიჰქონდათ, ნაწილი ჩალისა კი რჩებოდა ხატში ზამთარში კოდების დასახურავად და ხატის მსახურთა სალოგინედ.

მკის დროს ლუდს ადულებდნენ დასტურები, საკლავებიც დაიხოცებოდა და ხორცი იხარშებოდა. ლუდი მკაში თან მიჰყვებოდა: თან სვამდნენ, თან მკიდნენ, სუფრა კი მკის გათავების შემდეგ იმართებოდა. პური მიჰქონდა ყველას თითო ხშიადი, სანთელსაც მიაყოლებდნენ. პურებს აწყობდნენ ბუსნოზე, ზედ ხორცს გააწილებდნენ, დაანთებდნენ სანთლებს და უფროსი ხევისბერი სუფრას შენდობას ეტყოდა: „გაუმარჯოს ჩვენს სალოცავს თავარმოწამეს და იყოს მწყალობელი ყმათი, ყველა გაჭირვებიდან დაიქსნას თავისნი საყმონი — თავდადებულნი, მათნი ქალ-ქალიშვილნი. ამ სუფრითა და სანთელ-კელაპტრით მოიქსენივნეს ის სულწმინდანი, რომელნიცა იყვნენ

ჩვენს უწინა, ემსახურებოდნენ ჩვენს თავარმოწამესა და ასრულებდნენ ყველა მისგან დაწესებულ სამუშაოსა თავდადებულად და ღლეს აღარ არიან. მაიჯსენიგენს ღმერთმა და თავარმოწამემა ის ცოდვილ-საბრალონიცა, რომელთაც მომკსენე-მომგონებელნი არავინა ჰყავს. მოგონებას მოგველოდებოდნენ და ჩვენ ვერ ვიგონებდეთ. მოიჯსენიოს ამავე სუფრა-სანთელ-კელაპტრით ის პირნიცა, რომელნიცა თავდადებულნი იყვნენ სახატო და სახალხო საქმეზედა და რაიმე შემთხვევით თავი არ დაზოგეს და თავისი სიცოცხლე შესწირეს სახატო და სახალხო საქმესა. თავარმოწამის ყმათა და მლოცავთა მადლი მისცეს და ბარაქა დაუტანოს სულწმიდამაცა და ჩვენმა სალოცავმა თავარმოწამემაცა“.

დალოცვას რომ მოათავებდნენ, დასტური იღებდა იქ დადგმულ ლუდიან თასებს და დაურიგებდა ხალხს. ყველანი შენდობას ეტყოდნენ და დაღევდნენ ლუდს, თანაც პურს იღებდნენ და ილოცებოდნენ: „ღმერთო, გაუმარჯვე ჩვენს ღიდ თავარმოწამესა და, თავარმოწამეო, სწყალობდი ყმათა შენის კარის მლოცავთა“. ჭამის გათავების შემდეგ ასევე ილოცებოდნენ.

როგორც ვთქვით, თავარმოწამე პირველად დაარსდა მასთალასა და აქედან „გამოვდა“ გამოღმა გოგოლაურთაში ხიშმუსს, აქ აირჩია სუფთა და მოედანი ადგილი და დაარსდა იქ. თავარმოწამის ბრძანებით ხალხმა ააშენა დარბაზი, სალუდე, საბერო და საზარე. აქ დაიწყეს ყველა ღლეობა. აქვე დარჩა სანადო მამულები ხატის ორივე მხარეს. ღიდი მამულები იყო და ხალხი აქაც ნადით ხნავდა. ნადით ნახნავს აქაც ნაყვერალეები ეწოდებოდა. აქვე ხატთან იყო ხატის კალო და საპურე ბეღელი. ხალხი აქაც მუშაობდა მოხვნაში და მომკაში. კალოზე დასტურს მიჰქონდა ძნა და ლეწავდა, პური ბეღელში ინახებოდა, ჩალა კი დასტურებს რჩებოდა. საპურე ბეღელში შესვლა დასტურებსაც არ შეეძლოთ: როცა პური უნდა შეეტანათ ბეღელში, დასტურები ხევისბერს ხელმხარს უნათლავდნენ ერთი საკლავით და მას მაშინ შეეძლო ბეღელში შესვლა. დასტურები გაღეწილ, დანიავებულ და გარჩეულ პურს ტომრებით მიუტანდნენ ბეღელში შესულ ფეხშიშველა და ქუდმხდილ ხევისბერს და იქ ის დასცილდა ტომრებს. ამ ხანებში დასტურიც უნდა ყოფილიყო წმიდად. ტანი უნდა დაებანა ყოველდღე. ოჯახშიც უნდა ყოფილიყო ყოველგვარი იმათებური უწმინდურისაგან დაცული და თავდაპირილი. პურს კალოდან ბელისკარმიდან ისიც ფეხშიშველი და უქუდო გაიტანდა, (რომელი საკლავითაც ხევისბერს ხელმხარი უნათლეს, ამ საკლავის ხორცი რჩებოდა აქ, რადგან დასტურები მუდმივად აქ იყვნენ, არსად წასვლა არ შეეძლოთ ერთი წლის განმავლობაში და ყველაფერი სჭირდებოდათ — საკმელიც და სას-



შელიც). თესლის დათესვის დროს, როცა საჭირო იყო სათესლე პურის გამოტანა, ხევისბერს მაშინ კიდევ უნათლავდნენ ხელმხარს დასტურები ერთი საკლავით, ე. ი. წელიწადში ორჯერ უნდა ენათლათ ხელმხარი დასტურებს ხევისბრისათვის სახატო პურთან მუშაობაში. როცა სალუდედ დასჭირდებოდა პურის გამოტანა, მაშინ ხევისბერი თავისთავად იქნებოდა წმინდად. რამდენჯერმე გაიბანებოდა, ფეხშიშველა ფეხს მიწაზე არ დადგამდა, ნამეტნავად იქ, რა გზაზედაც ქალები დაიარებოდნენ. მათი აზრით, ქალი იყო ყველაზე მეტი უწმინდური და სიწმიდის გამაუწმიდურებელი. პურის გამოტანის დროს უკანასკნელად კიდევ დაიბანდა ბელლის კარებთან ფეხებს, ანთებდა სანთელს და ქუდმოხდილი დიდის მოხატრებით შედიოდა პურის ბელელში, თანაც ლოცულობდა და ეხვეწებოდა: მე ხორციელი ვარ და ადამიანის ხორცი უწმინდურია, მე ვერ გავიგებ, რასა გცოდავ, რა უწესობას ჩავდივარ და ისეთი შემოვდივარ შენს წმიდა საპურე ბელელში. ჩემი უცოდრობით ჩადენილი საქმე უწმინდევ და ჩემი დანაშაულის შესადარისად ნუ დამსჯი, რადგან შენ ხთიშვილი ხარ, სულგრძელი და ჩვენ უმეცრებას გვაპატიებო. რასაც ცოდნითა და დაუდევრობით ჩავიდენ კი, დასჯის ღირსი ვიქნებო. ამ ამბით გამოუწყავდა დასტურთ სალუდე პურს, დიდის თხოვნით და მოხატრებით გამოდიოდა უკან პირუტყულმა ე. ი. პირი საპურისკენ უნდა ჰქონოდა. გამოსვლის დროს გაიბერტყებოდა, რომ პურის მარცვლები არ გამოჰყოლოდა და მიწაზე არ დაბნეულიყო. სამისოდ დასტურებიც და ხევისბერებიც ზოგიერთ რამეში საკუთარ პურს დახარჯავდნენ, რომ აენაზღაურა, რაც მარცვალი დაებნეოდა დაუდევრობით ან შემთხვევით.

დასტური დგებოდა ხატის არჩევით. თითქმის ყველას რიგრიგობით ხედებოდა, მაგრამ აუცილებელი იყო ხატის ჩარევაც დასტურის დაყენებაში. ხევისბერს ანდა სხვა მკითხავსაც შეეძლო დასტურის ანუ წლის ბერის არჩევა: ან ავად ვინმე გაუხდებოდა დასტურად დასაყენებ კაცს და მაშინ უბძანებდა თავარმოწამე მკითხავის ან თვით ხევისბრის პირით დასტურად დადგომას და დაპირდებოდა დაზმარებას. დასტურად დასაყენებიც დიდის ამბით შეხვდებოდა ამ ბრძანებას, ანთებდა სანთლებს, ხშირ შემთხვევაში, ვისაც შეეძლო, საკლავსაც დაკლავდა და აღუთქვამდა ხატს მისი სურვილის პირნათლად შესრულებას. თუ შეუგნებლობით რამეს სცოდავდა, სთხოვდა პატიებას.

თავარმოწამეში დასტური პირველად დგებოდა ამალლებას. ამ დღეს ძველი დასტურები გამოილოცავდნენ და ახლები შეილოცავდნენ. შელოცვა და გამოლოცვა ერთნაირი წესით სრულდებოდა. დას-

ტური ირჩეოდა ორი, ერთი წლის ვადით. სადასტუროში შესვლა, გარდა შელოცვილი დასტურისა, არავის შეეძლო. როცა გამოიღო-ცავედა, იმის შემდეგ ველარც ის შედგამდა ფეხს სადასტუროში. შელოცვის წესი ასეთი იყო: საზღუბლეს ორივე დასტური ერთ საკლავს დაკლავდნენ იმიტომ, რომ სადასტუროს ზღუბლს პირველად ლახავდნენ და პირველად შედგამდნენ ფეხს სადასტუროში. საკლავს დაიჭერდა ძველი დასტური. სადასტუროს წინ დადგებოდნენ ახალი დასტურნი, ძველი დასტურები და ხევისბერებიც. ახალი დასტურნი მუხლით დასხდებოდნენ, უფროსი ხევისბერი დაიჭერდა დანას ან ხანჯალს და შეუდგებოდა დიდებთ (დიდების დაწყებაზე ყველანი პირჯვარს იწერდნენ, იღვნენ პირით აღმოსავლეთისაკენ; საკლავიც ასევე ედგათ): „შენამც იდიდები, ღმერთო, ცათა და ხმელეთის გამჩენო, დამაარსებლო და მომწესრიგებლო. შენამც იდიდები, დიდო, დიდად სახსენებლო კვირავ, ხთიშვილთ მოანგარიშევე (ფშავლის მკითხავ-ხევისბერები ამბობდნენ: კვირა ხთიშვილთ მოანგარიშე არის, ის აჯამებს ხთიშვილთ გაკეთებულ ავსა და კარგს და ხთისკარზე წარადგენსო). შენამც იდიდები, თავარმოწამევე, მასთალას სვეტის ანგელოზო (მასთალას სვეტის ანგელოზი ნიშნავს იმას, რომ ის პირველად ციდან სვეტად ჩამოვიდა მასთალას), ხეთანაჲ მოლაიებეო (ხეთანა აქვე მასთალასთან ახლოს, მდებარეობს და თურმე აქ მოისვენა ერთს დროს თავარმოწამემ, წამოწევა, წამოილაიბა (ლაიბი: ლეიბი, ამაზე მერე გვექნება ლაპარაკი), ჯვართანის გორს მოყარაულეო (აქ თავარმოწამე ერთ დროს ყარაულობდა და ამაზედაც მერე იქნება). თქვენამც იდიდებით, ხთიშვილნო, ხთის ნაბადებნო, სუ ერთურთის მოდემომძენო. ძალი, ბრძანება თქვენია, კურთხეულ-სამართალ თქვენია, თორემ კმელზეით, კორციელზეით თქვენს დიდებულს სახელს ვერა გუადრებდით. დიდებულო თავარმოწამეო, დაგვედრებთან ყმანი, საყმონი, დასტურნი, მსახურნი. შენს ვერება-ლაღადებასა სასინანულოდ ნუ გაუჯდი, სასინარულოდ გაუჯადე. თაობით პურს მაუმატე, მაგათ სახლ-ჯალაფობაჩი, წულსა ღონე-ქონესა, კაცსა კაცრივლობასა. შტრისა კელი-კმალ აჰკადე, სიკვდილისა კმა მიაშორე. საცა იძახონ შენი სახელი, შენ ბედის უღურ დააკმარე, შენ კაბის კალთა დააფარე. თუ რამე ეღირებოდეს ცას მედგრითა, მთას ფიფქითა, ჭალას მდინარითა (ცას მედგარი — მეხი, მთას ფიფქი — ზვავი და ჭალა: მდინარე — წყალი, მდინარე). არა თუ თქვენ გამოთხოილნ იასაულნ იყვნენ, თქვენა უფაროდით, უმქავროდით ამ თქვენ ერთგულ მლოცავთა. ბევრი გვავისთ გამტეხი, მუხანათი, თავისავ მუხანათზე მავნეს გადასცოდით, გადააგოდით. ე თქვენსა რწმუნებულსა, ერთგულ მლოცავთა თქვენ წმინდა ჯვარი გადმოსწეროდით. გზასა, მოგზაურსა თვალწალმედ, გულწალმ ჩაპყვოდით, მოლაშქრე-მონადირეს

გაუმარჯოდით, მაგათ სახშით წასულსა. დიდებულო თავარმოწამეო, სნეულს გახვეწებდნთ, — სნეულს ულხინოდით, სნეულობისგან დაიქსნოდით, მოურჩინოდით. გასაზღოს გახვეწებდნ — გაუზარდოდით, წულის წყალობას გეთხოებოდნენ — გამჩენს ღმერთს გამაუთხოვოდით (წულის წყალობა — წულის, ვაჟის გაჩენა — დაბადება). თავად თავის ტკბილის ანგელოზობით დევემაროდი, წულის წყალობა უბოძოდი. წამაუყენებაე მაცხოვარი სადიდებლადა შენდა, სამწყალობნოდა თავისადა, შენდა სამსახური არ დაუყრავ — შენს წყალობას ნუ დააკლებ. დიდება ძალსა და ძლიერებასა შენსა“. ეს დიდება ხდება ნელის ლაპარაკით. შიგ იხატება ხვეწნა-მუდარა გამოთქმაშიც და ხვეისბერის გამომეტყველებაშიც. ლაპარაკობს ნელი, ტკბილის ხმით.

დიდება რომ დამთავრდებოდა, ერთი დასტური საკლავს შემოიგდებდა ნახევრად გულანმა და გვერდზე. ხვეისბერი მარცხნივ იდგა ხანჯლით ხელში, საკლავის თავი მარცხნისაკენ, ე. ი. ხვეისბრისაკენ იყო. წვერით გაუყრიდა ხანჯალს ყელში და შიგნიდან გარეთ გამოსჭრიდა ყელს. მერე გადასწევდა და გადასტეხდა კისერს, კიდეე დაარტყამდა ხანჯალს ვიდრე ხერხემლის ტვინი არ გაიჭრებოდა კისერში. დასტური მიიტანდა საკლავს და სასაკლავე სიპზე დასდებდა. ხვეისბერი იტყოდა: „გწყალობდესთ ახალ დამდეგ დასტურთა, სასიხარულოდ გაგიკადოსთ თავისი წლიური სამსახური, ნურა შეგანანოსთ დალოცვილმა, ბევრს ამ დროს სიხარულოთ შეგასწვრნასთ თავის ცოლ-შვილითა“. ასეთსავე სიტყვებს იმეორებენ სხვა იქ მყოფებიც. დასტურნი პასუხობენ: „თქვენიცამც მწყალობელი არის დიდი თავარმოწამე და თქვენის ცოლ-შვილისი და თავისი საყმითი“. მერე დასტური საკლავს ატყავებს. ამ საკლავის ხორცი რჩება აქ, რადგან დასტურნი აქ რჩებიან ერთ წელიწადს და საკმელი და სასმელი აქვე უნდა ჰქონდესთ ყველაფერი. ნახევარს კი მოხარშავდნენ და იქ მყოფთ დაურიგებდნენ ხელზე წილობებს.

გამოლოცვაც ხდება ამავე წესით. ძველი დასტურნი კლავენ საკლავს და გამოსთქვამენ სინანულს, თუ რამე თავის გაუგებრობით სცოდეს ერთი წლის განმავლობაში. ხვეისბერიც თავის დიდებაში ასევე ამბობდა: „დიდო თავარმოწამეო, შაუნდეე გადამდგომ დასტურთა, რაიცა გცოდეს თავისი უმეცრებითა, ეს მაცხოვარი (ცხვარი) მოუყვანია სასინანულოდა თავისი დანაშაულობათა, შენ სასიხარულოდ გაუკადე და კვლავად უკეთესი გულით მიჰყერძე შენი სამსახური“. ასეთს სიტყვებს ურთავს თავის დიდებაში ხვეისბერი და ბოლოს გამოსჭრის საკლავს ყელს ჩვეულებრივ. გადამდგომ დატურთაც ყველანი ამწყალობნებენ. საკლავი მველ დასტურთ შინ მიაქვთ. აქ რჩება ერთი მხარი და ტყავის სახსარი ერთი აბაზი ფული.

პირველად შემსვლელი დასტურნი თითო საკლავით ხელ-მხარსაც ინათლავდნენ. როცა ძველი დასტურნი გამოდიოდნენ და ახალი დასტურნი შედიოდნენ, მაშინ ორივე დასტურთ ოჯახის წევრები და ნათესაობა მოდიოდა ხატში. ქალები ხატიდან ცოტა შორს დასხდებოდნენ, მამაკაცები კი ხატში მიდიოდნენ. ლუდი იყო დამზადებული ამალღებას ძველ დასტურთაგან. ისინივე იღებდნენ სალუდედან და ურიგებდნენ ხალხს. აქ დღეობა იწყებოდა დილიდან. მომსვლელს ყველას მოჰქონდა ქადაპურა და თითო ბოთლი არაყი. თუნდაც საკლავიც ჰყოლიყო, ქადაპურს მოიტანდნენ. ყმათათვის სავალდებულო იყო ძროხის ნაწველის ნათავრისაგან ამალღებას ქადის გამოცხობა და მიტანა.

მასთალას და ხიშმუს ორგანვე, როგორც ვთქვით, თავარმოწამეს ილოცავდნენ. მასთალას მარტო ორი დღეობა იცოდნენ — ამალღება და მარიანობა. ეს ადგილები არის ერთი არაგვის გაღმა, მეორე გამოღმა, ერთურთის მოპირდაპირედ, მაღლა. ამალღებას არაგვა ძალიან აღიდება იცის და გასვლა მასთალისაკენ ძნელია.

ერთი მედროშავე ხევისბერი იყო ძველად, სახელად ბეწინტური, გვარი ბუღურაშვილი. ამალღება დღე იყო, მასთალისაკენ წავიდა ხატი და მისი მლოცავებიც. ბეწინტური დროშით წინ გაუძღვა. შევიდა აღიდებულ წყალში ცხენით, წყალმა ცხენიც წაიღო და კაციც, დროშა მალევე გამოირიყა უვნებლად, ცხენ-კაცი კი ორივე დაიხრჩო. დახრჩობამდინ სამჭერ ამოჩნდა წყალში ბეწინტური და სამჭერვე ერთი სიტყვა დაიძახა ხალხის გასაგონად: „მარიანობასაო“. ეს იმას ნიშნავდა, რომ დღეობა მარტო მარიანობას ყოფილიყო, რადგან არაგვი ხიდს არ აყენებდა, ამალღების წყალი დიდი იყო და ასეთივე უბედურება გამეორდებოდა. ამის შემდეგ დაწესდა მასთალას მარტო მარიანობას ყოფილიყო დღეობა, რადგან წყალი იკლებდა და გასვლა შეიძლებოდა.

ლუდს დასტურები აღუღებდნენ ჩვეულებრივი წესით. პური იყო სახატო ნაყევრალეზე მოყვანილი, რომელიც ინახებოდა ბელელში, და როგორც ვთქვით, ხევისბრის დახმარებით გაიტანდა დასტური განსაზღვრული რაოდენობით. სოფლის კოდს ხატის ენით — „საცხვარეს“ ეძახოდნენ (კოდში ანუ საცხვარეში ჩადიოდა ქერი ახლანდელი წონით ორფუნთხავეარი, წმიდა პური სამი ფუთი). ეს საცხვარე ზოგ დღეობაში ორი უნდოდა, ზოგში სამი და მეტიც. მაგალითად, ამალღებას ძველი დასტურნი აფორებდნენ სამ საცხვარეს. დღეობა, როგორც ვთქვით, იწყებოდა დილიდან სასოფლო საკლავის დაკვლით. იმართებოდა სიმღერა და თამაშობა. სასოფლო საკლავის ხორცი იხარშებოდა ხატში. დასტური ხელზე ჩამოურიგებდა ყველა იქ მყოფთ წვრილ-წვრილად დაჰკრილ-დანაწილებულ წილობებს. აგრეთვე პატარ-

პატარა ნაჭრებად დაჭრილს, ხალხისავე მოტანილ ხშიადის პურებს. ქაღის მეოთხედებსაც დაჭრიდნენ და ურიგებდნენ ხალხს. კანონით კი ქაღის ერთი მეოთხედი ხატის მსახურთ ეკუთვნოდა, მაგრამ ისინი მაინც ხალხს ურიგებდნენ, თუმცა სავალდებულო არ იყო. ქაღა-პურზე რომ პატარა ხავიწიანი კვერები ეწყო, ესეც ხატის მსახურთ ეკუთვნოდა, მაგრამ ამ კვერებსაც ხატის მსახურნი ხშირ შემთხვევაში ბავშვებს ურიგებდნენ, ან თუ პური საკმარისი არ იყო დასარიგებლად, იმ შემთხვევაში ანაწილებდნენ კვერებს და არიგებდნენ. ხატში სიხარბე არ შეიძლებოდა, დასტურ-ხევისბრებს თუ ხატი თავისთავის მოხარბებას შეამჩნევდა, მიზეზს დაუყენებდა და შემდეგისათვის გააფრთხილებდა. სახატო ქაღა-პურებს ჭკრეთდენ საჭკრეთელით. როცა ქაღა-პურზე ხატს აღიდებდნენ, ასე იტყოდნენ: „შენამც იდიდები, ღმერთო, ცისა და ქვეყნის გამჩენო, შენამც იდიდები, კვირავ ხთიშვილთ მონაგარიშეო, შენამც იდიდები, თავარმოწამეო. სადიდებულო შენი იყოს ეს შემოწირულნი სეფისკვერნი და სამწყალობელო სეფისკვერთ შამამწირველისა (სახელი), მაგის თავისი, ჯალაფობისი, მადლი და ბარაქა დაუტანე ვარის ნაჯნავსა და ძროხის ნაწველსა, თავის მარჯვენის ნაშრომ-ნაამაგარსა“. ამ სიტყვებით გამოჭრიდა ქაღის ერთმეოთხედს და სამიმეოთხედი პატრონს უბრუნებოდა (საჭკრეთელს ჰქონდა დასაჭკრეთ ადგილზე ჯვარი გაკეთებული (ამოჭრილი) და ჯვრები გამოდიოდა ქაღაზე დაჭკრეთილ ადგილზე).

გამოგვჩა, თუ ახალ დასტურთ რა მოჰქონდათ საკლავის გარდა. მათ მოჰქონდათ ჩვეულებრივი ქაღა-პურები, რომლებიც ეწყობოდა სასუფეველზე. სასუფეველი იყო დიდი სიბი ყორეში გამოჭარბებული და ასრულებდა ტაბლის მაგიერობას. ამაზე ეწყობოდა გასადიდები ქაღა-პურები. სანთელი ქაღა-პურზე ზედ არ ენთებოდა. აქვე სხვა ქვა იყო ყორეში გამოჭარბებული სანთლის დასაკრავად და ანთებულ სანთლებს აქ დააკრავდნენ. ამას ეწოდებოდა სასანთლე. დასტურთ მოტანილ ქაღა-პურებსაც გაადიდებდნენ, სანთლებს სასანთლეებზე დააკრავდნენ. აქვე საღვინით იღვა ლუდი და არაყი (თიხის ჭურჭელით). ხევისბერი როცა დაილოცებოდა, ერთი დასტური ჩამოარიგებდა სასუფეველზე. ანთებდნენ ახალ სანთლებს, სასანთლეზე დააკრავდნენ და ხევისბერი შენდობას ეტყოდა სასუფეველზე გაწყობილ სასმელს და იმავე ქაღა-პურებს, რაზედაც ხატი გაადიდეს. შესანდობრის წესი მიცვალებულთათვის ხსენებულ დღეს ასე სრულდებოდა: შენდობას ეტყოდნენ წინა დასტურ ხევისბრებზე, რომელნიც წინათ იყვნენ და დღეს აღარ არიან ამ სიტყვებით: „გაუმარჯოს ჩვენს თავარმოწამეს და მოიგსენივნეს ის პირნი, რომელნიც აქა დასტურ-კევისბრობდნენ უწინა და ახლა აღარ არიან. მოიხსენივნეს ის პირ-

ნიცა, რომელთაც ჰქონდეს დანამადლისი ენითა, კელითა, ქვა-ქასურითა, ხემხვიენითა, შემონაწირნითა. ბეჩავ-საბრალო იყოსა და შენდობას გველოდდეს და ჩვენ ვერა ვგონებდეთ, შეიწყალოს იმათაცა“. ხევისბერი რომ დაილოცებოდა, სხვებიც მოაყოლებდნენ ასეთსავე დალოცვას და დაღევდნენ სასმელს (ქვა-ქასური — ხატში რამის აშენება — კოჭი და სხვა, ხემხვიანი — ხატის პატივსაცემად ხატში რამეს დარგავდნენ; იფნი, მუხა და ან სხვა, გაახარებდნენ). ეს სადასტუროში ხდებოდა, სხვა ხალხი აქ ვერ შევიდოდა. აქ იყვნენ მარტო წლის ბერები და ხევისბრები. დანარჩენი ხალხი ცალკე დღეობობდა. ამის შემდეგ დასდებოდნენ თავ-თავის სკამზე. სკამი მთლიანად იყო ქვისაგან გაკეთებული ყორის პირზე, ორივე მხარეზე. აქ ყველასათვის განკუთვნილი იყო თავ-თავისი ადგილი. ჭერ უფროსი ხევისბრები დასდებოდნენ და მერე წლის ბერები ანუ დასტურნი.

ხევისბრებსაც თავ-თავისი საკუთარი საქმე ებარა. პირველი იყო: თავხევისბერი, ამას ევალებოდა საკლავის დაკვლა და სანთლის ანთება. მეორე ხევისბერი იყო მედროშავე, ამას ევალებოდა დროშის აბმა-აბძანება და სადაც საჭირო იყო, ლაშქარში და სხვა, წინ გაძლოლა, მესამე ხევისბერი იყო; მეთასური; ამას ევალებოდა თასების შენახვა, მოვლა და საჭირო დროს მათი წაღება-მოტანა. მეოთხე იყო ხთიშობლის ხევისბერი. აქვე ახლო ხთიშობელის ხატია ე. ი. სალოცავი და მას საკუთარი ხევისბერი ჰყავდა. ოღონდ ისიც ამ ხევისბრებთან იყო მუღმივად, გარდა იმისა, როცა თავის ხატში წესრიგს ასრულებდა.

დასტურ-ხევისბრების გარდა, აქ შეიძლებოდა შემოყვანა პატივსაცემი კაცებისა, მეზღვნეებისა, რომლებიც დიდი ზღვნით იყვნენ მოსულნი. იმათ შესვლა ეკრძალებოდათ, მაგრამ ხევისბრები რომ თხოვდნენ, ველარ უტეხდნენ ხათრს, დიდის მოკრძალებით, მუხლის ყრით და პირჯვრის წერით შევიდოდნენ სადასტუროში და ბოლოში დასდებოდნენ. როცა ყველანი დარიგდებოდნენ, დასტური აავსებდა კოდიდან ლუდით ჩხუტს, დადგამდა ხალხის წინ (აქ ლუდის ამოღება ებარა დასტურს) და ეტყოდა: „ნუ მაიწყენთ თავარმოწამეს“. ხალხიც შეხვდებოდა პასუხით: „მოგვიხვედ მშვიდობითა, შენს მოსვლას გაუმარჯოს“. მერე კი იმართებოდა ჩვეულებრივი სმა.

ზოგს მეზღვნეს გარდა ერთი ბეჭისა, მოჰქონდა თავისი საკლავის ხორცი, ზოგს კი ისე ჰქონდა შეთქმული, ან მკითხავისაგან ნათქვამი, რომ ხორცს აქ მოხარშავდა, მიცვალებულებისათვის სუფრას დადგამდა და ხალხს სუფრაზე მოიწვევდა. მკითხავი ეტყოდა: ესა და ეს მიცვალებულის სული გთხოვს: დაჯალით ხატში საკლავი და ჩემთვის სუფრა გააგდეთო. ეს იყო ხატისთვისაც პატივისცემა და მიც-

ვალეზულის სულისთვისაც. საკლავი იკვლოდა ხატისათვის, ხორცი მოიხარშებოდა და სუფრა დაილოცებოდა მიცვალებულისათვის.

სუფრისათვის სახლიდან მოტანილი ჰქონდათ, ვისაც რა შეეძლო — ქადა, ხშიადი, ხილი, კაკალი, თნლი, მოხარშული კვერცხები და სხვა. საკლავის ხორცის მოსახარშად ქვაბი ან სახლიდან მოჰქონდათ ან თუ ხატთან ახლო სოფელი იყო, იქ ითხოვდნენ. ჩაყრიდნენ ასო-ასოდ აჭრილ ხორცს და მოხარშავდნენ. გაეფუფუნენ წერილად ფილტვს, თირკმელებს, გულს, ქონს და ღუმას და იმასაც შიგ მოხარშავდნენ ძვლიან ხორცთან ერთად. შესანელებელი რამეც სახლიდან ჰქონდათ მოტანილი, ხახვი, ქინძი ან სხვა ასეთი რამ. შეანელებდნენ წვესაც. ჯამებიც სახლიდან ჰქონდათ მოტანილი, ბაკანიც (გობი). რომ მოიხარშებოდა, ძვლიან ხორცს ჩააწყობდნენ ბაკანში. გაფენდნენ რამეს ბუსნოზე სუფრის მსგავსად. დადგამდნენ წვნიან ქვაბსაც, ბაკნით ხორცს, სალაღებლსაც ბაკნით (სალაღებელი — ხილი და სხვა). მარილსაც დადებდნენ. დადგამდნენ წყალს რამე ჭურჭლით, თავის მოტანილ სასმელსაც; რაც ექნებოდათ: ღვინო, არაყი თუ ლუდი, აავსებდნენ ერთ თასს ან ყანწს სასმელით, მისცემდნენ ხევისბერს, სუფრაზედვე იყო ანთებული სანთლებიც. სუფრის პატრონს ხალხიც ჰყავდა მოპატივებული და უსკამოდ გარშემო შემოუსხდებოდნენ სუფრას. მარტო ხევისბერი ადგებოდა ფეხზე და იტყოდა: „გაუმარჯოს დიდს თავარმოწამეს და დიდს თავარმოწამის დიდებით მოიქსენიენეს ისენი, ვისთვისაც ეს სუფრა იყოს გამეტებული (სახელი). სულწმიდათა შანდობა ჰქონდეს და ამ ქვეყნად მომგონე ნუ დაუღიოს. ნაშრომ-ნაამაგარსაც სულმა წმიდამაც და თავარმოწამემაც მადლი და ბარაქა დაუტანოს. (სახელი სუფრის პატრონისა) გაუმეტებავ ეს სუფრა და სანთელ-კელაპტარი სულის მოსაქსენებლად და თავარმოწამის სადიდებლად და მისი დიდებით მოიქსენიენეს კიდევ ის პირნიცა, თუ ვინმე ცოდვილ-საბრალო იყვეს, შენდობას მოგველოდდეს და ამ სუფრას მოჰბრუნავდეს და ჩვენ ვერ ვგონობდეთ (ვისაც არის სუფრა, ე. ი. ვისთვისაც დაილოცა, იმის სახელს იტყვის) ამის (მაგ. ხთისოს) მასპინძლობითა. თავარმოწამემა იმათ შენდობა მისცესა და იმათ ზედამრჩოთ დღეგძელობა“. ამის შემდეგ დალევდა თავი ხევისბერი და სიტყვის დაბლოებაზე სხვებიც ჩაურთავდნენ: „შეიწყალოს ღმერთმა“.

მერე ხევისბერიც სუფრის სათავეში დაჯდებოდა, მოაყოლებდნენ და ერთი ყანწით ყველა დალევდა შესანდობარს. ხევისბერთან ახლოს დასვამდნენ უფრო პატივსაცემ სტუმარს (ეს ყველაფერი ხდებოდა გარეთ, სადაც ქალებსაც შეეძლოთ მისვლა; სუფრასთან დაჯდომა და შენდობაში მონაწილეობის მიღება) ან ხნიერ კაცს. ხევისბერსა და პატივსაცემ სტუმრებს ხელზე წილობის დარიგებას არ ჰკადრებდნენ,

სუფრას გაუშლიდნენ: პურს, ხორცს, დაასხამდნენ ჯამებზე წვეს და სათითაოდ თუ ვერა, ორთ მაინც ერთ ჯამს დაუდგამდნენ. კოვზები არ იცოდნენ და რიგრიგობით იღებდნენ ჯამს და ხერეპდნენ წვეს. დანარჩენ ხალხსაც სუფრის სახით ჰქონდა გაშლილი რამე. ერთი დაიჭერდა დაჭრილ პურებიან ბაკანს და ყველას თავ-თავის წინ დაუწყობდა თავის წილს. წვრილ-წვრილად დანაწილებულ ხორცსაც დაუწყობდნენ, მარილსაც იქვე დაუყრიდნენ რამეზე. ყველა იღებდა და ჰამდა თავისი წილიდან. ხევისბერს და მის პატივსაცემ ხალხს კი საერთო სუფრა ჰქონდათ (ამ სუფრაზე ყველიც იყო დარიგებული). ფეხზე არავინ არ იდგა. ყველანი ისხდნენ და ისე სვამდნენ და სჭამდნენ. ვინმე ქალი იღებდა სალაღებელს და იმასაც ყველას დაუბრუნებდა. ასე გრძელდებოდა ამ სუფრის წესი, ხორცს და პურს დამრიგებლები იხვალისებდნენ, კიდევ თუ ვინმე შემომემატებოდა სუფრას, იმისათვისაც ჰქონდათ კერძი წილობა. თან მოაყოლებდნენ სასმელს და თამალობდა თავხევისბერი. ამ სუფრაზე შემღერნებდნენ კიდევ ფშაურად, რაც შესანდობარ სუფრას მოუწოდებოდა, მიცვალებულზე ნათქვამ ლექსებს, მაგ.:

თავ დამანებე, სიკვდილო, მამწყინდა მგლოვიარობა,  
ქალისა, რძლისა სიკვდილი, ფარაგთით ცრემლიანობა.

სიკვდილო, სიცოცხლისათვის თავს კი ვერ მოგცემ მუღმადა,  
წავალ და მინდორ მოვკვდები, ბალახნი მეყენენ სუღრადა.  
კაქკაქნი დამიტირებენ, ყორნები მოვლენ მუღმადა.

როცა როლში შევიდოდნენ, თავის პირის ლექსებსაც მიაყოლებდნენ (თავისპირის ლექსები ეწოდება, ერთმანეთს რომ იქვე გააღებდნენ, მაშინვე რომ იგონებენ ლექსებს). ჩემ დროს ორი ხევისბერი იყო — დავითი და ჭრელი, დავითი ქალების მოყვარული კაცი იყო და ასეთ სუფრაზე მათურის მთავარანგელოზის ხევისბერმა ფუნჩიამ შაუმღერა:

შენ ჭრელი მოკალ, დავითო, გეცილება ხელობასა (ჭრელი მეორე ხევისბერი იყო)

სუყველიც შენ დაგრჩება საღმურთობა-სერობასა,  
იმთვენ ქალებ მოგვივალის, სუ გეყოფა შენობასა,  
ეგებ მაშინ მაინც მორჩე მეზობლების ფერობასა.

ამ სუფრაზე დროს ატარებენ, თუ აქვე მეორე ან რამდენიმე სუფრა არ არის გამართული და ანალი სუფრის პატრონმა არ გადაიპატრია ხევისბერი და ხალხი. ახალი სუფრის პატრონი ხევისბერს უფრო სთხოვდა: ახლა ჩემს სუფრაზე მობრძანდი და შენდობა უთხარიო. ხევისბერი რომ აღგებოდა, მადლობას გადაიხდიდა: სულმაც და ხატ-



მაც მადლი და ბარაქა მოგკენ და თავარმოწამე წყალობით იყოს შენ-  
ზეო. ისიც უპასუხებდა: თქვენიცამც მწყალობელია, მადლობელი ვარ,  
რომ ჩემს სუფრაზე მობრძანდით და ჩემი მკვდარიც დაანამუსეთ და-  
ცოცხალიცო. ხალხიც აპყვებოდა ხევისბრის ადგომას და გადავიდოდა  
მეორე სუფრასთან. ასე რამდენიმე სუფრას გამოიცვლიდნენ. იმართე-  
ბოდა მღერა და ცეკვავც. სუფრის პატრონები როცა ბევრი იყვნენ,  
თანხმდებოდნენ ერთიმეორესთან, ვის როდის გაეწყო სუფრა. ხან-  
დახან იმდენი სუფრები იყო, რომ თუ მორიგეობით არ მოამზადებ-  
დნენ, ერთბაშად მომზადებული საჭმელი გაცივდებოდა. სუფრაზე  
შეიძლება ხორცი და საჭმელი შემოკლებოდათ, მაგრამ სასმელი იმ-  
დენი მოჰქონდათ, რომ სახლში კიდევ მიჰყვებოდათ, მიუხედავად  
იმისა, რომ გზაში ვინც შეხვდებოდა, ყველას ასმევდენ საგზაო სას-  
მელს. სირცხვილიც იყო, თუ ხატიდან მომავალს საგზაო არ ედგა ტიკ-  
ში და შემხვედრს ვერაფერს დააღევიებდა. მიჰქონდათ ქადის და მო-  
ხარშული ხორცის წილობები შემხვედრისათვის. სუფრები გრძელდებო-  
და ღამემდინ. ზოგი ხალხი აქ რჩებოდა ღამის გასათევად, ზოგი  
კი წავიდ-წამოვიდოდა სოფლებში. ამალლებას გარეთაც შეიძლებოდა  
ღამის გათევა.

აქ საკოდე ცალკე იყო სადასტუროს შიგნით. მხოლოდ დასტურ-  
ხევისბრებს შეეძლოთ შიგ შესვლა. ლუდის ამოღება ერთ-ერთ დას-  
ტურს ევალებოდა. კოდი იმას ებარა და ის უწყევდა ანგარიშს.

ამალლებას ძველი დასტურები რომ გამოილოცავდნენ და ახლები  
შეილოცავდნენ, სახატო ქონებას ახალ დამდგომ დასტურთ გადა-  
აბარებდნენ. კოდსაც მაშინვე ერთ-ერთი დასტური ჩაიბარებდა. ხე-  
ვისბერის საქმე იყო, თუ რომელს ჩააბარებდა კოდს. ლუდის სა-  
დუღებლად ყველა მოწყობილობა სალუდუში იყო და იმასაც სულ  
დათვლით იბარებდნენ ახალ დამდგომი დასტურნი. თავარმოწამეშო-  
ლათბა ხისა იყო.

ზემოთ დიდებაში ჩართული არის: „თავარმოწამე მასთალას  
სვეტის ანგელოზო, ხეთანას მოლაიბეო, ჯვართანის გორს მოყარაუ-  
ლეო“. ეს სახელები მკითხავ-ხევისბრების ენით შემდგეზე ეწოდებო-  
თავარმოწამეს. აქ ახლაც არის დიდი ნასახლარები მდიდარი კაცის ყარ-  
ტაულასი. ერთ დღეს თავარმოწამის მამულზედაც იყო მუშა და  
ყარტაულსაც ამავე დღეს თავის მამულზე მუშა ჰყავდა. ყარტაულამ  
გორიდან გამოხედა: — ჩემი მუშა უფრო ბევრია თუ თავარმოწამისაო,  
დათვალა კიდევ და მოსულმა თავის მუშათ უთხრა: ჩვენ მეტნი ვართ  
და მომკილიც მეტი გვაქვსო. აბა ხთიშვილთ რა გამოეპარებოდა,  
გაიგო თავარმოწამემ, რომ თავს მე მადრის და თავის მუშას ჩემს  
მუშას. ჩემი სწორობა მოინდომა ხორციელმაო. წამოვიდა და ჯვარ-

თანის გორს ყარაულობდა: ყარტაულა თუ კიდევ გადმოჩნდა, ლახტს დაეკრავ და მოვეკლავო. ამაზედ არის „ჯვართანის გორს მოყარაულე“. აქ რომ ყარტაულა აღარ გადმოჩნდა და ლახტი ვერ დაჰკრა, თავარ-მოწამე ქვევით ჩამოვიდა. აქ ხეები იყო და ჩრდილში „წამოილაიბა“ — წამოწვა, მოისვენა, ამაზე არის: „ხეთანას მოლაიბე“. თავარმოწამემ რომ ვერ დაჰკრა ლახტი, მიუსია და ხორციან ქვაბში გველი ჩაუგდო, საჭმელი მოუწამლა. ყარტაულაც თავისი ოჯახით ამოწყდა და მისი მუშაც სულ დაიხოცა.

თავარმოწამე ხშირ შემთხვევაში თავის ხევისბრებს პირად ელაპარაკებოდა; ლევანი (მთხრობელი) თავის ბავშვობაში შესწრებია ერთ ხევისბერს — კუდოელ ჩოთეშას, რომელიც ხატს პირად ელაპარაკებოდა და მის ბრძანებას ყმათ გადმოსცემდა.

ამაღლების დღეობა რომ დამთავრდებოდა, ყველანი მადლს მოთხოვდნენ, ხალხიც და ძველი დასტურებიცა. ძველი დასტურები, როგორც ვთქვით, გამოსალოც საკლავებსაც დაკლავდნენ და წავიდოდნენ შინ. დარჩებოდნენ მარტო ახალი დასტურნი, ისინი აქ ერთ წელს შინ წაუსვლელად იქნებოდნენ.

#### ს ა ლ მ უ რ თ ო ბ ა

ამაღლების შემდეგ მოდიოდა დღეობა საღმურთობა. ეს იყო მკათათვის პირველებში და მლოცავიც ბევრი მოდიოდა. დღეობა იმართებოდა ისეთივე წესებით, რაც აიწერა ამაღლების დღეობაში. მხოლოდ იყო ცოტა გარჩევა იმაში; რომ აქაური ხატიონნი წავიდოდნენ იქვე ახლო ხთიშობლის ხატზე; დროშით და ფერხისული სიმღერით: მარიანგა ეწოდება ხთიშობლის სალოცავ ადგილს. აქ იყო იფნის და მუხის დიდი ხეები; იდგა ერთი კოშკი. ჰყავდა ერთი საკუთარი ხევისბერი, რომელიც მუდამ იყო თავარმოწამის ხევისბრებთან და დასტურებთან. მარიანგას არ ჰქონდა არც სალუდე, არც საბერო და არც დარბაზი, არც საკუთარი მამული ჰქონდა, არც დასტურები ჰყავდა. ზოგიერთ დღეობებში თავარმოწამის დროშით გადადიოდნენ, მლოცავს მიჰქონდა სასმელ-საჭმელი და ლუდს თავარმოწამის ხატიდან წაიღებდნენ. მეზღვნეები მიდიოდნენ და იმართებოდა ჩვეულებრივი სუფრები.

საღმურთობას უფროსი ხევისბერი დროშას ააბძანებდა, იქ მყოფ ხალხს დაამწყალობნებდა. მოუტანდნენ თასით ლუდს და ერთ ფეხანთებულ სანთელს. ამ დროს ხალხი ქუდმოხდილი იდგა. ხევისბერი ადიდებდა ხატს. მერე სხვა დასტურ-ხევისბრებიც დაამწყალობნებდნენ. დროშით წინ გამორუძღვებოდა ხევისბერი. ხალხი ფერხისას

დაბამდა და ფერხისულის მღერით ყველანი წამოვიდოდნენ მარიან-გისაკენ. ფერხისაში ერთი იძახებდა სიმღერისთავს და მის მხარეზე მყოფი ხალხი ბანს ეტყოდა. ამათი მღერის დროს მათი მოპირდაპირე ჩუმად იყო. პირველი მომღერალი სიმღერას რომ გაათავებდა, ამავე სიტყვებს გაიმეორებდა მოპირდაპირე მხარიდან ერთ-ერთი კაცი და სხვები ბანს ეტყოდნენ და ასეთის მღერით მოვიდოდნენ მარიანგას. ფერხულში მღეროდნენ ისეთ სიმღერებს, უფრო საგმიროს, რომელიც ხატებთან იყო დაკავშირებული:

ვინა თქო, ენამც გახმება, — მითხოს გაბევრდა ცხვარიო,  
გაიგო ლაშარის ჭვარი, წელთ შამაირტყა ჯმლიო,  
შასთვალა მშავლის შვილებსა, მათ შამოვალთ თვალთ,  
წელში გაიგლო მათრავი — შვიდეცი შვიდი მვარიო;  
უჭერეს ფშავლის შვილებმა, ყველამ გალესა ხმალიო,  
ვინც არ გალესა, გადაჰკრა, მაგის ნაცემი მწარეო,  
ქვავიდს ჩაგროვდა ფშავლები, არ ჩასწვდა წვიმის ცვარიო.  
გარა თქვეს თურმანული, ქორ-შეარდენი ჩქარიო,  
შეარდა ციხის წვერზედა; ციხეს მამალა თავიო.  
ცხვარ-ძროხა გამაიტანეს, თან მოაქვ მთა და ბარიო.  
მოზღვეენ ქისტიშვილები, ნარჩენი მეომარნიო.  
აყრიან სეტყვასავითა, ტყვიას არ მააქვ ძალიო.  
ნუ დაიკეხნებთ, ფშავლებო; არ არის თქვენი ზრალიო,  
გვერდს ვიდგათ ლაშარის ჭვარი, გიქრით დავლათის ქარიო.  
გორს იქი-აქათ გადადის ტერელოვლების მკვდარიო,  
თან ჩააყოლეს ძალები, დახარით ქისტის ძვალიო,  
შამოვდა ლაშარის გორსა, ბეერი ხარი და ცხვარიო,  
ბეერ კი მოვედით ცოცხალი, ბეერ იქავ დაგვჩა მკვდარიო,  
დედისერთაის სიკვდილი, ღმერთო, რა დიდი ბრალიო.  
უ მაგის მალექსებელი, აღენჩი თუშის ქალიო,  
სალექსოდ გამომიგზავნეთ, თეთრი ქორაი ჯარიო,  
ან იყენენ საყურ-ბეჭედნი შამიყრიალებს ქარიო,  
არ ვამბობ პირსფერობითა, მენც იქა მყვანდნენ ძმანიო.

ამ სიმღერით გზადაგზა წრედ ხელხელჩაკიდებულნი მიდიოდნენ, მარიანგას რომ მივიდოდნენ, თუ სიმღერა დამთავრებული არ ექნებოდათ, ფერხისა არ დაიშლებოდა, ტრიალებდნენ გარშემო და მღეროდნენ, სიმღერა რომ დამთავრდებოდა, ფერხისაც დაიშლებოდა და ყველანი ხმამალა დაიძახებდნენ: „გაუმარჯოს დიდ ლაშარის ჭვარს, გაუმარჯოს დიდს თავარმოწამეს, გაუმარჯოს!“.

ფერხისა რომ დაიშლებოდა, ყველანი ქულებს მოიხდიდნენ და პირკოშკისაკე მიბრუნდებოდნენ, სადაც თავარმოწამის დროშა უკვე დაბძანებული იყო და ხევისბერიც იქ იდგა პირხალხისაკე, ხალხი მუხლს მოიყრიდა და მოსთხოვდა თავის სალოცავს მადლს: „დიდო თავარმოწამეო და დედაო ღვთიშობელო, რასაც გცოდავთ, გვაპატიე;

ან ენითა, ან გელითა, ან სხვა ქმედებითა. შენნი საყმონი ვართ ხორციელნი, უვიცნი და ჩვენის უვიცობით ბევრს გცოდავთ. შენ დიდი ხარ და შენის ანგელოზობით გვაპატიებ შანაცოდვარსა და გვაღირსებ შენის სახელის კსენება-დიდებასა და შენის კარის ლოცვასა“. მემრე ადგებოდნენ, ხევისბერი დაამწყალობებდა: „დიდება დიდს თავარმოწამესა და ადგილისდედა ხთიშობელსა, წყალობით იყოს თქვენზედა თქვენ შვილთა და ქალ-ქალიშვილთაზედა, მრავალი ეს დღე მშვიდობისა მოგვაროსთ“. „თქვენიცამც მწყალობელია“ — იქნებოდა ხალხის პასუხი.

საკლავის დაკვლის დიდებით ხევისბერი ისეთივე შინაარსით და წესით იტყოდა, როგორც აიწერა თავარმოწამის ხატში. საკლავი რომ დაიკვლებოდა, ახლა ლუდიან თასს მიუტანდნენ და იმაზე დაილოცებოდა ხევისბერი. დაამწყალობებდა ყმათ და საყმით. მერე ჩამოაყოლებდნენ და ყველანი თითო თასით დაილოცებოდნენ და დაღევდნენ ამის შემდეგ დასხდებოდნენ მამაკაცები ხატთან ახლო, ქალები შორს, თავის დანიშნულ ადგილზე, და იმართებოდა სმა. სასოფლო საკლავს დასტურები გაატყავებდნენ, ხორცს მოხარშავდნენ და როგორც ჩვეულება ჰქონდათ, დაურიგებდნენ ყველას ხელზე. ქადაპური ყველას მიჰქონდა, აქაც ყველანი ვალდებულნი იყვნენ ძროხის ნაწველის ნათავარის ქადა გამოეცხით და ადგილის დედაში მოეტანათ. მას მოჰყევნოდა ხშიადი და სამი ხავიწიანი კვერი. ეს ქადაპურიც იმავე წესით იჭრებოდა და ნაწილდებოდა, როგორც აიწერა ხომარაში და თავარმოწამეში. აქვე მოდიოდნენ მეზღვენეები და ზოგი მათგანი, ვისაც ხატისაგან დავალებული ან თვითონ შეთქმული ჰქონდა, მოხარშავდა ხორცს და მართავდა სუფრას. აქვე იმართებოდა მღერა და ცეკვა, იმართებოდა, თავისპირით მღერა (სხვათაშორის, გოგოლაურები სახელგანთქმული არიან სიტყვამოსწრებულობითა და ლექსის თქმით); სრულდებოდა ყველა ის, რაც დაიწერა თავარმოწამეში. დღის ბოლოს ყველა ქუდმოხდილი და ჩოქმოხრილი მოსთხოვდა მადლს და დაბამდენ ისევ ფერხისას. წამოვიდოდნენ ფერხისეულმეში. დღის ბოლოს ყველა ქუდმოხდილი და ჩოქმოხრილი მოსთხოვდა მადლს და იმართებოდა კიდევ დროსტარება ჩვეულებრივი წესით.

## მარია ნობა

მარიანობას დღეობა იწყებოდა ისევ თავარმოწამეში, ყველაფერი იყო ჩვეულებრივი წესით. პირველ წესებს რომ შეასრულებდნენ, მერე ხევისბერი დროშას ააბძანებდა და გაუძღვებოდა ხალხს, გავიდოდნენ არაგვი და ყველანი მივიდოდნენ მასთალას. ხევისბერი დროშას და-

აბძანებდა და დაამწყალობნებდა მლოცავთ და ყმათ მასთალას სვეტის ანგელოზის სახელით. ხალხიც ქუდმოხდილი მადლს სთხოვდა, მერე წაუყენებდნენ საკლავებს და ჩვეულებრივი დიდების თქმით დაკლავდა. აქაც შეასრულებდნენ ყველა იმ წესს, რაც ხოშმუს თავარმოწამეში სრულდებოდა. მეზღვნეები მოდიოდნენ, მაგრამ სუფრის დაგება აქ არ წესობდა, თუ ვისმე სუფრა უნდოდა, ხიშმუს თავარმოწამეში შეასრულებდა ამ წესს. აქ მხოლოდ სასოფლო საკლავის ხორცს მოხარშავდნენ თან წამოღებულ ქვაბში (აქ თას-განძი და ქვაბ-ჭურჭელი არაფერი იყო). დაანაწილებდნენ წილობებად და დაურიგებდნენ ხალხს: დიდსა და პატარას. აქედან ხევისბერი დროშას ააბძანებდა და გამოუძღვებოდა მლოცავს. ვისაც ან ქადა ჰქონდა, ან საკლავი ჰყავდა, ან სხვა რამე შესაწირავი, ისინიც თან გამოჰყვებოდნენ მარიანგას. ვისაც აღარა საქმე ჰქონდა კი, აქედანვე შინ წავიდოდა გარდა თავარმოწამის ყმათა; თავარმოწამის ყმანი, ე. ი. გოგოლაურნი, დროშას თან გამოჰყვებოდნენ და გამოვიდოდნენ მარიანგას. აქ კიდევ იკვლებოდა ერთი საკლავი, ხორცი იხარშებოდა, ჩვეულებრივ რიგდებოდა ყველა იქ მყოფზე და იმართებოდა სმა და ლხინი თამაშობა-სიმღერით. აქ დიდხანს არ რჩებოდნენ და დროშის წინამძღოლობით გადავიდოდნენ ისევ თავარმოწამეში. აქედან დაიშლებოდა ხალხი, დარჩებოდნენ მარტო დასტურნი და ხევისბრები.

## გიორგობა

გიორგობა მოდიოდა გიორგობის თვის ათში. დღეობა იცოდნენ იმავე წესით, მხოლოდ ამ დღეობაში მეტი მლოცავი მოდიოდა და მეტი საკლავი იხოცებოდა. ეს დღეობა გრძელდებოდა ორ დღეს. ღამეს ყველა მლოცავი ხატში ათენებდა. საკლავები იხოცებოდა წინა დღითვე და ღამით ხორცი ჰქონდათ, რიგს ხარშავდნენ და რიგს მწვადად აკეთებდნენ, სასმელი მლოცავებს თავისი ჰქონდათ, ხატიდანაც გამოუტანდნენ ლუდს და ღამეს სულ ლხინში და ღრეობაში ათევდნენ. მეორე დღე გათენდებოდა და იმართებოდა სუფრები. გადადიოდნენ ერთი სუფრიდან მეორე სუფრაზე და ასე გრძელდებოდა საღამომდინ. მეორე დღეს, რომ შემოსალამოვდებოდა, მლოცავი თანდათანობით აშლიდა თავთავის ბინას (ყველას თავისი საკუთარი ბინა ჰქონდა დადებული ბუნსოზე, ზოგს კი — ერთურთის ახლობლებს ერთად ჰქონდათ), დაიწყებოდნენ ხურჩინებში ჩალაგებას და ცხენებს გაამზადებდნენ, ხევისბერიც დროშას ააბძანებდა და მიაბძანებდა თავის სამკვიდროში. ხალხი პირხატისაკენ ქუდმოხდილი იდგა და იწერდნენ პირჯვარს, ყველა თავისთვის ნელის ხმით ლოცულობდა და ეხვეწებო-

და თავარმოწამეს: თუ რამე შეცოდა უმეცრებით, ხატმა ეს აპატიო<sup>ნ</sup> და წასულს თავისი წყალობა გააყოლოს. ხევისბერი საბოლოოდ წამსვლელთ დაამწყალობნებდა: დიდი თავარმოწამე წყალობით იყოს. თქვენზე, რასაც თქვენი გული გამოელოდება, ის წყალობა გიბოძოთ და მოწალმართე ანგელოზი დაგაყოლოსთ მგზავრობაშიც და სახლშიცო. ისინიც დიდის მოხატრებით და პირგვრისწერით პასუხობდნენ: თქვენიცამც მწყალობელია დიდი თავარმოწამეო. ასე მთავრდებოდა გიორგობა.

## შოზა ანუ ჰრისტა

შობასაც განსხვავება არ ჰქონდა გიორგობის წესებისაგან; დასტურნი ხომ მუდამ აქ იყვნენ და ხევისბრებიც შობა დღეს დილიდანვე თავარმოწამეში მოვიდოდნენ. მეთასური მოიტანდა ვერცხლის და სპილენძის თასებს, გარეცხდა და დაალაგებდა მათთვის განკუთვნილ ადგილებში, მედროშე ხევისბერი გაამზადებდა დროშას, დასტურთ ლუდი წინასწარ ჰქონდათ გამზადებული ისე, როგორც აიწერა ლუდის დამზადების წესი ხოშარას ძელის ანგელოზში. კოდ-საფუარი თავის წესზე ჰქონდათ დალაგებულ-დასუფთავებული, სანთელ-კელაპტარი ჩამოქნილი (ფშავლების უმრავლესობამ იცოდა ჩამოუქნელი სანთელის შეწირვა ხატში, დართულ ბამბას ზედ გადაახვევდნენ, რომ სანთლის ჩამოქნის დროს ჰკმავებოდა და თვით ხატის მსახურნი ჩამოქნიდნენ სანთელს, როცა როგორი სანთელიც სჭირდებოდათ — კელაპტარი თუ წვრილი) ეწყო განკუთვნილ ადგილზე. თავისებური სიწმიდეც დაცული იყო ტანის დაბანით. თუ სათანადო მიზეზი დაუდგებოდათ, სიწმიდეში რამე შეცდომას დაუშვებდნენ, რაც ხატის წესით ეკრძალებოდათ, რიგს გარეშე ხელმხარსაც ინათლავდნენ გასაწმენდად და თავისი ცოდვის სასინანულოდ. ეს რომ ყველაფერი მომზადებული და თავის რიგზე იყო, ხევისბერი და დასტურნი ახდიდნენ კოდს (ჰიჰი ხევსურულად, ჩამი ფშაურად — ფუილში რომ ლუდი ჰაფს მოიდგამს), მოაშორებდნენ ჩამს, ამოიღებდნენ ვერცხლის თასით ლუდს და კოდთან დადგამდნენ. გადაახვევდნენ სამ ფეხ სანთელს ერთიმეორეზე და დააკრავდნენ კოდზე. ერთ ფეხ სანთელს დააკრავდნენ ლუდიან ვერცხლის თასზე და ხევისბერი ადიდებდა თავარმოწამეს: „დიდება შენდა, დიდო თავარმოწამეო, მასთალას სვეტად ჩამოსულო (ხან იტყოდნენ: მასთალას სვეტის ანგელოზო). ხეთანას მოლაიბეო, ჰვართანას გორის მოყარაულეო“ და გააგრძელებდა შემდეგ დიდებას. დიდება რომ დამთავრდებოდა, ლუდს პირველად თავხევისბერი გასინჯავდა, მერე ყველა. ამის შემდეგ იწყებოდა დღეობა იმავე წესით, როგორც აიწერა აქ. მხოლოდ დღეიდან ხევისბრებიც აქ რჩებოდნენ წელწდის მეორე დღემდინ (კუ-

მეტამდინ). დასტურ-ხევისბრები ყველანი ცხოვრობდნენ სადასტუროში, ანთებდნენ გაუქრობლად ცეცხლს. შობიდან წელწდის მეორე დღემდე ყოველ დღეს ორი კაცი მოდიოდა რიგრიგობით სოფლიდან. ე. ი. გოგოლაურთ რიგით მოუდიოდათ დღეში ორი კაცის მისვლა დასტურ-ხევისბრებთან. თითოს მიჰქონდა ოთხი ხელადა არაყი სახლიდან, ხინკალი და სამწვადე ხორცი, ან სხვა რამე კარგად გაკეთებული საქმელი და მთელი დღელამის განმავლობაში სმაში და ჭამაში ატარებდნენ დროს. მეორე დღეს სანამ სხვა ორნი არ მოვიდოდნენ, პირველნი აქედან არ წავიდოდნენ.

ასე გრძელდებოდა წელწდის კვირას. წელწადამეს აქ გაათევდნენ. ზოგიერთ ადგილებში მეკვლენი და სოფლის კაცებიც ხატში რომ ათევდნენ ღამეს, აქ ესეთი წესი არ იყო.

გოგოლაურთას აქვს მეორე სალოცავიც წმიდა გიორგი. იქ ცალკე დასტურ-ხევისბრები არიან და დღეობებსაც ცალკე აწესრიგებენ. აქაური დღეობები და იქაური არ განსხვავდებოდნენ ერთიმეორისაგან.

#### წ ე ლ წ ა ღ ი

ახალწელ დილას, მანამ თავის ხატში რამე წესს შეასრულებდნენ, თავარმოწამის ხევისბერი ააბძანებდა დროშას, გაუძღვებოდა აქაურ დასტურ-ხევისბრებს და წმიდა გიორგის ხატში მიუკვლევდნენ, კვალს მიუტანდნენ. ამათი დროშის ზარის ხმას იქ რომ გაიგონებდნენ, ისინიც მზად იყვნენ და დროშით გამოეგებებოდნენ წინ. შეხვდებოდნენ დანიშნულ ადგილას, სადაც პატარა დამოედნება არის იმ გვერდალ გორზე. ერთიმეორეს შეესალმებოდნენ, გადაკონიდნენ ერთი-მეორეს და მიულოცავდნენ ახალ წელს. პირველად თავარმოწამის ხევისბერი დაიწყებოდა. მილოცვას: „შემოვდგით ფეხი, გწყალობდეთ ღმერთი, ფეკი ჩვენი, კვალი ანგელოზისი, დიდი გიმატებიათ, დიდი გიმატოსთ ახლის წლის გამოცვლამა, მიგაგებოსთ მრავალსა წულითა, სინარულითა, ერთურთის კარგად ყოფნითა“. ასეთივე სიტყვებით ყველანი ულოცავდნენ ერთიმეორეს. ახალი წლის გამოცვლისათვის უსურვებდნენ ბედნიერი და ბარაქიანი წლის დადგომას.

ეს რომ მოთავდებოდა, ცალკე-ცალკე გაირჩეოდნენ და ერთურთის პირდაპირ მწკრივზე დადგებოდნენ. პირველად ხევისბრები გამოითხოვდნენ საჭიდაოდ ერთიმეორეს და მერე ყველა თითოობით გამოითხოვდა ფალავანს. წაქცეული ნებდებოდა ვითომც ტყვედ და გამარჯვებულს მიჰყავდა თავის ჭგუფში. აქ ორივე მხარეს სასმელი თავთავისი ჰქონდათ და ტყვეს უმასპინძლებოდნენ, სცემდნენ პატივს, მერე ანთავისუფლებდნენ და უბრუნდებოდნენ ისევ თავის ჭგუფს. ეს გრძელდებოდა ჯერ ხევისბრებში, მერე წლის ბერბში. ამ ხნის გან-

მავლობაში სოფლის ხალხიც აქ იყრიდა თავს და მათ შორისაც იმართებოდა ასეთი ქიდილი, ბოლოს, როცა ეს ამბავი მოთავდებოდა, წმიდა გიორგის ხევისბერი დროშით გაუძღვებოდა კოშკისაკენ, სადაც დროშის საბძანი იყო. მასვე გაჰყვებოდა თავარმოწამის ხევისბერიც და კოშკზე მიაბძანებდნენ დროშებს. ამის შემდეგ მიიპატიჟებდნენ წმიდა გიორგის დასტურ-მსახურნიც პირველად თავარმოწამის დასტურ-მსახურთ და მერე ყველა ხალხს. დაიკვლებოდა ორი საკლავი, ერთი წმიდა გიორგის, მეორე თავარმოწამის სახელზე. გაატყავებდნენ და მოხარშავდნენ თავ-თავის დასტურნი და დაურჩებდნენ ხალხს წვრილად დანაწილებულ ხორცს. პური — ხალხის მოტანილი ხმიადები იყო წვრილ-წვრილად დაჭრილი. ხევისბრებს ცალკე ჰქონდათ სუფრა, სპილენძისაგან გაკეთებული სამფეხა მრგვალი მაგიდა, რომელიც ხატებში ბევრგან იყო (მას ხალხი სწირავდა). სასმელი სოფლიდანაც ჰქონდათ მოტანილი და დასტურ-ხევისბერსაც ამ დღი-სათვის განსაკუთრებით ჰქონდათ კარგი და ბევრი ლუდი დამზადებული. მას ადუღებდნენ ცალკე, განსაკუთრებით. ჩაადუღებდნენ სხვა ჩვეულებრივ ლუღზე მეტად. ტკბილი ძალიან. განშირებოდა, რომ გასწურავდნენ, დააყრიდნენ სვეს, რამდენიც ფქვილი იყო ჩაყრილი, იმდენს. თუ სვის იმედი არ იყო, რომ კარგად გასჭირდა, მაშინ მეტ-საც დააყრიდნენ. ჩვეულებრივ ლუღს ჰიგვიან ხელს ჩაადუღებდნენ, ამ განსაკუთრებული ლუღის სისწვენს კი ერთ გაშლილ ხელს ჩაადუღებდნენ (ჰიგვიანი ხელი: ხუთივე თითი ერთმანეთზე მიწყობილი, ხელის ზიგანე). საფუარშიც განსაკუთრებულ ყურადღებას აქცევდნენ, რომ კარგი ლუდი გამოსულიყო. აი, ასეთი ლუდით გაუმასპინძლებოდნენ სტუმრებს და იმართებოდა მთელი დღე მხიარულება სიმღერა-თამაშობით. უფრო ხშირი იყო ფშაური სიმღერა და ისაც თავის პირისა. ე. ი. მილექსება. ერთი შაუმღერნებდა მეორეს, ახალად გამოიგონებდა, ლექსს და მეორეც მოასწრებდა და ლექსითვე უპასუხებდა, რაზედაც ხალხი სიცილით იხოცებოდა. აი, მაგალითად, სიძე-ცოლისძმის გალექსება ასეთი წესით ხდებოდა:

- შინ წასვლა ხო არ გწადიან, თვედორევ, რასა სწუხნები,
- მწადიან, წავალ კიდევ, თუ იორს გადაურჩები.
- დაგემ დაგლოოს, მე დამრჩეს შენის მამულის ყუბჩები,
- ჩემს მამულს ვერ მოუვლიან, კოფავ, შენფერებ ქურდები.
- დაგპარავ ქამარ-ხანჯართა, თუ ჩემს ღმერთს გადაუდგები,
- წავალ, პრისტეთან გიჩივლებ, ციშბირს არ გადაურჩები.
- ისევაც გამომიშვებენ, ძმობილები მყვან რუსები.

ძალიან გავრცელებული იყო და ჯერაც არის ფშავეში ასე მოსწრებელი სიტყვებით გალექსება ერთიმეორისა, თითქმის მეტ წილ



დროს ასეთ ფეშაურ მღერაში და ლექსობაში ატარებდნენ. ხანდახან სამი-ოთხი კაცი გადაეკიდებოდა ერთიმეორეს სალექსოდ. ფეშაველბმა ჩხუბი არ იცოდნენ და თუ სიმთვრალის დროს იშვიათად ჩხუბი მოხდებოდა, მათრახები ჰქონდათ და იმით იჩხუბებდნენ. ერთიმეორის წახმარება ადვილად იცოდნენ, უფრო თავისები თავისებს გაუჯავრდებოდნენ ჩხუბის დროს. შერიგებაც მაშინვე თავისთავად იცოდნენ. ასეთი დროსგატარებით აღამებდნენ ახალწელს. საღამოხანზე თავარმოწამის ხევისბერი ააბძინებდა და დააწკრიალებდა დროშის ზარს, ააბძინებდა თავის წმიდა გიორგის დროშას აქაური ხევისბერიც და კარგა ხანს ხელზე აქანავებდნენ და აწკარუნებდნენ ზარებს. ხალხი ამ დროს ქუდმოხდილი პირდროშისაკენ იდგა, პირჯვარს იწერდა და ევედრებოდა ორივე სალოცავს, რომ ბევრი წელწადი მოსვლოდათ მშვიდობისა, თავის სალოცავების დახმარებით. მერე ორივე ხევისბერს მიუტანდნენ ლუდით სავსე ვერცხლის თასებს. ორივე ხევისბერი აღიდებდა თავის სალოცავს, თავარმოწამის ხევისბრები — თავარმოწამეს, წმიდა გიორგის ხევისბრები — წმიდა გიორგის. იმათი სახელით დალოცავდნენ ხალხს და უსურვებდნენ მრავალი ახალი წლისათვის ბედნიერად დასწრებას. ხალხიც მადლობას უხდიდა. ხევისბრები გამოცლიდნენ ამ თასებს და დაიძახებდნენ: „ასე დაგეცალოსთ მტერი და ორგულიო!“ დასტურები თასებს ჩამოართმევდნენ და დააღვეინებდნენ ერთის დასტურნი მეორეთ და მეორესი იმდთ. ბოლოს ხალხს ურიგებდნენ ლუდს, გამოემშვიდობებოდნენ ერთიმეორეს და თავარმოწამის დროშას წამოაბძინებდნენ, წმიდა გიორგის დროშით გამოჰყვებოდა მისი ხევისბერი და გამოაცილებდა კარგა მანძილზე, განსაზღვრულ ადგილამდე, მანამ თვალით არ დაჩნდებოდა თავარმოწამის კოშკი და საზარე. მერე ხევისბრები ერთიმეორეს აკოცებდნენ, წმიდა გიორგის დროშით მისი ხევისბერი უკან დაბრუნდებოდა, თავარმოწამის ხევისბრები კი გზას განაგრძობდნენ თავის სალოცავისაკენ. ორივე დროშას და ხევისბერს თან ახლდნენ დასტურნი და ხალხიც თან გაყვებოდა, თუ ვისმე შეთქმული ჰქონდა წელწად-დილას ზღვნობა ან სხვა რამე შესაწირავი. ოღონდ ასეთი შემთხვევა ხშირი არ იყო, რადგან ამ დღეს არავის ეცალა საზღვნოდ. ყველა პატივობდა ერთიმეორეს და იყო სიმთვრალე. როცა მოვიდოდნენ თავარმოწამეში, ხევისბერი დროშას დააბძინებდა კოშკზე და დაამწყალობებდა დასტურთ, მსანურთ და ყმათ. იქ მყოფნი ყველანი ქუდმოხდილნი პირჯვარს იწერდნენ და პასუხობდნენ: „თქვენიცამც მწყალობელია“. კაცი სოფლიდან მორიგეობით აქაც მოდიოდა და მოჰქონდათ თავიანთი ოჯახებიდან სასმელ-საჭმელი. ეს გრძელდებოდა კუმეტამდინ. აქ მოსული კაცები თავის სუფრას მოამზადებდნენ, ხატის მსახურთაც თავისი ჰქონდათ სასმელიც და საჭმელიც,

წმიდა გიორგის ხატიდანაც გაატანდნენ საგზაოდ თავარმოწამის მსახურთ იმ საგანგებოდ დამზადებულ ლუდს და დაიწყებოდა ქეიფი.

ხალხი რომ წავიდ-წამოვიდოდა, ახლა სახლებში იწყებოდა მეკვლეობა, კვალის შეტანა. ყველა დაუძახებდა მეზობელს, მამაკაცს, თუნდა ბავშვიც ყოფილიყო და შეატანინებდა კვალს, მანამდე სხვა ვერავინ შევიდოდა ოჯახში, ვერც დაუძახებდნენ. კარებს დაუკაკუნებდნენ, თუ ლაქმე რამე ექნებოდათ და კარებიდან მოშორებით დადგებოდნენ. თუ კვალი შეტანილი ჰქონდათ, სახლში შეიპატოებდნენ, თუ არა, გარედანვე გაისტუმრებდნენ. კვალის შეტანა დაცლილი ჰქონდათ: თუ რომელიმე კვალის შემტანისაგან კვალი კარგად დაუქდათ და ის წელი კარგად გაიარეს, მაშინ იმავე მეკვლეს შეატანინებდნენ კვალს. თუ წარსული წელი ცუდად დაუქდათ, მაშინ შეიძლებოდა მეკვლის გამოცვლა. ზოგს „კარგი კვალი ქონდა“, ის თუ კვალს შეუტანდა, იმ წელს კაცითაც კარგად იქნებოდნენ და საქონითაც. ყველა ეშურებოდა კარგი კვალის მეკვლეს. თითქმის სოფელში ყველამ იცოდა, ვინ იყო კარგი კვალისა და ვინ ცუდისა.

ყველა ოჯახს ქონდა გამომცხვარი „გოგა“ (ხევესურულად სამეკვლაო). გოგა დაკრელებული იყო ერთ გვერდზე; მეკვლე რომ მოვიდოდა, დაიწყებდა მილოცვას: „შემოვდგი ფეკი, გწყალობდეთ ღმერთი, ფეკი ჩემი, კვალი ანგელოზისი (ზოგი ამბობდა: კვალი ჩემი, კვალი ანგელოზისი), დიდი გიმატეხით, დიდი გიმატოსთ ახლის წლის გამოცვლამ, მრავალს დაგასწროთ შობა-ახალწელსა“. დამხვედრებიც პასუხობენ ასეთსავე მილოცვით და თან გოგას მიაგებებენ (ხევესურეთში სამეკვლაოს შემოაგორებს ხატში ღამეგანათენები მეკვლე, ამავე ოჯახის ერთერთი წევრი, რომელიც დილით მოდის ხატიდან. მეზობლისაგან კვალის შეტანა იქაც იციან, მხოლოდ სამეკვლეს გოგორების შემდეგ. ფშავში კი პირდაპირ მეზობელი მეკვლე აგორებს გოგას). მეკვლე გოგას სამჯერ გამოაგორებდა კარებიდან ქაზდარში (იატაკი) და სამჯერვე მიუტანდა ერთ-ერთი ოჯახის წევრი. ყურადღება ექცეოდა, წაღმა შემობრუნდებოდა გოგა თუ უკულმა (ხევესურეთში კი რომელ გვერდზე დაიდებოდა), წაღმა შემობრუნვა იყო მარჯვნიდან მარცხნივ, ეს იყო მომავალი წლისათვის კარგი ნიშანი. თუ მარცხნიდან მარჯვნივ შემობრუნდებოდა, ეს მოასწავებდა დამდგომ წელში რაღაცა უბედურებას. ოჯახის ქალები ხშირად ამბობდნენ: „ეჭ წელს. ჩვენი გოგა უკულმა შემობრუნდა და რა კარგი დაგვემართებოდაო“.

ერთხელ შემობრუნვა უკულმა ნიშნავდა პატარა რამე ცუდს, ორჯელ და სამჯერ უფრო ცუდს. ვისი გოგაც წაღმა შემობრუნდებოდა, ის ოჯახი კი დაიმედებული იყო, რომ მათი ცუდიც კარგად შეიცვლებოდა დამდგომ წელს. მეკვლე რომ გოგას შემოაგორებდა,

გადმოდგამდა ფეხს ზღურბლზე და კიდევ გაიმეორებდა მილოცვას. მასპინძლები ყველანი ფეხზე ადგომით მიეგებებოდნენ და ისინიც ულოცავდნენ ახალი წლის გამოცვლას. მერე დასხდებოდნენ და ოჯახში თუ კი რამე კარგი სასმელ-საჭმელი იქნებოდა, გაუმასპინძლებოდნენ მეკვლეს. ერთიმეორეში არეული თაფლ-ერბო აუცილებელი იყო მეკვლის პატივისაცემად. თაფლი ოჯახში ყველას არ ჰქონდა. მაგრამ აუცილებლივ უნდა სადმე ეშოვნათ. რადაც არ უნდა დამჭდარიყო და ერთი ჩარეკი მაინც ჰქონოდათ ახალწლისათვის მეკვლის მისალოცად და პატივისაცემად. არაყი ამ დღეს ყველას ჰქონდა, უფრო კარგი არაყს მეკვლისათვის ინახავდნენ. მეკვლეს პატარა ჯამით თაფლ-ერბოს სახლშიაც გაატანდნენ.

მეკვლე ყველას უნდა მიეყვანა წელწად-დღეს (ხევსურეთში ზოგს მეორე-მესამე დღემდინ რჩებოდა მეკვლის მიყვანა). მეკვლეობა რომ მოთავდებოდა, ყველა პატიყობდა ერთიმეორეს, ულოცავდნენ ახალწელს და იმართებოდა ლხინი. ხშირად მღეროდნენ ფშაურად ერთსადიმავე სიმღერას.

ჩიტი შემოჭდა ღობეზე, იძახდა იშრიშობასა.

ბევრსამც აემდროს ილოცავთ წელწადსა, ქრისტიშობასა.

როცა სოფელში მოსწყინდებოდათ ერთიმეორესთან მისვლა-მოსვლა და მილოცვები, ქალი და კაცი ყველა ხატისაკენ წავიდოდა, ყველას მიჰქონდა ხინჯალი, კეცეული, არაყი, ხილი და სხვა რამე სასმელ-საჭმელი. ხატიონთათვის. ქალები მივიდოდნენ ხატის ცოტა მრშორებით, მიჰქონდათ ქადები, თხილი, კაკალი, არაყი და აქ იმართებოდა ლხინი, ხატიდანაც გამოუტანდნენ ლუდს და ამ დღეს აღამებდნენ სმაში და მხიარულებაში.

ახვსეზა (ალღოვა)

წელწადის შემდეგ პირველი დღეობა თავარმოწამეში მოდიოდა ახვსება. ახვსებას განსაკუთრებული არაფერი იყო, მიმდინარეობდა ყველა იმ წესით, რაც აქ სხვა ჩვეულებრივი დღეობებში აიწერა, დასტურთათვის ეს უკანასკნელი დღეობა იყო, როგორც ითქვა, ამალღებას გამოილოცავდნენ ძველნი და შეილოცავდნენ ახალნი დასტურნი.

სხვა დასხვა ცნობები ამ ხატის ირგვლივ

თავარმოწამე იყო ძალიან მაღლიანი. ერთი კუდოელი კაცი ყოფილა, ძალიან რწმუნებული თავხევისბერი (კუდო, გოგოლაურთიდან დაშორებულია ოცდახუთი კილომეტრით, ცხოვრობენ მამა-პაპით აქ გადმოსახლებული გოგოლაურები). წელწადში თოვლი მოსულა და ამ ხევისბერს წამოსვლა დაზარებია თავის სალოცავ თავარმოწამეში. წელწადლამეს ჯალაფნი დიდხანს მსხდარან, ხევისბერიც გვიან დაწო-

ლილა. ტანთ გაუხდია და წინდა-ახალუხიანი წოლილა. ერთი კი დასძინებია და გაუქადაგებია თავარმოწამეს. წამოვარდნილა და გამოქცეულა ქადაგობით გოგოლაურთისკე წინდიანი და ახალუხიანი, უქულო. წინდები დაგლეჯილა და ფეხშიშველა დამრჩალა იმ თოვლში და სიცივეში. თავარმოწამის სადასტუროში ყოფილან ადგილობრივი დასტურ-ხევისბერები. თურმე თენება არის და მოესმათ ქადაგობა, ცოტახანიც და ხევისბერი მოვარდა ოფლიანი; მიეგებნენ აქაურებიც და თურმე მოითხოვა სანთლები, გავიდა ისევ ფეხშიშველი და კოშკთან დაბრძანებულ დროშასთან დაანთო ჩოქით, თავის ხრით და მადლის თხოვით. მერე შემოვიდა დამშვიდებული და დაჯდა სადასტუროში. არც ხელები ჰქონდა მოყინული და არც ფეხებზე. მერე მოყვა თავის ამბავს, როგორ დაიზარა წამოსვლა და როგორ წამოაგდო და გამოაქცია თავის სალოცავმა შუალამისას. გაიგვეს მისმა ბიძაშვილებმა, რომლებიც აქვე გოგოლაურთაში ცხოვრობდნენ, მოუტანეს ჩასაცემელ-დასახური და ლოგინი. ერთი საკლავიც სამანანულო (რომ შეინანა შეცოდება) მოიყვანეს და დაკლეს.

თავარმოწამე იყო ლაშქარში დამხმარე. მისი დროშით გაუძღვებოდა ხევისბერი სალაშქროდ. წასულ ხალხს და ხშირად ბრუნდებოდნენ გამარჯვებულნი. იმ დროს ფშავლები ქისტებსაც ლაშქრავდნენ და ხევსურებსაც. მთხრობელის პაპა ნადირა (ახლა ესენი ეწერებიან ნადირაშვილებად) გასძლოლია ლაშქარს თავარმოწამის დროშით მითხოში ლაშარის ჯვარის დროშასთან ერთად და გამარჯვება მოუპოვებია ლაშარის ჯვარი მოძმე არის თავარმოწამისა და ლაშარში მოუყვანია ას სამოცი ხარი მითხოდან წამოყვანილი.

ერთხელ ხევისბერი გარა თურმანული წასულა თავარმოწამის დროშით და ლაშქრით პირიქით ხევსურეთს შატლში და დაუმარცხებია ისინი:

გარამა თურმანულმა ფშავის ქვე მთარაო,  
შაყარა მძიმე ლაშქარი, მათურა შაიარაო,  
წითელ-ყვითელი დროშაით ბოროლა ვადიარაო,  
ქისტან ატირდა ბებერი — ლაშქრით საღ მიხვალ, გარაო?  
— შატლს მივდივარ, ბებერო, ვარდანამ დამიბარაო,  
მე-ღ იმან უნდა ვიომოთ, უნდა იქეხოს ცამაო.  
გვერდ უნდა გადაიქციოს ვარდანის ციხის ქვეშაო,  
პირ ცრემლით უნდა იზანოს შუქომ — ვარდანის დამაო,  
უნდა დაქვრდენ მასკვლავნი, აღარ იწვიმოს ცამაო,  
უნდა ქუიონდენ გოზანი ვარდანის ციხესთანაო.  
უნდა ტყვრებოდენ ისარნი ციხის წევრ ჩარდახთანაო.  
გათენებისად მიადგეს ვარდანის ციხის კარსაო,  
კარზე გამოდი, ვარდანო, ნუ მაიმთვრალებ თავსაო,  
თას თუ გეჭიროს კელჩია, გადააწვადე სხვასაო,

ფანდურ თუ კელჩი გვეიროს, ძმას მიეც მგელიასაო.  
— გამუალ, მგელიაის მზემ, გამოვიყოლებ ფარსაო,  
ვია თქვენს ვარდანს, მშავლებო, ვერ გადმავასწევრ ქაქსაო,  
თორ ქვიშათ ჩაგიწითებლით, გაზიდვიებლით მკედარსაო.

ამ ბრძოლაში გარას წინამძღოლობით მოუკლავთ სახელგანთქ-  
მული ვარდანი და გამარჯვებული დაბრუნებულა გარა ნადავლით თა-  
ვარმოწამეში. ვერცხლის ნადავლს ხატს სწირავდენ, ხოლო ნადავლი  
ცხვარ-ძროხა და სხვა რამე, ხალხზე იყოფოდა. ხევისბერს საწინამ-  
ძღვროს აძლევდნენ მეტად ერთ ხარს.

## მ ა მ უ ლ ე ბ ი

გადასული ხალხის მამულები სახატოდ რჩებოდა. ხშირი იყო სოფ-  
ლიდან სოფელში გადასახლება, მაგალითად გოგოლაურთიდან მალა-  
როსკარში სახლდებოდნენ, რადგან ორივე ადგილი გოგოლაურებს  
ეკუთვნოდათ და ორგანვე გოგოლაურთის ხატის ყმები ცხოვრობდნენ.  
იქაც გადადიოდა ხალხი, იორზედაც, ერწოსა და კახეთშიაც. გადა-  
სული მეკომურები ხშირ შემთხვევაში ხატს სწირავდნენ მამულს.  
აილებდნენ თავის მამულიდან მიწას, მიიტანდნენ ხატში, გადაყრიდნენ  
და იტყოდნენ: „დალოცვილო თავარმოწამეო, შენდ შამომიწირიან ჩემი  
კუთვნილი მიწა-თიჯანი, შენ შაიწირე, დაზღვე კელი, მე წყალობა  
გამამაყოლე. გზაშიაც მიშველე, მგზავრობაშიაც, ველთაც და შინაც.  
დამიკსენი ყველა გაქირვებიდან ჩემის საქონ-ჯალაფობით“. მერე ეს  
მიწა რჩებოდა სახატედ. აქ მომიზეზებით და ავადმყოფობით მამულე-  
ბის შეწირვა არ იცოდნენ.

ხატს, როგორც ზემოთ თავში ვთქვით, ორივე მხარეს — აღმო-  
სავლეთით და დასავლეთით — ჰქონდა ნაყევრალები. ერთ წელიწადს  
ერთ მხარეს ხნავდნენ ნადით, მეორე წელს მეორე მხარეს. ერთ წელს  
ერთი რჩებოდა ყამირებად, მეორე წელს მეორე. ყამირებს დასტუ-  
რები თიბდნენ. აქვე იყო სხვა სათიბეებიც და იმასაც დასტურები  
თიბდნენ. ამ ნაყევრალების დამუშავების წესი ზემოთ აიწერა. იყო  
მეორე რიგის მამულები, რომელსაც ხალხი საღალედ ხნავდა. განა-  
წილება ამ მამულებისა არ შეიძლებოდა; ვისაც უნდოდა, ის მოხნავ-  
და და როცა გაღეწავდა, სახატოდ მართო ხუთ ლიტრა ქერს ჩაყ-  
რიდა კარგად გარჩეულს. თუნდ ბევრი ჰქონოდა მოხნული, თუნდა ცო-  
ტა, მანც ხუთი ლიტრა იყო გადაწყვეტილი ჩასაყრელად. დანარჩენი  
დამმუშავებელს რჩებოდა. მხოლოდ ხატის მამულზე წმიდა ხალხი  
მუშაობდა. მრევლი იქ ვერ გაივლიდა. სახატო მამული გაფანტული  
არ იყო, უფრო ერთიმეორეზე მიჰყვებოდა, რადგან გაფანტულ მა-  
მულებს მრევლი ვერ გაიგებდა, ზედ გაივლიდა და ხატის წესრიგი  
წმიდად არ იქნებოდა დაცული. ერთ ადგილზე კი ყველამ იცოდა და

მრევლი შორიდანვე ერიდებოდა. ამიტომ არ იყო მირეული ხატის პური და მამული.

## ხ ე ვ ი ს ბ რ ო ბ ა

ხევისბრობა მემკვიდრეობით არ იყო. ხევისბრად მიმსვლელს ხატი პატარაობიდანვე ამიზეზებდა — ხან ავად ხდებოდა, ან გააქადაგებდა და ხატივე ავალებდა სიწმიდეს. უმკითხავებდნენ მკითხავები, ძველი ხევისბრები. ზოგი მათგანი გაჯიუტდებოდა და არ მივიდოდა ხევისბრად. მერე გახდებოდა ავად და მეტი გზა აღარ ექნებოდა, უნდა გაეგონა მკითხავ-ხევისბრებისათვის და მისუღიყო ხატში. პირველად მიმსვლელ ხევისბერს, თუ ხუთით არა, სამი საკლავით მაინც უნდა ენათლა ხელ-მხარი, რომ ღირსი გამხდარიყო ხევისბრობისა.

ზევით გამოგვჩჩა: ხატის პური, გარდა ლუღისა, არაფერზე იხარჯებოდა. ქადა-პურები დასტურის ხარჯი იყო, ფქვილიც და ხავიწიც. სახატო პურებს გამოაცხობდნენ არამრევლი ღედაკაცები; ბოსლობის შემდეგ თუ სიწმიდის მეხუთე დღე არ ექნებოდათ, ისე ვერ გამოაცხობდნენ.

თავარმოწამეს ვენახიც ჰქონდა კახეთში, სოფელ ზოდაშენში. ეს ვენახი მაშინ იყო შემოწირული, როცა თუშ-ფშაველ-ხევსურებმა თათრები გარეკეს ბახტრიონიდან და კახეთიდან. მაშინ თუშ-ფშავ-ხევსურთათვის უთქვამს მეფეს: რა გინდათ, რომ მოგვეთ საჩუქრადაო. თუშებს მოუთხოვიათ ალვანი და მეფესაც მიუცია. ფშავ-ხევსურებს კი უთქვამთ: ჩვენ მთის ხალხი ვართ და ბარის სიცხეს ვერ ავიტანთ, ამ ომის მოსაგონებლად და თქვენ სადღეგრძელოდ მოგვეცით ვენახები, დავამუშავებინებთ, ღვინოს დავაყენებთ და ყველა თავ-თავის ხატში წავიღებთ კულუხსო. ხატსაც ვადიდებთ იმის ზედაშით, ჩვენც წელიწადში ერთხელ მაინც დავლევთ კახურ ღვინოს და თან მოვიხსენიებთ ამ ბრძოლაში დახოცილ პირებსაო. ხელმწიფესაც ყველა ფშავ-ხევსურეთის დიდი ხატებისათვის შეუწირავს მამულები კახეთში, აქედან ათენგენას, საღმურთობას და სერობას (სამივე დღეობა მკათათვეშია სხვადასხვა რიცხვებში და ადგილებში. ამ დღეობაში ბევრი მლოცავი მოდის). კულუხზე იგზავნება რამდენიმე კაცი, როგორც აიწერა ხომარის ძელის ანგელოზში, მოაქვთ ღვინო და დაიდგმება საყეენო. ერთ-ერთ დღეობაში მორთავდნენ ერთ კაცს, აუვსებდნენ, დიდ თასს ღვინით, არაყით ან ლუღით და ხელში მისცემდნენ. ყეენი დადიოდა კარი-კარ, მას სხვა ხალხიც თან დაჰყვებოდა. გზადაგზა ხალხი საყეენოდან ჭვამდა სასმელს და ან თეთრ ფულს ჩაყრიდნენ საყეენოში, ან სხვა რამეს აჩუქებდნენ. ამ ხალხს ბევრი

რამე შეუგროვდებოდა, გადასცვლიდნენ ყველაფერს სასმელ-საჭმელზე და მერე ამითი ქეიფობაში ატარებდნენ დროს.

ხატებში დასდგამდნენ კახეთიდან მოტანილ ღვინით სავსე დიდ თასს საყუენოს და ჩადიოდა ფულს ხალხი (ეს აწერილია ხოშარის ძელის ანგელოზში). ეს ფული რჩებოდა ხატის სასარგებლოდ. რაც ღვინო დარჩებოდა კახეთში მარანში, იქაც დადიოდა მლოცავი ზღვნით. ზოგს მლოცავთან ხარჯავდნენ, ზოგს ფულად აქცევდნენ და მეორე წელს ისევ ვენახში დამხმარე მუშებს აძლევდნენ. ზოგს კიდევ იქ რომელი კაციც ცხოვრობდა ყარაულის სახით, ის იყენებდა სარჩოდ და ჩასაცმელ-დასახურის საყიდლად. სწორედ ასეთი თასი, რომელსაც საყუენოდ ხმარობდნენ, იყო ყარტაულას ჩაჩქანი რკინისა, რომელსაც ხმარობდნენ თავარმოწამეში საყუენო თასად. თავარმოწამემ რომ მდიდარი ყარტაულა ამოსწყვიტა თავისი მუშებითა და ხიზან-ჯალაფობით (აღწერილია ზემოთ), მაშინ იმის ქონებას თვითონ დაპატრონდა და ის ჩაჩქანი მაშინდელია.

თავარმოწამე იყო ძალიან მრისხანე ხტიშვილი; თუ თავის ყმათ რამე უწესობას შეამჩნევდა, ან ხელით, ან ენით, ან უფრო მირეულობით (უფრო მეტად მოითხოვდა სიწმიდეს), არ აპატიებდა და ამოსწყვეტდა. ჯერ ერთხელ ამოსწყვიტა თავისი ყმანი უწმინდურობაზე და წმიდა გიორგიმ მისცა თავის ყმათ ნაწილი. მეორედ იმათაც ვერ შეასრულეს მისი სიწმიდის წესები და ამოსწყვიტა სულ. მესამედ წმიდა გიორგიმ უთხრა: თავის ყმანი ხომ გაათავენ და ჩემთ ყმათაც ათავებ, ერთხელ კიდევ მოგცემ ყმათ და გაფრთხილდი, აღარ ამოსწყვიტო, თორემ მეტს აღარ მოგცემ და შენც უყმოდ რისილა ბატონი იქნებიო. თავარმოწამემ თურმე უთხრა: შენ შეგიძლიან მოითმინო და რა ვქნა, მე არ მიწესობს მირეულობა და ვერ მოვითმენო. ამის შემდეგ ჩემთ ყმათ არც სულ გავსწყვეტ და არც სულ გავათავებ, იმის პირობას მოგცემო. ამ პირობით ჰყვანდნენ თავარმოწამეს მესამედ მიცემული ყმანი. მართლაც, არც სულ თავდებოდნენ და მათი გამრავლება ხომ წესი არ იყო. თავარმოწამის ყმანი თვითონაც სულ იმას დაიჩვილებდნენ: ჩვენ ჩვენი სალოცავი არ გავვიშვებ, რომ გავმრავლდეთ, სულ ერთ მამაზე მოვდივართ. თითქმის არავის ახსოვდა, რომ სამი ძმა ყოფილიყო თავარმოწამის ყმათა ოჯახში. თუ იქნებოდა, აუცილებლივ დაზარალდებოდნენ და ისევ ერთზე ჩამოვიდოდა შთამომავლობა.

### გ ა დ მ ო ც ე მ ა ზ ა რ ი ს ზ ა ლ ა ზ ე

ზარისქალა არის გოგოლაურთის სოფლის ბოლოში, ქალაში, პატარა ადგილი, მოწყვეტილია სხვა სოფელს და არის ერთი ან ორი

კომლის საცხოვრისი. ზარისკალის მაღლა, ჩრდილოეთის მხარეზე, იყო მთავარი საბრძანებელი თავარმოწამისა, მასთალიდან სადაც გამობრძანდა და დაარსდა. აქ იყო საბეროც, სადასტუროც, სალუდეც. აქვე იყო დიდი საზარე, სადაც ეკიდა ძალიან კარგი ზარი.

გოგოლაურების ადგილს საზღვრავს შუაფხოვლების ადგილისაგან ამ ორი სოფლის შუა მდებარე ნაროულას ხევი. გოგოლაურებსა და შუაფხოვლებს ბევრჯერ ჰქონიათ დავა ამ საზღვრის გადაწევა-გადმოწევაზე. დავაში თურმე მონაწილეობას იღებდნენ ორივე სოფლის სალოცავეები: შუაფხოს სალოცავი იახსარი და გოგოლაურთის თავარმოწამე. თავარმოწამე თავის ყმათ ამცირებდა, როგორც ვთქვით, უწმიდურობის გამო, იახსარი კი ამრავლებდა, ცოდვებს აპატიებდა და სასიკვდილოდ ადვილად არ გაიმეტებდა. თუ ვინმე რამეს სცოდავდა, მოამიზეზებდა, საკლავ-ზღვნითა, სანთლითა და ჭურუმით გადაახდევინებდა, ცოდვას აპატიებდა და მოარჩენდა შენანების შემდეგ. ამ ნიადაგზე ქისტაურები (შუაფხოვლებს ქისტაურებს. ეძახიან, რადგან ამბობენ: მაგათი წინაპარი ქისტი ყოფილა, ცხორეგოველი, იქიდან კაცის მოკვლაზე გამოხიზნული) გამრავლებულან და ადგილი აღარ ჰყოფნიდით. იახსარიც ხელს უწყობდა და თვითონაც ძალით მოინდომეს საზღვრის გადატანა. ერთ გაზაფხულზე ქისტაურები შეიყარნენ, მთელი დიდი გვარი წავიდა და სამანი ძალმომრეობით ხიშმუს ხეებზე ჩადგეს (ხიშმუს ხევი გოგოლაურთ ცალცალკე მეკომურებს ორად ჰყოფდა), ისე რომ, საზღვარი გადაიტანეს. ნაპირიდან გოგოლაურთის შუა ადგილში. მირეკეს ხარ-გუთანი და თავარმოწამის სანადო მიწებს დაუწყეს ხვნა, ვითომ იახსარის სანადოდ უნდა გადაექციათ. სიწმიდის დარი იყო. რომ წამოსადილდა, კიბულიდან წამოვიდა პატარა შავი ღრუბელი (კიბული არის გოგოლაურთის თავს ძალიან მაღალი მთა), უცბად გაიბერა ეს ღრუბელი და ისეთი სეტყვა გამოუშვა, რომ ქისტაურების ხარ-გუთანი და კაცი სულ ჭალას მიაბარა ნიაღვარმა. თავარმოწამის საზარეც თავის ზარით ჭალას ჩამოიტანა, ზარიც გატყდა ცოტათი. მერე მკითხავეების პირით ჰქონდათ ლაპარაკი იახსარსა და თავარმოწამეს. იახსარი ეუბნებოდა: გაუშვენ ჩემნი ყმანი, შენ ადგილი ბევრი გიჭირავს და ყმანი ცოტანი გყვანანო. თავარმოწამე ეუბნებოდა: გავუშვებ, მხოლოდ მე უნდა დამეყმნენო. იახსარმა უთხრა: მე ჩემნი ყმანი დასალევეად არ მინდინა, შენ თავის ყმანი გაათავენ და ახლა გინდა ჩემ ყმათ მიჰყო ხელიო. ვერ შეთანხმდნენ და მიჯნა კი ისევ ძველ ადგილზე გადმოიტანეს. არ გაუშვნა თავარმოწამემ, აღარც ზარი მიიღო უკან. მერე მასთალას იტანეს და ახლაც იქ არის. მას შემდეგ ამ ჭალას დაერქვა ზარისკალა დღემდინ ეს სახელი ჰქვინ.



გადმოცემები, დღეობები

მიამბეს პატარაობიდანვე ხევისბრებმა იახსარში ბიჭურ ბადრიაშვილმა, 60 წლისამ, და ქრელ ჯიხვიაშვილმა, 67 წლისამ. მათ ახსოვთ. გადმოცემა. თავისი ძველი ხევისბრებიდან, როცა ისინი ხატში მოდიოდნენ და რამდენიმე დღით ცხოვრობდნენ საბეროში, მაშინ ისინი ასწავლიდნენ თავისი წინაპრების გადმოცემებს და ავალდებულებდნენ ესწავლათ შთაგან, მერე კი გადაეცათ მომავალი ხევისბრებისათვის და ახალგაზრდობისათვის.

იახსარი პირველად ყოფილა ხორციელი „წმიდა ბერი“, ხეთის მლოცავი და ხეთიდან მიცემული დიდი ძალის მქონე. ხეთიდანვე ჰქონდა მოცემული ძალა, ებრძოდა დევებს და ანადგურებდა. იმ დროს დევკერპნი ზეპირად გამოსულნი ყოფილან, ხოცავდნენ და სჭამდნენ ხალხს; მათის შიშით ადამიანები ვეღარსად მიდიოდნენ. ამიტომ მორიგე ღმერთმა იახსარსა და კოპალას — ერთუტის მოძმეთ, ორივე წმიდა ბერს მოულოცა ძალა და შეძლება დევებთან ბრძოლისა და მათი განადგურებისა. (კოპალაზე მერე გვექნება საუბარი). იახსარს ნინახში ჰქონდა პატარა სამლოცველო და საბერო. მისი სამლოცველოს ნანგრევი ახლაც არის კლდის თავზე. ახლანდელი ეკლესიას მსგავსად კარები აქვს. შემოსასვლელი დასავლეთიდან აღმოსავლეთისაკენ. აქვე გვერდზე ჰქონია თავისი საცხოვრებელი პატარა საბერო. ეს ადგილი მაშინაც და ახლაც დაბურულია მუხის ხეებით. აქვე საბეროს წინ იახსარს ჰქონდა საყუჩი. — საყარაულო. ერთ ძირზე ოთხიმუხა იყო ამოსული, რომელიც ახლაც არის და ქორბუდიან მუხათ ეძახიან. აქედან ყარაულობდა იახსარი ერთ დიდსა და მდიდარ დევს გამხვეურას. გამხვეურა ამ დევს იმიტომ ერქვა, რომ ის გახვიებულ იყო ცოლშვილითაც და ცხოვრებითაც (გახვიებულნი: გამრავლებული, გამდიდრებული). ეს დევი ცხოვრობდა იახსარის საცხოვრებელიდან დასავლეთ მხარეს. იმ ადგილს შემდეგ დაერქვა გამხვეურთკარი — დევის სახელწოდებიდან. გამხვეურთკარის პირდაპირ, არაგვს ვაღმა, სამხრეთისაკენ იყო კიდევ ერთი სოფელი დევებისა (ახლა აქ შუაფხოველები მოსახლეობენ და ეწოდება თხილიანა). სოფელ შუაფხოში კახალნი ცხოვრობდა, ქისტაურები: შუაფხოდან ნახევარი კილომეტრის დაშორებით დასავლეთ მხარეს იახსარის ბინა იყო და აქედან ამდენივე მანძილით დაშორებით გამხვეურასი. გამხვეურას და იმის პირდაპირ მოსახლე დევებს ფაცერი ჰქონდათ გაბმული. ფშავის არაგვის ჭალაზე გამვლელ ხალხს იქერდნენ და სჭამდნენ. როგორც ვთქვით, გამხვე-

ჟრა იყო დიდი დევი (არ იციან, რამდენ თავიანი), დედა ჰყავდა ცხრათავიანი და ცხრა შვილი ჰყოლია, სულ ვაჟაკები:

ცხრათავა დედა ჰყოლიო, ცხრათი გამზრდელი შვილისა, სალუდე ქვაბი თავს ედგა, საზარელ იყო სინისა.

ეს დევები აქ რომ გამრავლდნენ, მოინდომეს ავისგორს დასახლება (ავისგორი: სადაც ახლა იახსარის ნიშია და იახსარს ლოცულობდა ხალხი, მაშინდელი იახსარის საცხოვრებელი ადგილი ნინახთისა და შუაფხოს საშუალო ადგილზე), წამოვიდნენ და აქ დაუწყეს სახლს შენება. გაიგო იახსარმა. აქვე ერთი ხევია — ხატისხევა, ამ ხევიდან მიეპარა და ბოლოზე აღმოჩნდა. დევების უფროსმა ძმამ თქვა: რა კაი სადილი მოდისო. უმცროსმა ძმამ უთხრა: სადილი კი არა, ეგ იახსარი არ იყოს, რომ ეგრე თამამად მოდისო. შეშინდნენ დევები და აირივნენ კიდევცა. იახსარი იმ დროს მივიდა, რომ კარისთავს დებდნენ ცხრანი დევნი და ვერ ერეოდნენ, იახსარს დასცინეს: „მოდი, მშობილო, გვიშველე კარისთავის შადებაო“ (კარისთავად შესადები დიდი ქვა იყო). იახსარმა გადიკვართა კალთები, მოავლო ხელი ქვას და მარტომ შეაგდო. შეშინდნენ დევები და გაიქცნენ, იახსარმა კარისთავიც იმათ ესროლა და გამხვეურთკარს სახლი დაუხვრია. ჯერ არ იყო ბრძანება მათი მთლიანად განადგურებისა, რადგან იორზედაც უნდა ამოეწყვიტათ, ამავე დროს კოპალას უნდა ამოეწყვიტა ისინი ციხეთგორს. კოპალას და იახსარს პირობა ჰქონდათ შეკრული: იახსარს იორზე ხაშარს უნდა გაეწყვიტა დევები. აქ სახელგანთქმული დევები ყოფილან მუზა და ბელელა. მუზა ყოფილა დევების მეფე, ხოლო ბელელა ლამაზი დევის ქალი. ხაშარს ბელელას სკამი ჰქონია ქვისა, მალალი. თურმე სკამზე რომ დაჯდებოდა, ისეთი გრძელი თმა ჰქონდა, რომ მიწაზე შეიდკეცად დაიდებოდა. უძილაურთის თავს არის ზედ მთაზე დიდი მოედანი, რომელსაც ჰქვიან ირემთკალო (უძილაურთა სოფელია ფშავში. აქ ცხოვრობენ კოპალას ყმანი, ირემთკალო რატომ ჰქვიან, მთხრობლებმა ვერ ახსნეს). იახსარსა და კოპალას აქედან ციხეთგორისკენ ქვები უნდა ესროლათ მჯობინზე და გაეგოთ, ვინ იყო მძლავრი (ციხეთგორი: ირემთკალოს პირდაპირი მთა. აქ არის ხევსურების პატარა სოფელი აკუშო, ამის მახლობლად მდებარეობს ციხეთგორი). სახელგანთქმული დევები დაბარებული იყვნენ ყველგანადან. იახსარს და კოპალას განზრახული ჰქონდათ ამ დროს დევების ამოწყვეტა. ბრძანებაც ასეთი იყო მორიგე ღვთიდან. იახსარი ჩუმად წავიდა და ხაშარის გადმოსავალში საპარავის ყელში ჩაუსაფრდა. ხაშარიდან წამოსული მუზა დევი ამ გზით გამოივლიდა ირემთკალოსაკენ მიმავალი. იახსარი აქ იმპს მოკლავდა. მერე ხაშარს ჩავიდოდა და იქ ამოსწყვეტდა დევებს. მართლაც, მუზა მთაზე შემოხდა. გამოხედა

ირემთკალოს და იქიდან შემორიშხნა (ირემთკალო არის საპარავის ყელის მოპირდაპირე მთაზე. მუზამ რომ დაინახა კოპალა და დევებო თავმოყრილი, დაიღრიალა და დაემუქრა. ამიტომ ამბობს მთხრობელი: შემორიშხნაო). ამ დროს იახსარი აქ იყო ჩასაფრებული, დაჰკრა თავში ლახტი და მუზა დევი მოკლა. სასიკვდილოდ დაჰკრილმა დევმა დაიღრიალა. ხაშარში რაც დევები იყვნენ, იმათაც გაიგეს, რომ მუზას რალაც გაუჭირდა. მანამ ისინი მოსაშველებლად გამოემართებოდნენ, მივარდა იახსარი თავისი ლახტით და სულ ამოწყვეტა ყველანი. სახლიც დაუქცია (მათი ნასახლარი ხაშარში ისევ არისო — ამბობდნენ მთხრობლები. ისეთი ქვებისგან არის ნაშენები, რომ თითო ქვას ოცი კაცი გვერდს ვერ გადაუქცევსო). ზოგები იორზე გაქცნენ, დაედევნა და გზადაგზა სულ ამოწყვიტა. ამ დროს ირემთკალოს რა ხდებოდა? დევებმა და კოპალამ სიბით დიდი კალოს ოდენი ადგილი დააზღვევეს (ირემთკალოს, ახლა საცა კოპალას საზარეა, იმ ადგილზე) იმიტომ, რომ ქვის სროლას რომ დაიწყებდნენ, სიმძიმისაგან მიწა არ ჩაბრუნებულიყო. ჭერ კი ელოდნენ მუზას და იახსრის მოსვლას და მერე კვირას მეთვალყურეობით დაიწყეს ქვის სროლა (ციხეთგორს ცხოვრობდნენ დევები, მათ ახლოს ცხოვრობდა კოპალა). დევების ფალანხმა გაისროლა ქვა და ციხეთგორს იქით (ახლა ხატის მამულია) დაეცა ქვები ერთნაირი იყო, ახლა კოპალამ გაისროლა ქვა, კარგა დიდის ძალით გაისროლა, მაგრამ კვირამ ამ ქვას მათრახის წვერი წამოჰკრა, კიდევ გაამალა და იგი დევების გასროლილ ქვას შორს გადასცილდა. დევები შეეცადნენ, რომ უკან გადმოეწიათ, მაგრამ ველარ გადმოაგორეს (ახლაც ეტყობა ნაბრძოლი, ქვა უკან არის გამონათარიო. ამბობენ მთხრობლები). შეშინდნენ დევები და გაქცევა დააპირეს. დაერია კოპალა ლახტით და სულ ამოწყვიტა. სახლი დაუნგრია და იმათ სამყოფელს თვითონ დაპატრონდა. ახლაც მისი საზარე ისევ არის. ფშაველ-ხევსურები მიდიოდნენ ციხეთგორობას სალოცავად. აქედან იწყება კოპალასა და იახსარისაგან დევების ზოცვის ამბავი. ხალხის თქმით, მათი ნაომარი და ამოწყვეტილი დევების ნასახლარები ბევრგან არის, სადაც ილოცავენ იახსარსა და ზოგან კოპალას. მაგალითად, ფშავის არაგვზეა კოპალას ქვა. იმ ხანებშივე, როცა კოპალა ჭორციელად იყო, ციხეთგორიდან ერთმა დევმა სამლოცველოდან მოიპარა ტრაპეზის ქვა და მიჰქონდა ქვევით. კოპალა წამოეწია, ესროლა ლახტი და მოკლა დევი. ქვა იქ გზის თავზე აიტანეს სოფელ ხომში მცხოვრებლებმა და ახლაც იქ არის, სადაც ილოცავენ გმირ კოპალას მთხრობლები ამბობენ: ნალახტარი კლდესაც ეტყობა და დევის ნასახლარი იმ ქვასაცაო).

ერთ დევს მიჰქონდა თურმე მოკლული ირემი. ერთ მხარეზე ძირიდან ამოწვდილი წიფლის ხე ედო. შეხვდა კოპალა, ესროლა ლახტი

და მოკლა დევი; რომ მოყვდა, ქვად იქცა. ახლაც არაგვში გრძელად ქვა არის და. ხალხის რწმენით, ის ქვა გაქვავებული დევია. ამ დევს ავთანდილი ერქვა და ამ ადგილს ახლაც ავთანდილის საქანს ეძახიან. მეორენაირადაც არის კობალის ქვის ამბავი: დევები კართანაში ქვას აგროვებდნენ, აქ წყალი უნდა დაეგუბებინათ და ფშავ-ხევსურეთით წაელეკათ. გაიგო კობალამ, წამოეწია დევს, რომელსაც ეს ახლანდელი კობალის ქვა მიჰქონდა წყლის დასაგუბებლად, ესროლა ლახტად და მოკლა. ქვა გადაიქცა სალოცავად და დაერქვა კობალის ქვა. (კართანა არის ფშავ-ხევსურეთის არაგვზე ძალიან ვიწრო ადგილი, გაღმაც ფრიალო კლდეა და გამოღმაც, ისეთი ვიწროა, რომ არაგვი ძლივს ეტევა).

კობალა რომ აქ ხოცავდა დევებს, მაშინ იახსარი იორზე მიჰყვებოდა და სადაც მათი ბინა იყო, ყველგან ამოწყვიტა. ამ ადგილებზე ყველგან არის ნიშები-სამლოცველოები. მაგალითად: იხინჭას. (ზემო: თიანეთში) ყოფილა დევების დიდი ოჯახი, შებრძოლებია იახსარი და გაუწყვეტია. მერე ამ ადგილსაც თვითონ დაპატრონებია. მას აქეთ გაშენდა მისი სამლოცველო აქ.

ერთი სახელგანთქმული დევი ზემოთიანეთს იყო, რომელსაც ვერხველას ეძახოდნენ. ეს დევი თავისი ცოლშვილით ცხოვრობდა ზემოთიანეთის სათავეში ერთ ვიწრო ხეზე და ამ არემარეს არავის შეეძლო გავლა. მას ჰყავდა დიდი ოჯახი. ეს დევები იჭერდნენ ადამიანებს და ჰამდნენ: დაიჭირეს პირქუში ოქრომჭედელი და ტყვედ ჰყავდათ. აკეთებინებდნენ იარაღს, მშვილდისარს და ოქრო-ვერცხლს (პირქუში ბოლოს სალოცავად არის გადაქცეული. ილოცავენ ხევსურეთში. სოფ. ბაყალიგოში და ფშავში სოფელ ახალში. ეწოდება პირქუში ცეცხლისალიანი. ეს სალოცავი რომ ერთი ჰყავთ, ამიტომ ახალლები და ბაყალიგოვლები ძმობენ). პირქუში ბევრს ცდილობდა, მაგრამ დევების ტყვეობას თავი ვერ დააღწია. იახსარმა ეს რომ გაიგო, მივიდა ჩუმაღ და პირქუშს უთხრა: დაგისნი, თუ ერთ კარგ ზარს გამიკეთებო. პირქუში ზარის გაკეთებასაც დაჰპირდა და ბევრ სხვა რამის გაკეთებასაც. იახსარი დევებს თავს დაესხა და თავისი ლახტით ჯერ ვერხველა დევთ მოკლა, მერე ყველა ამოსწყვიტა და პირქუში გაანთავისუფლა; პირქუში წამოვიდა და ახალში დაბინავდა, იახსარს დაპირება შეუსრულა. ბოლოს თვითონაც ხთიშვილად გადაიქცა. პირქუშს სამი კარგი ვერცხლის თასი ჰქონდა. იახსარმა ეს თასები სთხოვა. პირქუშმა არ მისცა. მაშინ იახსარმა წაართვა ძალით და მოიტანა თავის სამლოცველოში. შემდეგ, როცა ერთიც ხთიშვილი გახდა და მეორეც, პირქუში ამ თასებს ისევ ედავებოდა. ბოლოს ხთის კარზე რჯული ჰქონდათ. დამბადებელმა და კვირამ გააჩჩიეს ეს საქმე და თასები პირქუშს არგუნეს, რად-

გან ძალით იყო წართმეული და ხთიშვილთ ერთიმეორეში ძალადობის ნება არ ჰქონდათ. დამბადებლისაგან. ძალადობის ნება მარტო დევკერპებთან ჰქონდათ. მკითხავის პირით იახსარმა გამოაცხადა: მე და პირქუშს ხთის კარზე რჩული გვექონდა და ეგ სამი თასი პირქუშს არ გუნესო. ძალიან დიდი ხანი არ არის მას აქეთ, რაც ეს თასები იახსარიდან ახადში, პირქუშში, წაიღეს. მას აქეთ აიკრძალა შუაფხოვლი ქალის ახადს გათხოვება და ახადელი ქალისა შუაფხოვში. ეს წესა დღესაც დაცულია. იახსარმა ბოლოს იორზე და თიანეთში ყველგან ამოწყვიტა დევები და დაბრუნდა შუაფხოვში. აქ ისევ იყვნენ დევები და უკანასკნელად ესენი ამოწყვიტა.

საკმისას ლახტი ვესროლე, თავს დაუქციე ბანიო,  
ერთ კიდე გამოქეულა, რომენიც ფალაიანიო.

იახსარმა გამხვეურთკარის დევებს ესროლა ლახტი თავისი საყურიდან. ბანი დაუქცია, ეცა და ყველა ამოწყვიტა, შემდეგ გავარდა თხილიანაში და თავისი ლახტით იქაური დევებიც ამოწყვიტა, მაგრამ გაიგო, რომ ერთი უფრო დიდი დევი ხევესურეთისაკენ გაიქცა. დაედევნა, არაგვი შეიარა იმის კვალზე, ქმოსტ-როშვა აიარა და აბუდელაურს (ქმოსტის მთა) დაეწია. მივიდა დევი და ჩაძვრა აბუდელაურის ტბაში, ჩაჰყვა იახსარიც — ძირს ჩასულს დაჰკრა ლახტი და მოკლა. დევის სისხლმა ტბის ზედაპირი დაფარა და რაკი ეს სისხლი უწმიდური დევისა იყო, იახსარი ვეღარ ამოვიდა, შეეკრა გზა. იახსარი სამ წელს დაკარგული იყო, ვეღარ ამოდიოდა ტბიდან. ხალხი ეძებდა: რა იქნა ის დევების მხოცილი ბერი იახსარი, რომელმაც დევებისაგან გაგვათავისუფლაო? ბოლოს მისი ამბავი ერთმა მკითხავმა გაიგო და გამოუცხადა ხალხს, ხალხმა მის ამოსაყვანად ბევრი იწვალა, მაგრამ ვერაფერი უშველეს. ბოლოს ისევ მკითხავმა უთხრა, რომ იახსარი აბუდელაურის ტბაში არის სიმურში დამრჩალი, იქ მან დევი მოკლა. დევის სისხლი ტბას აქვს გადაფარებული და ვეღარ ამოვა. მანამ ეს არ გაიხსნება და გზა არ ექნებაო. ახლა ამ სისხლს რა მოაშორებდა და ამ გზას რა გახსნიდა, ამაზე დადონდნენ. ესეც ისევ მკითხავმა გამოურჩია: სოფელ ბლოში ერთ კაცს ოთხრქა, ოთხყურა ცხვარი ჰყავს, ის გამოართვით, იმ ტბაში ჩაკალით და გზა გაეხსნებაო. მოსთხოვეს ზლოელ კაცს ცხვარი და მანაც უარი არ უთხრა. როცა იახსარმა ტბის პირზე მისულ დევს ლახტი ესროლა, თვალი გამოსთხარა და კლდე ოთხად გაატეხინა, აი ამ კლდესთან დაკლეს ეს ოთხრქა, ოთხყურა საკლავი. სისხლი ტბაში ჩავიდა. გაიხსნა ტბის ზედაპირი, ერთი ბროლის ქვა ამოვიდა და ამოჰყვა იახსარი. ის ქვაზე მტრედის აღით დაჭდა. ყმათ დაინახეს და დაიწყეს პირჭვრის წერა, მას შემდეგ იახსარი ხორციელობიდან იქცა ხთიშვილად.

იახსარი აქედან გაფრინდა და ლიქოკისთავს კარტისწვერს „მოი-  
კიდა კოჭი“ ე. ი. დაბძანდა (მაღალი მთა არის). მას აქეთ აქ იახსარის  
ნიში (კოშკი) და საზარე ააშენეს. აქედან გამოფრინდა და უბისთავს,  
კარატისწვერ მაღალ მთაზე მოიკიდა კოჭი. აქაც საზარე და კოშკი  
არის აშენებული. აქედან შუაფხოში ჩამოვიდა და აქ სამუდამოდ  
დაარსდა, რაზედაც მერე გვექნება ლაპარაკი.

შიაყრებიან დევები, სადაც დიდ მოედანო,  
აიმას გაარიგებენ — ერთუცს უჭიროთ მქარიო,  
ხთიშვილთ კოპალა მოუკლათ, თავში დაუცნვეთ ქვანიო,  
გაიგეს ხთისნაბადებთა, გაგზავნეს იახსარიო.  
ერთი წლის ბალდი მოიდა, ერთ ცოტას შეგვრემანიო\*  
ველჩი ევირა მათრავი, შეიდეკეი, შეიდი მქარიო,  
მაჰყუა შეიდის წლის ქალი, თქვეს — თამარ დედუფალიო.  
ჩიქილა გადაიხურა, გადააყენა ზღვანიო.  
შუა ზღვას ჩადგა სამანი, არ გადუვარდეს ცხვარიო.  
— ავისგორ ციხეს აგებენ, გავებენ ცხრანი ძმანიო,  
ქორწილ ქონიუო დევებსა, სიმურ ეჩქვიფა წყალიო,  
ცხრათაჲ ჰყონიუო დედაი, ცხრათ ვაჲთ გამზღელი ქალიო.  
თავს სალუდე ქება ეხურა, ღმერთო, რა შესაზარიო  
მე მაგათ ვერა დაესწონე, მონა შამამდეს ზარიო,  
დამცხვენდა, იქავ წამოვედ, გამოუცვალე ჟამიო,  
საკვისას ლახტი ვესროლე, ზედ დავაქციე ბანიო.  
ერთ ისევ გაქეულოყო, რომენიუ ფალავანიო.  
როშისყოჯრე შამამეწია, კლდეს მოაფარა ტანიო.  
საგმირო შამაიმაღლე, ღმერთო, შენგან მაქე ძალიო!  
კლდე ოთხად გავატეხიე, დევის გამოვთხარე თვალიო,  
კარგად სცოდნიყენეს წყეულსა აბუდელაურ ტბანიო.  
დევ რო სიმურში ჩავიდა, თან ჩავჰყეე იახსარიო,  
ჩავედ და ვედარ ამუედ, სისხლმა გამიბზა მქარიო,  
ჩემთ ყმათაც კარგად იფიქრეს, ოთხრქა, ოთხყურა ცხვარიო.  
მოიყვანეს და ჩამაკლეს, ამოვედ იახსარიო.  
შამოვედ ტრედის აღითა, შამოვიბერტყენ მქარიო.  
დავკვლიე ჩემსა ნაქლომსა, კრელნ მამრჩალიყენეს ქვანიო,  
ეჲქეთ კარატემდინა არს შიბზე გასავალიო,  
ეგრე გავივლი შიბზედა, ვერვინ მამკიდოს თვალიო.

როგორც ვთქვეთ, იახსარი სამ წელს ყოფილა ტბაში. მერე რომ  
ამოიყვანეს, ხეთიშვილად გარდაიქცა. იმის შემდეგ იახსარის ნაამბობს  
მკითხავები გადმოსცემდნენ ხალხს: ტბის ძირში დევების სოფელი  
ყოფილიყო და იქ ყუავდი ტყვედ დაჰქერილი. მერე საკლავი რომ დაი-  
კლა და გზა გამეხსნა, ხეთიდან ბრძანება იქნა და ამოვედიო.

\* იახსარი მოეჩენა ამ სახით.

რომელმა ბლოელმაც ოთხრქა, ოთხეყურა ცხვარი მისცა, იმას უთხრა იახსარმა: „შენ კი სიკეთე ჰქენი, რომ ცხვარი მიეცი ჩემ ყმათა და მე დამიხსენითო. შენ ერთხელ მიშველე, სამაგიეროდ მე სამჯერ გიშველიო. როცა ძალიან გაგიჭირდება, მაშინ შამოძახნე და დაგიხსნიო (შაძახნება: როცა გაუჭირდებოდათ, ქუდს მოიხდიდნენ და შეეხვეწებოდნენ რომელიმე თავის სალოცავს, სალოცავი ამას მაშინვე გაიგებდა და მიეშველებოდა თუ ამ კაცისაგან დანამადლისი რამე ჰქონდა და დახმარების ღირსი იყო. თუ შანაცოდვარი რამე ჰქონდა, მაშინ კი უფრო ცუდს საქმეს მიუსევდა და მიუმარჯვებდა). ერთხელ ამ ბლოელი კაცის ოჯახს სისხა (კუჭ-ნაწლავის ინფექციური დაავადება) შეუდგა და დაღუპვაზე იყო მისი საქმე მისული. დაიწერა პირჯვარი და შასძახნა იახსარს: დალოცვილო იახსარო, შამოძახილზე ნუ გამიწყრები, მომირჩინე ეს ავადმყოფები. გადამარჩინე ამ უბედურებას და მოძავალ დღეობაში შენს კარზე მოვალ ზღვნითა და სანთლით ჩემის ოჯახით, თუ ისინი ცოცხლები დამრჩებიანო. იახსარმა გაიგო მისი მდგომარეობა, მიეშველა და გამოიხსნა უბედურებიდან ის და მისი ოჯახიც. მეორედ გაჩნდა ბედნიერი (სახადია) და ამ ბლოელის ოჯახსაც შეუდგა. მაშინაც ბლოელმა იახსარს შემოსძახნა, მოეშველა და ყველანი გადაარჩინა სიკვდილს. ბლოელიც დანაპირებ-ნაქადებს არ გადასთქვამდა, გადარჩებოდა უბედურებას თუ არა, მოჰყავდა საკლავი, სანთელი და ემსახურებოდა იახსარს ჩვეულებრივი წესით.

მესამედ ბლოელმა შამოსძახნა უბრალო საქმეზე: ნამთიბლავი (მუშების მიერ გათიბული მთა) ჰქონდა ასახვეტი, ამ დროს საავდრო ღრუბელი გაჩნდა ცაზე, ბლოელი შეშინდა, რომ გაავდრდეს, ნათიბი გამიფუჭდებაო, მოაგონდა და შემოსძახნა იახსარს: „დალოცვილო იახსარო, ნუ გაავდრებ, ნათიბს ნუ გამიფუჭებ და შენს კარზე სამსახურით მოვალო“. ამ დროს თურმე იახსარი ხთის კარზე იყო „შამჯდარი“ რალაც დიდი საქმისათვის, თავის სახელას ხსენება და შეძახნება გაიგო და მოსაშველებლად მობრუნდა, იქ აუცილებელსა და დიდ საქმეს კი თავი დაანება. მოვიდა და ნახა, რომ ამას დიდი არაფერი უჭირს. თავის გულისათვის შაუძახნებია და ხთისკარიდან იმისთვის დაუბრუნებია. გაწყრა იახსარი, შერისხა და ის ოჯახი სულ ამოწყვიტა. მერე მკითხავის პირით თქვა: იქ ხთისკარზე ძალიან დიდი საქმისათვის ვიყავი მისული, შამოძახნება რომ გავიგე, ჩემს წესს ვერ გადავედი და მოვბრუნდი ხთისკარიდან, შამოძახილის ადგილზე მივედი, ვნახე, რომ საქმე არაფერი უჭირდა, იქ კი დიდი საქმე დამარჩია გაუკეთებელი, ამიტომ გავუწყერი და თავისი ოჯახით ამოვწყვიტეო.

ერთ ბლოელ ქალს: ქალქვისთავისაკე ძროხები დაუდიოდა სა-  
ზაფხულო საძოვარზე. ამ ქალთან დაიწყო სიარული ერთმა კარგის  
სახის ახალგაზრდამ. ქალი ძროხებს არეკდა ქალქვისთავს თუ არა, ეს  
ახალგაზრდა მაშინვე აქ გაჩნდებოდა. ქალმა არ იცოდა, ვინ იყო, ან  
საიდან მოდიოდა. ძროხებს რომ შინისკენ დააბრუნებდა, იგი ისე  
მონებრებულად გაიპარებოდა, რომ ქალი ვერ გაიგებდა, როგორ, ან  
რა დროს და სად წავიდა. უკვირდა ქალს და თანდათან ეჭვი ეპარე-  
ბოდა. ის კი მთელი დღე ქალს ესაუბრებოდა, ეთამაშებოდა და თით-  
ქოს სიყვარულსაც იჩენდა, თითქოს უამქალოდ გაძლება არ შეეძლო.  
ქალმა ბევრჯერ ჰკითხა: ვინ ხარ, საიდან მოდიხარ და სად მიდიხარ,  
რომ ერთხელ ვერა გნახე ვერც მიმავალი და ვერც აქეთკენ მომავა-  
ლი? ახალგაზრდა ამ კითხვაზე გაიცინებდა და სულ სხვა რამეს ეტ-  
ყოდა. ასე ვაჟიდა დრო, ქალი ამ ახალგაზრდას ისე დაუახლოვდა, რომ  
ჩელდახელაც კი დაუწყო თამაშობა-ხუმრობა. ერთხელ ქალმა მკლავ-  
ზე მოხვეული, მძივიანი „ხელსახვიელა“ შეამჩნია (ხელსახვიელა: მო-  
ქარგული და მძივებით აჭრელებული მკლავზე მოსახვევი. აკეთებ-  
დნენ დაწნული თმისაგანაც და უბრალო რამე ქსოვილისაგანაც. ეს  
იყო სამკაული სამაჯურის მსგავსი. იკეთებდნენ ვაჟებიც ერთიმეორის  
მოსაგონებლად), ქალმა მკლავი დაუჭირა და სახელო „შეუხვასტა“.  
ჩახა, რომ ადამიანის მკლავს არა ჰგავდა, მკლავი ძალიან ბარდლიანი  
(ბალნიანი) იყო. ქალი შეკრთა, გაიხედა კარატის წვერისაკენ, სადაც  
კოპალასი და იახსარის ნიშებია და თქვა: იახსარო და კოპალავ,  
თქვენ დამწერეთ ჯვარი, ამას რარიგი მკლავი ჰქონია? ახალგაზრდა  
ამ სიტყვაზე შეკრთა და უთხრა ქალს: რაზე დამღუპე, ეს რა სტქვიო!  
ამ დროს კარატის წვერიდან აიშართა სალულდე ქვაბის ოდენა ღრუბელი,  
ჯერ მალა ავიდა და წამოვიდა ქალქვისთავისაკენ. გზაში ცეცხლად  
იქცა, დაეცა ზედ ქალის გვერდზე ნამყოფ ახალგაზრდას და დაკვლად  
(ფერფლად) აქცია. ქალი გადარჩა უვნებლად. მერე ქალის ჯალაფნი  
შკითხავთან წავიდნენ იმის გასაგებად, თუ რა მოეჩვენა იმათ ქალს.  
შკითხავმა უთხრა: ის ვაჟი დევის შვილი იყო, იმ ქალს დიახლოვებდა  
და ბოლოს ავნებდა. მაგრამ ქალი ყისმათიანი ყოფილა, რომ კოპალა  
და იახსარი ახსენა, იმ დროს კარატის წვერს იახსარი ყოფილა, ქალს  
მოშველებია და დევის შვილი დაუწვავისო. ამ ქალის ჯალაფთ ათენ-  
გენას წაიყვანეს ერთი საკლავი, წავიდა მთელი ოჯახი და იზღვენე,  
იახსარის ნიშთან.



იახსარმა და კოპალამ დევები სულ ამოწყვეტეს, ბერობიდან ზეთის ძალით ხთიშვილებად იქცნენ, კოპალა დაარსდა უძილაურთის თავზე და ცინეთგორს, იახსარი — შუაფსოვი. იახსარი კარატიდან რომ ჩამობანდა, დაარსდა ავისგორის და გამხვეურთკარის შუა ადგილზე. იქ კარგა მოზრდილი მამულებია და მათ საშუალო ადგილზე დაარსდა, ნახევარი აღმოსავლეთ მხარეს მოიგდო, ნახევარი დასავლეთ მხარეს, შუა ადგილზე კი თავისი საბრძანებელი გაიჩინა. რა თქმა უნდა, პირველად და მერეც ყველაფერი მკითხავეების პირით ხდებოდა, რადგან იახსარი ხალხისათვის უხილავი გახდა და მათი პირით ესაუბრებოდა ხალხს. ხორციელობის დროს, რაკი ქისტაურების ადგილ-მიდამოს ცხოვრობდა, ხთიშვილად ჩარიცხვის შემდეგაც აქ გაიჩინა თავისი არჩევით საბრძანებელი და ყმად გამოაცხადა ქისტაურების გვარი. ქისტაურები თურმე პირველადვე ყველანი შუაფსოვი ცხოვრობდნენ და ერთ გვარს ატარებდნენ, მერე გადასახლდნენ ზოგნი სწროფავში, ხორხში, ვანხევში და არახიჯაში, თითოთოროლი კომლი სხვადასხვაგანაც გადასახლდა, გვარებიც ყველამ თავთავისი მიიღო ე. ი. გვარი ქისტაური დაიყო ქვეგვარებად. ცხოვრობდნენ სხვადასხვა ადგილებში და სოფლებში. მაგრამ სახატო სამსახურის დროს ყველანი მოდიოდნენ შუაფსოვი და დავალებას ასრულებდნენ. მკითხავეების საშუალებით გაჩნდნენ ხევისბერები, მერე დასტურები, ააშენეს: საბერო, სალუდე, სადასტურო, საზარე, გაიჩინეს და ჩამოყალიბდა დღეობების წესრიგი. მამულები, რომელიც ხატთან იყო, გარდა სანადოდ. ხევისბერი გამოაცხადებდა გუთნების გატანას, დანიშნავდა ერთ დღეს. ვანხევ-არახიჯიდანაც ხარ-გუთნით მოდიოდნენ და ერთ დღეს ყველა ერთად გააბამდა ხარ-გუთანს და მოხნავდნენ სანადოს. (ვანხევ-არახიჯა მთას გადაღმა არის). პირველად რომ ხარ-გუთანი მოვიდოდა ხატის მამულზე, იქ დახვედობდნენ დასტურ-ხევისბერები (დასტურები აქ ისე არ იყვნენ, როგორც სხვა ხატებში წლის ბერები, რომლებიც იქ ცხოვრობდნენ მუდმივად. ესენი ერთი წლით იყვნენ მორიგეობით დაყენებულნი. ხელმძღვანელობდნენ ხატის წესრიგის დაცვას, ასრულებდნენ ხევისბერის ბრძანებას და ემსახურებოდნენ მოსულ მეზღვნეს).

დასტურები ძნას გალენწავდნენ და პურს ჩაყრიდნენ. მღუღეობა თითო დღეობაში ორთ შეხვედებოდა. ისინი ლუღს ადუღებდნენ. დღეობაში ესენიც ხატში იყვნენ და წლიური დასტურნი, როგორც მუდმივნი და არა მარტო ერთ დღეობაში მისულნი, აქ მეტს საქმეს ასრულებდნენ, უძღვებოდნენ ყველა სახატო წესრიგს. ხარებს ყველა დაადებდა უღელს, მოაბამდა გუთანს, მირეკდა და თავის სრელთან და-

აყენებდა (მამულები სრულებად იყო დაქრილი). მერე თავხევისბერი მოიხდიდა ქუდს და დაამწყალობებდა ხარ-გუთანს: „გაემარჯოს დიდ იაცსარსა და იყოს წყალობით თავის ყმაზედა, თავის ყმათაში ერთგულთა და თავდადებულთაზედა სახატოსა და სახალხო საქმეშია. მრავალჯერ გაგატანიოსთ გუთანი მშვიდობით და ერთურთის სიცოცხლითა, ბევრი სთველ-გაზაფხული მშვიდობისა და კარგად ყოფნისი მოგაგვაროსთ, წელი ღალიან-ბარაქიანი დაგიყენოსთ“. „ამინ. — იტყოდნენ გუთნისდებები, — თქვენიცამც მწყალობელია“ და გარეკავდნენ ხარებს. ხენა აქ ყვეარი ხარით იცოდნენ, რადგან მაგარი მიწა არის; თითო გუთანში ყვეარი ხარი ება, თითო მეხრე ჰყავდა და თითო გუთნისდებდა. ხნავდნენ ყველანი, შეისვენებდნენ ერთდროულად. დათესავდნენ და დაფარავდნენ თავთავის ნაყევრალს (მოხნულს). მერე მთელი ზაფხულის განმავლობაში თავთავის ნაყევრალზე ეჭირათ თვალი-მაგრამ დასტურნი უფრო მეტ ყურადღებას აქცევდნენ.

სანადოები იხვნოდა ყამირობით: ერთ წელიწადს ერთ მხარეზე მოხნავდნენ, მეორე წელიწადს მეორე მხარეზე. რომელი მამულიც ყამირად რჩებოდა, ამას დასტურები თიბავდნენ, მამულის პირებსა და სხვა სათიბებსაც ისინივე თიბავდნენ და თივა შინ მიჰქონდათ. ხატს საკუთარი კურეტები ჰყავდა და აჰმევდნენ, ზოგი მათგანი კი მცხოვრებლებზე იყო გასაკვებად განაწილებული. აქვე გომური იყო მათთვის და ერთი მომღელი ჰყავდა. ეს ნაგომურალი ისევ არის და სახელწოდებაც ძველი შერჩენია: „სახარბაკე“. კურეტები მრავლდებოდა ცოცხლად შეწირული სახარე მოზვრებისაგან. როცა კურეტები 6—7 წლისა გახდებოდნენ, ხევისბრები და დასტურები გადაწყვეტდნენ უფრო ხნირი კურეტების დაკვლას. იკვლოდა გიორგობას. ხორცი ზოგი გაიყიდებოდა და მოხმარდებოდა ამ კურეტების მოვლის საქმეს. ნაწილს მათ მომღელსაც მისცემდნენ. ზოგი მოიხარშებოდა და ხალხი ჰკამდა. ტყავის ნაწილიც დასტურ-ხევისბრებს რჩებოდა, ნაწილი იყიდებოდა. ხორცს იმას ვერავინ შეეცილებოდა, ვისგანაც იყო შეწირული კურეტი. როცა დაიკვლოდა, რაც ფასიც ჰქონდა გადაწყვეტილი, ის მისცემდა იმ ფასს. თუ იმას არ უნდოდა ხორცის ყიდვა, მაშინ სხვა იყიდდა, ვისაც სურდა იახსარის საყმოში. თუ ბევრნი გამოჩნდებოდნენ მყიდველები, მაშინ წილს იყრიდნენ და ვისაც ერგებოდა, ის იყიდდა. ანდა რამდენიმე კაცი საერთოდ იყიდდა და გაიყოფდნენ. კურეტი თუ ხუთწლამდე იყო, იმისი ხორცის ნახევარი დაფასებული იყო სამ მანეთად. თუ ხუთ წელს გაცილებული, მაშინ მეოთხედო ღირდა. სამი მანეთი მაშინდელი ფულით. (შეწირვა იცოდნენ ხატის მიზეზით, უფრო ერთის წლისას შესწირავდნენ და მერე იზრდებოდა).

ყანები რომ სამკალად შემოვიდოდა, ყველა მომკიდა თავ-თავის ნაყევრალს, მიიტანდა ხატის კალოზე და მერე დასტური ლეწავდა.

ჩალა დასტურს რჩებოდა. ნაწილს ხატში ინახავდნენ კოდების დასაფარებლად და ზამთარში ხატში მოსულ დასტურ-ხევისბრების სალოგინედ. პურს აკოში ჩაყრიდნენ (აკო: საპურე კილობანი). აქ ბელელი არ ჰქონდათ, ჰქონდათ მარანი, წმიდად დაცული სახლის ზედა სართული და პურიც აქ ინახებოდა, სხვადასხვა სახატო ინვენტარიც. სახატო ფუტკარიც აქ იდგა ხოკრებით ხალხისაგანვე შეწირული. ისიც ერთს ებარა მოსავლელად. საწელწოდ ზოგ ძირებს გასტეხავდნენ, თაფლს აიღებდნენ და ზედაშეს აკეთებდნენ — გააკეთებდნენ თაფლწყალს და ამაზე ადიდებდნენ ხატს. ხატის კალო სულ ძველად სოფელთან ყოფილა (არ იციან, მამულებიდან ასე შორს რად იყო). ძალიან სიწმიდე უნდოდა ხატის კალოს. მის მიდამოს ქალი ვერ გაივილიდა, მრევლი ქალი ხომ ძალიან ერიდებოდა. ისე წმიდად რომ ვერ ინახებოდა, როგორც საჭირო იყო, რადგან სახლები ახლო იყო, მრავალი მიზეზი უდგებოდა მცხოვრებლებს. მერე კალო გადაიტანეს ხატის მამულებთან ახლოს. ახლაც იქვეა შემოღობილი საძნოვარი. აქ უფრო გაადვილდა მისი წმინდად შენახვა. რადგან ხატის სამლოცველოც აქ იყო, მამულებიც და კალოც. ამ არემარეს მრევლი არ გაივილიდა მამულებს ისეც სწირავდნენ ხატს, ან ავადმყოფის პატრონს ეტყოდა მკითხავი: ესა და ეს მამული ხატს უნდა შეწირო, ხელსა სდებსო, ან სხვა რაიმე გაჭირვებიდან დახსნილი კაცი შესწირავდა მამულს, ოღონდ ხატის მამულთან ახლო უნდა ყოფილიყო. გაფანტულად არ ჰქონდა მამული ხატს, რადგან მრევლი ვერ მოერიდებოდა და მირეული მამულის პური ხატის სადიდებლად აღარ ვარგოდა. მამულები რომ ერთად იყო, ყველამ იცოდა და წმინდად იყო დაცული. სადაც წინათ ხატის კალო იყო, იმ ადგილის სიწმიდესაც მოითხოვს იახსარი და თუ ვინმე მრევლი ამ მიდამოს გაივლის, მიზეზი დაუდგება და ანანებს შეცოდებასო.

დასტური რომ ვალეწავდა და პურს აკოში ჩაყრიდა, მერე გაცემდა ამ პურიდან, რისთვისაც საჭირო იყო. ეს ყველაფერი დაწესებული ჰქონდათ და რაც უწესობდა, იმას ასრულებდნენ (რომელდღეობაში რამდენი პური უნდა დახარჯულიყო. ან თუ სხვა რამეში იყო საჭირო პურის დახარჯვა). ზემოთ ვთქვით, რომ მღულე დასტურობაც რიგით მოუდიოდათ და ჩჯახებიდან თითო კომლი წელაწადში თავისი საკუთარი პურიდან ხარჯავდა ორ კოდ პურს. რომელი დღეობაც ერგებოდა, იმ დღეობისათვის გააკეთებდა ფორს, მოიტანდა სვეს და აღულებდა ლუდს. ლუდი იფუვლებდა იქვე სალუდში, სადაც საკოდე ადგილი უფრო განცალკევებით იყო. აქ გარდა დასტურ-ხევისბრებისა პრავინ მიდიოდა, იყო წმიდად დაცული (ფშავშიც და ხევსურეთშიც ზოგიერთ ხატში საკოდე ან საბეროში ჰქონდათ, ან დარბასში. აქ კი სალუდში იყო შიგნით მხარეს. სალუდშიაც ეკ-

რძალებოდათ გარეშე პირებს შესვლა). ლუდს ადუღებდა, როგორც ვთქვით, ის დასტური, რომელსაც თითო დღეობა ხვდებოდა წელიწადში, მხოლოდ წლიური დასტურიც ეხმარებოდა, რომელსაც თას-განძი, სახატო ქონება და ხატში დიასახლისობა ევალებოდა.

სისწვენი რომ საკმარისად გაცივდებოდა, ყველა დასტურ-ხევისბრები ლათბიდან კოდში გადაიღებდნენ (აქ საფუფრის გამთელება არ იცოდნენ, სისწვენიში პირდაპირ ჩააგდებდნენ ჩამს და ამიტომ კარგი ლუდი არ გამოუდიოდათ).

იასხარი, როგორც ვთქვით, ჯერ დაარსდა, სადაც ახლა სახარბაქეს ან ვალმითა ხატო ეძახიან. აქ ზოგიერთ დღეობაში ისევეც არის ლოცვა, მერე აქედან გამოვიდა ავისგორს, სადაც გამხვეურა დევის შვილებს პირველად შეებრძოლა და სასახლე დაუშალა. აქ უფრო კარგი სადღეობო ალაგია. დიდი ადგილი ჰქონდა ბორტვის ნაკვეთად, არც იხვნოდა ის ადგილი და არც ითიბებოდა. იღვა დიდრონი ხეები: იფნი, მუხა და ცაცხვი. აქ ააშენეს საზარეც, სალუდეც და საბეროც. დარბაზიც იყო სახალხოდ. სახარბაქიდან ხატის ქონება სულ აქ გადმოზიდეს. ამ დროს იყო აქ დიდი ხევისბერი გივი ფოცხვერაშვილი. ის ხატს პირად ელაპარაკებოდა. იასხარმა მისი პირით ბრძანა ავისგორს დაარსება მთავარი მისი საარსოსი და სამლოცველოსი. გივი ხევისბერმა ხატის ქონება უფრო მეტი თავის ზურგით გადმოზიდა. როცა სალუდე ქვაბი დაიდო საბელზე და უნდა გადმოეტანა, წამოიწია და ვერ მოერია, ვერ წამოიკიდა. ამ დროს აქ ვინმე ბადრიშვილი იყო, სოფელ შუაფხოელივე და იასხარის ყმა. მან წამოუწია ქვაბს და გივიმ წამოსვლა შეძლო. ამაზე გახდა ავაღ, ჩავარდა ლოგინად და კინალამ მოკვდა. ბოლოს იასხარმა მკითხავის პირით შემოუთვალა: შენ რად მიეშველე ქვაბის წამოკიდებაში, შენ ვინა გკითხავდა, მე ჩემს ყმას ვცდიდი — აიკიდებდა თუ ვერა. მე თვითონ ან ავაყენებდი ჩემს ყმას, ან არა, თვითონ ვიცოდით. ამაზე ბადრიანებს დანადგები აძეს: წელიწადში ერთი საკლავი და ერთი კოდი ქერის ლუდი — შობა დღეს.

აქ ჰქონიათ სახელგანთქმული ზარი, ტანად პატარა, მაგრამ მისი ხმა ახადს ისმოდა თურმე შუაფხოდან (ს. ახადი ექვსი — შვიდი ვერსით არის დაშორებული შუაფხოს, მდებარეობს მაღალ მთაზე):

ავისგორს შამიკლოდით ჩემი პატარა ზარიო,  
დაჰკრან, ხმა ახადს გავარდეს, პირს დაიწერონ ჯვარიო,  
ლოცვა-წირვაზე დადგოდენ ჩემის პირქუშის ყმანიო.

ზარი პირველად გაღმა ხატში ეკიდა. რაკი ავისგორს გადმოვიდნენ, ზარის გადმოტანაც აქ უნდოდათ, მაგრამ ამ დროს მტრიანობა იყო, ეცემოდნენ ლეკები და სხვა მტერი. ეს ზარი სახატო ქონებაში ყველაზე მეტად ეხარბებოდათ და ამიტომ მალავდნენ ისევე სახარბაქეში.

მხოლოდ დღეობას გამოიტანდნენ, ავისგორს საზარეზე დაჰკიდებდნენ. დილა-სალამოს, როცა დაწესებული იყო, დარეკავდნენ, მერე კი ისევ გაიტანდნენ და დამალავდნენ სადმე მიწაში. გივის დაავიწყდა დამალვის ადგილი და ველარ იპოვნა ზარი. ბევრი იარეს, ბევრი ეძებეს, მაგრამ ჭერაც დაკარგულია. მის საქმერად ნათხარი ადგილები ჭერაც ეტყობა, მაგრამ ალბათ რაიმე მიზეზით თვითონ იახსარმა დასდო საფარველი, თორემ უნდა ეპოვნათ იმდენი ძებნით. დარჩა საზარე ცარიელი. მერე ზოგი ხალხმა შეკრიბა, ზოგი სახატო ცხოვრება გაყიდეს და გივი ზარის საყიდლად წავიდა, ორი დასტურიც გაჰყვა. მისულან, საცა ზარები იყიდება. შესულა გივი და იახსარი იქ დახვედრია: ერთ-ერთ ზარზე ტრედის აღით იჭდაო. ამით მიხვდნენ, რომელი ზარიც უნდა ეყიდათ. იყიდეს, მოიტანეს და იახსარის საზარეში დაჰკიდეს. ეხლაც ისევ ის ზარი ჰკიდია, ხმა კარგი აქვს, მაგრამ რაც დაიკარგა, იმისი ნათალიც არ არის.

თავხევისბერი გივი პირველად ცოლშვილიანი ყოფილა. მაგრამ ხატმა ისე დაიჭირა, რომ ბოლოს სულ საბძელში ცხოვრობდა, აღარ ჰქონდა უფლება არც ცოლშვილთან მისვლისა და არც სხვა სახლში. ვერც გაივლიდა ისეთ გზაზე, სადაც მრევლი დადიოდა, ხიდზე გასვლაც კი აკრძალული ჰქონდა, თუ აუცილებელი საქმისათვის ხიდზე გავიდოდა, შუაზე არ გაივლიდა, სადაც ქალები დადიოდნენ. ის გაივლიდა ხიდის ნაპირზე, ან თუ იქ ვინმე იქნებოდა, ზურგზე აიკიდებდნენ და ისე გაიყვანდნენ.

წმიდობდნენ დასტურებიც, უფრო დღეობის მოახლოებისას, მანამდინაც კი სხვა ხალხისაგან გარჩევით, სიწმინდე იყო საჭირო. დასტური მრევლი ქალის გაცეთებულ რამეს ხელს არ ახლებდა, არც მის მოტანილ წყალს დაღვედა, არც რძეს მის მოწვევლილს და სხვა (ფშავში მრევლი ქალები ძროხებსაც სწველიან, წყალსაც მოიტანენ ოჯახისათვის და სხვა საოჯაო საქმეებსაც აკეთებენ, მხოლოდ სახლში არ შედიან. არიან ან ცალკე პატარა ქოხში, უფრო კი ჩვეულებრივია გომურში ძროხებთან ყოფნა „მრევლობის“ დროს).

## ი ა ხ ს რ ი ს კ ი რ ვ ე ლ ი ყ მ ა ნ ი

იახსარი მკითხავის პირით ხშირად იტყოდა: ჩემი ყმანი გავამრავლენ და ზოგმა ხთიშვილმა თავისი ყმანი სულ ამოწყვიტაო. პირველად დამბადებელმა ყმანი რომ გაგვიანწილნა, ყველა ხთიშვილს ხუთ-ხუთი ყმა გვერგო. ჩემს ყმებში მეზუთე ხუცი (ხუცესი) ხუცურაული იყო (ხუცურაულები პირველად ცხოვრობდნენ სოფ. ვანხევში და აქედან გადასახლდნენ სხვადასხვა სოფლებში. უფრო ბევრნი ცხოვრობდნენ

ხორხში და იქიდან ემსახურებოდნენ თავის ბატონს იახსარს). ყმებში ერთი მონადირე შემხვდაო. ერთხელ ეს ჩემი მონადირე ყმა სანადიროდ წასულიყო, ღორი დაეჭრა, რომელიც მონადირეს შებრძოლებოდა. მონადირემ იახსარს შემოსძახნა. იახსარი მიეშველა და ღორი და მონადირე ორივე შემოაკვდა. ხთის კარზე რომ მოვედიო, — ამბობს იახსარი — დამბადებელმა მნახა სისხლიანი და რომ გაიგო ღორის სისხლი იყო, ძალიან გამიწყრაო. ამის შემდეგ იახსარმა აკრძალა თავის საბრძანებელში ღორის გავლა და ნაცივარი (მიცვალებულის შენახები) კაცის ხატში ან მის მამულ-მიდამოში, ხატის კალოზე და სხვა ასეთებში მისვლა.

ხუცი ხუცურაული პირველი ხევისბერი ყოფილა იახსარის ყმებიდან. პირველად მას დაუწყია ხევისბრობა და ხატის ქონებისათვის ხელმძღვანელობდა. ამ ხუცურაულიდან და დანარჩენი ოთხი ყმიდან იახსარის ყმანი-მალე გამრავლებულან. იახსარის ყმათაში წულიანობა ბევრი ყოფილა, სიკვდილიანობა კი ნაკლები. ამიტომ სხვა ხატების ყმებზე ორჯერ და სამჯერაც მალე მეტნი გამხდარან. დაიწყეს ლოცვა და ჩამოაყალიბეს ყველა წესები, რაც იახსარმა მკითხავის პირით უბრძანა. შესწირეს თას-განძეული, ქვაბები, ააშენეს დროშა და გაიჩინეს ყველაფერი, რაც კი საჭიროა ლუდის დუღების მოწყობილობიდან ვერცხლის თასებამდინ. შესწირეს ცხვრები ცოცხლად, აგრეთვე სახარე ხბოები და კურეტები. მეცხვარეობა, ე. ი. ცხვრის მოვლა, იახსარმა ხუცურაულებს ჩააბარა. ცხვარი მათ ხელში ისე გამრავლდა, რომ ერთ-ერთი მეცხვარის — მტყუანაიშვილისობას საბატკნე ცხვარი ათასი სული იყო.

ხატის საკუთარი ცხვირიდან დღეობებში იხოცებოდა საკლავები განსახლვრული რაოდენობით. ზოგ დღეობაში მეტი, ზოგში ნაკლები, ზოგ დღეობაში არჩეული საკლავები, ზოგში უფრო მდარე. საკლავების დაკვლისა და რაოდენობის წესი დააწესეს იახსარის ბრძანებით. იახსარი ხევისბერის პირით იტყოდა — ამა და ამ დღეობაში ამდენი საკლავი უნდა დაიკლას ჩემი ფარიდანო ან არჩეული ქედლია, ან ბატკანი და სხვა. ამას იხსომებდნენ და იღებოდა შემდეგი წლებისათვისაც წესად. მატყლი, საკლავი, ყველი და სხვა რაიმე ბანდი ცხვრის შემოსავლისა იქცეოდა ფულად, იხარჯებოდა ცხვრის მწყემსების ჯამაგირად, შირაქში ბინების ასაშენებლად, საზამთრო და საზაფხულო საძოვრების გადასახადად, მატყლისათვის ბარდანების მოსაქსოვად, ცხვრის მწველავების და მპარსავების დასაქირავებლად, ყველის ამოღების მოწყობილობაზე, ყველის გამკეთებლის ჯამაგირზე, ცხვრის გასაპარსი დუქარდებისათვის და მრავალი ასეთი ხარჯებისათვის. რაც ამ ხარჯებს გადაჩებოდა ცოცოტას სხვადასხვა საქმეებისათვის მოიხმარებდნენ. ბოლოს ცხვარმა თანდათან იზარალა და დაიწია რიცხო-

რივად. უკანასკნელად იყო პაპა ხუცურაულის ხელში. იმისგან გადავიდა სხვებზე, არა ხუცურაულებზე და ბოლოს ვერავინ გაიგო, როგორ და სად გაქრა ამდენი ცხვარი (გამრავლებული იყო უფრო ნათავარი დოლისათვის შენაწირით). კურეტებზე ზემოთ გვექონდა ლაპარაკი, ესეთივე წესით გამრავლდა როგორც ცხვარი, მხოლოდ ეს იყო შარტო შენაწირი, ცხვარი კი ნაშენობდა და მრავლდებოდა თანდათანობით. კურეტების მოვლა-წყემსობა ებარა ტოხიანთ გვარს, უვლიდნენ აგრეთვე დასტურებიც.

## დასტურების შეცვლა ამაღლებას

ახალი წლის დასტურნი ხატში შედიოდნენ ამაღლებას. ლუდი ამაღლებას ისევ ძველ დასტურთა მიერ, მორიგეობით რომელნიც ადულებდნენ, იმათგან დამზადებული იყო. ძველი დასტურნი მოიყვანდნენ საკლავს გამოსალოცავს, ხოლო ახალი დასტურნი ერთ საკლავს შესალოცავს. დანარჩენი სახატო განძეულობაც ამ დღეობაში ისევ ძველ დასტურთ მოჰქონდათ და დაალაგებდნენ თავ-თავის დანიშნულ ადგილზე. პირველად დაიკვლოდა ძველ დასტურთ გამოსალოცი საკლავი და შერე ახალ დასტურთ შესალოცი. დაკვლა და დიდება ერთნაირი წესით იყო; საკლავს წამოაყენებდა სასაკლაოზე ერთი დასტური, დააყენებდა პირადმოსავლეთისაკენ. ხევისბერიც ხანჯლით ხელში დადგებოდა მარცხენა მხარეს, დაიწერდა პირჯვარს და დაიწყებდა დიდებას ნელო ხმით: „დიდება შენდა, ღმერთო მალალო, ცათა და ხმელეთის დამაარსებელო. დიდება შენდა, კვირავცხოველო, ხეთისა და ხეთიშვილთ შუამდგომელო, ქრისტეო და ღმერთო, დასწერე ჯვარი ამ მოყენებულთა ზღვენთა, თქვენთა სამსახურთა. ძალი და ბრძანება თქვენგან არის. თორთო ვორციელნი ჩვენ ნმელთაზეით სახელს ვერა გაკადრებდით. რადგანაც ღმერთმა ვმელეთი დააარსა, ცარგვალი დაახურა, მზე-მთვარე დაჰფინა, ხმელეთზე ცხოველნი და კაცნი გააჩინა და მწვანილნი იმათ საზრდოდ მოიყვანა, გაკურთხნათ ხთიშვილნი ხთიშვილნად და ჩაგაზარათ ჩვენი თავი მოსამსახურედ თქვენდა სადიდებლად. თქვენის გამჩენის ხთის ბრძანებითა თქვენ აწესრიგებთ ცათა არსთა და ვმელეთზე არსებულთა კაცთა და ცხოველთა გეხვეწებით და გევედრებით, შაიწირე და ღიბსეულად შიიღე ჩვენი ხვეწნა და ვედრება, ხვეწნაზე და შენის სახელის კსენებაზე ნუ გაგვიწყრები, ნუ გაგვირისხდები, შენის სახელის კირიმე. გახვეწებთ და გავედრებთ ჯერ შენთ საყმობათ, ყმათა თავდადებულთა და შენის სახელის მლოცავთა. საყმობით კიდენა შენის კარისა და შენის საბრძანებლის გორის მლოცავთა. გეხვეწებიან და გევედრებიან, ჩვენო სალოცაო ლალო იაქსარო, დღეს შენნი მლოცავნი, წესისა და რიგის დამყენებელნი, შეიხვეწენ და შეივედრენ,

ზევეწა-ვედრება სასიხარულოდ გაუქადე, სასინანულოდ ნუ გაუქდი-  
დიდება თქვენს ძალსა ყველა წმიდა ანგელოზნო, ყველა ხეთიშვილნო,  
სუ ერთურთის მოდე-მოძმენო, ხეთის და თქვენის მორიგის ნების. ამს-  
რულებელნო, მასკვლავნო ცისანო, მოთანახმენო ხთისანო და სტუმარ-  
მასპინძლნო ერთურთისანო. გაქებთ, გადიდებთ, თქვენი გამჩენი ღმე-  
რთი არ მოგიწყენსთ, არ მოგიძულეხსთ, თქვენ თქვენ ყმათ ნუ მიიწ-  
ყენთ, ნუ მაიძულებთ, თქვენის კარისა და გორის მლოცავთა, თქვენ  
ამებულ-წამებულთა. თუ რამე ეხედვებოდეს — სენი, სევდა, სნეუ-  
ლობა, მაცილ-ფათერაკი, საზიანო საქმე, ისევე თქვენ მგმობარეზე და  
მოლაღატეზე გადაიღოდით, ბევრი გყავთ მაცილ-მოლაღატე და მუხა-  
ნათი, ენითაც, კელითაც და სხვა საქმითაც, თქვენამც იდიდებით, სენსა  
და მავნეს იმათ ნუ ააცილებთ, თქვენთა მლოცავთა და წამებულთა  
ზეით იმათზე გადაიღოდით. თქვენნი მლოცავნი წულსა გთხოვდენ,  
პირველად წულს უმატოდით, ამათ სახში ღონე-ქონებას, კაც-კაცრივ-  
ლობას უმატოდით, მტერს კელი-წმალი აჰკადოდით, სიკვდილის  
გმა მოაშოროდით. ამათ სახშით გამოსულს მოლაშქრეს გაუმარჯოდით.  
მონადირეს ველ მუშმართოდით. გზასა-მომგზავრესა, ცხვარსა, საწყე-  
მსოსა, ამათ მთაბარობასა. ჩემო სალოცავო, ლალო იაცსარო, თუ  
ჩემის უენპირობით ვერ ვასრულებდე ან გეცოდებოდე რამეში  
ჩემის ხორციელობით, მეც მაპატიე ჩემი დანაშაული. ყმა დაუნაშა-  
ვებელი, არ იქნება და ბატონი შაუნდობელი. ღირსეულად მიიღე, ღირ-  
სად შეიწირე, ქსნილად და კურთხეულად ეს წამოყენებული ზღვენი  
შენი სამსახური. ღმერთს გინდოდეს, ღმერთს მიაჯსენე, კვირას გინ-  
დოდეს, კვირას მიაჯსენე. თავისი მოდე-მოძმელთა, ივანე ოქროს პირისაო,  
სანატრელო ხთისაო, ღმერთის დიდებისა და წმიდა ანგელოზთა გამა-  
რჯეებისა“.

ამის შემდეგ დასტური ოთხივე ფეხს დაუჭერდა ცხვარს და ზურ-  
გით თავისკენ დასდებდა, კისერი კი ხევისბერისაკენ ექნებოდა. ხევის-  
ბერი კიდევ იტყოდა ამ სიტყვებს: „შენ სასახელოდ იყოს, ჩვენო სა-  
ლოცავო, დიდო ლალო იაცსარო, ეს სამსახური შამოწირული, შენთვის  
შამოუწირავ გადამდგომთ დასტურთა. შაიწირე, ნუ შეანანებ, სიხა-  
რულად გაუქადე“. გამოუსვამდა ხანჯალს და გამოსჭირდა ყელს (ფშავ-  
შიც ზოგიერთ ხატში და ხევისურეთში ყველგან ხანჯალს წვერით გაუ-  
ყრიდნენ ყელში და ისე დაკლავდნენ, აქ კი პირდაპირ გამოუსვამდნენ  
და ისე გამოსჭირდნენ ყელს). დასტური საკლავს იქით გაიტანდა და  
ბუნნოზე დადებდა. ყველანი დაამწყალობებდნენ: „გწყალობდესთ  
ლალი იაცსარი გადამდგომთ დასტურთა, კვლავ უკეთესი გულით გიმ-  
სახუროსთ და შეგასრულებიოსთ თავისი სამსახური“.

ამავე დიდებითა და წესით დაიკვლებოდა ახალ დამდგომ დასტურთ  
მოყვანილი საკლავიც. ხევისბერი და ხალხი ამათაც დაამწყალობებ-



დნენ და უსურვებდნენ შეუცოდვრად შეესრულათ იახსრის სამსახური — დასტურობა. ეს ორივე საკლავი აქ გატყავდებოდა და ხალხი ჰქამდა (ამ წესზე მერე).

ამის შემდეგ დიდი მადლის თხოვით და პირჯვრის წერით შევიდოდნენ ახალი დასტურნიც და ძველნიც საკოდეში, ანთებდნენ სამ ფეხსანთელს და დააკრავდნენ კოდზე. აქვე დააწყობდნენ ახალ დასტურთაგან მოტანილ საწირავთ (საწირავნი: ერთი თხელი მცირე მოცულობის პური უგულო და სამი სულ პატარა ზედ დაწყობილი პურები), ამოიღებდნენ კოშით ლუდს, გაავსებდნენ სამ პატარა ვერცხლის თასს და დასდგამდნენ საწირავზე. ხუცესი აქვე იდგა პირით აღმოსავლეთისაკენ, გადამდგო დასტურნი და ახალდამდგო დასტურნიც ყველანი აქ იყვნენ ქულმობილნი. ხევისბერი დაიწყებდა ისევ იმ დიდებათ, რასაც საკლავის დაკვლაში. მხოლოდ ის ადგილები, რაშიც განსხვავება იყო კოდის გახსნის და საკლავის დაკვლის დიდებაში, აქ იწერება კოდის გახსნის წესთან:

„დიდება შენდა, ღმერთო მაღალო, დიდება შენდა, კვირავ ცხოველო, ქრისტეო და ღმერთო, დასწერე ჯვარი დანთებულ სანთელთა დაჰკრეთილ სეფისკვერთა, დადგმულ ჭიქა-ბარზიმსა, ძალი და ბრძანება თქვენგან არის..“ და გრძელდება, როგორც საკლავის დაკვლის დიდება, მხოლოდ ზღვის მგაიერ ჩაერთვის: „ანთებულნი სანთელნი, დაჰკრეთილ სეფისკვერნი და დადგმულ ჭიქა-ბარზიმნი“.

ჩვეულებრივ, ხევისბერი დიდებათ რომ დაამთავრებდა, დასტურები თასებს აიღებდნენ, ერთ თასს ხევისბერს მისცემდნენ, ორს დასტურები დაიჭერდნენ (ხევისურეთში ამ დროს დიდი თასები და სახუცო კოჭობი იციან, ფშავში კი როგორც არაყის ჭიქა, იმაზე დიდი თასები არ იცოდნენ, განსაკუთრებით იახსარში) და ხევისბერი კიდევ დაილოცებოდა: „გაუმარჯოს ყველა წმიდა ანგელოზთ და იმათი დავლათა გწყალობდესთ ყველა ხალხსა, ყველა ჩემ ყურთა მსმენელთა, ამ იაქსარის კარისა და გორის მლოცავთა. სწყალობდეს ჩვენი იაქსარი იმ ხალხთაც, ვისაც დღეს მოსვლა უნდოდა და რაიმე მიზეზით ვერ მოვიდა, გაწყალობდესთ ახალ დამდგომ დასტურთაც და გადამდგომთაც. დამდგომნი შაუცოდვრად, შაუწყინრად შაგინანხნისთ და გადამდგე დასტურთ თავისი წყალობა და მოწაღმართე ანგელოზი გამოგაყოლოსთ დალოცვილმა, თუ რაიმე თქვენის უცოდრობით სცოდეთ, შეგინდოსთ და გაპატიოსთ ჩვენმა სალოცავმა ლაღმა იაქსარმა“. ამ დალოცვის შემდეგ ხევისბერი გამოცლიდა თასს. დასტურნიც ასეთივე სიტყვებით ერთიმეორეს დალოცავდნენ და დაღევდნენ. კიდევაც აავსებდნენ და ვისაც დააკლდა, დააღვეინებდნენ. ამის შემდეგ ამ პურს ხევისბერი დანას გაუსვამდა ჯვარედინად, გასერავდა და იტყოდა: „შენ სასახელოდ იყოს, ჩვენო სალოცაო ლაღო იაქსარო, ეს.

დაპერეთილი სეფისკვერიც და ზედაშეც“. ამის შემდეგ კიდევ აავსებდნენ სამივე თასს და ხვეისბერი შენდობას ეტყოდა: „ღიდება ამ ჩვენს სალოცავს ლაღს იავსარსა და ღმერთმა შაიწყალოს ის სულწმიდანი, რომელთაც ჩვენი სალოცავი არ ივიწყებდეს ამ სეფისკვერითაცა და ამ ზედაშითაცა. ჰქონდეს ნაამური შანაძღვენ-შანაწირითა. ჩვენ კი სახელდობრ ვერ ვიგონებდეთ, ან კიდენა ჰქონდეს დანამადლისი, ენითა, ველითა და თავისი შრომითა. შეიწყალოს ასეთი სულელები ღმერთმა და ჩვენმა იავსარმა“. შენდობას რომ ეტყოდა, კიდევ იღებდნენ ჰიქებს ხელში და ასეთივე დალოცვით ყველანი დალევდნენ. ეს რომ მოთავდებოდა, ამ ხნობამდენ ხორციც მოიხარშებოდა ორივე დასტურთ საკლავებისა. ერთი მათგანი ხორცს სუფრაზე ამოალაგებდა და წვრილ-წვრილად დააწილობებდა. დაჭრიდნენ აგრეთვე ხალხის მიერ შემოწირულ პურებს წვრილ-წვრილ ნაწილებად და დააწყობდნენ სუფრაზე. აავსებდნენ კოშს ლუდით, იმასაც იქვე დადგამდნენ სუფრაზე, აანთებდნენ სამ ფეხ სანთელს და დააკრავდნენ სუფრაზე. ხვეისბერს ხელში არაფერი ეჭირა, ფეხზე დადგებოდა, პირჯვარს დაიწერდა და სუფრას შანდობას ეტყოდა:

„ღიდება და გამარჯვება მოხსენდეს ძალას ზთისას, სამართალს კვირაისას, იმათ მოთანახმე წმინდა ანგელოზებს, ნაცსენებ ზეთიშვილების მადლი სწყალობდეს დამდგომ დასტურთაც და ძველთ, გადამდგომ დასტურთაცა. გიემოსთ და გიმსახუროსთ, შაუწყინრად, შაუცოდვებლად. გადამდგომთ თავისი წყალობა გამოგაყოლოსთ და დამდგომს თავისი წყალობის თვალი და გული დაგაყოლოსთ. ღმერთმა შაიწყალოს, როგორც წესი და რიგი ჰქონდეს ჩვენს სალოცავს, ამ დასტურების შაცვლაზე, რომელნიც სულწმიდანი მოგვბერიოდენ და მოგონებას მოგველოდენ, ჩვენ სახელდობრივ ვერ ვიჯსენიებდეთ, ჩვენი სალოცავი არ ივიწყებდეს, ჰქონდეს ნაამური ენითა, ველითა, თუ შანაწირით-შანაძღვენითა, დადგმული სუფრა. დანთებული სანთელი, საქმელი და იმათ ზედამრჩოთაზედა წყალობით იყოს ჩვენი სალოცავი დიდი იავსარი“. ამ დალოცვის შემდეგ ყველანი იტყოდნენ: „შაიწყალოს ღმერთმა“. აიღებდა ხვეისბერი კოშს, ჯერ თვითონ დალევდა ცოტას, მერე მოულოცავდა ძველ გადამდგომ დასტურთ და ეტყოდა: „აი, ამ თასითა და ზედაშითა მოგილოცავთ დასტურობიდან და ჩვენ იავსარის სამსახურიდან ერთი წლის შასრულებას და განთავისუფლებას. წყალობით იყოს ჩვენი სალოცავი თქვენს თავ-ჯალაფობაზედა. ამ ერთის წლის განმავლობაში თქვენის უტოდრობითა და ხორციელობით თუ რაიმე სცოდეთ, გაპატიოსთ დალოცვილმა და მრავალჯერ გიმსახუროსთ მშვიდობითა“.

ძველი დასტურები კოშს ჩამოართმევდნენ და თითობით დალოცებოდნენ: „ღიდება ღმერთსა და ჩვენს იავსარსა და იყოს მწყალო-

ბელი ჩვენ გადამდგომ დასტურთი და ჩვენი თავჯალაფობისი. შავენ-  
დოს და გვაპათიოს დალოცვილმა, ჩვენის გორციელობით რაცა ვცო-  
დეთ ამ ერთი წლის განმავლობაში“. ამ სიტყვებს ორივენი გაიმეო-  
რებდნენ და ცოტას დალევდნენ. ბოლოს კოშს მიულოცავდნენ ახალ  
დამდგომ დასტურთ და ისინიც გადამდგომ დასტურთ დაამწყალობებ-  
დნენ. მერე კოშს ისევ ხევისბერს გადაულოცავდნენ დამდგომ დას-  
ტურთ დასამწყალობებდად. დამდგომ დასტურთ დამწყალობების  
დროს ისინი ზემოთ, მარჯვენა მხარისაკენ, იდგნენ, ხოლო დამდგომი  
დასტურნი ქვემოთ, მარცხენა მხარისაკენ. ახლა შესცვლიდნენ ადგი-  
ლებს: გადამდგომ დასტურნი ქვემოთკენ გადმოდგებოდნენ, ახალდამ-  
დგომნი დასტურნი კი ზემოთ გადავიდოდნენ მარჯვისაკენ. ხევისბერი  
ახლა ახალ დამდგომ დასტურთ დაამწყალობებდა და მიულოცავდა  
კოშს ამ სიტყვებით: „ამ თასითა და ზედაშითა გილოცავთ დასტურად  
ახალ დადგომასა, ვთხოვ ჩემის ცოდვილის ენებირითა დალოცვილს  
ჩვენს იავსარსა, რომა წყალობით იყოს თქვენზედა, მშვიდობითა და  
უცოდველად გატარებისთ ეს მომავალი წელი და შეგესრულებიოსთ  
ჩვენის იავსარის სამსახური შაუცოდველადა და შაუწყინრად. თუ  
რაიმეს თქვენის გორციელებითა და უცოდრობით სცოდავთ, თავის ან-  
გელოზობით ვაპათიოსთ დალოცვილმა, ყმა შაუცოდველები არ იქნე-  
ბა და ბატონი შაუნდობელი“.

ამ სიტყვებით ხევისბერი კოშს გადასცემდა ახალ დამდგომ დას-  
ტურთ. ისინიც ჩამოართმევდნენ და დაილოცებოდნენ. ჯერ ერთიმე-  
ორეს დალოცავდნენ და მერე თავისთავსაც მიაყოლებდნენ: „გწყალობ-  
დესთ დალოცვილი ჩვენი სალოცავი ლალი იავსარი, მშვიდობით დაწყე-  
ბული მისი სამსახური მშვიდობით და უცოდველ-შაუწყინრად დაგვა-  
მთავრებისთ, უშველოს დალოცვილმა ჩემს სახ-ჯალაფობასაც, წელი  
მშვიდოწისა დაგვიყენოს და რასაც ვცოდავთ უმეცრებითა და კორ-  
ციელობითა, გვაპათიოს და კვლავად უკეთესი გულით შეგვახვედროს  
მისი სამსახური, დასტურობა“. ცოტას ორივენი დალევდნენ და ამ  
სიტყვებით დაილოცებოდნენ. მერე გადასცემდნენ კოშს გადამდგომ  
დასტურთ. ისინიც ასეთივე შინაარსის სიტყვებით ახალდამდგომ დას-  
ტურთ დაამწყალობებდნენ და ცოტ-ცოტას დალევდნენ. ბოლოს  
თასს ისევ ხევისბერს გადაულოცავდნენ. ის გამოსცლიდა და გადაუ-  
ხდიდა მადლს: „ასე დაგეცალოსთ მტერი და ორგულიცო“, და დახ-  
რიდა კოშს. დასტურნი კოშს ჩამოართმევდნენ, ხევისბერი წავიდოდა  
და დაჯდებოდა თავის ადგილზე. დასტურები კი ჩხუტს ან სპილენძის  
ქებას ავსებდნენ ლუდით, გამოიტანდნენ გარეთ, სადაც ხალხი ბუს-  
ნოზე ისხდა. მოიტანდნენ თუ რამე ჰქონდათ სუფრის მაგივრად ვასა-  
შლელი და გაუშლიდნენ ხალხს, თუ არა, პურებსა და ხორცს ყველას  
დაუწყობდნენ წინ. ხალხი ისწადა უსკამოდ ბუსნოზე და სუფრის მაგი-

ვრობასაც გათელილი ბალახი ასრულებდა. სადაც ხევისბერი იჯდა დასვამდნენ პატივსაცემ სტუმრებს ან ხნიერ კაცებს და საერთო სუფრას დაუდგამდნენ. თავთავის კერძი წილობების მაგიერ მათ ხორცსაც საერთოდ უწყობდნენ და პურსაც. ყველა აიღებდა ხელში პურს, გატეხდა და იტყოდა: „ღმერთო, გაუმარჯვე დიდს იავსარსა და, იავსარო, შენ სწყალობდი შენთ ყმათა, ყმათაში დასტურთა ახალ დამდგომთა და გადამდგომთა და ყველა შენ მსახურთა“. ამის შემდეგ დაიწყებდნენ პურის ჭამას. ძველი დასტურნი უკვე აირეოდნენ ხალხში, ახალ დამდგომი დასტურნი კი არიგებდნენ ლუღს. ყველა დაილოცებოდა ფეხზე აუღდგომლად ძველთა და ახალ დასტურთა დამწყალობებით.

იმართებოდა სმა და დროსტარება: ცეკვა, სიმღერა. სიმღერა აქ მარტო ფშაურ კილოზე იცოდნენ. რაკი იახსარი დევებთან მეზობლოდ იყო, ხშირად ჩამოვარდებოდა ლაპარაკი იმის გმირობაზე, დევკერპებზე და სხვა. მოიგონებდნენ აბუდულაურს და მღეროდნენ მასთან დაკავშირებულ დევების ლექსებს. ლექსს ჯერ ერთი იტყოდა სიმღერით და ბანს ყველანი ერთ ხმაზე ეტყოდნენ; მღერა შეიძლებოდა ერთი კაცის ბანის თქმითაც და რამდენიმე მეზნითაც. ერთი რასაც იმღერებდა, მეორე მეორე გაიმეორებდა ამ სიტყვას და ბანს ყველა ეტყოდა; პირველი და მეორე მომღერალიც ერთიმეორეს ბანს ეუბნებოდნენ.

ლხინისა და სმა-ჭამის დროსვე თავხევისბერი წავიდოდა დე სანთელს აანთებდა სასანთლეში. სასანთლე — პატარა კოშკი, საზარესთან იყო ახლო აშენებული, პატარა საკვამის ოდენა ადგილი ჰქონდა დატოვებული, რომლის შიგნით ქვა იყო გამოჭარბებული, რაზედაც ანთებულ სანთელს დააკრავდნენ და გარედან სიძს მიუღობებდნენ, რომ სანთელი ქარს არ დაეჭრო. სანთელს თვითონ დასტურ-ხევისბრები დაახვევდნენ (ჩამოქნიდნენ) ხალხის შეწირული, გამდნარი სანთლიდან. სანთელს თითქმის ყველა მლოცავი სწირავდა ნახევარ გირვანქამდე. ზედ გადაახვევდნენ ბამბის ძაფს, რომელიც ამ სანთელს გულად ეყოფოდა. პირველ შეწირვაზე ხევისბერი ეტყოდა: „ამ სანთლის შემოწირვისათვის წყალობით იყოს შენზედა, ჩვენი იავსარი“. სანთელი ერთ კოლოფში გროვდებოდა და საჭიროების დროს ხარჯავდნენ. ამბობდნენ: ვისი შემოწირულიც არის, იახსრის წყალობა მაინც მას ეკუთვნის, რისთვისაც არ უნდა დაენთოსო.

დასტურ-ხევისბრები ბლომად სანთელს დაწყობდნენ ცეცხლთ ახლოს. რამდენიც გალხვებოდა, დანით სთლიდნენ და ხელში ზელდნენ. როცა სანთელი საკმარისად გალხვებოდა, ერთი მათგანი ბამბის ძაფს დაიჭერდა, მეორე კი დაანვევდა; ზოგს წვრილ სანთლებს აკეთებდნენ, ზოგს კელაპტრებს. ცხრა ფეხ სანთელს და ერთ კელაპტარს სასანთელსთან წაიღებდა ხევისბერი (სასანთელსთან სხვა კაცი ვერ

მივიდოდა, გარდა თავხევისბერისა, რომელსაც სანთლის ანთება და საკლავის დაკვლა ებარა), მივიდოდა ქუდმოხდილი და ფეხშიშველი პირჩვრის წერით და თხოვნით: — დალოცვილო იახსარო, ნუ შამისაწყინდები, რომა მე უღირსი ხორციელი შენს წმიდა ადგილს ფეხით ვლახავ, სანთელს ვანთებ და შენს წმინდა ადგილს ვახსენებო. მერე აანთებდა სანთლებს, დააკრავდა შუკუნში ქვაზე და პირჩვრის წერით იტყოდა: „დიდება ძალსა და სახელსა შენსა, დიდო იაქსარო და კვირაცხოველო. ღაღო იაქსარო, ამ სანთელ-კელაპტრით შენა სწყალობდე შენთ ყმათა და ყმათაში შენს სამსახურზე თავდადებულთა, შენსა და ხალხის ერთგულთა, დაიქსენ ყველა გაჭირვებიდან შენნი საყმონი, დაეკმარე ველთაცა და შინაცა. დაეკმარე მაგათ კაც-საქონსა და ცხვარსაწყემსოთა“.

მერე ხევისბერი პირჩვრის წერით დაბრუნდებოდა ხალხთან და ეტყოდა: „გწყალობდესთ ყმათ ღალი იაქსარი, გიშველოსთ და გიმეშველოსთ დალოცვილმა, დაგიქსნასთ ყველა გაჭირვებიდანა“. ხალხიც ქუდმოხდილი ფეხზე ადგომითა და პირჩვრის წერით შეხვდებოდა და ეტყოდა: „შენიცამც მწყალობელია და შენის თავჯალაფობისი“. ამის შემდეგ ისევ გრძელდებოდა სმა-ჰამა და მღერა-თამაშობა, მოდიოდა მეზღვხე, იხოცებოდა საკლავი, მოდიოდა ქადა-პური, სანთელი და სხვა შესაწირავი. დასტურ-ხევისბრები ყველა შემოწირულს აწესრიგებდნენ და ამწყალობებდნენ ხალხს. ქადა აქაც მოდიოდა და აქვე ახლო ზთიშობელია, ადგილის დედა, იქაც პატარა კოშკი დგას და სანთელს ანთებდნენ, საკლავსაც კლავდნენ. ქადა აქ ყველას მიაქვს ნათავარისა. ქადას დასჭრიდა დასტური, მიიტანდა და სიპზე დადებდა (ამას სანთელს არ უნთებდნენ, ქადაზე ჩამოსაქნელ სანთელს კი მოაყოლებდნენ. როგორც ზემოთ ვთქვით, სანთელი შემდეგვისათვის ინახებოდა, ქადას აქ სანთლის აუნთებლად სჭრიდნენ). ქუდმოხდილი დასტური პირჩვარს დაიწერდა და იტყოდა: „დიდება ძალსა შენსა, დედაო ხთიშობელო, შენა სწყალობდე შენთ მეხვეწურთა, რასაც მვარ-გულზე გეხვეწებოდეს, იმ მვარ, იმ გულზე უშველე, რაზედაც შეთქმული ჰქონდეს შენთვინა ქადის შემოწირვა, იმ საქმეში დაეკმარე, დალოცვილო. შენი გასამრჯო იყოს, მაგისი სამწყალობნელო“. ამ სიტყვებს რომ იტყოდა, ქადას დანას გადაუსვამდა ჯვარედინად და ცოტათი გასერავდა ერთ მეოთხედს კი გამოსჭრიდა, რაც დასტურ-ხევისბრებს რჩებოდათ, სამი მეოთხედი ქადისა პატრონს უბრუნდებოდა. მერე ჩვეულებრივად დაიკვლოდა მეზღვნეების ზღვენი, რაზედაც ვის ჰქონდა შეთქმული (საკლავის დაკვლიან წესი და დიდება ზემოთ არის ჩაწერილი). ზოგს ისე ჰქონდა შეთქმული, რომ აქ უნდა მოეხარშა ხორცი და სუფრა გაემართა, ზოგს კი შინ მიჰქონდა, მხოლოდ ხევისბრებსა და

დასტურებს აძლევდნენ ერთ მხარსა და ტყავის სახსარს, ერთ აბაჯ ვერცხლის ფულს.

ვისაც შეთქმული ჰქონდა სუფრის გაკეთება, ან: ახალი მკედლის პატრონი იყო, ან ძველი სულის მოხსენიება სურდა, აქ მოხარზავდა ხორცს და გამართავდა სუფრას. აქვე იცოდნენ სკამის ნათელა. იახსარში საბეროში იყო ქვის შვიდი სკამი, რომლებიც ეკუთვნოდათ ძველ ხევისბრებს, ვინც უფრო ხატის რწმუნებულები იყვნენ, ე. ი. ხატთან დაახლოვებულები. (ყველა სამლოცველო ადგილს ხევსურულად ჰქვიან „ჭაბრნი“, ფშაურად „ხატი“ ან „ხატნი“), რომლებიც ითვლებოდნენ უფრო წმიდა ხევისბრებად. ამ სკამების პირველი პატრონები თანდათან დაავიწყდათ. იციან, რომ ეს შვიდი სკამი არის წმიდა ხევისბრების კუთვნილი, ოღონდ ვისი რომელია, ეს აღარავენ იცის. იცოდნენ და იციან გადმოცემით ისაც — ვისი წინაპრები იყვნენ ასეთი ხევისბრები, სწორედ მათ შთამომავლებს მკითხავები ხშირ შემთხვევაში ავალებდნენ თავისი წინაპარი ხევისბრის სკამის ნათელას და ამ საკლავის ხორცი თამავე ხევისბრისათვის სუფრის დადგმას ხატში, ე. ი. იახსარში. იმასაც მკითხავევ აღნიშნავდა, რომელ დღეობაში შეესრულებინათ ეს სამსახური. იმ დღეობაში, რომელშიც მკითხავემა დაავალა, მეზღვნე მოიყვანდა საკლავს, მოიტანდა ქადას, პურს, მარილს, სანთელს და ქვაბსაც.

საკლავს ჩვეულებრივად დაკლავდა იახსარისთვის, დიდებაში ჩაურთავდა: „მოუყვანია, ლალო იაჯსარო, სამსახური შენდა სადიდებლად და შენის რწმუნებულის (სახელი იმ ძველი ხევისბრისა, რომლის სკამის სანათლავადაც არის საკლავი მოყვანილი) სკამის სანათლავად და იმის სულის გასანათლებლად. ღირსეულად შეიწირე, ლალო იაჯსარო, ეს შემოზღვნილი ზღვენი; შენ იდიდე და იძლიერე, იმ სულიწმიდას კი განათლება მიეცი და ზღვნის შემომწირველს შენი წყალობა, დაეკარე შენის სახელის ჭირიმე ველთაც და შინაც, ცხვარშიც და სამწყემსოშიც“. დანარჩენი დიდება ჩვეულებრივია. საკლავს ყელს გამოსჭირდნენ და მეზღვნეს დაამწყალობებდნენ. საკლავის დაკვლის დროს აქ იდგა პატარა სპილენძის თასი, რაშიც გროვდებოდა საკლავის სისხლი, რომელსაც ზემოხსენებულ შვიდს სკამს ასხურებდნენ ე. ი. ხევისბრების ყველა სკამს. საკლავს რომ დაკლავდნენ, დასტური ბუსნოზე დადებდა მას, საკლავის პატრონი თავს სულ გადასჭრიდა და მისცემდა დასტურ-ხევისბრებს, გაატყავებდა და ერთ მხარს მათვე აუჭრიდა (საკლავის გატყავება ხევსურეთში სხვა წესით იცოდნენ, აქ სხვა წესით. ხევსურეთში საკლავის ტყავს გადასჭრიან წინა ფეხებიდან, გაუვლიან მკერდსაც და წინა ფეხებსაც ორივეს ერთურთის მოპირდაპირედ გასერავდნენ მუხლამდინ. ასევე უკანა ფეხებს, ყელიდან ჩაპყვებიან ტყავის ვაჭრას და ჩავლენ ღუმის წვერამდინ და მერე

მთლად გაატყავებენ. ფშავში კი უკანა ფეხებზე გადასერავენ, წინა-  
ფეხებზე და მკერდმუცელზე აღარ დასჭრიან და გამოვა გულა. ამი-  
ტომაც არის, რომ თუ ხატში მოსახარშად არა აქვთ შეთქმული, ფშა-  
ველი გატყავებულ საკლავს სახსრებზე დასჭრის, აწყობს ამავე საკ-  
ლავის გულად გახდილ ტყავში, მოაკრავს ორივე მხარეზე პირზე ბა-  
წარს და ხორცი ისე მიაქვს შინ): დანარჩენ ხორცს ასო-ასოდ დას-  
ჭრიდა, ჩაყრიდა ქვაბში და მოხარშავდა. ქვაბის დასადგმელად ან ორ-  
კუთხიან ქვას დადებდა და ზედ ქვაბს დაადგამდა, ან იქით-აქეთ ორ-  
ჯოხს დაარჭობდა მიწაში, მესამე ჯოხს ზედ გასდებდა, რაზედაც ქვა-  
ბის ხელი იქნებოდა გაცმული და ჩამოკიდებული. ცეცხლს შეუთებ-  
დნენ და მოხარშავდნენ. ამავე საკლავის პატრონს სახლიდან მოტა-  
ნილი ჰქონდა რამდენიმე ჯამი წვეწვანის დასალევეად; პურიც სახლიდან  
ჰქონდა მოტანილი. სუფრის მოტანაც იცოდნენ თუ ჰქონდათ. მსხა-  
ლი, ვაშლი, თხილი, კაკალი ხშირ შემთხვევაში ინახებოდა ფშავლისა  
ოჯახში, იყენებდნენ სუფრაზე, ჰირ-ლხინის დღეში მეზობელთან მისა-  
ტანად, სტუმრებთან და სხვა. ასეთი სუფრისათვის კი, როგორც აქ  
უნდა გაიმართოს, ხომ აუცილებლად ჰქონდათ ასეთი „სალაღობო“.  
ხორცი რომ მოიხარშებოდა, ამოიღებდნენ ქაფქირით, რომელიც თან  
ჰქონდათ მოტანილი, ჩააწყობდნენ ბაკანში, დაჭრიდნენ წილობებად,  
პურსაც დასჭრიდნენ და გაშლიდნენ სუფრას, დააწყობდნენ ზედ პუ-  
რის ნაჭრებს, დადგამდნენ ბაკნით სალაღებელს, ხორცსაც ბაკნით და-  
დგამდნენ, წყალს ჰურჰლით (დოქით), სასმელს დაახამდნენ ყან-  
წში და მისცემდნენ ხევისბერს. სანთლებს დაანთებდნენ და დააკრავ-  
დნენ სუფრასთან დადგმულ ხილზე, პურზე, სასმელზე, წყალზე და  
სხვა. ხევისბერი სუფრას ჩვეულებრივი წესით შენდობას ეტყოდა:  
„დიდება მორიგეს ღმერთსა კვირაცხოველსა და ლალ იავსარსა. ლალო-  
იავსარო, შენა სწყალობდე შენთ საყმოთა და შენს საყმოშით შენთ  
გორის მლოცავთა და კარის მლოცავთა, ჩვენო სალოცაო ლალო იავ-  
სარო, შენ უშველე ამ სუფრის პატრონსა, შენთვის ზღვენი არ დაუ-  
კლავ და სულწმიდათთვის დადგმული სუფრა, შენ შენს წყალობას  
ნუ დააკლებ. შეიწყალოს ღმერთმა ამ პურ-სუფრითა და სანთელ-  
კელაპტრით კია, ვისთვისაც გამეტებული იყოს ეს სუფრა (იმ მიცვა-  
ლებულის სახელი, რომლისთვისაც სუფრაა დადგმული და სკამი დაი-  
ნათლა). სულის მადლმა და ხეთისამა ამ სუფრის პატრონს კი უშ-  
ველოს და თავის ნაშრომ-ნაამაგარს ბარაქა დაატანოს“. — „შეიწყა-  
ლოს ღმერთმა“, — იტყოდნენ ყველანი. მერე პურსაც და ხორცსაც  
თავთავის კერძს ყველა დაუწყობდნენ. სუფრის წესი ჩვეულებრივ ჩა-  
ტარდებოდა, იმართებოდა სმა-ჰამა და მღერა-თამაშობა. დღეობა  
გრძელდებოდა საღამომდე, საღამოყამს თას-განძს დასტურნი თავის  
ადგილზე მიაბძანებდნენ და შეინახავდნენ. ხალხი თითო-ოროლობით

წავიდ-წამოვიდოდა მადლის მოთხოვით და დასტურ-ხევისბრებისაგან დამწყალობნებით.

#### ს ე რ ო ბ ა

ამაღლების შემდეგ მოდიოდა დღეობა ს ე რ ო ბ ა, ძველი რიცხვით მკათათვის ექვსში. ამ დღეობისათვის დასტურნი კარგა ბლომად ლულს ამზადებდნენ, რადგან ყველაზე მთავარი დღეობა იყო. შორიდან მოსასვლელადაც ზაფხულობით ყველგან გზები იყო გასული. ამავე დროს მთებში ცხვარი უკვე ამორეკილი იყო და საკლავს ადვილად შოულობდნენ. ყველა ამ მიზეზის გამო ყმათ გარდა სხვა მლოცავეებიც ბევრა იყრიდა თავს. სასერობოდ უპირველეს ყოვლისა გზავნიდნენ შეკულუხეს და მოჰქონდათ კულუხი როგორც ვიცით, ფშავ-ხევსურეთში მთავარ სალოცავეებს ბევრს ჰქონდა ახმეტაში და მის ახლომახლო სოფლებში ვენახები. ვენახები იყო მაშინ შეწირული, როცა თუშ-ფშავ-ხევსურებმა ბახტრიონიდან თათრები გარეყეს. ძველები იტყოდნენ: მაშინ ფშაველ-ხევსურხი სალოცავეების დროშით იყვებნ და როცა მტერი დაამარცხეს, მეფემ უთხრა: ვის რა გინდათ, რომ გაჩუქოთ. თუშებმა შოთხოვეს ალვანი, ფშაველ-ხევსურებმა თქვეს: ჩვენ მთის ხალხი ვართ. ბარში არ ვიგვარებთ, ამ გამარჯვების ნიშნად ჩვენს სალოცავეს ვისი დროშებიც არის, ახმეტაში და ახლომახლო სოფლებში თითო ვენახი შემოსწირეთო. მაშინ შესწირეს ვენახები: გუდანის ჭვარს, არხოტის ჭვარს, კარატის ჭვარს, კოპალას, ლაშარის ჭვარს, თავარშოწამეს და იახსარსაც მაშინ შეწირული ვენახი ჰქონდა. ახმეტაში ვენახი, შემოღობილი იყო ჭვის კედლით, ერთი კარგი მარანი ჰქონდა და იქვე ბატარა კოშკი დროშის საბძანებელი, აქვე იყო მეზვრისათვის აშენებული საცხოვრებელი ბინა და ჰყავდა მუდმივი კაცი, რომელიც უვლიდა ვენახს, ინახავდა სახატო ქონებას, რაც კი სჭირდებოდა ვენახის დამუშავებას, ყურძნის დაწურვას, ღვინის დაყენებას და სხვა. ამავე დროს ის კაცი ყარაულობდა ვენახს და ხელმძღვანელობდა მუშას. ქვევრები სხვაც ჰქონდათ, მაგრამ ერთი ქვევრი კაჟის ქვისაგან ამოჭრილი იყო და არაჩვეულებრივი კარგი ღვინო დგებოდა მასში. ყურძენი რომ დაიწურებოდა, ამ ქვევრში მაშინ ჩაასხამდნენ ტკბილს, იფუვლებდა და წამოღებამდინ ასე იყო, სხვა ჭურჭელი არ სჭირდებოდა, იდგა ჭაქაზე სერობამდე. სერობას მეკულუხე რომ მივიდოდა, მაშინ ახდიდნენ თავს და გადმოიტანდნენ საცალო ტიკებში (ამაზე მერე გვეჩნება ლაპარაკი).

ქვევრი ამოჭრილი იყო ერთი კოჭლი კაცის მიერ, ამიტომ ამ ქვევრს „კოჭლაური“ ერქვა საკუთარ სახელად. იახსარმა რომ დევები ყველგან ამოწყვიტა, ნახა, რომ ეს კოჭლი კაცი დევებს ჰყავდათ დაქე-



რილი და აკეთებინებდნენ სხვადასხვა იარაღებს. ეს კოქლი კაცი იყო სახელგანთქმული მკვდელიც. იახსარი მივიდა მასთან და უთხრა: დევების პატიმრობიდან დაგიხსნი, თუ ერთს ტალის (კაყის) ქვევრს ამომიჭირო. კოქლმა პირობა დაუდო: ოღონდ ამათ ხელიდან დამიხსენი და ისეთი ქვევრს გავაკეთებ, რომ იმისი ცალი ქვევრი არც აქნობამდე გაკეთებულიყოს და არც ამის შემდეგ ვისმეს შეეძლოს იმისთანა ქვევრის გაკეთებაო. დევები იორზე ცხოვრობდნენ; ერთ დღეს, როცა ყველანი შინ იყვნენ, დაეცა იახსარი თავს და თავისი ლახტით სულ ამოწყვიტა, კოქლი კაცი კი წამოიყვანა მშვიდობით. იგი დაბინავდა ახმეტაში, გამართა სამკვდლო. ისეთი იარაღები გააკეთა, რომ ქვას ხესავით სჭრიდა და ამოთხარა ტალის ქვევრი. ეს კაცი იახსარმა თავის მარანში დააბინავა და სიკვდილამდე აქ ცხოვრობდა, პატრონობდა ვენახს და სახატო ქონებასაც უვლიდა, ქვევრი თვითონვე ჩააგდო მიწაში და გამოდგა ისეთი, როგორც ზემოთ ვთქვით.

მეკულუხე რომ მოემზადებოდა, შეუთვლიდნენ უფრო სამგზავროდ 'საიმედო', ამასთან მორწმუნე კაცებს. მოემზადებოდნენ თავხევისბერი და ორი დასტური, იშოვიდნენ თავისთვისაც და ღვინის მოსატანადაც კარგ ცხენებს, საცალო ტიკები სახატოც ჰქონდათ და, რაც დააკლდებოდათ, სოფელში იშოვნიდნენ. ხევისბერი დაკლავდა ერთ საკლავს ხელმხრის სანათლავს (დროშათ აბმის დროს ხელმხრის ნათვლა ჩვეულებრივი ამბავი იყო), მერე ააბამდა დროშას. დროშა ძველად აქაც სამი იცოდნენ — ერთი ზარით და ვერცხლის ჭვარით, ორი რკინის შუბით. ყველა ეს მასალა ჩალაგებული ჰქონდათ პატარა კიდობანში. თანაც საჭირო ბაღდადეგი (აბრეშუმის თავსაფრები) იყო ჩაწყობილი, რომელიც დროშას სჭირდებოდა და ხალხისაგან იყო შეწირული.

ხევისბერი ყველა ამ მასალას ამოიღებდა და დააწყობდა იქვე საამისოდ გაკეთებულ და წმიდად დაცულ სიბზე (წმინდად დაცული იმით იყო, რომ იმ სიბთან ყველა ვერ მივიდოდა, გარდა ხელწმინდა კაცისა). პირველად აიღებდა ხელში მგზავრი დროშის ტარს, მოახვევდა წვერზე ერთ ბაღდადს, ჩამოაცემვდა ზედ ვერცხლის ბურთს, დაიწერდა პირჯვარს და იტყოდა: „დალოცვილო ჩემო სალოცაო იაქსარო, ნუ შამისაწყინდები კორციელსა შენი წმიდა ხატის ხელის კადრებისათვის. შემინდევ, დალოცვილო, რასაც გცოდავ ჩემის კორციელობითა“; აიღებდა ხელში ჭვარს, ემთხვეოდა და გაუკეთებდა ბაღდადმოხვეულ წვერზე. მერე თითობით შეაბამდა ბაღდადებს დროშის ტარზე; შემდეგ შეაბამდა პატარა ზარს. ასევე მორთავდა სხვა ორ დროშის ტარსაც, ოღონდ წვერში უკეთდებოდათ შუბები რკინისა. კულუხე წამსვლელნი ყველანი გაბანილ-გასუფთავებულნი წმიდად მოვიდოდნენ და

გამგზავრებისათვის ყველაფრით მომზადებულნი იდგნენ, როცა ხევისბერი დროშით ააბამდა. სადიდებელი იქნებოდა ამ დროს ლუდი ან არაყი, რომელსაც მიაართმევდნენ ხევისბერს, სანთელსაც აანთებდნენ და ხევისბერი მოკლე სიტყვებით დაილოცებოდა: „დიდება ძალსა ღვთისასა, დიდება შენდა, კვირავ ცხოველო, დიდება შენდა, ჩვენო სალოცაო ლალო იავსარო, მოგზაურო ანგელოზო. გვედრებით და გეხვეწებით, ლალო იავსარო, უშველე შენ ყმათა და ყმათაში შენის წმიდა დროშის თანამყოლთა კულუხის მომტანთა, შენთა წამებულთა. შაიხვეწენ, ჩვენო სალოცაო ლალო იავსარო, მგზავრობა მშვიდობისა მიეც და მოსულთა ხიზან-ჯალაფობა მშვიდობით დაახვედრე. შენდა სასახლოდ იყოს ეს სანთელ-კელაპტარი და ეს ზედაშე და ამ მგზავრთა სამწყალობნოდ“. ხევისბერი რომ დიდებას გაათავებდა, ყველანი იტყოდნენ: „ამინ, დალოცვილო ჩვენო სალოცაო, გვიშველე და გვამგზავრენ მშვიდობითა“. ხევისბერი თასს გამოცლიდა, დაასხამდნენ და ყველა მეკულუხეს თითო თასს მისცემდნენ. ყველანი დაილოცებოდნენ და სთხოვდნენ იახსარს, მიეცა მათთვის წყალობა და მშვიდობით მგზავრობა. თასებს ყველანი გამოცლიდნენ, ააბრძანებდა ხევისბერი დროშას, გადაიწერდნენ პირჯვარს და გაემგზავრებოდნენ. ერთ დღეში ჩავიდოდნენ ზემო თიანეთში, იქ იახსრის ნიშია დროშის საბძანისი და იმ ღამეს იქ დადგებოდნენ. ვისაც შუაფხოში წამოსვლის საშუალება არ ჰქონდა და ზღვრობა კი უნდოდა, აქ უხვდებოდნენ იახსრის დროშას და ზღვრობდნენ. ზემოთიანეთში, ტუშურიანთსოფელში გვარად სულ ტუშურები ცხოვრობდნენ. ესენიც ეყმობოდნენ იახსარს, ხევისბრებიც იყვნენ აქაურები. ამათ სოფელში კი იშვიათად ვინმე დარჩებოდა, რომ კულუხიდან დაბრუნებულს იახსარს არ დახვედროდა ზღვრით და მის მსახურთა პატივისცემით.

ზემოთიანეთში ერთ ღამეს გაათევდნენ, ხატს ადიდებდნენ, საკლავებიც დაიკვლებოდა. იმ ღამეს სულ ქეიფში და მღერა-თამაშობაში გაატარებდნენ, დილით კი გაემგზავრებოდნენ. საღამო ხანზე ახმეტაში თავის მარანზე იყო იახსრის დროშა. აქაც ბლომად ხალხი ელოდებოდა, იცოდნენ, რა დღეს იქნებოდა იქ იახსარი და მის მლოცავნი მზად იყვნენ. ორშაბათ-საღამოს არ ასცდებოდა, იახსრის დროშა და მეკულუხე მარანზე გაჩნდებოდნენ, ხევისბერი დროშას გამოიღებდა, დაიჭერდა ორივე ხელში და მარცხნიდან მარჯვნივ ზარის წკარუნით მარანს შემოუვლიდნენ გარშემო. იყო შემთხვევა, რომ ვენახსაც შემოუვლიდნენ, თუ ეს იახსარისაგან იქნებოდა ნაბრძანები. შემდეგ ხევისბერი დროშას მიაბძანებდა თავის საბძანის კოშკზე, მობრუნდებოდა და დაამწყალობებდა იქ მყოფთ: „გწყალობდესთ ლალო იავსარი, დროშისათვის მყოლი მოგზაური ანგელოზი იმის მლოცავთა ყმათა და თანამყოლთა, ამ თავის საბძანებელის და მისი მარნის კარის

ლოცვა ნუ შეგანანასთ, სიხარულად გაგივადოსთ და კვლავ უკეთესის გულით მიგაგებოსთ ამ დღესა. ხალხი ამ დროს ქუდმოხდილი იდგა პირ-ხევისბრისაყენ და პასუხობდნენ: „თქვენიცამც მწყალობელია“. მეკულუხეს აქედან თან მიჰყავდა ერთი საკლავი. ცოტა შესვენების შემდეგ ამ საკლავს დასტური დროშასთან წამოაყენებდა და ხევისბერი, როგორც ზემოთ ვთქვით, იმ წესით დაკლავდა საკლავს, ოღონდ ზოგიერთ ახალსაც ჩაურთავდა დიდებაში და დამწყალობებში. ახსენებდა იახსარს, დროშისათვის მყოლ მოგზაურ ანგელოზს, სთხოვდა გზაში და მგზავრობაში ხელის მომართვას და უცოდრობით, რასაც იახსარის სურვილის წინააღმდეგ ჩაიდენდნენ გზაში და მგზავრობაში, ამის პატიებას. დამწყალობებიცა ჩვეულებრივ დაამწყალობებდა: გწყალობდესთ ლალი იახსარი, მგზავრი ანგელოზიო და სხვა. დიდებით შემდეგ საკლავს ყელს გამოსჭირდა დასტური განკუთვნილ ადგილზე და დაამწყალობებდნენ ყმათ, საყმოთ, იახსარის მარანზე მოსულ მლოცავთა და იმათაც, ვისაც მოსვლა სულით და გულით უნდოდათ და რაიმე მიზეზის გამო ვერ მოვიდნენ. საკლავის დაკვლის დროს სასისხლე თასი ედგათ, რაშიც სისხლი ჩადგებოდა, ერთ-ერთი ამ თასს აიღებდა და ბალახის ქუჩით ასხურებდა მარანსა და მის მიდამოს შიგნით და გარეთ. მეზღვნეებსაც, უმრავლესობას, მარნის ნათვლა ჰქონდა შეთქმული და მისი საკლავი რომ დაიკვლებოდა, დასტური ასეთივე წესით ასხურებდა სისხლს. ხევისბერი რომ კურთხევისათვის თან მოყოლილ საკლავს დაკლავდა, მერე წამოაყენებდნენ მეზღვნეების საკლავებსაც და თითობით დაკლავდნენ. ამწყალობებდნენ საკლავის პატრონ მეზღვნეს. მეზღვნეებს მოჰქონდა ზედაზე ღვინო სადიდებლად, სასმელ-საჭმელი და გაუმართავდნენ სუფრას მოსულებს. სუფრის პატრონებს ხევისბერიც და დასტურებიც ჩვეულებრივად ამწყალობებდნენ. მიცვალებულებისთვისაც ამავე სუფრებს ლოცავდნენ, გაატყავებდნენ დაკლულ საკლავებსაც და მოხარშავდნენ ხორცს. სანთელი აქაც შემოწირული იყო იახსარში. ცოტა შესვენებისა და პურის ჭამის შემდეგ ერთ-ერთი დასტური შეუდგებოდა სანთლის კეთებას. ხევისბერი ამ სუფრიდან დროებით ადგებოდა, პირჯვრის წერით და მადლის თხოვით მარანში შევიდოდა, დასტურნიც თან შეჰყვებოდნენ, აუნთებდნენ სანთლებს, ამოიღებდნენ შუაფხოდან თანწალებულ საწირავთ, სანთელს ქვევრის (კოჭლაურას) პირზე დააკრავდნენ (ქვევრს წინასწარ ახდიდა ხევისბერი და გადაასუფთავებდა მის მიდამოს), საწირავთაც ქვევრის პირზე დააწყობდნენ, ერთ კოშ ღვინოს ამოიღებდნენ და ჩაასხამდნენ ნათავრს იმ ტიკში, რომლითაც შუაფხოში უნდა წაეღოთ ზედაზე, მეორედ სამ პატარა ვერცხლის თასს აავსებდნენ და იქვე ქვევრის პირთან პატარა სუფრაზე დადგამდნენ საწირავთან ერთად. ხევისბერი შეუდგებოდა. ლოცვა-დიდებით.

პირველად ილოცავდა თავისთვის და ეხვეწებოდა იახსარს: ქვევრ-მარანზე მოსვლით და ქვევრის ახლით თუ რაიმე სცოდა, აპატიოს. იქნება უცოდრობით ან უღირსი ხელით რამეს შეახო, ან უცოდინრობით ის ლოცვა-დიდება ვერ თქვა, რაც საჭირო იყო და თავის უენპირობით დააკლო რამე. ხევისბერი ნელი და ხვეწნა-მუდარის გამომხატველი ხმით თავითვის ლაპარაკობდა. ბოლოს უფრო მაღალ და ისევ მუდარის გამომხატველი ხმით იტყოდა: „დიდება ღმერთსა ქვეყნის დამაარსებელსა, რომელმაც გააჩინა ჯმელნი და გადახურა ცარვალი, ამუშავნა ჯმელთა ზედა მწვანილნი და მცენარენი, გააჩინნა პურნი და ღვინონი თავისი დიდებითა ცხოველთა და კაცთა საარსოდ და თავის დიდი სახელის სადიდებლად. დიდება შენდა, კვირაჲ ძალიან-მადლიანო, ხთის მაღლის მოკარვეო, დიდება შენდა, ჩვენო სალოცაო დიდო იაჯსარო. თქვენამც იდიდებით ამ ქვევრ-მარანზე, დადგმულ ჭიქა-ბარზიმზე და დაქვრეთილ სეფისკვერთაზე. ლალო იაჯსარო, მოგზაურო ანგელოზო, ქვევრისა და მარნის მცველო-მფარველო, თქვენა სწყალობდეთ იაჯსარის საყმოთა, საყმოთაში იახსარის დროშისად თანამყოლთა, ქვევრ-მარანზე მოსულთა და იაჯსარის ბძანების შემსრულებელთა. ლალო იაჯსარო, ჩვენო სალოცაო, შენა სწყალობდე შენს ქვევრ-მარანზე მოსულთა, შენის სახელის მლოცავთა. გეხვეწებიან და გვედრებიან, ჩვენო სალოცავო, ლალო იაჯსარო, დღეს შენს ქვევრ-მარანზე მოსულნი — შენის სახელის მლოცავნი, წესისა და რიგის მყენენი. ხვეწნა-ვედრება სასიხარულოდ გაუჟადე, სასინანულოდ ნუ გაუჟდი, დაეკმარე, დალოცვილო, ველთაცა და შინაცა' გზაში და მგზავრობაშიცა“.

დანარჩენი დიდება გრძელდებოდა ისე, როგორც აქვე ზემოთ ჩაიწერა. დიდება რომ მოთავდებოდა, დასტური აიღებდა თასებს, პირველ თასს მისცემდა ხევისბერს, ორს თვითონ დასტურნი დაიჭერდნენ. დაილოცებოდა ხევისბერი და მერე დასტურნიც: „გაუმარჯოს ჩვენს სალოცავს — ლაღს იაჯსარსა, მოგზაურს დროშისად მყოლს ანგელოზსა, ქვევრისა და მარნის მცველსა და მეპატრონეს ანგელოზსა და იმათი წყალობა გქონდესთ იაჯსარის ყმათა, ყმათაში იაჯსარის დროშისად მყოლთა და ქვევრ-მარანზე მოსულ კულუხის წამლებთა, გზა დაგილოცოსთ და მშვიდობით შინ მიგიყვანოსთ, შინაურებიც მშვიდობით დაგახვედროსთ, სწყალობდეს კიდენა ამ ქვევრ-მარანზე მომსვლელთ მეზღვნეთა და წესრიგის შემსრულებელთა. სადიდებულო იაჯსარისა იყოს და სამწყალობნელო თქვენი თავისა“. ამ სიტყვებით ყველანი დაღვედნენ თითო ჭიქა ღვინოს. კოჭლაურას ღვინო ახმეტაში სახელგანთქმული იყო და, რა თქმა უნდა, არც ეს დასტურ-ხევისბერი იტყოდნენ ცუდს. რომ გამოცლიდნენ, კიდევ აავსებდნენ ამავე თასებს და ხევისბერი საწირავის პურს დანით ჯვარედინად გასერავდა, თასს

ხელში იღებდა და შენდობას ეტყოდა: „ამ დაქვერეთილის სეფისკვე-  
 რითაც და ზედაშითაცა მაიქსენიენეს ჩვენმა იაქსარმა პირველად ამ  
 კოჭლაურის გამკეთებელი კოჭლი (იმ კოჭლი კაცის სახელი არ იციათ,  
 რომელმაც ეს ქვევრი გააკეთა). მერე ის პირნი, რომელთაცა დანამად-  
 ლისი ჰქონდეს ამ ქვევრ-მარნისა და ვენახის გაშენებაში, ან გელითა,  
 ან კიდენ სხვა-სხვა რამითა. ან კიდენა მოვლა-პატრონობა გაეწიოს ამ  
 ქვევრ-მარნისა და ვენახისთვისა, ჩენი სალოცავი არ იგიწყებდეს და  
 ჩვენ კიდენა წანელდობრ ვერ ვიგონებდეთ. იაქსარის სადიდებულო  
 იყოს და იმათი შესანდობარი“. მსგავსი სიტყვებით დაილოცებოდნენ  
 დასტურებიც და დაკლიდნენ ყველანი ჰიქებს. მერე აანთებდნენ კელ-  
 პტრებსა და სანთლებს (ამ დროს ღამე იყო, რადგან დასტურ-ხევის-  
 ბერები და მეკულუხე გვიან მივიდოდნენ ახმეტაში, სადაც ერთი ღა-  
 მის მეტს არ რჩებოდნენ. აქ იმდენი საქმე შეხვდებოდათ, რომ მთელ  
 ღამეს მუშაობდნენ და დილისათვის ძლივს მოასწრებდნენ მომზადე-  
 ბას. დილით ადრე უნდა წამოსულიყვნენ უკან, რადგან დღეები გან-  
 საზღვრული ჰქონდათ, რომელ დღეს სად უნდა ყოფილიყვნენ. მლო-  
 ცავმა ეს დღეები იცოდა და გზადაგზა უხვდებოდნენ. მერე შუაფხო-  
 შივ დღეობა განსაკუთრებულ დღეებში იყო და დღეობა-დღის სხვა  
 დღეზე გადატანა არ შეიძლებოდა) და მარანში ყველა კუთხეში და-  
 აკრავდნენ. აღიდებდნენ ამ მარნის მცველ მეპატრონე ანგელოზს და  
 თანაც ღვინის ამოღებაში სინათლე უნდა ყოფილიყო. მოიტანდნენ ტი-  
 კებს, ერთი დასტური ტიკის პირს უწევდა, ხევისბერი გრძელტარიანი  
 კოშით კოჭლაურიდან ღვინოს იღებდა და ასხამდა საცალოში (საცალოს  
 იმიტომ უწოდებდნენ, რომ სხვა ამისთანა ტიკის ცალად აეკიდებოდა  
 ცხენს). ტიკი რომ აივსებოდა, გადასცემდნენ მეორე დასტურს. ის  
 პირს მოაკრავდა და გადასცემდა მეკულუხეებს. მეკულუხეები ტიკს  
 ჩათოებით შეკრავდნენ ცხენის ზურგზე ასაკიდებლად (ჩათოები  
 ღვედისაგან გაკეთებული იყო საპალნის შესაკრავად), ოცდახუთ  
 ჩაფს შეკრავდნენ საპალნეებად. ეს ოცდახუთი ჩაფი ხელუხლე-  
 ბელი უკლებლივ უნდა მისულიყო შუაფხოში — იახსარში. საგზაო  
 სახარჯოდ სხვა ღვინო მიჰქონდათ პატარა ტიკებით. საპალნეები რომ  
 გამზადდებოდა, ამავე კოჭლაურიდან ღამისათვის აქ სასმელად გამო-  
 ჰქონდათ ღვინო სტუმრებისათვის და თავისთვისაც. ამასობაში მოი-  
 ხარშებოდა ხორცი და გამზადდებდნენ მეკულუხენი თავის საკლავის  
 ხორცის სუფრას, მეზღვნეებიც თავ-თავის სუფრას. ხევისბერი თავის  
 საკლავის ხორცის სუფრას შანდობას ეტყოდა იმავე სულეებისათვის  
 შემდეგის სიტყვებით: „დიდება ღმერთსა, ცისა და ხმელეთის დამაარ-  
 სებელსა, დიდება დიდს კვირასა, ხთის მალღის მოკარვესა, დიდება  
 შენდა, ჩენო სალოცაო, ლალო იაქსარო. მოიქსენიენეს ის სულეები,

რომელნიც წინათ აქ ყოფილან კულუხისადა, ან დანამადლისი რაჰე ჰქონდეს ჩვენის სალოცავის ქვევრ-მარნისადა ან ველითა ან ენითა, ან კიდენა საქმითა. ჩვენი სალოცავი არ ივიწყებდეს და ჩვენ კიდენა სახელდობრ ვერ ვიგონებდეთ, სადიდებულო ჩვენის სალოცავისა იყოს და შასანდობარი იმ სულეებისა“. შესანდობარს ყველა დალევდა (ფშავ-ლური კილო დიდებაშიც და შენდობის თქმაშიც ძალიან თხოვნის და ხვეწნა-მუდარის გამომხატველია, ხევისბერის დადგომაში და თავის და-ჰერაშიც, აგრეთვე უფრო გამოთქმის კილოში. ხევესურულში კი თითქმის ნახევრად მბრძანებლური კილოა ხუცობაშიც და შენდობის თქმაშიც, თითქოს ავალდებულებს ღმერთსაც და სხვა სალოცავებსაც: რასაც გეტყვი, ეს უნდა შეასრულო).

თავის სუფრას რომ დალოცავდნენ დასტურ-ხევისბრები, ამ დრო-ისათვის აქ სხვა სუფრებიც დამზადებული იყო. ჯერ თავის სუფრაზე მოიპატიებდნენ ყველას და დაუხვდებოდნენ პურ-ღვინით. აქედან გადადიოდნენ სხვა სუფრების დალოცვაზე. ეს სუფრები როგორც ვის შეთქმული ჰქონდა, ისე და იმ სულეებისათვის ილოცებოდა. აქ ყველა შლოცავი კახეთიდან იყო მოსული და საუკეთესო ღვინო ჰქონ-დათ მოტანილი. დაილოცებოდა პურ-სუფრა და იმართებოდა სმა-ჭამა და ლხინი (პური დასტურ-ხევისბრებს და მეკულუხეს თავისი ჰქონდათ შუაფხოდანვე წამოღებული, შეზღვევებსაც ყველას თავისი მოჰქონ-და). ათენებდნენ ღამეს გარეთ, ბუსნოზე. თუ ვინმე ციტათი ჩაი-ძინებდა, თორემ წესად თეთრად გათენება ჰქონდათ. გათენდებოდა თუ არა, მაშინვე ცხენებს მოიყვანდნენ, აჰკიდებდნენ ღვინოს, ხევის-ბერი დროშას აბძანებდა, მარანში შევიდოდა და დროშით შემოუვ-ლიდა შიგნით. რომ გამოვიდოდა, ერთ თას ღვინოს მიართმევდნენ. დაილოცებოდა, დაამწყალობებდა ყველა იქ მყოფთ, დაულოცავდა მგზავრობას და გამოემგზავრებოდნენ. შლოცავი ხალხი კარგა შორ მანძილზე გამოჰყვებოდა პურ-ღვინით და სიმღერებით, ასმევდნენ ხევისბერსაც და დასტურ-მეკულუხეთაც. ბოლოს დანიშნულ ადგილ-ზე რომ მოვიდოდნენ, ყველანი პირჯვარს დაიწერდნენ და უსურვებ-დნენ მშვიდობის მგზავრობას ხატ-კაცს. აქედან წამოსულები მოვი-დოდნენ ზემოთიანეთში. აქ, როგორც ვთქვით, იახსარის ნიში იყო, სადაც ბევრი ხალხი დახვდებოდათ სალოცავად მოსული. ხევისბერი დროშით ხელში კოშკთან გაჩერდებოდა, ხალხი ფეხზე იდგა ამ დროს და პირჯვარს იწერდნენ. ხევისბერი დაამწყალობებდა მოსულ ხალხს და მეზღვევებს: „გწყალობდესთ, ხალხნო, ჩვენი იაქსარი, მოგზაურა ანგელოზი. იმისი წყალობა იყოს თქვენზედა და მრავალს დაგასწროთ ამ დღესა და ღღესასწაულსა, მშვიდობით და კარგად ყოფნითა. ნუ შეგანანოსთ ეს მოსვლა და ზღვენ-სანთელი ჩვენმა იაქსარმა, სასი-ხარულოდ გაგიჯადოსთ“. ხალხი მანამდენ ჩუმად იდგა და მერე უპა-

სუხებდა: „თქვენიცამც მწყალობელია“. ხევისბერი დროშას კოშკთან დააბძანებდა და ცოტას დაისვენებდა. შემდეგ დაახამდნენ ერთ ზას ღვინოს, აანთებდნენ სანთელს და ხევისბერი აღიღებდა იახსარს — მოგზაურ ანგელოზს. აქ მეკულუხეს თავისი საკლავი არ ჰყავდა და თუ ვინმე მეზღვენები იქნებოდნენ, მათი საკლავები დაიხოცებოდა. საკლავის დაკვლა, დიდება, ხორცის მოხარშვა, სუფრის წესები და სხვა ყველაფერი იმ წესით სრულდებოდა, როგორც ზემოთ არის ნათქვამი. ამ დამეს მლოცავეებიც და მეკულუხეებიც აქ გაათევდნენ, დილას ადრე კი იმავე წესით გამოემგზავრებოდნენ, როგორც ახმეტრიდან. აქ ის მლოცავეც იყო მოსული, რომლებიც შუაფხოში უნდა გამოჰყოლოდნენ მეკულუხეს. მოუდიოდათ საკლავები, მოჰქონდათ თავ-თავის პური და სასმელი. მეკულუხე წამოვიდოდა იორზე. გზადაგზა ისვენებდნენ და მხიარული მღერა-თამაშით ერთობოდნენ. ამოვიდოდნენ შუაფხოს პირდაპირ მდებარე მაღალ მთაზე (ივრიდან შუაფხოს ხეობაზე გადმოსასვლელი მთა) მისელურზე. აქედან შუაფხოს ხევისაქენ რომ გადმოვიდოდნენ, თოფებს დასცილდნენ (ქართული კაჟიანი თოფ-იარაღი დაჰქონდათ მტრისაგან თავდასაცავად).

მისელურიდან ახლო არის ის ადგილი, სადაც იახსარი პირველად დაარსდა ანგელოზთ სახით, ამ ადგილს ეწოდება კარატე, აქ არის დროშის საბძანი კოშკი და საზარე. მის მოპირდაპირედ იმავე მთაზე ამალღებულ ადგილზე კიდევ იყო ასეთივე კოშკი და საზარე. ამას ეძახდნენ არახიჯის კარატეს. აქ ახლო პატარა სოფელია ფშავლებისა; არახიჯა. ამ ადგილსაც იმიტომ ჰქვიან არახიჯის კარატე; იმ ადგილს კი, სადაც იახსარი პირველად დაარსებულა, შუაფხოს კარატე ეწოდება. არახიჯის კარატეზე ამბობენ, აქ ვილაცა ბერი ცხოვრობდაო. აქვე მიწაში არის ჩადგმული ორი დიდი ქვევრი. ბერს ამ ერთ ქვევრში წყალი ედგა, რადგან აქ წყალი ახლო არ არის, ერთ ქვევრში კი ღვინო-ზედაშეო. სამლოცველოც აქვე ჰქონდაო.

იახსარის დროშა სერობას რომ ადის შუაფხოელთ კარატეს, აქედან მეორე დღეს არახიჯის კარატესაც გავიდოდნენ. ზოგს აქაც მოუდიოდა საკლავები და ზღვენობდნენ. უფრო მეტად არახიჯელები და მათი ქალ-ღისწულები.

მისელურიდან თოფებს რომ დასცილდნენ, თითო-ოროლა მეზღვენე შუაფხოელთ მთაში დაელოდებოდა მეკულუხის მოსვლას, ისინი თოფის ხმას რომ გაიგონებდნენ, ავიდოდნენ კარატეს და კოშკის დაბლა დავაკებაში დაბინავდებოდნენ, ჩამოვიდოდა მეკულუხეც და ავიდოდა კარატეს (კარატე მთიდან ოცი-ოცდაათი მეტრით ამალღებულ გორაკზე არის). მლოცავეები გორაკის დაბლა იდგნენ ქუდმობდილნი და იწერდნენ პირჯვარს. ხევისბერი დროშას მიაბძანებდა კოშკზე, მობრუნდებოდა და დაამწყალობნებდა ხალხს: „წყალობა მოგიტანეთ

მგზავრის ანგელოზის ლალი იაცსარისა, გწყალობდესთ ყმათა და ყმათაში იმის კარისა და გორის მლოცავთა“. ხალხიც უპასუხებდა: „თქვენიმც მწყალობელია“. ამავე მთაზე უბისთავს ზაფხულობით სამთოდ ამოდიოდნენ შუაფხოვლები, პატარა-პატარა ქოხები ჰქონდათ გაკეთებული და თავის ცხვარ-ძროხით აქ ატარებდნენ ზაფხულს. ისინიც გაიგებდნენ მეკულუხის მოსვლას, ამზადებდნენ, რაც კი შეეძლოთ, კარგ საჭმელებს და მიჰქონდათ კარატისაკენ მეკულუხის შესახვედრად და პატივსაცემად. აღიოდნენ გორაკის დაბლა დაბინავებულ მეზღვნეებთან. იქიდან დაუძახებდნენ და წააღებინებდნენ დამზადებულ სასმელ-საჭმელს. ხევისბერი მათ მოტანილ სუფრას მათი მიცვალებულებისათვის შენდობას ეტყოდა, სასმელი თუ მათგან იქნებოდა მიტანილი იმით აავსებდნენ ჭიქას (ჭიქა ვერცხლისა დაჰქონდა თან). თუ შემთხვევით არ ჰქონდა, ასეთ შემთხვევაში მეკულუხეს მოტანილი სახარჯო ღვინიდან დაასხამდნენ და სუფრას ჩვეულებრივი წესით დალოცავდნენ. ამის შემდეგ ჰამდნენ საჭმელს დასტურ-ხევისბრებიც და სხვა მეკულუხეც. აქ, სადაც ხალხის საბინაო იყო გორაკის დაბლა, ბლომად ხალხი მოიყრიდა თავს. რამდენიმე კაცი ჩამოვიდოდა, ჩამოიტანდნენ თან სახარჯოდ წამოღებულ ღვინიან ტიკს. მათ მოსვლას და საღმის მიცემას ყველანი ფეხზე ადგომით და ქუდმობდილები შეხვდებოდნენ. მოიკითხავდნენ ერთმანეთს მომსვლელები და დამხვედრები, დასხდებოდნენ და დაიწყებდნენ სმას, რასაც მხიარული ცეკვასიმღერა მოჰყვებოდა. აქ მეზღვნეები იყვნენ, მაგრამ უმრავლესობა შუაფხოში უნდა ჩასულიყო, იქ მთავარ ღვინობას დაესწრებოდნენ. აქ მაშინ იზღვნობდნენ, როცა შუაფხოდან ისევ კარატეს წამოვიდოდა დროშაც და მლოცავი ხალხიც. სრული ზღვნობა ის იყო, ვინც ამ ღვინობას ყველგან დაესწრებოდა. თუ ვინმეს აუცილებელი საქმე ჰქონდა და დაბრუნება ეჩქარებოდა. მაშინ კი ამავე საღამოს დაკლავდა ზღვენს, გამართავდა სუფრას და მეორე დღით. მეკულუხე რომ შუაფხოში წამოვიდოდა, ისინი შინ წავიდოდნენ. ასეთი მეზღვნე ბევრი არ იყო, იყვნენ უფრო სრული წესრიგის დამცველნი, დაიწყებდნენ ღვინობას პირველად შუაფხოში და დაამთავრებდნენ კარატეს. შეთქმული უმრავლესობას ასე ჰქონდა: ჯერ იზღვნობდნენ შუაფხოში, გამართავდნენ სუფრას, მიიღებდნენ მონაწილეობას საყენიოში, შესწირავდნენ ფულს და მერე იახსარის დროშას გაჰყვებოდნენ კარატეს, იქაც იზღვნობდნენ, სუფრას გამართავდნენ და წავიდოდნენ სახლში. იმ დამეს კარატეს გაათევდნენ ბუსნოზე მხიარულობით. დილას ხევისბერი დროშას ააბძანებდა. ყველანი მადლს მოსთხოვდნენ და წამოვიდოდნენ ქვევით შუაფხოსაკენ. წინ მოუძღვებოდა იახსარის დროშა და მერე ხალხი



მიჰყვებოდა: შუაფხოშიც ამ დღეს დროშისა და მეკულუხის მომლო-  
დინე მლოცავი მოიყრიდა თაჳს (ეს უნდა ყოფილიყო ხუთშაბათი დღე)-  
ქვევით ნიჯოხის გორის თავზე რომ ჩამოვიდოდნენ და აქედან გამოჩ-  
ნდებოდა შუაფხო და იახსარის საარსო ადგილი, თოფებს დასცილდნენ.  
ხალხი გაიკებდა — მოდიანო და, თუ ხიდი არ იყო, შუაფხოს წინ ჩა-  
მოვიდოდნენ არაგვში გასვლის დროს მოსაშველებლად (ამ დროს ფშა-  
ვის არაგვმა ძალიან ადიდება იცის და ხიდი იშვიათად გადაარჩება შუა-  
ფხოს ჰალაზე, რომ არ წაიღოს; წყალიც ძალიან ჩქარია და ცხენებსაც  
უძნელდებათ გასვლა, ამიტომ ერთიმეორეს ეშველებიან). შეარჩევნ  
უფრო საიმედო, წყალში ნაჩვევ და ღონიერ ცხენებს და მივლენ წყლის  
პირზე. რომ ჩამოვიდოდა იახსარის დროშა და ხალხიც მთიდან, თავ-  
მომწონე ახალგაზრდები შესხდებოდნენ ცხენებზე, მიეგებებოდნენ  
წყალგალმა, ჩამოხტებოდნენ ცხენებიდან, ქულებს მოიხდიდნენ, პირ-  
ჯვარს დაიწერდნენ და ეტყოდნენ: „გამარჯვება ბატონყმათა, ჯელიმც  
მოგემართებათ“ (ამ დროს ხევისბერს დროშა ტარით თავის ფეხზე  
ჰქონდა დაბჯენილი, ცოტათი არხევდა და ზარს აწკარუნებდა). ხალხის  
მისალმებაზე ხევისბერი ეტყოდა: „წყალობა მოგიტანეთ ლადის იაჯ-  
სარისა — მოგზაურის ანგელოზისა, დაგასწროსთ მრავალს სერობას  
ბედნიერად“. მეკულუხე და სხვა მოსული ხალხიც გამარჯვების თქმაზე  
უპასუხებდნენ: „გაგიმარჯოსთ ღმერთმა, გიშველასთ იაჯსარმა მოგე-  
ბებისათვის“. აქ აღარ დაიგვიანებდნენ: შეარჩევდნენ უფრო საიმედო  
ცხენს და ხევისბერს შესვამდნენ თავისი დროშით, პირველს იმას გა-  
მოჰყვებოდა ცხენდაცხენ წყალში რამდენიმე ახალგაზრდა და გამო-  
იყვანდნენ. დროშის ფეხზე დაყრდნობითვე იგი პირხალხისაკენ და-  
დგებოდა, დროშას აწკარუნებდა. იახსარის დროშის ხმაზე ხალხიც  
მხნევედებოდა. ახალგაზრდობა ახლა კულუხს გამოაცილებდა და მერუ  
მოსულ მეზღვნეს და დიაც-ყმაწვილს ცხენის გავაზე შემოსმით ყველას.  
თითობის გამოიყვანდნენ. გამოუძღვებოდა წინ ხევისბერი დროშით,  
გამოჰყვებოდა ხალხიც მხიარული სიმღერით. ამ დროს ფერხისას არ  
დააბამდნენ, უფრო მღეროდნენ ფშაურად.

კოპალის მეკულუხე უძილაურები კოპალის დროშით ამ დღეს  
იახსარში უნდა მოსულიყვნენ (სოფელი უძილაურთა და კოპალას საა-  
რსო მალლა მთაზე არის, სოფელი შუაფხო კი დაბლა ჰალაშია და იახ-  
სარის საარსოც ხომ აქ არის. ამ დღეს წესი იყო: გამოივლიდა კოპალის.  
მეკულუხე და დროშა დროშას შეხვდებოდა იახსარში). იახსარის დრო-  
შა და მეკულუხე რომ მოვიდოდა, უძილაურთისა, ე. ი. კოპალის, დრო-  
შა უკვე იახსარში მოსული იყო. იახსარის დროშის მოახლოვებისას კო-  
პალის დროშასაც ააბძანებდა მისი ხევისბერი, გზაში გამოეგებებოდა.  
ხალხიც თან გამოჰყვებოდა. პირველად დროშები შეხვდებოდნენ ერთ-  
მანეთს, ხევისბრები ხელს ჩამოართმევდნენ და გადაჰკოცნიდნენ. სხვა

ხალხიც მიეგებებოდა ქუდმოხდილი პირჯერის წერით და ეტყოდნენ: „გამარჯვება ბატონყმათა“. „გაგიმარჯოსთ ღმერთმა და ჩვენმა სალოცავმაო“. — უპასუხებდნენ მოსულები.

ხევისბრები დროშით მხარზე „მხრიდმხრივ“ წაივლოდნენ დროშის საბძანისაკენ. მივიდოდნენ კოშკთან და მიიბძანებდნენ დროშებს, მობრუნდებოდნენ პირხალხისაკენ და კიდევ დაამწყალობებდნენ: „გწყალობდესთ, ხალხნო, ჩვენი სალოცავეები: იაქსარი და კოპალა, ერთურთის მოძმე-მომხრენი, თავისი წყალობა ნუ დაგაკლონთ მათთვის თავდადებული სამსახურისათვის. ბევრს სერობას მიგაგებოსთ მშვიდობით და ბედნიერად, სასიხარულოდ გაგიკადონთ მათი კარისა და გორის ლოცვა“. ხალხი ნელი ხმით პასუხობდა: „თქვენიცამც მწყალობელია“. მანამ დასხდებოდნენ, წამოაყენებდნენ ერთ საკლავს კოპალისა და იახსრისათვის საერთოდ დასაკლავს. რადგან ადგილობრივი იყო, მას იახსარის ხევისბერი დაკლავდა, დიდებათ იტყოდა ჩვეულებრივ, ოღონდ ცოტა განსხვავებით: „დიდება შენდა, ღმერთო მაღალო, ცისა და ქვეყნის გამჩენო, დიდება შენდა, კვირავ ცხოველო, ქრისტეო და ღმერთო, დასწერე ჭვარი ამ მოყენებულსა ზღვენს-სამსახურსა. ძალი და ბრძანება თქვენგან არის, თორო ხმელთაზეით სახელს ვერა გკადრებდით, რადგანაც ღმერთმა ხმელეთი დაარსა, ცარვალი დახურა, მზე-მთვარე დაჰფინა. გაკურთხნათ ხთიშვილნი ხთიშვილადა და ჩაგაბარათ ჩვენი თავი მოსამსახურედა. გეხვეწებით და გევედრებით, გახვეწებით და გავედრებთ ჯერ თქვენ საყმით, საყმოშიცთ დღეს თქვენ მლოცავთა, გეხვეწებიანთ და გევედრებიანთ ჩვენო სალოცავებო, ღაღო იაქსარო და გმირო კოპალაო, ერთურთის მოძმე-მომხრენო, ღღეკ-კერბთად მებრძოლნო, თქვენი საგმიროთ და ლახტით მავნეთ გამანადგურებელნო, თავის ყმათად მეშველ-დამგმარენო და მწყალობელნო, დღეს თქვენ მლოცავთ წესისა და რიგის დამყენებელთ, თქვენის სამსახურის შემსრულებელთ, თქვენის კულუხის მომტანთ, ხვეწნა ვედრება სასიხარულოდ გაუჟღედთ, სასინანულოდ ნუ გაუჟღედთ“ (დანარჩენი დიდება ჩვეულებრივია). ხევისბერი საკლავს ისე დაკლავს, როგორც ჩვეულება არის იახსარში. საკლავი რომ დაიკვლოდა. მოუტანდნენ ერთ თასს ღვინოს. ორივე კულუხიდან იყო ნათავარი ჩასხმული ამ თასში და ისევ იახსრის ხევისბერი დაილოცებოდა: „ღმერთმა გაგიმარჯოსთ თქვენმა გამჩენმა ამ ზედაშეზე და ჭიქა-ბარზიმზე, ჩვენო სალოცავებო — ღაღო იაქსარო და გმირო კოპალაო. ერთურთის მოძმე-მომხრენო, შოთანახმენო, სადიდებელო თქვენი იყოს ეს ზედაშე და სამწყალობნელ თქვენ ყმათი, ყმათაში დღეს თქვენ მლოცავთი და წესრიგის შემსრულებელთაი, კულუხის მომტანთ სწყალობდით, დალოცვილო ჩვენო სალოცავებო“. მეორე თასს ასეთივე შერეული ზედაშით ავსებდნენ და კოპალას ხევისბერს მიაართმევდნენ. ისიც

ამავე წესით დაილოცებოდა, ოღონდ პირველად კოპალას ახსენებდა, მეორედ იახსარს. ისევე როგორც იახსრის ხევისბერი ჯერ იახსარს ახსენებდა და მერე კოპალას. მერე დასტურებიც მეორ-მეორე სასმისს უვსებდნენ და ხევისბერნი შენდობას ეტყოდნენ იმ პირთ, რომლებიც წელს ფიქრობდნენ მოსვლას და ველარ მოესწრნენ სერობას. ან შარშან იყვნენ აქ და წელს ცოცხლები აღარ არიან, ან შარშან კულუხზე იყვნენ და ახლა ცოცხლები აღარ არიან იახსარისა და კოპალას საყმოდან. შესანდობარსაც ყველა დალევდა.

წამოვიდოდნენ ხევისბრები და დასხდებოდნენ მათთვის განკუთვნილ ადგილზე, სადაც სხვა კაცი ვერ დაჯდებოდა. მლოცავიც ახლო დასხდებოდა ბუსნოზე და უსმენდნენ მათ საუბარს. ორივე მეკულუხენი მოიტანდნენ თავისი კულუხიდან სახარჯოდ წამოღებულ ღვინოს და დაიწყებდნენ სმას. იახსრის დასტურ-ხევისბრები ყოველ ღონეს ხმარობდნენ, რომ რამე ესიამოვნებინათ პატივსაცემი სტუმრების, გმირი კოპალას დასტურ-ხევისბრებისათვის და მთლიანად მეკულუხეთათვის. საამისოდ სოფლელებსაც მოჰქონდათ ხინკალი, სხვა რამე საჭმელი, არაყი. ძველი ხილი და სხვა. იმართებოდა მღერა-თამაშობა. კოპალას მეკულუხე საღამო ხნამდე აქ რჩებოდა, საღამოზე ხევისბერი ააბძანებდა დროშას, ხალხი ფეხზე ადგებოდა და პირჯვარს იწერდა.

კოპალის ხევისბერი დაამწყალობებდა: „წყალობით იყოს, ხალხნო, თქვენზედა გმირი კოპალა, გიშველოსთ და საცა გაგიპირდესთ. თავისი საგმირო დაგავმაროსთ ჩვენმა სალოცავმა“. „თქვენიცამც მწყალობელია“, უპასუხებდა ხალხი. აქვე თასით ღვინოს მიართმევდნენ. როგორც ზემოთ ითქვა, ისევე დაილოცებოდა, დალევდა და გაემართებოდა. ამავე დროს იახსრის ხევისბერიც ააბძანებდა თავის დროშას და კარგა მანძილზე გააცილებდა კოპალას დროშას და მეკულუხეთ. ხალხიც თან მიჰყვებოდა თავისი მოტანილი სასმელით და პატივს სცემდნენ მათ. ბოლოს ხევისბრები და ხალხიც გამოემშვიდობებოდნენ ერთმანეთს. კოპალას ხევისბერი იტყოდა: „ხალხო, იაჯსარისა და კოპალის მლოცავნო, თავისი წყალობა გაგიწიროსთ გმირმა კოპალამა და მრავლის სერობა მშვიდობით გალოცვიოსთ“. იახსრის ხევისბერი დაამწყალობებდა წასულთ და ეტყოდა: „თავისი წყალობა გამოგაყოლოსთ ლაღმა იაჯსარმა და მრავალი მშვიდობის მგზავრობა მოგცესთ და გალოცვიოსთ მრავალი დღესასწაული მშვიდობით“. ისინი წავიდოდნენ, ხოლო იახსრის დროშას დააბძანებდნენ თავის საბძანებელში. ამის შემდეგ იწყებოდა მეზღვენების ზღვენის დახოცვა. თავთავის საკლავს პატრონები გაატყავებდნენ, ერთ მხარს, თავს, აგრეთვე ერთ აბაზ ვერცხლის ფულს ტყავის სახსრად დასტურ-ხევისბრებს მისცემდნენ, დანარჩენ ტყავ-ხოცს კი თავის ბინაში წაიღებდნენ.

აქ, გორზე, მოედანია, სადაც ყველა მლოცავი ცალ-ცალკე იყო დაბინავებული. ყველას ჰქონდა სასმელ-საჭმელი, ხორცის მოსახარ-ში ქვაბი, ჯამები, მარილი და სხვა, რაც კი სუფრაზე დასჭირდებოდათ. ვინც საკლავს დაკლავდა და სახალხოდ სუფრის გაკეთება ჰქონდა შეთქმული, სუფრას ამზადებდა თუ არა, თავის ბინაზე საკმარ ხორცს მაინც მოხარშავდა, რომ შემთხვევით სტუმრებს მაინც გამასპინძლებოდა. გადადიოდნენ ერთი სუფრიდან მეორეზე, იმართებოდა მღერათამაშობა. დასტურ-ხევისბრები კი პატივსაცემი სტუმრებით ხატის კარზე ისხდნენ და სვამდნენ. საჭმელიც იქვე მზადდებოდა.

ხატისაგან ხალხის ბინები ცოტა მოშორებით იყო, სადაც ქალეზის მოსვლა შეიძლებოდა. ქალი აქ „მრევლობის“ შემდეგ მეხუთე დღეს მოვიდოდა, სუფრაზე ეპატიებოდნენ დასტურ-ხევისბრებსაც, მაგრამ რამდენიმე კაცი მაინც ხატის კარზე ტრიალებდა და უძღვებოდა ყველა წესრიგს. ნათვარი ღვინო საყეინოსათვის ინახებოდა. სხვა ღვინოზე ხევისბერი იახსარს ჩვეულებრივ ადიდებდა და შემდეგ ხალხშიც გამოჰქონდათ დასალევად, მხოლოდ ხატის კარზე სხვების სუფრაზე ამ ღვინოს არ გაიტანდნენ. ერთ-ერთი დასტური ამ ღვინოს მარტო ერთხელ გაიტანდა, რომ კოჭლაურის ღვინო ქალებსაც დაელიათ ასეთი წმიდა ადგილიდან და პატივცემული ქვევრიდან მოტანილი, იახსრის ვენახისაგან დამზადებული ღვინის დალევა ხატის წყალობად მიაჩნდათ.

ბინებზე ჰქონდათ ფანდურები, მერე შემოიღეს გარმონი, პირველ ხანებში გარმონის მოტანა ხატში არ მოსწონდათ — ხატს არ უწესობს, ხატში ფანდური უნდა იყოსო, მერე კი, გარმონები რომ გამრავლდა, ბევრს მოჰქონდა და სათამაშოს დასაკრავად იყენებდნენ, ფანდურს კი უფრო დასამღერებლად. ამ ამბით დაღამდებოდა ხუთშაბათი დღე. ბინებზე ღამე ცეცხლი ენთოთ და მისვლა-მოსვლა ჰქონდათ. შეშა არ აკლდათ. აქ ძველი იფნის ხეები იყო, სიბერისაგან ტოტები სტყდებოდა და ზოგი მთლიანად იქცეოდა, აქედან ოჯახისათვის ერთი ნაფოტის წაღებაც არავის შეეძლო, მარტო ხატში ლუდის მოსახარშად იყენებდნენ და მეზღვნეც ამ ხატის შეშით ანთებდა ცეცხლს. ღამეს ათევდნენ ნაბდებში.

გათენდებოდა პარასკევი 'ღილა. ხევისბერი იქვე ახლო ხატისხევაში (გვერდზე ერთი ღრმა, ტყიანი ხევია და ხატისხევას ეძახიან) ტანს დაიბანდა. რომ მოვიდოდა, ერთ ჭიქა კარგ არაყს დააღვეინებდნენ (ახმეტრიდან თავის მარნიდან ჭაჭის არაყიც მოჰქონდა მეკულუხეს საგზაოდ და ასეთი შემთხვევისათვის), სანთელს დაახვევდნენ და ხევისბერი სანთელს სასანთლე კოშკთან დაანთებდა. იგი ამ დროს ფეხშიშველი იყო. აქედან მობრუნდებოდა, საზარესთან მუხლს მოიყრიდა, პირჯვარს დაიწერდა და იტყოდა: „დიდება ძალსა შენსა, ჩვენო სალოცაო

ლალო იაცსარო, ჩემის ჯორციელობით ბევრსა გცოდავ და შანაცოდვარი შენის ანგელოზობით მაპატიე. მე ჯორციელი შენს წმიდა საზარესთან და ზართან მოვდივარ და უღირსი ღირსად გამჟაღე“. ამის შემდეგ დაჩეკავდა ზარს ნელნელა. ზარის ხმაზე ყველა მლოცავი აიშლებოდა, პირით საზარისაკენ დადგებოდა და იწერდა პირჯვარს, თან ამბობდნენ: „დიდება შენს ძალსა, ლალო იაცსარო, შენის ძალით შეგვინახე“ (ქალები იახსარის სახელს არ იტყოდნენ, რადგან ქალი იმდენად ღირსად არ ითვლებოდა, რომ იახსარის წმიდა სახელი ეხსენებინა). ზარის რეკვა გაგრძელდებოდა რამდენიმე წუთს. მერე ხევისბერი კარგა მანძილს პირუტყულმა გადმოდგამდა ნაბიჯებს, ზარისათვის რომ ზურგე არ შეექცია. მივიდოდა დარბაზში, სადაც დანარჩენი დასტურ-ხევისბრები იყვნენ და ეტყოდა: „წყალობა მოგიტანეთ იაცსარისა, ზარის მცველის ანგელოზისა“. „შენი იყოს მწყალობელი“ — უპასუხებდნენ. ლუდიანი კოდის გახსნა წინა დღესვე ხდებოდა, საწირავით და სანთელით, დააწყობდნენ საწირავთ, ანთებდნენ სანთელს, სამ პატარა ვერცხლის თასს ერთერთი გაუხსნელი ტიკიდან ღვინით აავსებდნენ და ხევისბერი აღიდებდა ჩვეულებრივად იახსარს. დასერავდა ჭვარედინად საწირავთ. ამ სადიდებელ თასებს რომ გამოცლიდნენ, მეორედ ავსებდნენ და ხევისბერი ზედაშეთი და დაჭკრეთილი სეფისკვერით ძველ დასტურ-ხევისბრებისათვის შენდობას ეტყოდა: „რომელიც იყვნენ და აღარ არიან, ჩვენი სალოცავი არ ივიწყებდეს და ჩვენ კი სახელდობრ ვერ ვიგონებდეთ, იახსარის სადიდებულო იყოს და მათი სულის მოსაცუნებში“. ასეთი სიტყვებით დააბოლოებდა ხევისბერი შენდობას და გამოცლიდა სასმისს. ასეთსავე შესანდობარს ჩამოარიგებდნენ დანარჩენ ხალხშიც.

მზის ამოსვლამდინ გრძელდებოდა სმა და საუზმე. მზე რომ კარგად ამოვიდოდა, დასტურები გამოიტანდნენ იმ ტიკს, რომელშიც კოჭლაურის ღვინის სულ პირველი ნათავარი იდგა (ღვინიანი ტიკები სალუდეში ინახებოდა). ხატის კარზე ბუნსო ადგილია, ამ ტიკს აქ დადებდნენ, მოიტანდნენ ერთ დიდ სპილენძის დასს და იქვე დადგამდნენ. ხევისბერი ააბძანებდა დროშას, ამ ადგილზე მივიდოდა და დროშის ტარს მარჯვენა ფეხზე დაიბჯენდა. ღვინოს დაასხამდნენ საყუინო თასში, სანთელსაც აანთებდნენ და დააკრავდნენ. ხევისბერი გაადრდებდა იახსარს: „დიდება შენდა, ღმერთო მაღალო, დიდება შენდა, კვირავ ცხოველო, დიდება შენდა, ჩვენო სალოცავო იაცსარო. ქრისტეო და ღმერთო, კვირაცხოველო და ლალო იახსარო, დასწერეთ ჭვარი ამ დადგმულ ჭიქა-ბარძიმსა, ზედაშესა, ძალი და დიდება თქვენია, თორო ჩვენ ჭვეყანაზეითა სახელს ვერა გკადრებდით. რადგანაც ღმერთმა ჯმელეთი დააარსა, ცარვალი დახურა და მზე-მთვარე მოფინა. გაკურთხნათ ხთიშვილნი ხთიშვილად და ჩვენი თავი მოგცათ მოსასახურედა“. დანა-

რჩენი დიდება გრძელდებოდა ისე, როგორც დაწერილია ამალღების წესებში. ამ საყენოთიკ ახვეწებდნენ ჯერ ყმათა და მერე ყმათაში იახსარისა და კარისა და გორის მლოცველთა.

დიდება რომ გათავდებოდა, საყენოს თასი დაილოცებოდა ლაშარის ჯვრის პიროფლიანთათვის და ბოლომდინ გრძელდებოდა ამ თასით მათი შესანდობარი (ლაშარის ჯვრის პიროფლიანად ითვლებოდნენ ის მიცვალებულები, რომლებიც ლაშქარში დაიხოცნენ, წასული იყვნენ ლაშარის დროშის ქვეშ ლაშარის ჯვარის ბრძანებით და ველარ დაბრუნდნენ, დალილნი და გაოფლიანებულნი დაიხოცნენ. ასეთებად ითვლებოდნენ შვიდნი ფშაველნი. ფშაველ-ხევსურეთ ლაშქარი გადასულამითხოში, ქისტებს გზები შეუკრავთ და მთელს ლაშქარს დაღუპვად ელოდა. ეს შვიდი ფშაველი შებრძოლებია ქისტებს, თავი დაუდვიათ ლაშარის ჯვარის დროშისათვის, ხალხისათვის, ფშაველ-ხევსურთათვის გზა გაუხსნიათ, თვითონ კი ამ ბრძოლაში დახოცილან. შემდეგ ამათთან ჩაითვალა ის პირებიც, რომლებიც იხოცებოდნენ ლაშარის ჯვარის დროშის წინაძღოლობით ლაშქრობაში).

ლაშარისჯვრის პიროფლიანთათვის შენდობის თქმა: „დიდება და გამარჯვება მოკსენდეს ძალას ხეთისას, სამართალს კვირეისას. დიდება და გამარჯვება ჰქონდეს ლალს იაქსარს და მათ მოთანახმე ღვთისშვილებს და წმინდა ანგელოზებს. იმათი მადლი სწყალობდეს იაქსარის საყმოთა, საყმოშით დღეს იაქსარის კარისა და გორის მლოცავთა, კულუხის მომჩანთა. მაიქსენიენეს ღმერთმა და ჩვენმა სალოცავებმა ლაშარის ჯვრის პიროფლიანნი, რომელთაც თავი შესწირეს ხალხისა და ლაშარის ჯვრის დროშის გულისადა და დაიკოცნეს ბრძოლაშია. იაქსარში დადგმული საყენო ზედაშითა, სადიდებულო იაქსარისა და მოსაქსენიები ლაშარის ჯვრის პიროფლიანთი“. — „შეიწყალოს ისინი ღმერთმან, ნათელი დაყენოს იმათ სულს საიქიოსა“, იტყოდნენ ყველანი. ხევისბერი დროშას ამ თასის თავზე რამდენჯერმე გააწკარუნებდა, მერე მუხლზე დაქდებოდა, დროშას კი ხელიდან არ გაუშვებდა და ისე დაღვედა საყენოდან, რამდენიც უნდოდა. ადგებოდა, დროშას თასის თავზე კიდევ გააწკარუნებდა და თავის ადგილზე წააბძანებდა. ერთი კაცი ტიკს ზურგზე წამოიკიდებდა, მარჯვენა მხრიდან ტიკის პატარა პირს გამოუშვებდა საყენოსაკე და საყენოსთან ახლოს დაქდებოდა. დაიწყებოდა საყენოში ჩასვლა. ვისაც სურდა, მივიდოდა, მოიყრიდა საყენოს წინ მუხლს (თასს მიწიდან ხელში არ იღებდნენ) და დაიძახებდა: „გაუმარჯოს ლალს იაქსარსა და შაიწყალოს ლაშარის ჯვრის პიროფლიანნი, რომელთაც ხალხის და ხატის გულისათვის თავი შესწირეს, სულის მადლმაცა და იაქსარისა და ხეთის მადლმაცა, თქვენ დიდი დღე მოგცესთ და მრავალი გალოცვიოსთ ეს დღესასწაულიცა და კიდენა სხვა დღესასწაულებიცა“. ამ სიტყვებს რომ დაამთავრებდა,

ფულს ჩააგდებდა ღვინით საესე თასში — საყეინოში (თუ ვერცხლის ფული იყო, საყეინოში ჩააგდებდა, თუ ქალაღდის ფული, გვერღზე ცარიელი სპიღენძის თასი იღგა და იმაში ჩააგდებდა). დაეწაფებოდა დნ დაღევედა ღვინოს. საყეინოში ჩასულს აქეზებდნენ, დაიწყებდნენ ყვირიღს: „გაუმარჯოს ლაშარის ჯვრის პიროფლიანთ, გაუმარჯოს! აბაბაბაი, შაიშრო, შაიშრო“ (შაიშრო — ვითომც იმ თასში რაც ღვინო იღგა, ამ კაცმა კი არ დაღია, შეიშრო). როცა თასს მოშორდებოდა, კიღეე დასცემდნენ კიყინას: „შაიშრო, შაიშრო, გაუმარჯოს ლაშარის ჯვრის პიროფლიანთ, გაუმარჯოს!“ და იმ კაცს ადგომის საშუაღებას არ აძღევედნენ. ძალაუღებუღად კიღეე უღდა დასწაფებოდა ღვინოს. თანაც ის კაცი, ვისაც ტიკი ზურგზე ჰქონდა მოღებული საყეინოში უმატებდა ღვინოს და ყვეღაზე უფრო ხმამაღღა გაჰკიოღდა: „შაიშრო, შაიშრო!“ „ღვინო კარდანახული, ბიჰი გადაღახული“ — თან ამას ყვიროღდნენ და იყო სიციღი და ერთი ამბავი. პირვეღი რომ თავს დაიღწევედა, ახღა სწვა გაიღეოღებდა და ასე გრძეღდებოდა საყეინოს სმა. საყეინო იყო მამაკაცებთან, ქაღებთან არ გაჰქონდათ, საყეინოში ერთიღეოღესაც პატიყოღდნენ; რომეღიღე კაცი ფულს ჩავიღღოდა და ვინმეს დაპატიყებდა; ვისაც შეეძღლო, ბღომად ფულს ჩავიღღოდა და ბევრს დაპატიყებდა. ჯერ ფულს ჩავიღღოდა და ერთ კაცს დაპატიყებდა, მერე მეოღრედ მეოღრე კაცს დაპატიყებდა. ფუღის რაოღდენობა განსაზღღვრული არ იყო, ვისაც რამდენი სურდა, იმდენს ჩავიღღოდა. სპიღენძის ფულს არ სწირავდნენ. თუ ვინმე შესწირავდა — ბევრს. ღვინოში მას არ ჩაყრიღდნენ, ჩაყრიღდნენ მშრალ თასში, საღაც ქაღაღდის ფული ეყარა. საყეინო კარგა ხანს გასტანდა. საყეინოში დაპატიყება სხვა დაპატიყებაზე მეტად ფასღებოდა. ფული ხატს ეწიოღებოდა და შემწირვეღს სახელი რჩებოდა. საყეინოში ბღომად ღვინო იხარჯებოდა და ბღომად ფულიც რჩებოდა. საღამომღე გრძეღღებოდა იგი და როგოღრც ყვეღასი, თასის წესრიგის ბოღოც მოვიღღოდა. დაციღიღდნენ, თასს აიღებდნენ და ყვეღანი დაიძახებდნენ: „აი, გაუმარჯოს ლაშარის ჯვრის პიროფლიანთა, გაუმარჯოს და ნუ გამოიღიოს იმის ყმათაში თავდაღებული ვაჰკაცები, როგოღრიც ისინი იყვენენ“.

საყეინო თასს ვერცხღის ფულით და მეოღრე თასს ქაღაღდის ფულით წაიღებდნენ და გადასცემდნენ ხევისბერს დაუთვეღელად. ის სახაღზოდ დათვეღიდა და გადასცემდა დასტურთ; ისინი ინახავდნენ განძთან და სხვა თანხასთან ერთად. ეს ფული ხმარებოდა ისეე იახსარის ვენახის მოვღას, მუშას, სხვადასხვა ხეღსაწყოებს ვენახის და ქვეერ-მარანის საჰიოღობისათვის. აგრეთვე ხმარღებოდა აქაურ სახატო საჰმეებს. მაგალითად. საღუღეე ქვაბი იქნებოდა ხეღახღა დასაკერებელი, ან სხვა წერიღი ქვაბები, ჩხუტი, ან საღუღეე დარბაზი და სხვა

რამე იქნებოდა შესაკეთებელი. ფულის შენახვა ევალებოდა დასტურებს, ხოლო დახარჯვა-გამოყენებას განაგებდა თავხევისბერი.

საყენოს გარდა, აქ სხვა წესებიც სრულდებოდა, მიდიოდა ქალაქაწირავი იახსარშიც და ხთიმობელშიც. პარასკევს მოთავდებოდა ყველა წესების შესრულება. მზე რომ გორს დაუახლოვდებოდა, ხევისბერი, როგორც აეწერეთ, ისევე იმ წესით ზარს დარეკდა. მლოცავი ხალხი პირველის წერით მადლს მოსთხოვდა და კარატეს წასასვლელად მზადებას შეუდგებოდა. მოიყვანდნენ ცხენებს, აკიდებდნენ ბარგს, ჩამოგროვდებოდნენ მოედნის ბოლოში წამოსასვლელ გზასთან და გაიმართებოდა თამაშობა. ცეკვავდა ოროლი ერთად, ქალი და კაცი, ხნიერი ქალებიც კი. ცეკვავდნენ. ამ დროს ხევისბერი დროშასთან მივიდოდა. მას ვერცხლის თასით ზედაშეს მიართმევდნენ. იახსრის სადიდებულოს დალევდა ისაც და სხვებიც (ხევისბრები ბევრნი იყვნენ, რომელთაც ებარათ სხვადასხვა საქმე, აქ ლაპარაკი მხოლოდ თავხევისბერზეა, რომელსაც ებარა საკლავის დაკვლა, სანთლის ანთება. დროშასაც ხშირ შემთხვევაში ეს ხევისბერი ატარებდა, ზოგჯერ კი მედროშე სხვა იყო. თუ მედროშავე არ იქნებოდა ხატისაგან არჩეული, დროშის ტარებაც თავხევისბერს ევალებოდა). ხევისბერი დროშას მარჯვენა მხარზე გაიდებდა და ხატის თანამყოლნი აქედანვე ფერხისით გამოჰყვებოდნენ დროშას. მოუახლოვდებოდნენ მლოცავ ხალხს, რომლებიც ქუდმოხდილნი იდგნენ. ცეკვას თავს ანებებდნენ, ქალები ცხენებს დაიჭერდნენ და ქვევით გადადგებოდნენ, ვაყები კი ფერხისას დააბამდნენ და შამღერებდნენ საგმირო სიმღერებს: ან ხთიშვილთან დევების ბრძოლის შესახებ, ან რომელიმე ლექსს გმირობაზე.

სიმღერით ფერხისა ჩამოვიდოდა არაგვის პირზე და დაიშლებოდა. თუ ხიდი არ იყო, პირველად მედროშეს, ე. ი. ხევისბერს, თავისი დროშით გაიყვანდნენ წყალში, თან დასტურებიც გაჰყვებოდნენ. დასტურ-ხევისბრები არაგვიდან ცოტა ზემოთ, ნიჯონის გორის ბოლოში, დროშის საბძანო იყო, სადაც დროშას მიაბძანებდნენ და დაისვენებდნენ, სანამ მთელი ხალხი არ მოიყრიდა თავს. გამართავდნენ თამაშობას, სმას. ცოტა ხნის შემდეგ ისევ ხევისბერი გაუძღვებოდა დროშით წინ და გაჰყვებოდა ხალხიც. დაისვენებდნენ საბუჩეს, მერე ესკალასთან, მერე სიპურაში და ბოლოს ავიდოდნენ კარატეს. აქ ჩამოთვლილ ადგილებში ყველგან იყო დროშის საბძანი, ისვენებდნენ მალმალე, იმიტომ, რომ დიდი აღმართია და მედროშავის გაოფლიანება არ შეიძლებოდა. კარატეს იგი დროშას კოშკთან მიაბძანებდა, ხალხს დაამწყალობნებდა და ცოტა შეისვენებდა. მერე წამოაყენებდა საკლავს. საკლავი იახსარის ცხვირიდან უნდა ყოფილიყო. ანდა სასოფლო (სანამ ხატის ცხვარი იყო, იქიდან გამოჰყავდათ და როცა ხატის ცხვარი მოისპო, მერე სასოფლო საკლავს კლავდნენ). საკლავი რომ დაიკვლე-



ბოდა, მოჰყვებოდა მეზღენების საკლავების დაკვლა, ყველა თავთავის საკლავს ატყავებდა და ხორცს ხარშავდა. იმართებოდა სუფრები. დღე ამ სამზადისში ღამდებოდა. ათევედნენ ღამეს ისევ ნაბღებში, უნდა ითქვას, რომ ფშავლური ქალ-ვაჟური წესებიც სრულდებოდა აქ — „ნადობ-ნამძობობა“, ანუ „წაწლობა“. ეს ამბავი ჩუმად ხდებოდა და თუ ვინმეს ასეთ ამბავს შეამჩნევდნენ, ხუმრობით გირაოდ რამეს წართმევდნენ, ქუდს, ქამარს და აღარ მისცემდნენ, სანამ ერთ ბოთლ არაყს არ მოუტანდა ჯარიმას. ასე ხუმრობა-თამაშობაში და მღერაში გაათევედნენ ამ ღამეს.

დილას ხევისბერს წყალს მოართმევდნენ, ხელ-პირს დააბანინებდნენ და ერთ ყანწ არაყსაც დალევინებდნენ (აქ წყალი შორს იყო და თუნგ-თულუხებით მოჰქონდათ). ხევისბერი ფეხზე გაიხდიდა, საზარესთან მივიდოდა და დარეკდა ზარს. ზარის ხმაზე მლოცავი წამოიშლებოდა, კაცები ქუდებს მოიხდიდნენ, დიდი და პატარა ყველა პირსაზარისაკენ დადგებოდა და პირჯვარს იწერდა. ხევისბერი დაამწყალობებდა: „გწყალობდესთ ლაღი იაჯსარი თავის კარის მლოცავთა, სასიხარულოდ გაგიქადოსთ მისი ლოცვა-დიდება, სასინანულოდ ნურა გაგიქადოსთ“. „თქვენიმცამც მწყალობელია“. — იტყოდნენ ყველანი. ვინც წინა დღეს ვერ მოასწრო, ეხლა დაიხოცებოდა მათი საკლავები. ერთ მხარს აძლევდნენ დასტურ-ხევისბერებს და ტყავის სახსარს ერთ აბაზ ფულს, დანარჩენი საკლავი პატრონს რჩებოდა. სუფრები აქაც ჩვეულებრივი იყო. იმართებოდა მღერა-თამაშობა. კარატეში მარტოდროშის საბძანი კოშკი და საზარე იყო, არც არაფერი წესი სრულდებოდა განსაკუთრებული. საკლავი იხოცებოდა და ამ საკლავის სისხლს (ზოგიერთისას, ვისაც ასე ჰქონდა შეთქმული) ასხურებდნენ საზარესაც და დროშის საბძანსაც. ერთხელ საწირავთ მიიტანდნენ და მოანთებდნენ დიდებათ დროს. ხევისბერი როცა ზედაშეზე აღიდებდა იახსარს, ამ დროს საწირავებიც იქ ეწყო.

მზის ჩასვლის დროს ხევისბერი აბძანებდა დროშას, დაამწყალობებდა ყმათ და ყმათაში დღეს იახსარის კარის მლოცავთ, ზედაშით თასთ გაადიდებდა და გამოუძღვებოდა არახიჯის კარატისაკენ. ხალხიც გამოჰყვებოდა თან. არახიჯის კარატეც შუაფხოელების კარატის პირდაპირ ახლოს იყო, პატარა ამაღლებულ გორაზე. აქ იყო საზარე და დროშის საბძანი. მლოცავი ხალხის საბინაო გორაკის ბოლოზე იყო ბალახიანი მოედანი. ხალხი დაბინავდებოდა, დასტურ-ხევისბერები მალა ავიდოდნენ. ხევისბერი დროშას თავის საბძანში მიაბძანებდა და ხალხს დაამწყალობებდა. მიიტანდნენ ზედაშით სავსე სამ ვერცხლის თასს, დააწყობდნენ საწირავთ, სანთელსაც აანთებდნენ და ხევისბერი შეუდგებოდა დიდებათ. დიდებათაში ამწყალობებდა ყმათ

და მეზღვნეთ. დიდება რომ გათავდებოდა, თასებს გამოსცლიდნენ, ისევ ააქსებდნენ და შენდობას ეტყოდნენ იმ სულებისათვის, ვინც აქ წინათ ემსახურებოდნენ ამ ადგილის ანგელოზს ლალს იახსარს და ახლა აღარ არიან. ამ თასებსაც გამოსცლიდნენ და დაიწყებოდა ზღვნობა. მოყავდათ თითობით საკლავები და კლავდნენ. საკლავის დაკვლაშიც ახალი წესი არაფერი იყო. ყველაფერი ისე სრულდებოდა, როგორც შუაფხოვლების კარატეს, მხოლოდ აქ ორი ქვევრი იდგა მიწაში რომელზედაც ამბობდნენ; აქ ერთ ბერს უტხოვრია, ერთ ქვევრში წყალი სდგომია, მეორე ქვევრში ზედაშე ღვინოო. სასოფლო საკლავის სისხლს ამ ქვევრებსაც უწევდნენ და იმ ბერის ძალასაც სთხოვდნენ, ეშუამდგომლა ღმერთთან და იახსართან, რომ ამ მლოცავებზე და ყმათაზე წყალობით ყოფილიყვნენ.

საკლავები რომ დაიხოცებოდა, გაიმართებოდა ლხინი. სუფრების გამართვა აქ მაინცდამაინც არ იცოდნენ, იშვიათ შემთხვევაში უფრო არაზიჯელი თუ ვინმე გამართავდა, არც დრო რჩებოდა. ხევისბერი დროშას ისევ ააბძანებდა, დაამწყალობებდა ყმათ, მლოცავთ და გამოემართებოდა შუაფხოსაკენ. ჭალამდინ ისევ დროშას ჩამოჰყვებოდნენ, ხევისბერი და დასტურები ხატში დროშას მიაბძანებდნენ, სადიდებელთ დადგამდნენ, ადიდებდნენ ხატს. დროშას ჩამოხსნიდა მედროშავე. მეგანძური დასტური თას-განძს შეინახავდა, სადაც ადგილი იყო. მერე გაიყოფდნენ, რაც მათ დარჩათ — საკლავების თავები, მხრები, ქადის და პურის ნაწილები, ტყავის ფული. ყველაფერს თანასწორად გაანაწილებდნენ და ამით მოთავდებოდა სერობა.

## მ ა რ ი ა ნ ო ბ ა

მარიანობას დროშა არ ებმოდა. დანარჩენი წესები ჩვეულებრივ სრულდებოდა. მოიტანდნენ თას-განძს, ლუდი დამზადებული იყო იმ დასტურთაგან, რომლებსაც თითო დღეობა ჰქონდათ ნარგენი. საკლავი იკვლოდა სასოფლო. ხორცი ხატშივე იხარშებოდა და იქ დამსწრეთ ჩვეულებრივი წესით ხელზე ურიგებდნენ. პური ხალხისავე შემოწირული იყო, ქადის საწირავთა ნაჭრებიც. მარიანობას ქადები უფრო ხთიშობელში მოდიოდა, რადგან მარიანობა ხთიშობლის დღეობად ითვლებოდა. ხთიშობლის კოშკის ქადის დასაჭრელი და სანთლის ასანთები აქვე იახსარში არის. საკლავი აქვე იხოცებოდა, უფრო ზვარა, ძროხის პირველმოგებული ხბო, რომლის გაზრდაც არ შეეძლებოდა. მათ ხთიშობელში კლავდნენ. ზვარას გაზრდა ითვლებოდა დანაშაულად ხატისა და ღმერთის წინაშე. თუ პატრონი ვერ გაიმეტებდა და არ დაკლავდა, მერე რაც უნდა ზარალი მისდგომოდა ოჯახს, ზვარის არდაკვლას დაბრალდებოდა, უფრო ძრო-

ხების ზარალი. ამიტომ ყველანი კლავდნენ მას. ხთიშობელში, ანუ ადგილის დედაში ქადის ნაწილი .და საკლავის მხარი ეძღვოდა დასტურ-ხევისბრებს. ხთიშობელს ცალკე დღეობა არ ჰქონდა და არც დასტურ-ხევისბრები ჰყავდა თავისი, ერთი პატარა კოშკის მეტი არც არაფერი სხვა გააჩნდა, ითვლებოდა იახსარის სალოცავის ერთ-ერთ ნაწილად. იახსარს, დიდ სალოცავს, ჰყავდა ადგილის დედა და ასეთი წვრილმანი მისთვის ჰქონდა ჩაბარებული. ესეთი შემოწირულობანი ითვლებოდა იახსარის პატივისცემადაც, რადგან ადგილის დედაც მისი ნაწილი იყო. აუცილებელიც იყო, მას ადგილის დედა ჰყოლოდა და ასეთი რამეებისათვის მიექცია ყურადღება, რადგან იახსარს საგმირო საქმეები ებარა და წვრილმანის დრო არ ჰქონდა.

მარიანობა დილას იწყებოდა და საღამოზე მთავრდებოდა, მეზღვენები მიდიოდნენ გაღმა ხატში და ნინახშიც ანთებდნენ სანთელს. დასტური და ხევისბერი დაახვედნენ ბევრ სანთელს, წავიდოდნენ გაღმა ხატში და ნინახში, სადაც იახსარი პირველად ცხოვრობდა, აანთებდნენ. თითო-ოროლა ყმას შეთქმული ჰქონდა და ნინახშიც მიჰყავდა საკლავი. ხოლო იქ ხორცის მოხარშვა და სუფრის გაკეთება არ იცოდნენ: ბოთლით არაყს, ღვინოს ან ლუდს მიიტანდნენ, იახსარს აღიდებდნენ და დალევდნენ. ნინახში ქადა არ იცოდნენ, მიიტანდნენ მარტო საწირავთ. გაღმა ხატში კი ქადაც იცოდნენ სახარბაქეში (სახარბაქე ჰქვია. იმ ადგილს, სადაც ზამთრობით ჰყავდათ იახსარის კურეტები, გომური ჰქონდათ და ახლაც არის ნაგომურალი). აქ ქადა იმიტომ კი არ მოჰქონდათ, რომ სახარბაქეა, არამედ იმიტომ, რომ კარატიდან ჩამოსული იახსარი პირველად აქ დაარსდა და მერე გამოვიდა ავის გორს. ამის გამო ზოგიერთ დღეობაში აქ საკლავსაც კლავდნენ და სუფრასაც მართავდნენ. ნინახში რასაც დაკლავდნენ ან სულ სახლში მიჰქონდათ, ან გამოიტანდნენ ავისგორს, სადაც იახსარის მთავარი სადღეობაა, აქ გაატყავებდნენ, ხორცსაც აქვე მოხარშავდნენ: სუფრასაც აქ გაკეთებდნენ და ყველა წესს ასრულებდნენ. სხვა წესით აქ არცერთგან არ ხსენდებოდა იახსარი, მას ერთი და იმავე წესით და სახელით ახსენებდნენ ნინახში, სახარბაქეში, ავისგორს და კარატეს. მარიანობის დღეობაშიც გამოილოცავდნენ ჩვეულებრივი წესით. სასოფლო საკლავი ყოველ დღეობაში იკვლებოდა, ზოგიერთ დღეობაში კი, როცა ხევისბერი ეტყოდა, ან დაწესებული ჰქონდათ, დაკლავდნენ იახსარის ცხვრის ფარიდან გამოყვანილ საკლავს. მაშინ სასოფლო აღარ დაიკვლებოდა, ის ჩაითვლებოდა სასოფლოდ.

ნადისათვის მორიგე დასტურები აღუღებდნენ ლუღს და აფუგ-  
ლებდნენ სალუღეში. ხევისბერი დანიშნავდა დღეს, უფრო შაბათს  
ნადისათვის. შეატყობინებდნენ ვანხეე-არახიჯაში და ხორხში იახსარაჲ  
ყმებს. ისინიც დანიშნული დღისათვის მოვიდოდნენ და იმართებოდა.  
ნადი. ორ არჩეულ საკლავს ჩამოიყვანდნენ იახსარის ფარიდან. ხევის-  
ბერი პირველად გახსნიდა კოდს, კოდთან დააწყობდნენ საწირავთ,  
დადგამდნენ სამს ვერცხლის პატარა თასს, ამოიღებდნენ კოშით ლუღს  
და ავსებდნენ თასებს, ანთებდნენ სამ ფეხ სანთელს და დააკრავდნენ  
იქვე ქვაზე საწირავთან. ხევისბერი დადგებოდა პირწოდმა და შეუდგე-  
ბოდა დიდებთ ჩვეულებრივი წესით და სიტყვებით, ახვეწებდა ყმათ,  
ყმათაში მშრომელთ და თავდადებულთ სახატო საქმისათვის. დიდებას  
მოათავებდა და დასცილდნენ თასებს. მერე ავსებდნენ და შანდობას  
ეტყოდნენ იმ სულებისათვის, წინათ ვინც თავდადებულნი იყვნენ  
სახატო საქმისათვის და დღეს აღარ არიან. ამ თასებსაც დასცილდნენ  
ყველანი. მერე საკლავებს დაკლავდნენ. ორ-სამ ახალგაზრდას დაა-  
ვალებდნენ საკლავების გატყავებას და ხორცის მოხარშვას. ხევისბერ  
გავიღოდა, აიღებდა ნამგალს, პირველი გამოსჭრიდა ყანას და იტყოდა:  
„ღმერთო და ჩვენო სალოცავო ლაღო იაჯსარო, შენ უშველე შენთ  
ყმათა ნადში მოსულთა თავის მრვალებობის ასასრულებლად. დაუტა-  
ნე მადლი და ბარაქა ნაშრომ-ნაამაგარსაცა და მიეც მადლი შენთ ქე-  
როქროთაცა“. ცოტას მომკიდა და ჩამოართვამდნენ ნამგალს. წამო-  
ეხვეოდნენ ყანას მომკელებიც და დაიწყებოდნენ ნამგალ-სათითეებით  
მკას (ფშავში უნამგლოდ არ მკიან, ხევსურეთში კი მეტწილად ხელით  
გლეჯენ ყანას უნამგლოდ). თან მისდევდათ დასტური ლუღიანი ქვა-  
ბით ან ჩხუტით, ხელში ეჭირათ თასები და ასმევდნენ მუშებს. სვამ-  
დნენ, თან მკიდნენ და მღეროდნენ კიდევ. მღერა იცოდნენ მკის დროს:  
ჯერ ერთი იძახებდა სიმღერის თავს, სხვებიც იმავე ხმაზე აპყვებოდ-  
ნენ. მემრე მეორე გაიმეორებდა ამავე სიტყვებს და ისინი თითქოს  
ერთი მღერისო, ყველანი ერთ ხმაზე ხმამალა მღეროდნენ:

ნეტავინ, კარგავ ქაღო, ყანაიმც მოგვცა ზიარი,  
გარივა სამარგლაი, ნაპირიმც მისცა ტყიანი,  
მემრამც ვის აყურებინა, ჩემი და შენი გრიალი.

სხვა ასეთ სიმღერებს მოიგონებდნენ და მღეროდნენ. ზოგი მკი-  
და, ზოგი კონავდა, ზოგი ძნას აგროვებდა და ზოგი ძნის წერებს აგებ-  
და (ძნის წერას ეძახოდნენ ხუთ ძნას ან მეტს ძირით მიწაზე დაყუ-  
ლებულს, ერთმანეთისათვის მიბჯენილს. წერა რჩებოდა გამოშრობამ-

დინ. გამოშრობის შემდეგ კი დასტურნი გადახუთლავდნენ. ე. ი. ერთ-მანეთზე გადააგებდნენ რამდენიმე წერას და იმას უწოდებდნენ „ხუთულას“). ასე გრძელდებოდა მკა, ვიდრე ხოდაბუნს ანუ სანადოს არ გადაარჩებოდნენ. როცა სამკალს გადაარჩებოდნენ, მოულოცავდა ყანას დასტური ან ხევისბერი. იგი უკანასკნელი ღერების გამოჭრის დროს იტყოდა: „ღმერთო და ჩემო სალოცაო ლალო იაჯსარო, დასწერე ჯვარი ამ ჯარით და დარ-ამინდით ნაჯნავსა, დარით მომკილსა. ლალო იაჯსარო, შეარჩინე ხელი და მკარი შენს ნადში ერთგულ მომუშავეთა და თავდადებულთა. დაუტანე მადლი და ბარაქა თავის ნაშრომ-ნაშვრალსაცა“. ამ სიტყვების შემდეგ უკანასკნელ ხელეურს გადააგებდა და დაიძახებდა: „ღმერთო, გაუმარჯვე ლალს იაჯსარსა და, ლალო იაჯსარო, შენ გაუმარჯვე შენთ ყმათა. გა-უ-მა-რ-ჯ-ო-ს!“. „გაუმარჯოს!“ — ყველანი მალალი და გაგრძელებულის ხმით ყვიროდნენ. ამის შედეგ მობრუნდებოდნენ და დასხდებოდნენ ქალები ყანის პირში, კაცები კი ხატში წავიდოდნენ (ქალი მრევლობიდან ხუთი დღის შემდეგ მოვიდოდა ნადში). ხატში ზორცი მოხარმული დახვდებოდათ და გაიმართებოდა სუფრა. პური მოტანილი იყო ხალხის მიერ შემოწირული საწირავეების სახით. მას წვრილად დასჭრიდნენ და სუფრაზე მოსატანად ჰყოფნიდათ. ხალხი დასხდებოდა მწკრივზე და დაუდგამდნენ სუფრას, ქალებს ცალკე. მხოლოდ თავთავის წილობას ყველას წინ დაუწყობდნენ. ეს, რა თქმა უნდა, შენდობის თქმის შემდეგ ხდებოდა. ხევისბერი გამზადებული სუფრით და სასმელით, ანთებული სანთლით შენდობას ეტყოდა იმ ხალხთ, რომელნიც შარშან იყვნენ ამ ნადში და წელს ვეღარ დაესწრნენ. მოიგონებდა უპატრონო მკვდრებსაც და ამის შემდეგ იმართებოდა სმა-ჭამა და მღერა (ნადში თას-განძის მიტანა არ იცოდნენ, მიჰქონდათ მარტო სპილენძის თასები და სამი პატარა ვერცხლის თასი სადიდებლად). პურს რომ ჰამდნენ, ყველანი წავიდ-წამოვიდოდნენ სახლებში. დასტურ-ხევისბრებიც გამოილოცავდნენ. ამით თავდებოდა ნადი.

## გიორგობა

გიორგობა იცოდნენ ყოველთვის გიორგობისთვის ათ რიცხვში. ამ დღეობაშიც დასტურები ლუდს აღულებდნენ, საკლავი ან სასოფლო იყო, ან იახსარის ფარიდან გამოყვანილი. თუ ხევისბერის პირით იახსარი ბრძანებდა, მაშინ გამოყავდათ ამ ფარიდან, თუ არა, თავისი ნებით არავის შეეძლო გამოყვანა. საკლავის დაკვლა, ხორცის მოხარშვა, სუფრა და დანარჩენი ყველა წესი სრულდებოდა ისე, როგორც ზემოთ დღეობებში არის აღწერილი. დიდება და შენდობის თქმაც იყო იმავე წესით და სიტყვებით. ამ დღეობაშიც ბევრი მლოცავი მოდიო-

და, იხოცებოდა ხარები, კურეტები და ჭედლები. ვისაც რა უნდოდა საზამთრო სახორცედ, ახლა დაკლავდნენ და ხორცი აქედან მიჰქონდათ შინ. ხარს რქებზე გაუკეთებდნენ კვერებს (ხევსურულად ძიძიტა). კვერები იყო მრგვალი პური, დაჭრელებული სხვადასხვა რამეებით, შუაზე ჰქონდა დატოვებული რქის გასაყოფი ადგილი; როგორც მკლავზე სამაჯური, ეგრე ჩამოეცმებოდა რქებზე. ორივე მხარეს თითო ფეხ სანთელს დააკრავდნენ და მერე ადიდებდა იახსარს ხევისბერი. დიდების შემდეგ ხარი ისე იდგა, ვიდრე სანთლები არ დაიწვეებოდა, შემდეგ შეკონავენდნენ, წააქევედნენ და გამოჰრიდნენ ყელს. ამ დღეობაში დროშაც გაშობძანდებოდა. სასანთლეში სანთელს ანთებდნენ და ზარიც ირეკებოდა. დანარჩენი წესი არაფრით განსხვავდებოდა ზემოთ აწერილ დღეობებთან.

### • შობა ანუ ქრისტე

საშობაოდ ხევისბრები წმიდობდნენ ყველა თავისი წესის მიხედვით. თავხევისბერი ხუთმეტი დღით ადრე უნდა შესდგომოდა ხატში მისვლის საშადისს. ტანს იბანდა ყოველდღე თუ არა, დღეგამოშვებით მაინც. ოჯახში აღარ ცხოვრობდა, ცოლისაგან ცალკე უნდა ყოფილიყო. იტყვიან, რომ ხევისბერი ხუთმეტობამდინ სანთელს ვერ აანთებსო, ე. ი. თუ ოჯახიდან წმინდად არ იქნებოდა ხუთმეტ დღეს მაინც (აქ ისე მძიმე წესები სიწმინდის მხრივ კიდევაც არ ჰქონდათ დასტურ-ხევისბრებს, როგორც სხვა ხატებში, მაგალითად, გოგოლაურთის თავარმოწამეში და სხვა). დასტურებიც ოჯახიდან წმინდად იჭერდნენ თავს. შობის წინა დღეს ყველანი თავს მოიყრიდნენ სალუღეში, ხევისბერი გააღებდა დარბაზის კარს და ვისაც შეეძლო აქ შესვლა, ისინი შევიდოდნენ. მიიტანდნენ საწირავთ, გააყეთებდნენ სანთელს და ჩვეულებრივი წესით გახსნიდნენ კოდს. პირველი თასებით ადიდებდნენ ღმერთს, კვირას და იახსარს. თასებს რომ დასცილდნენ და ხელახლა აივსებდნენ, შენდობას ეტყოდნენ იმ მიცვალებულთათვის, რომლებსაც დანამადლისი რაიმე ჰქონდა იახსარისათვის. აგრეთვე უპატრონო მკვდრებსაც არ ივიწყებდნენ. მერე საკოდიდან დასტურს მიჰქონდა ჩხუტით ლუდი დარბაზში და იმართებოდა სმა. იახსარში ხევისბერი ბევრი იყო, ხანდახან ცხრა-ათი კაცი იყრიდა თავს. ყველას თავ-თავისი საქმე ებარა, მხოლოდ თავიხევისბერი იყო ერთი. ყველა ხევისბერა, ორი წლიური დასტური და ორიც მორიგეობით, რომლებიც თითო დღეობაში ლუდს ამზადებდნენ (მღუღე დასტურნი) მოვიდოდნენ და შობა ღამეს ხატში გაათევდნენ ლუდის სმაში და მხიარულობაში. ერთ სასოფლო საკლავსაც დაკლავდნენ და შუაღამის დროს ხევისბრები ამ საკლავის ხორციით გაიხსნიდნენ მარხვას. მარხვის გახსნის წინ თავი-

ხევისბერი ერთი თასით დაილოცებოდა, დაამწყალობნებდა დასტურ-ხევისბრებს და ყმათ, უსურვებდა მრავალი შობა-ახალწლის გამოცვლას მშვიდობით. მერე საკლავის ხორცის სუფრას დალოცვდნენ ძველ ხევისბრებისათვის, რომლებიც იახსარის რწმუნებულები იყვნენ და აღარ არიან. ამ თასებსაც გამოცილდნენ. პურს და ყველს აიღებდნენ და პირველად ხევისბერი და მერე ყველანი იტყოდნენ: „ღმერთო, გაუმარჯვე ლაღს იაცსარსა და, ჩვენო სალოცავო, შენა სწყალობდე შენთა ყმათა და ყმათაში დღეს შენის კარის მლოცველთა, დასტურთა და კვეისბერთა, მიეც წყალობა და მრავალჯერ ალოცვიე შენს კარზე შობა და ახალი წელი“. ჯერ პურ-ყველს შექამდნენ და მერე ხორცსაც აიღებდნენ.

ასე გაიხსნიდნენ მარხვას და თითქმის გათენებამდინ სვამდნენ ლუღს, არაყს. გათენებაზე მოვიდოდა სოფლის ხალხიც. მადლს მოსთხოვდნენ მოსულნი და იტყოდნენ: „აშენდით, ხატ-კაციანად, აშენდით“, „დაშენდი, წყალობა ჩვენი სალოცავისა“ — ეტყოდნენ დასტურ-ხევისბრები. ზოგი ქადა-პურს მოიტანდა, ბოთლით არაყს, ზოგი საკლავს მოიყვანდა ზღვენს. ზოგი ხთიშობელში მოიყვანდა ზვარას, მოიტანდა ქადას და აქაც არყიან ბოთლს მოაყოლებდა, გაუჩნდებოდა საქმე დასტურ-ხევისბრებსაც — დასტური ქალებს ჭრიდა იახსარშიც და ხთიშობელშიც. თუ დასტურს დრო არ ჰქონდა, ამ შემთხვევაში ხევისბერი ჭრიდა ქალებსაც. ზღვენებს ხოცავდა ხევისბერი იახსარშიც და ხთიშობელშიც. ხთიშობელში რაც არაყი მოჰყვებოდა, ქადას, ქადის დაჭრის შემდეგ ბოთლიც იახსარში მიჰქონდათ. აქ ხალხი ისხდა საქვაბეში და ვისაც იქ შესვლა არ შეეძლო, სალუდის კარზე იჯდა და აქ სვამდნენ სოფლიდან მოტანილ არაყსაც და ლუღსაც. შეწვავდნენ საკლავების ღვიძლს ცეცხლის ალზე, დაჭრიდნენ, დაამარილებდნენ და ერთიმეორეს სთავაზობდნენ. პურად შემოწირული ქადა-საწირავებო იყო დაჭრილი. ამ დღეობაში სუფრა იშვიათად იცოდნენ, რადგან გარეთ სიცივე იყო და შიგნით ყველა ხალხი ვერ შევიდოდა სალუდეში და დარბაზში (სუფრები იცოდნენ უფრო ზაფხულ-შემოდგომაზე, რადგან ხალხი ბუნსოზე თავისუფლად დასხდებოდა). ეს დღე დადამდებოდა სმა-ჭამაში. შეიძლებოდა ცოტათი შეემღერნა ვისმე და ისე დიდი ღვინ-მხიარულება არ იყო. ზღვენებისას, მხრების გარდა, კიდევ სხვა ხორცსაც უტოვებდნენ დასტურ-ხევისბრებს, იმიტომ, რომ შობიდან ახალწლამდე ერთ კვირას დასტურ-ხევისბრები მუდმივად ხატში რჩებოდნენ. დღე და ღამე აქ იყვნენ დასტურნი, რომლებიც ერთი წლით იყვნენ დაყენებულნი, აქ იყვნენ ხევისბრებთან და ყოველგვარ სამსახურს უწყევდნენ ხატის წესრიგს და ხევისბრებს. მღულე დასტურნი კი ხანდახან მოვიდოდნენ აქ. სასმელ-საჭმელი ამ კვირას არ აკლდათ. მათ რჩებოდათ შობას დაკლული სასოფლო საკლავის ხორ-

ციც, ამის გარდა სოფლიდან მოსდიოდათ მოსაკითხი. ყველა კომლი მოუტანდა ხორცის ქადას, ან ხინკალს, კეცეულებს და სხვა, თან მოაყოლებდნენ არაყს ბოთლით. ზოგ ღლეს მოუვიდოდათ ოთხი-ხუთი მოსაკითხი. მოსაკითხის მომტანი ზოგი შევიდოდა სალუღეში დასტურხევისბრების თხოვნით, ზოგი კი გარეთ დაჯდებოდა ქვის სკამზე (ქვის სკამები გაკეთებული იყო ხალხის დასასხდომად ხატის კარზე). შეიძლება ქალსაც მიეტანა, თუ ოჯახში კაცი არ ჰყავდა მოსაკითხის წამლები. მოვიდოდა იმ ადგილამდინ, სადაც ქალებისათვის იყო განსაზღვრული. იქიდან ერთ-ერთი ხევისბრის სახელს დაიძახებდა, ან დასტურის სახელს, გაიგონებდნენ, მიეგებებოდნენ და წაიღებდნენ. მოსაკითხის მომტანს ჭამის შემდეგ დაამწყალობებდნენ და გაისტუმრებდნენ.

სანთელს ან მოსაკითხის მომტანი მოაყოლებდა ან ხატიდან დააკრავდნენ სუფრაზე. (სუფრად ჩაითვლებოდა რითიც მოიტანდა მოსაკითხს, ხატში სანთელი მუდამ ჰქონდათ დამზადებული). სანთელს რომ დააკრავდნენ და არაყსაც ვერცხლის თასში დაასხამდნენ (ერთი ჭიქა ამისთვის მუდამ ჰქონდათ აქ), ხევისბერი დალოცავდა მოტანილ სუფრას: „ღიდება და გამარჯვება მოხსენდეს ძალს ხთისას, სამართალს კვირაისას. გამარჯვება ჰქონდეს ჩვენს სალოცავს ლაღს იაქსარს. იმათი ძალი და მადლი სწყალობდეს ღლეს ჩვენს გამკვლევ — გამკითხველს (სახელი მოსაკითხის მომტანისა), მრავალი შობა-ახალწელი ალოცვიოს მშვიდობისა თავის ცოლშვილით, მიიქსენოს ღმერთმა და ჩვენმა იაქსარმა ამ სუფრითა და სანთელ-კელაპტრითა ის სულ-წმიდანი, ამ ჩვენს გამკითხველს ვისთვისაც ემეტებოდეს ეს სუფრა. ცოტამც ღიდად მიუეა, რიოში წმიდად. თუ ვინმე იყოს უპატრონო ოხრის სულმკვდარი და შენდობას გამოგველოდეს, ჩვენ სახელდობრ ვერ ვიგონებდეთ და ჩვენი სალოცავი კი არ ივიწყებდეს, ჰქონდეს დანამადლისი ენითა, კელითა, შენაძღვენ-შენაწირითა; ამავე სუფრით მოიქსენიენეს ისინიცა (სუფრის პატრონის ერთ-ერთი მიცვალებულის სახელს იტყოდა, — მაგ. იოსები) იოსების მასპინძლობითა, იმათ შანდობა ჰქონდეს. ჩვენს სალოცავს ღიდება და მიცვალებულის პატრონებს ღდეგძელობა“. ერთი ჭიქა არაყიც იქნებოდა დასხმული, ხევისბერი ჭიქას ხელში აიღებდა და დალევდა. მერე ყველანი გარს შემოეხვეოდნენ სუფრას, პურითაც და სასმელითაც შანდობას ეტყოდნენ იმ მიცვალებულებს, ვინც ხევისბერმა მოიხსენია. პურს ჭამდნენ და რაც დაჩებოდათ, ნაწილს თავისთვის დაიტოვებდნენ, ცოტას კი გააყოლებდნენ ჭურჭელს. შეეძლო, თუ არ შეეძლო, ყველა ვალდებულად სთვლიდა თავს და მიჰქონდათ სოფლიდან მოსაკითხი. ვერ და არ მიტანა იახსარის რისხვად მიანდათ და სხვა რომ არაფერი ჰქონოდათ, ამ მოსაკითხისათვის მაინც იშოვიდა რამეს.



ეს კვირა ასე გაივლიდა. ახალი წლის (წელწლის) წინა საღამოს სოფლიდან ყველანი სალუღეში მოიყრიდნენ თავს, ვისაც შეეძლო მოსვლა ქუდიანს. დაკლავდნენ იახსარის ფარაში არჩეულ კედილას. მოსულებს მოჰქონდათ საწირავნი და სათეო პუჭი, საწირავნი როგორც ზემოთ გვაქვს აწერილი, ერთი მოზრდილი, მრგვალი პურია და სამი პატარა მრგვალივე პური ზედ აძეს. გული არა აქვს, სათეო პური არის მოგრძო ლავაში. ამ პურებს ყველას დასტური ჩაიბარებს და აწყობს სიპისაგან გაკეთებულ სუფრაზე. მეკვლეებს არაყიც მოაქვთ ოჯახებიდან, ლუღსაც ამოიღებდნენ კოდიდან დასტურნი და იყო ლუღ-არყის სმა, სიმღერა ფშაური. მოიხარშებოდა ხორციც და დასტურნი გააწყობდნენ სუფრას. ხევისბერი ჯერ აღიდებდა იახსარს და მერე შენდობას ეტყოდა სუფრას, თუ ვინმე შარშან იყო ამ მეკვლეში და ახლა ცოცხალი აღარ არის, ან უპატრონო მკვდარია და მომგონე არა ჰყავს. ეს შესანდობარი თასი ყველას ჩამოურიგებოდა (ხევსურეთში სმაში მეტნაწილად ფეხზე დგანან და სმის დროს საჭმელი არა აქვთ. ფშავში კი სხედან და სასმელ-საჭმელი ორივე ერთად მოაქვთ).

ხევისბრები და დასტურებიც ჯერ აქ იყვნენ, მერე კი წავიდოდნენ საბეროში, მთელ ღამეს არ იძინებდნენ მეკვლენი (მეკვლეში მისვლა ხევსურეთში, მაგ. არხოტში, ოჯახიდან ერთს ეკუთვნის, აქ კი ყველანი მივლენ, ოჯახში რამდენიც უნდა იყოს ქუდიანი). თენების დრო რომ მოატანდა, კვალს დაიჭერდნენ, გარეთ აღარავინ გამოდიოდა, ცისპირი რომ გატყდებოდა, ხევისბერი დარეკდა ზარს. მეკვლენი ზარის ხმაზე ფეხზე წამოდგებოდნენ, დაიწერდნენ პირჯვარს და მოემზადებოდნენ დასტურ-ხევისბრების შესახვედრად. საბეროში ჰქონდათ დასტურთაგან მოტანილი გოგა (ხევსურულად სამეკვლეო), გამოვიდოდა პირველად თავხევისბერი, მივიდოდა მეკვლეებთან, მოიტანდა გოგას და კარებიდან მეკვლეს შეუგორებდა, თან იახსარს ევედრებოდა: „დალოცვილო ლალო იაქსარო, ბევრი შობა-ახალწელი მოჰკვარე ამ მეკვლეთ და შენთ ყმათ მშვიდობით და კარგად ყოფნით“. ერთ-ერთი მეკვლე გოგას ორჯერ კიდევ მოუტანდა და ხევისბერი შემოაგორებდა. გოგას ყურადღება ექცეოდა, თუ რომელ გვერდზე მოვიდოდა. გამოცხობაშიც გოგაზე დანიშნული ჰქონდათ ყმათაში კაცი, საქონელი, ცხვარი, პური და სხვა. გამომცხობი დაისწავლიდა და რომელინაწილიც უფრო მაღლა აიწევდა, ის მომავალი წლისათვის კარგი ნიშანი იყო. ხატში შესაგორებელი გოგა ცხვებოდა დასტურის სახლში, აცხობდა ხნიერი ქალი ან თვით კაცი. თუ არა, გოგას გამომცობ ქალწ. მრევლობიდან მეხუთე დღე უნდა ჰქონოდა მანც, თუ მეტი არა, აგრეთვე მრევლობის დრო არ უნდა ჰქონოდა მოახლოვებული.

გოგას რომ შეაგორებდა, ხევისბერი გადადგამდა ზღურბლზე

ფეხს და იტყოდა: „ფეხი ჩემი, კვალი ანგელოზისა, მოგილოცავთ, მეკვლენო, ახალი წლის გამოცვლასა, დიდი გიმატეზით და დიდი გიმატოსთ ჩვენმა იაკსარმა, წულიანი, ბედნიერი წელი დაგიყენოთ მაღლიან-ბარაქიანი, მშვიდობისა და ერთურობის კარგად ყოფნისა“. ამ დროსვე შემოვიდოდნენ ყველა დასტურ-ხევისბრები და ასეთი სიტყვებით ულოცავდნენ ერთიმეორეს ახალი წლის გამოცვლას. ცოტა ხანა დასხდებოდნენ, დასტურ-ხევისბრებს არყით სცემდნენ პატივს და ამასობაში გათენდებოდა კიდეც. გაშლიდნენ ნაბადს და ყველას ქუდეებს დაყრიდნენ ზედ. მეორე კალთას ნაბდისას ზედ გადაათარებდნენ ზევისბერი შეეხვეწებოდა იახსარს: „ა დალოცვილო იაკსარო, შენნყმანი შენის წყალობით შეინახენ და შენნი მეკვლენიცა. ბედნიერი წელი და კვალი გამოუცვალე და მრავალს დაასწარი ახალწელსა. დალოცვილო ჩვენო სალოცაო, ლალო იაკსარო, შენის სახელით არგინე მეკვლეობა, რომნისადაც გემეტებოდეს და საიმედოდ მიგაჩნდეს“. ამ სიტყვების შემდეგ ზევისბერი ნაბდის ქვეშ შეყოფდა ხელს, ერთ-ერთ ქუდს გამოიღებდა და გადმოაგდებდა მეკვლეებთან. მეკვლენი აიღებდნენ და ვისიც იყო, იმას ერგებოდა პირველი მეკვლეობა, მეორე ქუდს გამოიღებდა და გადმოაგდებდა; ეს ქუდი ვისიც იყო, იმას ეძახდნენ „ჯარის დედას“. პირველი მეკვლე წავიდოდა სოფელში, თავის სახლში მივიდოდა და შეაგორებდა გოგას, როგორც ვიცით, ასეთი მილოცვით და გოგას წესების დაცვით. მეკვლენი ჯერ ხატიდან არ წამოვიდოდნენ. პირველ მეკვლეს თავის სახლში მოუმზადებდნენ ძღვენს, სასმელ-საკმელს და ის წაიღებდა ხაშტი. მიუტანდა დასტურ-ხევისბრებს, ისინი დაამწყალობნებდნენ, მოტანილ ძღვენს შენდობას ეტყოდნენ მათი მიცვალეზულებისათვის და ისაუზმებდნენ. პირველი მეკვლის მოსვლამდე სოფელში გარეთ ვერავინ გამოვიდოდა, ყველა უთვალთვალებდა მის სოფელში მისვლას და რომ მივიდოდა, მერე გამოვიდოდნენ კარში. დიასახლისი ჩაიტანდა გომურში პურს და შეაქმევდა ძროხებს. ნაწილი დარჩებოდა ამ პურისა და გაამზადებდა ნაწილს: შეახვევდა ძროხების მორჩენილ პურს, ყველს, ერბოს, ხორბალს, ოჯახში რაც რამეა ყველას, წყლის ქურჭელს და აჩქარებით წავიდოდა წყალზე. ყველანი ცდილობდნენ, რომ სხვებისათვის მიესწროთ და წყალში ნაწილი ჩაეგდოთ. ნაწილს რომ წყალში ჩააგდებდა, იტყოდა: „წყალო, ნაწილი მოგიტანე (არხოტში ამ ნაწილს ნიკს უწოდებდნენ). შენი ბედი და წყალობა გამომაყოლე, ბედნიერი წელი დაგიყენე კაცისი, საქონისი, წულიანი და პურიანი“. ამოკრეფდა წყალს და წამოიღებდა შინ; რომ მიიტანდა, ოჯახის წევრები ცოტა-ცოტას ყველანი დალევდნენ, ჩაიტანდნენ და ძროხებსაც ასხურებდნენ ახალი წლის დილის წყალს, ოჯახში რაც რამე იყო, ყველაფერს ასხურებდნენ. იგი მიღებული იყო როგორც იაზმა.

მეკვლე რომ ხატში დაბრუნდებოდა ზღვით, უკვე დაკლული იყო იასარის ფარიდან საუკეთესო ჰედლია, გაატყავებდნენ და მის ბეჭს დაუდებდნენ ძღვნის მომტანს, გამოუძღვებოდა სოფლისაკენ ჯარის დედა (მიუძღვებოდა მეკვლეთ, ვითომ ჯარს მიუძღვებოდა). მეკვლენი ჯარის დედას მოჰყვებოდნენ ხუმრობა-თამაშობით; აყრიდნენ თოვლს — თეთრად დაგვიბერდიო, ზოგი ხელს ჰკრავდა და თოვლში წააქცევდა. ჯარის დედა თვითონაც უფრო მეტს ხუმრობდა. ამ აბით შემოვიდოდნენ სოფელში. თუ ქათამი შეხვდებოდათ, დაკლავდნენ და ერთი ამბით, მღერა-თამაშობით მოდიოდნენ. სოფელში დაიშლებოდნენ და ყველანი თავ-თავიანთ სახლში წავიდოდნენ მისაკვლევლად.

მეკვლე გოგას შეაგორებდა და შევიდოდა, მიულოცავდა ახალწელს, ოჯახის წევრებიც ჩეულებრივ უპასუხებდნენ, მერე გამართავდნენ სუფრას და ისაუზმებდნენ (არხობში და ხევსურეთში წყალზე მაშინ წავა ერთ-ერთი ოჯახის წევრი, როცა მეკვლე შინ შემოვა, ოღონდ მეკვლეს არ ეჩვენება წასვლაში. ფშავში კი პირველი მეკვლე სოფელში რომ შემოვა, მაშინ მიდიან წყალზე). მერე მიიყვანდნენ მეზობელს, უფრო ბავშვებს და შემოატანინებდნენ კვალს. კვალის შემოტანა თუ ძალიან პატარა არ იყო და შეეძლო, მიულოცავდა ახალ წელს. ოჯახში დამხვედრებიც ულოცავდნენ მას. გაუმასპინძლებოდნენ, რაც რამე კარგი საქმელი მოეპოვებოდათ; თუ დაღევდა, არაყსაც დააღვეინებდნენ. ხილი, კაკალი ან თხილი ყველას ჰქონდა. ჩეულება იყო — ამ დღისათვის თაფლი უნდა ჰქონოდა ყველას ოჯახს, უნდა ჩაეყარათ თაფლში გაყინული ერბო, ჯერ მეკვლესათვის მიეტანათ სუფრაზე თაფლ-ერბო და მერე ვისაც დაპატიებდნენ, ყველას მიართმევდნენ და დააბერებდნენ ტკბილად. ვიდრე მეკვლეს არ მიიყვანდნენ და კვალს არ შეატანინებდნენ, მეზობელი მანამდინ არ შევიდოდა მეზობლის სახლში. თუ საქმე რამე ჰქონდა, ან დაპატიება უნდოდა, კარებზე დაუკაკუნებდა, გაივლიდა და შორს დადებოდა. ხმამალა არ დაუძახებდნენ სახლში ერთიმეორეს. თუ კვალი შეტანილი ჰქონდათ, მასპინძელი სახლში შეიპატიებებდა, თუ არა და აქედანვე გაისტუმრებდა. ყველა ცდილობდა, მეკვლე აღრე მიეყვანა და კვალი შეეტანინებინა, რომ მერე გახსნილიყო მომსვლელთათვის სახლში შესასვლელი გზა. ამ დღეს ეპატიებოდნენ ერთმანეთს. სოფელში რომ მიივლ-მოივლიდნენ, კაცები ისევ წავიდოდნენ ხატში, გაატყავებდნენ იმ დილას დაკლულ საკლავს, მოხარშავდნენ ხორცს, გამართავდნენ სუფრას, ჯერ აღიდებდნენ იახსარს და მერე შენდობას ეტყოდნენ მიცვალებულებსათვის. კარგა დროსტარების შემდეგ წამოვიდოდნენ ისევ სოფელში და კიდევ იმართებოდა ოჯახებში დაპატიება. დასტურ-ხევისბრებიც გამოილოცავდნენ და მოდიოდნენ შინ. ასე მთავრდებოდა შობა-ახალწელი.

შობას დროშა სულ გარეთ იყო გამობძანებული. ჩამოხსნიდნენ გამოლოცვის დღეს, ნინახში იცოდნენ მთავარი დღეობა ლიტანია დღეს. ლიტანიას ეძახდნენ წელწდის წინადღეს. ამ დღეს დასტურ-ხევისბრები დროშით მიდიოდნენ ნინახში. დაკლავდნენ საკლავს და იმართებოდა სმა. მოდიოდნენ სოფლიდან მეზღვეებიც, მხოლოდ საკლავებს აქ არ გაატყავებდნენ, რადგან აქ დარბაზ-სალუდე და სხვა რამ დაფარული არაფერი იყო და გარეთ სიცივეს არ გაეძლებოდა. საკლავები იახსარში მიჰქონდათ და იქ ატყავებდნენ. დანარჩენ წესსაც ყველაფერს აქ ასრულებდნენ, რაც საკლავის დაკვლის შემდეგ ხდებოდა.

## ა ლ ღ ო მ ა (ახმაზა)

წელწდის შემდეგ იახსარში პირველი დღეობა მოდიოდა აღდგომა. აღდგომა-დღეს დასტურ-ხევისბრები მოდიოდნენ ხატში და აწესრიგებდნენ ყველაფერს, მეგანძურს მოჰქონდა თას-განძი, გარეცხავდა და დაალავებდა მისთვის განკუთვნილ ადგილზე. დანარჩენები ასუფთავებდნენ დარბაზს, საბეროს და სხვა. ლუდი წინასწარ იყო დამზადებული მორიგე დასტურთაგან და საკოდში კოდში იდგა. დასტურნივე მოიტანდნენ საწირავთ, მესანთლე ამზადებდა სანთელს და ჩამოქნილს ერთად აწყობდა. ყველაფერი რომ წესრიგში მოვიდოდა, დააწყობდნენ კოდთან საწირავთ, მოაცილდნენ კოდს ლუდის თავზე მოდგმულ ჩამს, ამოიღებდნენ კოშით ლუდს და ჩაასხამდნენ სამს ვერცხლის პატარა თასში. ამ თასებსაც საწირავთან დადგამდნენ, აანთებდნენ სანთელს, დააკრავდნენ კოდზე ერთ, ხოლო საწირავთან საქ ფეხს სანთელს და ხევისბერი შეუდგებოდა დიდებთ (დიდება და სხვა წესები ყველა ისე იყო, როგორც ამაღლების დღეობაში). დიდება რომ მოთავდებოდა, ჭერ ისე დაკლიდნენ ამ თასებს და მერე მიცვალბულებს მოიგონებდნენ ყველა ჩვეულებრივი წესით. ამას მოჰყვებოდა სასოფლო საკლავიც ყველა თავისი წესებით. ამის შემდეგ მოვიდოდნენ სოფლელები, მოყავდა საკლავები, უფრო მეტი ზვარები მოდიოდა ამ დღეობაში, რადგან მარხვაში საკლავს არ კლავდნენ და შვიდი კვირის მანძილზე ბევრი ზვარები გროვდებოდა. ამ ხნის განმავლობაში ზვარას დედას არ აშორებდნენ. იგი უნდა. დაკლულიყო მაწოვარი ისე, რომ დედას მოსხლეტილი არ ყოფილიყო. მოდიოდა ქადა-პურები და დასტურ-ხევისბრები ყველაფერს აწესრიგებდნენ ჩვეულებრივი წესით. მარხვას ხევისბრები ამ დღემდე არ გახსნიდნენ. როცა სასოფლო საკლავი დაიკვლოდა მაშინ პირველად პურ-ყველით და მერე ხორცითაც გაიხსნილებდნენ. მარხვის გახსნისას იტყოდნენ: „ღმერთო და ჩემო სალოცაო, ლალო იაკსარო, უშველე შენთ ყმათა და ბევრი აღდგომა და მარხვის გავსნა მშვიდობისა და კარგად ყოფნისი მოჰგვარე“. ამის შემდეგ სრულ-

დებოდა ყველა ის წესები, რაც წინ დღეობაში ავწერთ. ამით მთავრდება შუაფხოს წლიური დღეობები იახსარში.

გამოგვჩა ა ღ ე ბ ა. აღება დიდმარხვის დადგომის წინა შაბათს მოდიოდა, მაშინ კლავდნენ იახსარში ერთ საკლავს. სისხლი ყველგან ესხურებოდა, სადაც საბძანებელი და სხვა არის ამ ხატში. ამას ეძახოდნენ „ეკლესიის ნათვლას“. დანარჩენი წესი ამ დღეობაშიც ჩვეულებრივ სრულდებოდა.

შუაფხოვლებმა სამხთო იცოდნენ სოფ. ქუთხში, მარიანობის სწორზე. ქუთხი შუაფხოვლების ყოფილი ადგილი იყო, ახლა აქ ცხოვრობენ მკედლურები. შუაფხოელ კაცს მოუკლავს მკედლური კაცი და ქუთხში ერთი კომლის წილი მიუცია მკედლურისათვის ამ კაცის სისხლში. აქ ჰყოლიათ სალოცავი — ადგილისდედა ხთიშობელი. ადგილი მიუციათ. მაგრამ სალოცავი ისევ შუაფხოვლებს სთხოვდა სამსახურს. მკითხავის პირით შემოუთვლია, რომ მისი დღეობა უნდა დაწესდეს მარიანობის სწორზე. ამ დღეს შუაფხოვლები წავიდოდნენ ქუთხში, სადაც ხთიშობლის კოშკია ძველადვე აშენებული. აქ საკლავს დაკლავდნენ. თან მიჰქონდათ სასმელი: ლუდი ან არაყი. საკლავის ხორცს მოხარშავდნენ და იქვე ჭამდნენ. საღამოს ჩამოვიდოდნენ მაშარას. მაშარაც შუაფხოვლების ადგილია, აქაც ნიშია ადგილის დედისა და ეძახოდნენ სამხთოს (ქუთხი და მაშარა, ორივე კარგა დაშორებულია შუაფხოდან სამი-ოთხი კილომეტრით, სამხრეთ-დასავლეთ მხარეს). მაშარაში ძველი ნასოფლარია, აქ ისევ არის მაშინდელი ჩადგმული ქვევრები, რომელთა შესახებ ასეთი თქმულება არის:

მაშარაში თურმე ცხოვრობდა ერთი მდიდარი კაცი, გვარად წიკლაური. ზაფხულობით თავისი ნახირი ედგა უბისთავს, იქიდან ერთი კილომეტრის მანძილზე მიღები ჰქონდა ჩაწყობლი, რომლებიც ქვევრებში ჩადიოდა. უბისთავს ძროხას რომ მოწველიდნენ, მიღებით ქვევრებში მოდიოდა რძე და ყველ-ერბოს აქ ამზადებდნენ. მერე წიკლაური წასულა თავის ადგილში (როგორც აბობენ, ხევსურეთიდან ყოფილა მოსული). ამ ადგილზე გადმოედანენ კიდევ რომელი წიკლაურები შუაფხოვლებს, დახოცეს ერთიმეორე და დიდი მტერობის შემდეგ შერიგდნენ. ადგილი კი შუაფხოვლებს დარჩათ. როცა წიკლაური ცხოვრობდა, აქ ადგილისდედა იყო. მერე შუაფხოვლები აღარ ასრულებდნენ ლოცვის წესებს და თურმე ხშირად სეტყვავდა აქაურ ჰირნახულს. შემდეგ მკითხავს უთქვამს: მაშარაში დააწესეთ სამხთო და მერე მოგშორდებათ სეტყვაო. მას შემდეგ აქაც დააწესეს მარიანობის სწორზე სამხთო და, როგორც აბობენ, აქ სეტყვა იშვიათად იცის.

ქუთხიდან ჩამოვიდოდნენ მაშარას, აქაც სასმელი მოჰქონდათ, საწირაენი, სანთელი და ერთი საკლავი. აქ მარტო დასტურ-ხევისბრები კი არ მოდიოდნენ, არამედ მთელი სოფლის მამაკაცები. სასმელი

დასტურების მიერ იყო დამზადებული, საკლავი კი სასოფლო იყრპური ხალხს მიჰქონდა საწირავების სახით. საკლავით ადგილის დედას ახვეწებდნენ ჰირნახულის დაცვას და გადარჩენას სეტყვისაგან. ხორცს ხარშავდნენ და სუფრა იმართებოდა. ამ დამეს აქ ათევდნენ. დილით ცოტახანს დარჩებოდნენ, ისაუზმებდნენ და წამოვიდოდნენ შინ. ხორცი რაც რჩებოდა, დასტურ-ხევისბერები წაიღებდნენ შინ. საკლავის დაკვლის დიდება და სხვა წესები ყველა ისე იყო როგორც ამალღებაში.

მთავარანგელოზის ხატის ამბავი, რომელიც ცაბაურთიდან გამოფრინდა. ერთი ცაბაური ქალი იყო შუაფხოში გამოთხოვილი. ეს ქალი ჰყავდა ვილაც ფოცხვერათ კაცს. ამ ფოცხვერათ სისხა\* შეუდგათ და იხოცებოდნენ. ცაბაური ქალიც ძალიან ავად გახდა და მამას შეუთვალა: ხატი გამოაბძანე, შუაფხოსაკე გადმოახედებინე და იქნება მეშველოსო. მისი მამა მთავარანგელოზის ხევისბერი იყო ცაბაურთაში. ორჯერ დანაბარებზე მამამ არ შეუსრულა, რადგან უღლეობოდ ხატის გამოაბძანება არ შეიძლებოდა. მესამედაც რომ შეუთვალა — ვკვდები და მიშველეო, ხევისბერმა ჯერ ერთხელ გამოაბძანა და გადმოახედებინა ცაბაურთიდან შუაფხოსაკენ (ცაბაურთა მალა მთაზე მდებარეობს, შუაფხო კი ქალაში არის, სწორედ ცაბაურთის გორის ბოლოში), მეორედაც და მესამედაც რომ გამოაბძანა და გადმოახედებინა, „დასცქვრა“ ხელიდან ხატი და გადმოფრინდა. წამოვიდა და ფოცხვერათ სახლის თავზე რომ მოვიდა, თოფივით დაიქუხა, საკემისას სახლში პირდაპირ ცეცხლში ჩავარდა. ნაწილი კიდევ დაიწვა. მოასწრეს და გამოიტანეს ცეცხლიდან. გაწყრა ხატი და ის ხევისბერი თავისი ოჯახით სულ ამოწყვიტა — უღროდ რად გამოაბძანაო. ამ ფოცხვერათ ოჯახიც, ვისი გულისთვისაც ხატი იყო გამოაბძანებული, სულ ამოწყდა. მერე ხატმა აღარ მისცა ნება, რომ ცაბაურთაში წაებძანათ და დარჩა შუაფხოში იახსარში.

ფოცხვერანი იყვნენ გვარად ბადრიანები და ამათ გვარს ჯერაც დანადები აძევს საკიდლის ნათვლა. ყველა კლავდა წელიწადში ერთ საკლავს თავის ოჯახში. აღიდებდნენ იახსარს, მთავარანგელოზს და სისხლ უწევდნენ თავის საკიდელს. ამას ეწოდებოდა საკიდლის ნათვლა. მას შემდეგ აიკრძალა ცაბაური ქალის გამოთხოვება შუაფხოში და შუაფხოველი ქალის გათხოვება ცაბაურთაში. და თუ ასეთი მოხდებოდა, ბოლო კარგი არ იყო: ან შეილები დაეხოცებოდით, ან სულ არ ეყოლებოდით და ან ცოლ-ქმარში მოკვდებოდა რომელიმე ადრე. ეს წესი მოსდევდა გვიანობამდინ და მტკიცედ ასრულებდნენ.

\* მუცლის კირი.

დღეობები, სხვადასხვა ამბები.

კოვალას ამბები მიაშობო მისმა ძველმა ხევისბერმა ხევსურა თათარაშვილმა, 70 წლისამ, მცხოვრებმა სოფელ უძილაურთაში. მისი ნათქვამი ჩაწერილია სიტყვა-სიტყვით.

კოვალა იყო ხორციელი, ხორციელის შვილი. ის პატარაობისას ძალიან კარგი ყმაწვილი ყოფილა, ჭკვიან-გონებანი. დევები ასეთ ყმაწვილს ძალიან ემტერებოდნენ. ერთხელ, როცა შინ არავინ ჰყავდა, პატარა კოვალა დაიჭირეს დევებმა და თავისთან წაიყვანეს. კოვალა დევებთან დიდხანს იყო. აწვალბდნენ, ამუშავებდნენ, რაც არ შეეძლო, საჭმელსაც ისეთს აძლევდნენ, როგორც მას არ უნდოდა და ადამიანისაგან არ იჭმოდა. გამოპარვას ვერ ახერხებდა, რადგან პატარა იყო და გზა არ იცოდა. ცოტა რომ მოიზარდა, გაიპარა და ბერებთან მივიდა. იფიქრა: ბერებთან მივალო, ვილოცავ, ლოცვას დავამთავრებ, დამბადებელს ძალსა ვთხოვ და დევებს ამოვწყვეტო. მივიდა ბერებთან. ბერებმა კარგად მიიღეს. დაიწყო ლოცვა და შეასრულა. მერე დამბადებელს ძალა სთხოვა: ღმერთო და დამბადებელო, იმდენი ძალა მომეცი, რომ დევები ამოვწყვიტო. დამბადებელმა შეუსრულა თხოვნა და იმდენი ძალა მისცა, რამდენითაც დევებს მოერეოდა. მაშინ დევები ცხოვრობდნენ ციხეთგორს, კართანაში; ერთი ხელმწიფეც ჰყავდათ. მათი ფალავნები იყვნენ: მუსა, ბელელა და ავთანდილი (მთქმელმა მათი ხელმწიფის სახელი ვერ მითხრა). დევების ხელმწიფე იყო ციხეთგორს და აქედან სამართლობდა, დევების კრებასაც აქ იწვევდა. როცა დევებს რამე საბრძოლო გაუჩნდებოდათ, ხელმწიფე დაიბარებდა ციხეთგორს და იქ მოისაუბრებდნენ საერთო საქმეებზე. დევები იყვნენ იორზედაც იქაური დევებიც აქაური დევების ხელმწიფეს ემორჩილებოდნენ და მის ბრძანებას ასრულებდნენ.

კოვალამ გაერგო, რომ დევებთან საბრძოლველად დამბადებელმა საკმაო ძალა მისცა. მივიდა ციხეთგორს და დევებს უთხრა: წადით აქედან, ეს ადგილი დამიცალეთ, მე უნდა დავბინავდეთ. დევებს გაუკვირდათ მისგან ეს ნათქვამი — ეს ვინ არის, რომ ასე გულდიდად გვეუბნებაო. ეს ბუკუკა ჩვენ რას დაგვაკლებსო (ბუკუკა — პატარა ბუზი). კოვალამ გაუმეორე, — თუ არ წახვალთ, ძალით გაგრეკავთო. მერე ძალის გამოსაცდელად რკინის კუნძი დაუდევს წინ, ცულის ნაჯახი მისცეს და უთხრეს: თუ ეგეთი ძალის პატრონი ხარ, რომ ჩვენ აყრას აპირებ, აბა ეს კუნძი დაჭერიო. კოვალამ დაჭრა ცული ცული და კუნძი ორად გახეთქა. დევებს გაუკვირდათ, თანაც შეშინდნენ — ვინ არის ეს ასეთი ძალის პატრონიო. მერე დევებმა უთხრეს: ირემთ

კალოდან ციხეთგორისაკენ ქვები გავკრათ (გავისროლოთ) და ვინც ვა-  
ჯობებთ, ციხეთგორი მას დარჩესო. დათანხმდა კობალა. დევებმა დაი-  
ბარეს ფალავნები: ხაშრით ბელელა, კართანით მუსა და ავთანდილი.  
სხვა დევები აქ იყვნენ. დანიშნეს დღე, როდესაც უნდა მოეყარათ თავი  
დევებს და კობალას ირემთკალოს და ესროლათ ქვები (ირემთკალო  
არის სოფელ უძილაურთის მდლა მთაზე. აქ წინათ ტყიანი ყოფილა და  
ირმები სცოდნია, იმიტომ ჰქვიან ირემთკალო). დანიშნულ დღეს ყვე-  
ლამ მოიყარა თავი, მხოლოდ ხაშრით ბელელა არ მოვიდა. მას იახსარ-  
მა შეუტრა საპარავის ყელში გზა, ლახტი დაჰკრა და იქვე მოკლა. მე-  
რე ჩავიდა ხაშარს და იქაც ამოწყვიტა დევები. თუ სადმე იორზე კი-  
დევ იყო დევების ოჯახები. იახსარი დაჰყვა და ყველგან ამოწყვიტა  
ისინი. იმასაც ძალა ჰქონდა დამბადებელისაგან მოლოცვილი დევების  
გასაწყვეტად.

ირემთკალოს, ახლა სადაც საზარეა, ისევ ეტყობა სიპებით დაზ-  
ღვავებული ადგილი. კობალამ და დევებმა სიპები დააწყვეს იმ ად-  
გილზე, საიდანაც ქვები უნდა ესროლათ, რადგან სროლის დროს მიწა  
არ გაუძღებდა და ჩააბრუნებდა. დანიშნულ დღეს კობალამ ნახა, რომ  
კართანის დევები მუსა და ავთანდილი მოდიოდნენ და მიწას ისე მოჰ-  
კვალავდნენ, როგორც ფიფქ თოვლსა. კობალა ცოტა შეკრთა ასეთი  
დიდი დევების დანახვაზე, მაგრამ დამბადებლისა და თავის ძალის  
იმედი ჰქონდა და გული გაიმაგრა. მოვიდნენ და დასხდნენ დანიშნულ  
ადგილზე. ერთი ქვა მოიტანეს, კობალამ სიმსუბუქით დაუწუნა და უკან  
გადმოავდო უძილაურთაკენ, ის ქვა ისევე არის. მეორე ქვა მოიტანეს  
და ესეც ემსუბუქა, მერე ზედ დააკრეს მეორე ქვა ცომივით და დაა-  
მძიმეს. მესამე ქვა მოიტანეს და ეს კი კარგი სიმძიმისა იყო, ქვა დაჰ-  
რულ ქვას გამოუწონეს ისიც. დევები ერთმანეთს „უთვალზმუნებდნენ“  
(თვალთ ანიშნებდნენ ერთიმეორეს, თვალს უკილავდნენ და დასცი-  
ნოდნენ): კობალა რა არის და რა ქვას გაჰკრავსო? გაღმა კვირა იყო  
სამართლის მიმცემი (ციხეთგორი ირემთკალოდან ერთნახევარი კილო-  
მეტრით იქნებოდა დაშორებული, ჩრდილო-დასავლეთ მხარეს. შუაზე  
არის აკუშოს ხეობა). პირველად დევმა გაისროლა ქვა და გადაავდო  
ციხეთგორს, მეორედ კობალამ გაისროლა. შეიძლება დევის გასროლილ  
ქვამდინ ვერცკი მიეღწია, მაგრამ კვირამ მათხარის წვერი წამოჰკრა,  
შორს გაამალა და გადააქარბა დევის გასროლილ ქვას. მერე მკითხავის  
პირით იცის ბრძანება კობალამ: „კვირა რომ არ დამშველებიყო და  
ქვა არ გაემალა, შეიძლება მე ჩამოვრჩებოდიო. ქვების გასასინჯად მე  
და დევები რომ წავედით, ჩემს გასროლილ ქვას ქაჭები ეხვეოდნენ  
და ვერ ძრავდნენ, უკან გადმოწევა უნდოდათო. ჩვენ რომ გვნახეს,  
თავი ანებეს და გაიქცნენ. იმ ქვას ახლაც ეტყობა, რომ ნაბრძოლია,



მაგრამ ვერ არის გადმოწეული, სხვა ქვაზეა მოხირებული. იმ ქვებს დღესაც შემოლობილი აქვს გალავანი მაღალი ქვებით.

მერე დევები და კოპალა გაიყარნენ მტრობაზე: კოპალას დარჩა დევების ბინა ციხეთგორს, ტახტიც, რომელიც დევების ხელში იყო. აქონდა, კოპალას დარჩა. დევები აქედან ყველანი გადასახლდნენ ფშავის არაგვზე კართანას. ერთხელ დევებმა: მუსამ და ავთანდილმა მოილაპარაკეს — კოპალას სკამი მოვპაროთო. მუსამ უთხრა: მე ქვას მოვპართ და მოვიტან, შენ კი ნადირობად წადი და შეშა მოიტანეო. წამოვიდა მუსა და როცა კოპალა შინ არ იყო, მოჰპარა ქვის სკამი. ე. ი. საბრძანებელი, „დაიწყო“ საბელეზე და წაიღო. გაიგო კოპალამ და თავისი ლახტით დაედევნა. სადაც ახლა არის ის ქვა, კოპალას ქვას ეძახიან, იქ ჩამოეწია, ესროლა ლახტი, დაჰკრა და იქვე მოკლა. ქვას დევის ნახელარი და ნასაბლარი ახლაც ატყვია და სხვა კლდესაც ეტყობა კოპალას ნალახტარი. ალბათ ორჯერ ესროლა, ერთი დევს მოხვდა, ერთი კლდეს, ან დევისად დაკრული მოხვდა კლდესაც.

იმ დროს; როცა კოპალამ მუსა მოკლა და ქვა დააგდებინა, გადმითა მხარეზე შემოჩნდა ავთანდილიც. ერთ მხარეზე მოკლული ირემი ჩამოეკიდა, მეორეზე ძირით ამოწვდილი წიფელი შეშად. კოპალას ხთის ბრძანება ჰქონდა — სადაც დევს ნახვდა, უნდა მოეკლა. ესროლა ლახტი და ავთანდილიც იქვე მოკლა, ავთანდილი გამოქანდა და ფშავ-ხევსურეთის არაგვში ჩაეგდო. ახლაც იქა ძეს ქვად ნაქცევი. წიფელი გადმოვარდა გზის ძირში და ძირით მიწაში დევფლო. მერე „ხატმა ბრძანის“: ავთანდილის ხე ისევ განედლდა, ავთანდილი კი ქვად გადაიქცა, როცა წყალში ჩაეარდაო („ხატმა ბძანის“: ნიშნავს როცა ქნდაგს დასვამდნენ, ის კოპალას სიტყვებით ელაპარაკებოდა ხალხს: მე ისეთი შეძლება მქონდა, რომ ესა და ეს გმირობა ჩავიდინეო). აქვე ახლო, მიგრიაულთის გორის ბოლოში, დევებს ჰქონდათ დიდი ოჯახი და ციხესიმაგრე. კოპალამ მათი მთავარი ფალავნები მუსა და ავთანდილი რომ დახოცა, ხოლო ხაშრელი ბედელა იახსარმა მოკლა, კოპალა ახლა ამ დევების ოჯახების ამოსაწყვეტად გაეშურა. გორის ბოლოში რომ მივიდა, დაინახა, რომ ერთი ცხრათავიანი დევის დედაბერი ჯარას უზის და რაღაც მკლავის სისხო ნართსა ძახს. დევის დედაბერმა კოპალა რომ დაინახა, თვალში ეპატარავა, გაიხარა და ჯარაზე დაამდგრა: „ჩემი შვილის ვახშამიც მოდისო“. კოპალამ აიმაღლა საგმირო ლახტი, დაჰკრა ბებერს და იქვე მოკლა. მერე ავიდა მიგრიაულთ გორის ბოლოში. აქ დევებს ქორწილი ჰქონდათ და კოპალაც სტუმრულად მივიდა, უნდოდა გაეგო, სად როგორ იყვნენ და რაგზით შეიძლებოდა მათი ისე ამოწყვეტა, რომ აღარავინ გადარჩენოდა. დევებმა კოპალა რომ დაინახეს, ერთიმეორეს უთხრეს: „ოჰ, კარგია, რომ ნეფე-

დედოფალთა სუფრაზე მოსატანი საკლავი თავის ფეხით მოგვივიდაო“-  
დევებს კოპალა უბრალო ხორციელი ეგონათ და მაშინ ისინი ხორცი-  
ელთ ჭამდნენ, სადაც ვის გაეწოდნენ. კოპალამ შეურჩია დრო, როცა  
ერთად მოქუჩდნენ, აიმაღლა საგმირო და ყველანი ამოწყვიტნა (ხევ-  
სურის სიტყვით: ამობრასტნა). ერთი დევი თვალწამოთხრილი გაიქცა  
და აბუდელაურის ტბაში ჩავიდა. მას იახსარი ჩაჰყვა ტბაში და მოკლა  
(იახსრის ამბები ცალკე არის აღწერილი. ამ ამბის მთხრობლებმა  
ჩამაწერინეს, ვითომც აბუდელაურის დევი თვითონ იახსარს გაექცა;  
ხალხურ ლექსშიც ისე არის. კოპალას ხევისბერმა ხევსურა თათარა-  
შვილმა კი ჩამაწერინა, რომ ის დევი კოპალას გაექცა, იახსარი მიეშ-  
ველა და იმან მოკლაო. იახსრის მორიგეებმა და ჩამაწერინებლებმა რო-  
გორც იახსარის აღწერილობაშია ნათქვამი, იორზე ბელელთანას, ე. ო.  
ს. ხაშარში, იახსარმა ამოწყვიტა დევები, როცა საპარავისყელს ბელე-  
ლა მოკლა. ხალხური თქმულებითაც, იორზე და თიანეთში იახსარმა  
ამოწყვიტა დევები, ფშავ-ხევსურეთის მიდამოს კი კოპალამ, გარდა შუა-  
ფხოსა და აბუდელაურის დევებისა. ეს უკანასკნელნიც იახსარმა ამო-  
წყვიტაო. კოპალას ხევისბერმა კი ბელელთანის დევების ამოწყვეტაც  
თავის სალოცავს — კოპალას მიაწერა).

კოპალამ რომ დევები გაწყვიტა, ერთი დევი ცოცხალი წამოი-  
ყვანა და ციხეთგორის ბოლოს ხევში კლდის ძირში ჰყავს მკლავზე  
მსხვილი ჯაჭვით დაბმული. კოპალა როცა ძალიან ვისმე გაუწყრება,  
მაშინ იმ დევს აუშვებს, მიუსევს და ავნებინებს დამნაშავისათვის. იმ  
დევის ჯაჭვს ვითომც ნახულობენ იქვე წყალში, მშრალზე არ ინახვი-  
და. ერთხელ ერთი ხევისბერი გააქადაგა იახსარმა, აიღო დროშა და  
წავიდა იმ კლდის ძირში, სადაც დევია დაბმული. ხევისბერი დროშით  
რომ მისულა და ხალხიც მიჰყოლია, უნახავს, რომ რაღაცა იყო იმ  
კლდისძირში და მიიმაღლა. ერთხელ უძილაურ ლეგუშამაც ნახა წყალ-  
ში დევის ჯაჭვი და აკუშელი ხევსურებიც ნახულობდნენ რაღაცას იმ  
კლდის ძირში. ხევსურები იტყოდნენ: ხანდახან ღამით ტირილ-წკმუ-  
ტუნით რაღაცას გავიგონებთ იქიდან, სადაც დევი არის დაბმულიო  
(ხევსურების სოფელი აკუშო ამ ადგილის ახლოს არის და ისინი ვი-  
თომც ხედავენ და უსმენენ ამ დევის საცოდაობას).

სადაც კოპალას ნაბრძოლ-ნაომარია, ყველგან ყოფილა მისი სამ-  
ლოცველო-საზარე და სხვა. კართანას დევების საფლავები ისევაც არის  
მიგრიაულთის გზა რომ ჩამოვა, გზის პირზე. ისეთი ქვები ჩანს მათ  
საფლავებზე, რომ ცხრა-ათი კაცი ვერ დასძრავს.

კობალასაგან დევების დახოცვაზეა ეს ლექსი:

„მშვილდ-ქაიბური ბერისა ქუდიელზედა“ ხეიოდა,  
მუზას მიარტყა ისარი, ბელელას გული სტიკიოდა,  
წყალიც არ იყო იმთენი, რაც იმას სისხლი სდიოდა“.

კობალას მამულები ბევრ ადგილას ჰქონდა უძილაურთაში. ხატის დარბაზი, საქობე, ბელელი და საზარე ყველა სოფლის დასავლეთ მხარეს ჰქონდათ. ამ ხატთ გარშემო სულ ხატის სანადოები იყო. ციხეთგორსაც, სადაც ნასროლი ქვები ეყარა და საზარეც არის, კობალას სანადო მამულებია. ახმეტაში ჰქონდა ვენახი, ზემო თიანეთში, იხიწყაში სანადო მამულები, შახვეტილაში საკურეტე ადგილი და შუაფხოვლების ადგილი მაშარაც კობალას საკურეტედ იყო იახსარისაგან მიცემული. უძილაურთაში სოფელთან ახლოს რაც მამულები იყო, ამუშავებდა სოფელი სანადოს წესით. ხევისბერი დანიშნავდა ნადს და ამ დღისათვის ყველა მოამზადებდა ხარ-გუთანს (უძილაურთაში უღლის ხარით ხნავენ ახლაც). დილაადრიან მიიტანდნენ ყველანი გუთნებს. ცდილობდნენ ადრე მისულიყვნენ სახატო საქმეში იმიტომ, რომ ადრე მიმსვლელი და გვიან წამსვლელი უფრო მეტად მწყალობდებოდა. ამ დროს დასტურ-ხევისბრებიც აქ იყვნენ (დასტური მუდმივად იყო ჩორხაულთ გვარიდან. ამაზე მერე იქნება ლაპარაკი). გუთნებს ყველა შეაბამდა, ხევისბერი მოიხდიდა ქუდს და დაამწყალობებდა: „გწყალობდესთ ჩვენი სალოცავი გმირი კობალა, იმის საქმეში ადრე მომსვლელსა და გვიან წამსვლელსა, ერთგულ მუშასა, თავდადებულსა. ბევრჯელ მშვიდობით გაგატანიოსთ გუთანი, წელი მშვიდობისა და დალიან-ბარაქიანი დაგიყენოსთ გმირმა კობალამა“. „თქვენიცამც მწყალობელია“ — იტყოდნენ ყველანი. თვითონაც ქუდმოხდილები ამბობდნენ: „ჩვენო სალოცავო გმირო კობალავ, შენ უშველე შენთ ყმათა, შენს ყმათაში დღეს შენს სანადოში მომსვლელთა და ამათ ხარსა და გუთანსა. წელი მშვიდობისა და დალიან-ბარაქიანი დაგიყენე, ჩვენო სალოცავო“. ყველანი ერთბაშად გაუჯავრდებოდნენ ხარებს და დაიწყებდნენ ხენას. ყველა ცდილობდა გულით მოეხნა, ბალახის ძირი გამოეთხარა, რომ მის ნახნავ ადგილზე სხვებზე კარგი მოსავალი მოსულიყო, რადგან ასეთებს უფრო მეტად ამწყალობებდნენ და თვითონაც იმედი ჰქონდა ერთგულ მუშას რომ კობალა წყალობას მიეცემა და ბევრ რამეში დაეხმარებოდა, დაიხსნიდა ყველა გაჭირვებიდან. ხარები რომ დაილღებოდნენ, ყველანი ერთბაშად ისვენებ-

\* ქუდიელი — ადგილის სახელია.

დნენ და მანამდე დასტურ-ხევისბრებიც მოასწრებდნენ ლუდის გახსნას (ლუდი წინასწარ იყო ნაღულარი და დამზადებული).

კოდს ხსნიდნენ იმ წესით, როგორც შუაფხოში ამაღლების დღეობაში არის აწერილი, მოიტანდნენ სამს თასს ვერცხლისას, აავსებდნენ ლუდით, დადგამდნენ კოდთან, დააწყობდნენ საწირავთაც, საწთელს კოდზე დააკრავდნენ და ჩვეულებრივი დიდებით გახსნიდნენ კოდს. სხვა ცვლილებები ხუცობაში არ იყო. აახსარის მაგიერ გმირ კოპალას ახსენებდნენ, ამწყალობებდნენ ყმათ და-საყმოში (ამ შემთხვევაში) ნაღში მომსვლელს და იმათ ხარ-გუთანს. დანარჩენი დიდების სიტყვები ერთნაირი იყო. კოდი რომ გაიხსნებოდა, ჯერ დასტურ-ხევისბრები დალევდნენ ცოტ-ცოტას, მოიგონებდნენ მკვდრებსაც და ცოცხლებსაც, მერე ქვაბით ლუდს ნაღში გაიტანდნენ. აქ დაასვენებდნენ ხარებს და ყველა დალევდა. ამწყალობებდნენ ყმათ, ყმათაგან ნაღში მომსვლელთ და იმათ ხარსა და გუთანს. მერე ერთბაშადვე გაუგმობდნენ ხარებს. ასე სმით, საუბრითა და ერთიმეორის წახალისებით ხნავდნენ. ზოგი დამღერებდა გუთანს:

„აჩაჩამ უთხრა გუთანსა: პატარა პური მაქმიე,  
მაშინ საღ იყავ, აჩაჩავ, მე რომ ბუსნები ვამტკრიე“.

ახლა მეორე შამღერებდა:

„ჯორი ჯობ საქონელშია — შინ მივა ავიღებული,  
მერე ჯარი სჯობ ქორაი, მტყელთ მამულთ გაკიდებული“.

ახლა მესამე:

„მესტვირევე, სტვირი დაგეწვა, მონადირევე, არგანია,  
დაილოცე, გუთნის დედავ, მუცელი გაქვს მაძლარია.

შენი ჭირიშე, გუთანო, გათლილო იფნის ხისაო,  
ცოცხლისიც შემნახველი ხარ, დამმარხველი ხარ მკვდრისაო“.

სიმღერა წააგავდა ქართულ ურმულს. სიმღერით სიმღერას ცვლიდნენ, ამ ამბით მოთავდებოდა სახნავი. თესლი უნდა მოეტანა დასტურს. დასტური აქ მუღმივად იყო ჩორხაულების გვარიდან. ჩორხაული იყო ხევსური, ბაცალიგველი. იგი ქრისტე-დილას, ოცდახუთ დეკემბერს გააქადაგა კოპალამ ბაცალიგოში. იქედან გამოიქცა და სადილობის დროს ფეხშიშველი მოვიდა უძილაურთაში, კოპალას საბეროში. ფეხებიც არ ჰქონდა გაყინული იმ სიცივეში და თოვლში. იგი დარჩა უძილაურთაში მუღმივ დასტურად. კოპალამ მისცა თავის მამულები და ამითი ცხოვრობდნენ. დასტურობა შერჩა მათ გვარს. აქ სხვა დასტურები არ იცოდნენ, მხოლოდ თითო დღეობაში ოროლნი აღუღებდნენ ლუდს. ამათ ეძახოდნენ „მღუღეთ“. ჩორხაულთ ებარათ თას-განძი და სხვა სახატო ქონებაც, პურსაც ჩორხაულნი ინახავდნენ. როცა პური მოიმ-

კებოდა, ერთ-ერთი ჩორხაული ხელ-მხარს ინათლავდა და შეიტანდა ბელელში პურს. ჩორხაულთ გარდა საპურე ბელელში ვერავინ შევიდოდა და ვერც ისინი შევიდოდნენ ხელ-მხარის უნათლავად. პურს როცა შეიტანდნენ, მომავალ მდულეებს აუწყავდნენ საკმარ პურს სალულდე. განსაზღვრული ჰქონდათ და იმ რაოდენობით აუწყავდნენ, რადგან ბელლის კარს წელიწადში ორ-ორჯერ აღებდნენ — ერთხელ პურის ჩაყრის დროს და ერთხელ თესლობის დროს. თესლობის დროს კიდევ აუწყავდნენ მომავალ მდულეებს ახალი პურის გალევამდინ საკმარ სალულდე პურს, რადგან იქ ხელ-მხარის უნათლავად ვერავინ შევიდოდა და ეს კი დაწესებული იყო წელიწადში ორჯელ.

როცა ნადი იყო, ამ დღეს ჩორხაული ერთი საკლავით ინათლავდა ხელ-მხარს, მერე ფეხშიშველი შევიდოდა ბელელში, ჯერ თესლს აწყავდა, მერე მდულეებსაც აუწყავდა თავთავის კუთვნილ დღეობაში საკმარ პურს. გამოვიდოდა და დიდი მადლის თხოვითა და ზეეწინით გამოიკეტავდა ბელლის კარს. ლოცვაში კოპალას ჭთხოვდა, ეპატიებინა, რომ ხორციელი იმის ბელელში შედიოდა და თავისი უმეტერებით ბევრ რამეს სცოდავდა. თესლს ჩაყრიდა გულაში, დაიკიდებდა მარცხენა მხარზე და დასთესავდა ქუდმოხდილი. ერთერთი გუთნიდან, ვისი ხარებიც საიმედო იყო და ხევისბერი შეუთვლიდა, გამოუშვებდნენ ხარებს, შეაბამდნენ ფარცხში და დაფარავდნენ მოხნულ-დათესილ მამულს.

ამის შემდეგ ხარებს აუშვებდნენ და დაისვენებდნენ. აქ გამოგვრჩა: ნადის დაწყებისას ერთი საკლავი დაიკვლებოდა, ხორცი მოიხარებოდა და სახნავის გათავების შემდეგ იმართებოდა სუფრა, სუფრაზე პური საწირავებისა იყო — როცა გუთანს მოიტანდნენ, საწირავებსაც მოაყოლებდნენ.

ხორცისა და პურის სუფრას გაამზადებდნენ, ხევისბერი დალოცავდა მიცვალეულთათვის, რომელნიც კოპალის ყმათაში თავის სალოცავის საქმეში ერთგული მუშები იყვნენ და ახლა აღარ არიან (შენდობის თქმა იახსრის აღწერილობაში არის ნათქვამი). საკლავი გამოყვანილი იყო კოპალის ცხვრის ფარიდან. ხალხი დასხდებოდა ბუნსოზე, გაუშლიდნენ რამეს სუფრის სახით და ყველას დაუწყობდნენ თავთავის წილობას. ვისაც სურდა, წვესნაც დაუხსამდნენ სპილენძის თასში. თან ლულს მოაყოლებდნენ და ასმევდნენ ხალხს. პურის ჰამა რომ მოთავდებოდა. წავიდ-წამოვიდნენ სახლებში ყველანი. ჰირნახულს მომკამდე იცავდნენ ჩორხაულნი. აქ ყამირები და სათიბეებიც იყო, რომელსაც ჩორხაულნი თიბდნენ. ყანა როცა მომწიფდებოდა, ხევისბერი გამოუტყხადებდა ნაღს. ამ დროსაც კლავდნენ კოპალას ცხვრის ფარიდან გამოყვანილ საკლავს. ლულს აღულებდნენ მორიგე

დასტურნი, კოდის გახსნა და სხვა წესებიც ჩვეულებრივ სრულდებოდა.

კოპალას ყმები ნაღში სხვა სოფლიდანაც მოდიოდნენ. როცა ხალხი ყანასთან თავს მოიყრიდა, ხევისბერი ქუდმოხდილი ჯერ დაამწყალობებდა იმავე სიტყვებით, როგორც ხენის დაწყებისას, მერე მისცემდნენ ნამგალს, პირველი თვითონ გამოჭრიდა ყანას და იტყოდა: „აღმერთო და გმირო კოპალაო, თქვენის ძალით მოსდის ცას ნამი და დედამიწას მწვანილი, საზრდონი კაცთანი და ცხოველთანი. გმირო კოპალაო, შენ უშველე შენთ ყმათა და ყმათაში შენს მამულში და ნაღში მომსვლელთა თავისი მოვალეობის შესასრულებლად. მშვიდობით აღებული ნამგალი და ცელი შენთ ყმათ მშვიდობითვე დაადებინე. სთველი შვიდობისა და ლალიან-ბარაქიანი დაუყენე. დიდება ძალსა შენსა“. ამ სიტყვებს იტყოდა ქუდმოხდილი, რამდენიმე ხელეულს გამოჰქიდა. ნამგალს გადასცემდა სხვებს და თვითონ წამოვიდოდა ხატთაყენ, აქ მას საქმეები ჰქონდა გასაკეთებელი — კოდის გახსნა. საკლავის დაკვლა და სხვადასხვა სახატო წესრიგის შესრულება. თუმცა სხვა ხევისბრებიც ეხმარებოდნენ, მაგრამ თავი ხევისბერი მეტ მოვალეობას ასრულებდა. ხალხი მკას შეუდგებოდა. ხევისბერი ამ დროს საკლავს დაკლავდა ჩვეულებრივი დიდებით, კოდს გახსნიდა და მორიგე დასტურები ხალხში ლუდს გაიტანდნენ. ხალხი ცოტახანს შეისვენებდა, თითო თას ლუდს დაღევდნენ და ისევ განაგრძობდნენ მკას. დასტური ფეხზე იდგა და ლუდს თან მიაყოლებდა. თითო კაცს შეაჩერებდა და დააღვეინებდა. დანარჩენი ხალხი თან მკიდა, თან მღეროდნენ ორ გუნდად. ჯერ ერთი გუნდი იმღერებდა აჩქარებულის კილოთი, ახლა მეორე. სიმღერის მთქმელი თითო იყო და სხვები ბანს ეუბნებოდნენ:

— ყანაო, ჩვენო ყანაო, აქა რამ მოგიყვანაო?

— კარმა მენა, კაცმა დამთესა, უფალმა მაიყვანაო.

შენ ქალისას წამოდი, წამოვალ მთაჩლიზედო,  
შენ მუშა გამაიყვანე კარისპირ კაგირზედო,  
მოგიკლავ ვარსა ირემსა, მოგიტან სადილზედო,  
პეგა, ჰოგა, მესვეური არ გივარგა და სხვ.

ასეთი შეტევით ყანას მალე მოჰქიდადნენ. ზოგნი მკიდნენ, ზოგნი ძნას კონავდნენ, ზოგნი თავთავს კრეფდნენ, რომ ხატისყანა უსუფთაოდ არ მოჰქილიყო, ზოგნი აქუჩებდნენ ძნას და „წერაებად“ აგებდნენ (ხუთ-ხუთ ძნას მიაყულებდნენ ერთმანეთზე და ამას ეწოდებოდა წერა). წერა ამ სახით კარგა ხანს რჩებოდა, რადგან გამოშრობა იყო საჭირო. რამდენიმე დღის შემდეგ ჩორხაული დასტური „გადაჰქუთულავდა“ — ააგებდა დიდ ძნებს. ყანა რომ გათავებოდა, პატარა ადგილზე დატოვებდნენ მოსამკალს. ხევისბერი ან დასტური ჩორხა-

ული მოვიდოდა და მოულოცავდა ყანას — „ჯვარი გეწეროს, ყანაო, დარით მოცნულო, დარით მომკულო, გაიხვიე ულოშია, გაუტიე კალოშია, ჩაეტიე ბელელშია, გმირის კოპალას სადიდებულოდ და იმის ყმათ სამწყალობნელოდ“. ამ სიტყვებით ყანას გაათავებდა, წელში გამიართებოდა და ხალხს ეტყოდა: „გწყალობდესთ ჩვენი სალოცავის გმირი კოპალა ყმათა და ყმათიშიით დღეს იაქსარის ნაღში ვინც ირჯებით და ოფლს იწმედთ, წელი ბარაქიანი დაგიყენოსთ და ჯელი და მჯარი შეგარჩინოსთ დალოცვილმა“. „გაუმარჯოს გმირს კოპალას“ — ხმამალა დაიძახებდა ხევისბერი და ყველანი აპყვებოდნენ: „გაუმარჯოს, გაუმარჯოს“. ამით გათავდებოდა მკა. მკის დამთავრების შემდეგ მამაკაცები ხატისკარზე წამოვიდოდნენ, ქალები კი შორს დასხდებოდნენ, სადამდისაც მიესვლებოდათ. ადგილს, სადამდინაც ქალები მივიდოდნენ, ქალების საჯარეს ეძახდნენ. მათ საჯარეში მიუტანდნენ სუფრას, კაცები კი იქ დალევდნენ სასმელსაც და სუფრაც იქ ექნებოდათ. სუფრას ხევისბერი შენდობას ეტყოდა მისთვის, ვინც შარშან ნაღში იყო და წელს ცოცხალი აღარ არის. აგრეთვე უპატრონო მკვდრებისთვის. პურის ჭამისა და სასმელის დალევის შემდეგ ხევისბერი დაამწყალობნებდა და წავიდ-წამოვიდოდნენ.

ძნას მიიტანდა სოფელი ხატის საძნოვარში და ხატის კალოზე ჩორხაულნი გალენავდნენ. ერთ-ერთი ჩორხაული საკლავით ხელ-მხარს ინათლავდა და შეიტანდა პურს ბელელში. როგორც ზემოთ ვთქვი, თესლობამდე რა დღეობებიც მოდიოდა, იმ დღეობებში საკმარ პურს ახლავე აუწყავდნენ იმ დასტურებს, ვისაც რომელი დღეობა ებარა. დანარჩენი პური კი ბელელში ინახებოდა თესლობამდინ. აქ დღეობების დაწყება ისე არ ხდებოდა, როგორც ფშავ-ხევსურეთის სხვა ხატებში, ახალი დასტურნი ერთ-ერთ დღეობაში რომ შევიდოდნენ და ამ დღეობიდან იწყებოდა დღეობები. აქ ჩორხაულნი მუდმივი დასტურნი იყვნენ და რიგის დასტურობა წყემსობის ჯერივით მოუდიოდათ — ერთ დღეობაში ერთი ადულდებდა ლუდს, მეორე — მეორეში და ასე გრძელდებოდა. ამა თუ იმ კაცს მუდამ ერთი და იგივე დღეობა კი არ ებარა, არამედ ხან რომელი შეხვდებოდა, ხან რომელი.

ზემოთ დასახელებული მამული შეწირული არავისაგან ყოფილა. კოპალა რომ აქ დაარსებულა, მაშინ იმას თვითონ დაუჭერია, მერე იმის მამულზე ნადებ მამულებს თავის ვაჭირვების დროს ხალხი სწირავდა, ან აყად გახდებოდა ვინმე და მკითხავი ურჩევდა მამულის შეწირვას, ან ტიალ-ოხრად ვისმე მამული დარჩებოდა და ისიც სახატედ რჩებოდა, თუ ამოწყდებოდა ვინმე, ან გვარი, ან ოჯახი; ან თუ ვინმე ხატის მამულის ახლო ცხოვრობდა — სიზმარში რამე ეჩვენებოდა, ისიც აიყრებოდა, სხვა ადგილზე გადაინაცვლებდა და მამული სახატოდ რჩებოდა.

მეორე მამული ციხეთგორს ჰქონდა კობალას, დევები რომ ამოუწყვეტია, მაშინვე დაჭერილი. მერე ხალხისაგან დაემატა შეწირული მამულები და დიდი ხოდაბური გაკეთდა. ამ მამულს ხევსურების სოფელი აკუშო ამუშაებდა. აქაც ნადი იცოდნენ, უძილაურები და აკუშლები ყველანი მოდიოდნენ სამკალში. პური აკუშოში ინახებოდა და ლუდსაც ისინი ადუღებდნენ. უძილაურები მარტო ერთ დღეობაში მიდიოდნენ ზაფხულში. ამ დღეობას ციხეთგორობას ეძახოდნენ. უძილაურებს ლუდიც უძილაურთიდან მიჰქონდათ და საკლავიც. ისინი (აკუშელები) ბევრ დღეობებს იხდიდნენ თავიანთი პურით, დასტურხევისბრები მათ ციხეთგორს თავისი ჰყავდა, უძილაურებს თავისი.

ხოდაბუნები ჰქონდათ ზემო თიანეთში სოფელ ტილინაანებში. აქ არის კობალას ნიში, ამ ადგილს ჰქვია ინანჭა, ტილინაანების სოფლის გვერდზე, სადაც დიდი ხოდაბუნები, ანუ სანადოები იყო კობალასი (ხოდაბუნებსაც ეძახოდნენ და სანადოებსაც). ამ სოფლის მცხოვრებნი ისეთივე კობალას ყმანი იყვნენ, როგორც უძილაურები. აქ იცოდნენ ნადი ხენაშიც და მკაშიც. დასტურ-ხევისბრები ჰყავდათ თავისი. სანადოს ამუშაებდა სოფელი. ლეწავდნენ და პურს ინახავდნენ დასტურნი. ბელელი ჰქონდათ საპურე და როგორც უძილაურთაში, აქაც იმავე წესით ინახავდნენ პურს. დღეობებსაც სულ ისეთი წესით იხდიდნენ, როგორც უძილაურთაში. ქონებაც ჰქონდათ სახატო, სალუდე და მისი მოწყობილობა, დარბაზი, საბერო და საზარეც ჰქონდათ. მხოლოდ უფროსი და მბრძანებელი იყო უძილაურთის ხევისბერი. აქაური მამულის ჩალას ზამთრობით კობალას კურეტებს აჰმევენდნენ. მიუდიოდნენ უძილაურთიდან და კვებავდნენ ტილინაანები. გაზაფხულზე კი მოდიოდა ისევე უძილაურთაში საზაფხულო საძოვრებზე, აქ იყო ჩაბარებული ერთ-ერთი კაცისათვის და ის უვლიდა. ზამთარში კი ტილინაანები მორიგეობით უვლიდნენ თავის საკუთარ გომურში ნადგომ კობალას კურეტებს. კობალას კურეტების ნაწილი აქ ინახებოდა, ნაწილი კი სხვადასხვა ადგილებში (კურეტებზე მერე იქნება საუბარი).

იხინჭაში უძილაურთიდან მიდიოდა დროშა ზაფხულობით, როცა მარანზე მიდიოდნენ კულუხის მოსატანად. ერთ ღამეს იხინჭაში გაათევდნენ ჩავლაზე და ერთს ამოვლაზე. მრავალი საკლავი და შესაწორავიც მოუდიოდნენ მაშინ. სხვა დროსაც შეიძლება მიეწვიათ კობალას დროშა განსაკუთრებული მიზეზით.

დანარჩენი მამულები, როგორც ვთქვით, საკურეტე იყო და ინახებოდა კურეტები ზოგ ადგილებში ზამთარში, ზოგან ზაფხულში.

ხევისბრობა უძილაურთაში იყო მოდენილობით (მემკვიდრეობით), თავიდანვე იყვნენ კოჭლიანნი და თათარაშვილები. ამ ორ გვარში თითო-ორთო კაცს შეარჩევდა კობალა ხევისბრად. ხევისბრად მი-



ყვანა ხდებოდა ან ავად გახდომით, ან გააქადაგებდა პირდაპირ ახალ ხევისბრად მიმსვლელს. ავად გახდილს კი მკითხავეები ურჩევდნენ ხევის- ბრად მისვლას. პირველ მიმსვლელი ხევისბერი ცხრა საკლავით ინა- თლავდა ხელ-მხარს. ვისაც გააქადაგებდა და ისე მიიყვანდა, ის უფრო მკითხაობასაც იწყებდა, დიდებათაც და სახელისდებასაც სიზმარში სწავლობდა, „ხატი ასწავლიდა“.

დღეობების დაწყება გიორგობიდან უნდა ჩაითვალოს, რადგან მაშინ ახალი მოსავლის ლუდი მზადდებოდა, თორემ, როგორც ვთქვით, დასტურები კი არ იცვლებოდნენ იმ წესით, როგორც სხვადასხვა ხატში იცოდნენ.

## გიორგობა

როგორც სხვა ხატებში, გიორგობა აქაც გიორგობისთვის ათში მოდიოდა. ლუდს დაამზადებდნენ რიგის დასტურნი, ვისაც ჰქონდა ნარგენი ამ დღეობისათვის გაძლოლა. ლუდს აღულებდნენ რიგის დას- ტურნი, ხოლო აფუველებდა ჩორხაული დასტური. გიორგობა დღეს ჩორხაული დასტური, ხევისბერი და რიგის დასტურნი ყველანი ხატ- ში მოიყრიდნენ თავს, ჩორხაული და ხევისბრები შედიოდნენ საბე- როში, მხოლოდ რიგის დასტურნი სალუდეში იყვნენ. ლუდიც სალუ- დეში ცალკე გადაკედლილ ადგილას ედგათ, რომელსაც ეწოდებოდა საკოდე. აქაც რიგის დასტურნი ვერ შედიოდნენ, შედიოდნენ მარტო ხევისბერი და ჩორხაული დასტური. ამ დღეობაშიც იკვლოდა სასო- ფლო საკლავი. (ზოგიერთ დღეობაში კი კლავდნენ კოპალას ფარიდან გამოყვანილ საკლავს). დასტურ-ხევისბრები გახსნიდნენ კოდს ისეთი- ვე წესით, როგორც აიწერა იახსარში. საწირავითაც ისეთივე წესით მოიტანდნენ, დააკრავდნენ კოდზე ერთ ფეხ სანთელს, საწირავებზე დადგამდნენ სამ ვერცხლის თასს და ხევისბერი იტყოდა დიდებით ისე- თივე წესით და სიტყვებით, როგორც იახსარში. მხოლოდ აქ ჩაერ- თვის: „გმირო კოპალაო, შენა სწყალობდე შენთ ყმათა, მთურთა, ბა- რულთა, პირიქით, პირაქეთელთა, მავნე მოაშორე, შენი სამგმირო აი- მალღე და მოიხმარე შენთ ყმათ დასაცავ-დასახმარებლად“ და სხვა.. „დიდებით“ დამთავრების შემდეგ, როგორც იახსარში აიწერა, ისევე დაღევდნენ. ამ თასებს, ხელმეორედ ავსებდნენ და შენდობას ეტყოდ- ნენ მიცვალებულებისათვის, რომელნიც კოპალას ერთგულნი იყვნენ, იმის საქმეს ეთგულად ემსახურებოდნენ და დღეს ცოცხლები აღარ არი- ან. ამ შესანდობარ თასებსაც გამოცლიდნენ, საწირავთ პურს გასერავ- და ხევისბერი და იტყოდა: „მოიხსენიენეს ჩვენმა სალოცავმა გმირმა კოპალამ ამ დაჰკრეთილი სეფისკვერითაც ის სულწმინდანი, რომლებიც

კოპალას ერთგულნი ყმანი იყვნენ, მაგის საქმეს ერთგულად ემსახურებოდნენ. თავდადებულნი იყვნენ და ღღეს ცოცხლები აღარ არიან, ჩვენი სალოცავი არ ივიწყებს მათი დანამადლისის გამოთა და ჩვენ სახელდობრ ვერ ვიგონებდეთ. აგრეთვე, თუ ვინმე საწყალ-საბრალო იყვეს და უპატრონო 'კედარი'. ამთ ყველას მოიხსენიებდნენ სეფის-კვერითაც და სასმლითაც. დაასხამდნენ ლუღს და გამოიტანდნენ ხალხში. ხალხიც თავისი ოჯახიდან ხელცარიელი არ მოდიოდა, მოჰქონდათ ქადა-საწირავი, არაყი და ზოგს საკლავიც მოჰყავდა. ქადას დაჭრიდა ჩორხაული დასტური. დადებდა სიბისაგან გამართულ სუფრაზე და იტყოდა: „დიდება ძალსა და ძრეილებასა შენსა, ჩვენო სალოცავო, გმირო კოპალაო. შენ შენის ძალითა და საგმირით უშველე შენს მლოცავსა ქადის მომტანსა, შენთვის სამსახური არ დაუყრია და შენს წყალობას ნუ დააკლებ, ჩვენო სალოცავო გმირო კოპალაო, უშველე და უმეშველე, კაცითაც ამრავლე და საქონითაც ნუ დააზარალებ, აგრემც გაგემარჯვება“. ამ სიტყვებით ქადას დანით ჭვარედინად გადასერავდა. ერთ მეოთხედს გამოჭრიდა, რომელიც ხატში რჩებოდა და სამი მეოთხედი პატრონს უბრუნდებოდა. საწირავები მთლიანად ხატში რჩებოდა. საკლავის დაკვლის წესი ისეთივეა, როგორც იახსარში არის. საკლავს ტყავს გახდიდნენ გულათ, აფელკავდნენ, ნაწილს თავისსავე ტყავში ჩააწყობდნენ, ნაწილ ხორცს კი აქ მოხარშავდნენ, თუ „სუფრის გაკეთება“ ჰქონდათ შეთქმული. ერთი მხარი და ტყავი, ან ტყავის სახსარი — ერთი აბაზი ვერცხლის ფული დასტურ-ხევისბრებს ეძლეოდა. ნაწილი, რაც აქ არ მოიხარშებოდა, სახლში მიჰქონდათ. სუფრის გაკეთების წესიც აწერილია გოგოლაურთაშიც და იახსარშიც. აქაც იმავე წესის მსგავსად აკეთებდნენ. არ იყო სუფრის დადგმაში გარჩევა, ილოცებოდა მიცვალებულთათვის სასმელიც და საქმელიც, აქაც ყველა წესებს შეასრულებდნენ და გამოილოცავდნენ.

## შობა

გიორგობის შემდეგ მოდიოდა შობა (ქრისტე). შობის ღღესასწაულიც ასეთივე წესებით სრულდებოდა, როგორც გიორგობა. მედროშავე ხევისბერი ააბამდა და გამოაბამებდა დროშას, მეგანძური მოიტანდა, გარეცხავდა განძს და დაალაგებდა თავთავის ადგილზე. ღამისთევა არ იცოდნენ, ღღეობა იწყებოდა პირდაპირ შობადილით. დასტურნი მოიტანდნენ საწირავთ, დაამზადებდნენ სანთელს, მოსჭიკავდნენ კოდს. საწირავთან დაიდგმოდა სამი ვერცხლის თასი ლუდით სავსე, და ანთებულ სანთელს კოდზე დააკრავდნენ და ხევისბერი იტყოდა დიდებათ. მერე გამოსცლიდნენ სადიდებელს და შესანდობარსაც

მოაყოლებდნენ. ამას მოსდევდა ყველა ის წესი, რაც გიორგობას ითქვა. შობას მოსული ჩორხაული დასტური და ხევისბრები წელწად-დღემდენ აღარ მიდროდნენ შინ, ამ ერთ კვირას რჩებოდნენ საბეროში.

ქრისტე-დღეს იკვლოდა კობალას ცხვრის ფარიდან გამოყვანილი საკლავი. ნახევარს ამ დღეს მოხარშავდნენ, ნახევარი კი რჩებოდა წელწის კვირაისათვის (წელწის კვირას ეძახოდნენ შობიდან ახალწლამდინ ერთ კვირას). ამ კვირას დასტურ-ხევისბრებს უძილაურთის სოფელში მცხოვრებნი ყველანი მიუტანდნენ საკვლევს (მოსაკითხს), ზოგი მიუტანდა ხინკალს, ზოგი კეცეულებს, ზოგი მოხარშულ ხორცს და სხვა. მიაყოლებდნენ თითო-ორი ბოთლ არაყს. ამ კვირას საკმარი ლუდი თვითონ ჰქონდათ შენახული. მოსაკითხის მომტანს თვითონაც ლუდს დაალევინებდნენ, მოხარშულ ხორცს ან მწვადს მიართმევდნენ და იმით გაუმასპინძლებოდნენ. კვირით-კვირობამდინ ყოველ დღე ორი-სამი კაცი მუდამ მოუდიოდათ. მოსული საბეროში ვერ შედიოდა, დასტურ-ხევისბრები სალუდეში გამოდიოდნენ, აქ ანთებდნენ ცეცხლს და მოსულებთან ერთად ისხდნენ მთელ დღეს. მოტანილ სუფრაზე ანთებდნენ სანთელს და ლოცავდნენ პატივისმცემლის მიცვალებულთათვის. იმის მოტანილ არაყიან ბოთლს რომ გამოსცილდნენ, მერე ლუდით უვსებდნენ და ისე გაატანდნენ შინ.

ასე გაივლიდა ეს ერთი კვირა. ლიტანია დღეს ყველანი ხატში მოიყრიდნენ თავს, მხოლოდ მამაკაცები, სოფლის ხალხი მოიყოლებდა ერთ ნარჩევ საკლავს. საკლავი კობალის ცხვრის ფარიდან იყო არჩეული და ლიტანია ღამისთევისათვის შენახული. თან მოიტანდნენ თითო ქადას, საწირავთ და ჩამოსაქნელ სანთელს. ქადაებს ჩორხაული დასტური დასჭრიდა შუაზე, ნახევარი ქადასა უბრუნდებოდა პატრონს, ნახევარი რჩებოდა ხატში. (სხვა დროს და სხვაგან ყველგან მეოთხედი რჩებოდა ხატში და აქ კი — ნახევარი ლიტანია ღამეს). შესაწირავები მთელად აქ რჩებოდა. ქადას დაჭრის დროს დასტური იტყოდა: „ღმერთო, შენა სწყალობდე და, კვირავ ხთვის მადლის მოკარვეო და ჩვენო სალოცაო გმირო კობალაო, შენ ქადას მომტანსა, შენს მლოცავსა და წესისა და რიგის მყენსა და არდამყრელსა. შენთვის რიგი არ დაუყრია, ჩვენო სალოცაო გმირო კობალაო, და შენს წყალობას ნუ დაკლებ, გახვეწებთ და გავედრებთ, შეიხვეწე და შეივედრე შენის ძალისა და დიდების ჭირიმე, ნუ გაუხდი სასინანულოდ შენს სამსახურსა, სასიხარულოდ გაუჟადე და ბევრი შობა-ახალი წელი მშვიდობით ალოცვიე, დიდება ძალსა შენსა“. წამოაყენებდნენ და საკლავსაც დაკლავდნენ. საკლავის დაკვლაში ახვეწებდნენ ყმათ, ყმათაში მეკვლეში მომსვლელთა და კობალის მლოცავთა. მერე დაკლავდნენ საკლავს, რიგის დასტური გაატყავებდა და მოხარშავდა მას. ხალხი ზოგი ორ

ბოთლ არაყს მოიტანდა. ზოგი ერთს და დაიწყებდნენ სმას (მეკვლენი ისხდნენ სალუდში და დასტურ-ხევისბრები საბეროში, გარდა რიგის დასტურისა, იგი რადგან საბეროში ვერ შედიოდა, მეკვლეებთან იჯდა) ხევისბერიც დასტურებთან ერთად კოდს ვახსნიდა და მერე გამოიტანდნენ ლუდს მეკვლეებთან. მეკვლენი დალაგებულად ისხდნენ და ერთი ვინმე მრიგედ დადგებოდა და ჩამოარიგებდა ლუდს. ამას მოჰყვებოდა ფშაური სიმღერა, ერთმანეთის ვალექსება და სხვა. ამასობაში მოიხარშებოდა ხორციც და გააწყობდნენ სუფრას. სუფრაზე იყო: ხორცი, პური ნაწირავებისა, ქაღების ნახევრები, რომელიც ხატში დარჩა ქადის ვაჭრის დროს. დადგამდნენ ჩხუტით ლუდს, ავსებდნენ თასებს, ერთ თასს ხევისბერს მისცემდნენ, სანთელსაც აანთებდნენ. ხევისბერი სუფრას შენდობას ეტყოდა: „დიდება ღმერთსა ცათა და ჳმელთა გამჩენსა, დიდება დიდს კვირასა ხთვის მალღის მოკარვესა, დიდება შენდა, გმირო კოპალაო; ჩვენო სალოცაო: ამ სუფრითაც, სასმლითა და სეფისკვერითაც და სანთელ-საკმლითაც ამ თავისი ძალის სადიდებლთა. ჩვენმა სალოცავმა მოიჯენივნეს ის სულწმიდანი, რომელნიცა ერთგულად ემსახურებოდნენ გმირს კოპალასა, იყვნენ ძველნი გევისბერნი და დასტურნი და დღეს აღარ არიან. ის სულეები კიდენა, რომლებიცა შარშან იყვნენ მეკვლეშია ჩვენის სალოცავის კარზედა და წელს ველარ დაესწრნენ. ის სულეები კიდენა, რომელთაც ჰქონდეს დანამადღისი ჩვენი სალოცავისადა, ან ენითა, ან კელითა, ან კიდენა საქმითა, უპატრონო სული იყოს და ჩვენ სახელდობრ ვერ ვიგონებდეთ და ჩვენი სალოცავი არ ივიწყებდეს“. ამ შესანდობარს დასტურ-ხევისბრები დალევდნენ, მერე ხალხშიც ჩამოარიგებდნენ და თან მოაყოლებდნენ სუფრასაც. სუფრის მაგიერ ფიცარივით გათლილ ხეებს დააწყობდნენ და სუფრას ზედ გაშლიდნენ. სხვა დროს წილობებს ხელზე არიგებდნენ, მაგრამ ამ მეკვლე ღამეს საერთო სუფრა ეწყობოდა, ხორცი ბევრი იყო და როგორც ვის უნდოდა, ისე ჰამდა და სვამდა. სუფრა აუღებელი იყო მთელ ღამეს. ატარებდნენ დროს უფრო ლექსობაში. თითქმის მთელი ღამის განმავლობაში ანთებდნენ სანთელ-კელაპტრებს. ლექსობა ამ ღამეს უფრო სახუმარო და გასართობი იცოდნენ (ლექსობა, ფშავლებში ერთიმეორისათვის სიმღერით სიტყვა-მოსწრებულ შემღერებას ჰქვია, ხევისურულად კი ფანდურზე დამღერებას), მაგ:

შეთემ თქვა ხახონიშვილმა: ჩემ სიტყვა არის ნამდვილი,  
 სახლ ჭიგრაულთას ავკყარე, ხიშმუს ავიღე ნაწილი. \*  
 იქ კი ტვირთის ქვეშ კვდებოდი, აქ კი მუშაობს მარჯილი,  
 ჩეს დაღონებას რა დალევს, ცხენ გამამდგა მაცილი,  
 იოსების ძნებს ჩაეხედენ, შეიღპირად იყო დაშლილი,  
 მიძახა კოინტალენა — დავმეხე შენი, თვალ-პირი.

ძნებ რაად ჩამიშლევინე, თვალზე ხე-არ გქონდა დათხრილი?  
შენ თუ არ იცი, მე გეტყვი, ცხენს იჭერს საბელ-მარგილი,  
განთურა მშიერა იყო, წუხელ უცვალე ადგილი, —  
მე კონტალეს რას ვეტყვი, მაშინებს გზაში შაყრილი.

ასეთი სახუმარო ლექსებით გაათენებდნენ ლიტანია-ლამეს. ცის-  
კარი რომ ამოვიდოდა და თენებას დაიწყებდა, მეკვლენი კვალს დაი-  
ჭერდნენ. გარეთ აღარავინ გავიდოდა. ერთიმეორეს გააფრთხილებ-  
დნენ — კვალი დავიჭიროთ და გარეთ აღარავინ გავიდესო. ამ დროს  
საბეროშიც ადგებოდნენ დასტურ-ხევისბერები, დაიბანდნენ პირს და  
მოემზადებოდნენ გამოსასვლელად. თავხევისბერი გავიდოდა პირ-  
ჯვრის წერით და მუხლისკვრით, მივიდოდა საზარესთან, ადგებოდა  
ფეხზე, ევედრებოდა გმირ კოპალას აპათოს ხორციელს იმის წმინდა  
ადგილზე საზარესთან მისვლა, წყალობით იყოს თავის ყმათაზე, ბევ-  
რი ახალი წელი გამოუცვალოს მშვიდობით და კარგად ყოფნით. შე-  
მოკრავდა ზარს სამჯერ ნელ-ნელა. თითო შემოკვრაზე პირჯვარს  
დაიწერდა, მერე ჩქარ-ჩქარა დარეკდა კარგა ხანს. ბოლოს სამჯერ  
ისევ ნელ-ნელა და პირჯვრის წერით დარეკდა და მადლის თხოვით  
დაბრუნდებოდა უკან. პირველსავე ზარის ხმაზე მეკვლენი ადგებოდნენ  
პირჯვრისწერით ფეხზე და იდგნენ. ქუდმოხდილნი, ვიდრე ზარის ხმა არ  
მთთავდებოდა.

ერთი კარგი ჭედილა მეკვლეთ თან ჰყავდათ წინა დღესვე მო-  
ყვანილი წელწად-დილისთვის. ამ საკლავს მოამზადებდნენ. დასტური  
ხმაამოუღებლად მივიდოდა სალუდესთან, სადაც მეკვლენი იყვნენ.  
მეკვლენი გაიგებდნენ დასტურის მოსვლას და კარებიდანვე იმას გა-  
დასცემდნენ ჭედილას. ხმას არც ისინი ამოიღებდნენ და არც დასტური,  
ის ამ საკლავს სასაკლაოზე წააყენებდა, სადაც ხევისბერი უკვე მზად  
იდგა. დასტურის და საკლავის მოსვლაზე ის შეუდგებოდა დიდებათ:  
„დიდება შენდა ღმერთო, ცათა და ვმელთა დამაარსებლო, დიდება შენ-  
და კვირავ ხთის მადლის მოკარვეო, დიდება შენდა ჩვენო სალოცაო  
გმირო კოპალაო, შენ გავედრებთ და გახვეწებთ შენთ ყმათა, შაი-  
ხვეწენ და შაივედრენ, დღეს შენის კარის მლოცავნი მეკვლენი. ახ-  
ლის წლის გამოცვლაზედა ბედნიერი წელი და კვალი გამოუცვალე  
და დაუყენე მშვიდობიანი წელი კაცისი, საქონისი და ცხვარ-საწყემ-  
სოსი. შენდა სადიდებულოდ მაიკმარე ეს წამოყენებული სამსახურა  
და შენთ ყმათ სამწყალობნოდ“. დანარჩენი დიდება გრძელდებოდა  
ისე, როგორც იახსარში არის აწერილი. ბოლოს საკლავს დაკლავდნენ,  
რომელსაც დასტური სასაკლაო სიძზე დასდებდა. ყველა დასტურ-  
ხევისბერები სალუდესთან მივიდოდნენ და კარებთან გაჩერდებოდნენ.  
ხევისბერს მეკვლენი მიუტანდნენ გოგას. იგი კიდევ დაიწყებდა ლოც-  
ვას: „ღმერთო და ჩვენო სალოცაო გმირო კოპალაო, გავედრებ შენთ

ყმათა, შაიხვეწენ და შაივედრენ. ბევრი ბედნიერი წელი გამოუცვალე, ახლის წლის გამოცვლაზე, წელი მშვიდობისა და მადლიან-ბარაქიანი, წულიან-პურიანი დაუყენე, მარცხი და ზიანი მოაშორე შენთ ყმათა, დიდება ძალსა შენსა“. ამ სიტყვების საუბარში გოგას შეაგორებდა მეკვლეებთან. ისინიც ფეხზე იდგნენ ქუდმოხდილნი და გოგას აკვირდებოდნენ — რომელ გვერდზე მოვიდოდა. თუ გოგა გაკვრეთილზე მოვიდოდა სამჯერვე ან ორჯერ მაინც, ეს კარგი ნიშანი იყო, და თუ მეორე გვერდზე, მაშინ ცუდის მომასწავებელი იყო მომავალი წლისათვის.

გოგას შემოგორების შემდეგ ხევისბერი გადადგამდა ზღურბლზე პირველად მარჯვენა ფეხს და შესვლისას იტყოდა: „შემოვდგი ფეკი, გწყალობდესთ ღმერთი, ფეხი ჩემი, კვალი ანგელოზისი, გილოცავთ ახალი წლის გამოცვლას, დიდი გიმატებიათ, დიდი გიმატოსთ ღმერთმა და ჩვენმა სალოცავმა გმირმა კოპალამ, მრავალი ახალი წელი გამოცვალოსთ მშვიდობისი და კარგად ყოფნისი“. ასეთივე სიტყვებით მოულოცავდნენ აქ მყოფნი მეკვლენიც და თუ ყველას არა, უფროსკაცებს მაინც აკოცებდა ხევისბერი. მოიტანდნენ საუკეთესო ლუდარაყს და ყველას დააღვინებდნენ. ჩორხაული დასტური გოგას დაჭრიდა ლუკმალუკმად და ჩააწყობდა თაფლიან ჯამში, რომელიც რიგის დასტურთაგან წინადლითვე იყო მოტანილი. ხევისბერი თითონაჭერს ყველა მეკვლეს მისცემდა და ეტყოდა: „ეგრე ტკბილად დაგაბეროს ჩვენმა სალოცავმა გმირმა კოპალამ და სიტკბოთ მიგაგებოს. ახლის წლის გამოცვლას მრავალჯერა“. „თქვენიანადა — თქვენც რომ კარგად მყვანდეთ“ — უპასუხებდნენ მეკვლეები, გამოართმევდნენ თაფლიან პურს და შეჭამდნენ. მერე მოაგროვებდნენ ყველა მეკვლეების ქუდებს, დააწყობდნენ ნაბაღზე და ზედ ისევ ნაბდის კალთას გადაათარებდნენ. ხევისბერი შეეხვეწებოდა კოპალას: „დალოცვილო ჩემო სალოცავო, შენა სწყალობდე ამ მეკვლეთა და ვისიც კვალი ხვდებოდეს, იმას არგინე მეკვლეობა აგრემც გაემარჯვება შენს ძალსა“. ამ სიტყვებით ხევისბერი მუხლისკვერზე დაჯდებოდა, გამოიღებდა ნაბდიდან ქუდს და გადმოაგდებდა ხალხში. ამას მოაყოლებდა მეორე და მესამე ქუდსაც და ერგებოდა მეკვლეობა სამ კაცს. მიულოცავდნენ და გაისტუმრებდნენ სოფელში. მეკვლენი თან წაიღებდნენ თაფლიან და პურიან ჯამს. შევიდოდნენ სოფელში და ჯერ მთლიანად სოფელს მიულოცავდნენ ახალი წლის გამოცვლას, მერე შემოუვლიდნენ ყველა ოჯახს, მიულოცავდნენ და შეუგორებდნენ გოგას სამ-სამჯერ. ჯამიდან თაფლის ნაწილს ოჯახში ყველას მისცემდნენ და ეტყოდნენ: „ტკბილად დაგაბეროსთ ჩვენმა სალოცავმა და მრავალი მშვიდობის ახალი წელი გამოგაცვლევიოსთ, დიდი გიმატებიათ და დიდი გიმატოსთ წულითა, პურითა და კაც-საქონითა“. ოჯახის წევრებიც ყველანი

მიულოცავდნენ მოსულ მეკვლეთ, მერე მიიპატიებდნენ და რითაც კი შეეძლოთ, პატივს სცემდნენ. ასე მოივლიდნენ სამივენი მთელ სოფელს.

ყველა ოჯახი ცდილობდა მეკვლეებისათვის პატივისცემას, გულკეთილად და კარგი სასმელ-საჭმელით დახვედრას, იმიტომ რომ მეკვლენი თუ კეთილი გულით იქნებოდნენ, მათი აზრით, იმ ოჯახის საქმე კარგად გაიმართებოდა მომავალ წელს.

ამის შემდეგ მეკვლეები ბრუნდებოდნენ ისევ ხატში, დანარჩენი მეკვლენი აქ დაუხვდებოდნენ. დილას რომ საკლავი დაიკლა, იმას გაატყავებდნენ და მოხარშავდნენ ხორცს. ამ დროს თავხევისბერი წავიდოდა წყალზე და წაიღებდა პატარა პურსა და ყველს. აქვე ახლო, რომელსაც ხატის წყაროს ეძახოდნენ, პურ-ყველს ჩაყრიდა და იტყოდა: „წყალო, შენთვის ნაყრი არ დამიყრავ და შენს წყალობას ნუ დამაკლებ. ბედი გამომაყოლე კაცისი, საქონისი. კობალას ყმათაში ნუ გამოვლევ წულსა, წულის აკვანსა“. ამოიღებდა თუნგივით წყალს, მოიტანდა და ყველას ასხურებდა. წელწად დილას მოტანილი წყალი იაზმის მაგიერ იხმარებოდა. შემდეგისათვისაც ინახავდნენ და რამე უწმინდურს ამით გაწმინდავდნენ. მაგალითად, თუ თავგი რამეში ჩავარდებოდა და მოკვდებოდა, ის უწმინდური ხდებოდა, წელწად დილას მოტანილ წყალს ასხურებდნენ და განიწმინდებოდა. ამ ხნის განმავლობაში მოიხარშებოდა ხორციც და გამართავდნენ სუფრას. სუფრაზე დაანთებდნენ სანთელს, ლუდიან საწლესაც დაღვამდნენ და ხევისბერი შენდობას ეტყოდა განსაკუთრებით ისეთი მკვდრებისათვის, რომლებსაც მომგონე აღარავინ ჰყავდა ამ ქვეყნად, სრულიად უპატრონოდ იყვნენ დარჩენილნი კობალას ყმათაში, მათი მამულები კობალას სანადოდ იყო დარჩენილნი, მისი ღალისაგან ლუდი დუღდა (მზადდებოდა) კობალას სადიდებლად და მიცვალებულთა შესანდობად. ყველას დააღვინებდნენ და გრძელდებოდა სმა-ჭამა და ღვინის საღამომდე.

სოფელში, ისევე როგორც შუაფხოში, მიჰყავდათ კიდევ მეორე მეკვლე — მეზობელი. მეკვლე უფრო ისეთი მიჰყავდათ, ვისი კვალიც კარგად ჰქონდათ დაცდილი, წარსულ წელს ოჯახი არაფრით დაზარალდა, არც კაცით, არც საქონლით, უფრო პატარები იცოდნენ მეკვლედ, ისინი ანგელოზებია, უმანკო და ასეთის შეტანილი კვალი უფრო კარგად მიაჩნდათ. ვინც ბოროტ და ცოდვის ჩამდენ კაცად ითვლებოდა, ასეთი მეკვლის მიყვანას ყველა გაუბრბოდა. წელიწად-დილას ყველა ცდილობდა, რომ პირველად კარგი კაცი დაენახა, ბავშვებს მშობლები არწმუნებდნენ, რომ ვისაც წელწად დილას პირველად ნახავთ, ისეთი კაცი გამოხვალთ. ამაში დარწმუნებული ბავშვები თუ ბოროტ ან უშნო კაცის ხმას გაიგონებდნენ, არ შეხედავდნენ, ვიდრე ისეთი კაცი არ გამოჩნდებოდა, რომელიც მათი შეხედულებით კაიკაცად ით-

ვლებოდა. მეკვლეს რომ მიიყვანდნენ, გოგას ისიც შეაგორებდა, როგორც პირველი მეკვლე (სხვა სოფელში ყველგან ისეთი წესი იყო, რომ გოგას შეაგორებდა ხატიდან მოსული მეკვლე. მეორე მეკვლე ისე შევიდოდა და მიულოცავდა, გოგას ის აღარ შეაგორებდა). მეკვლე მილოცვის საუბრით შევიდოდა: „შემოდგი ფეცი, გწყალობდესთ ღმერთი, ფეცი ჩემია, კვალი ანგელოზისია. გილოცავთ ახლის წლის გამოცვლასა, ბევრი გიმატებიათ, ბევრი გიმატოსთ ჩვენმა სალოცავმა და მალაღმა ღმერთმა“. ასეთი საუბრით მივიდოდა და გაჩერდებოდა ზღურძლზე. აქ ერთ-ერთი ოჯახის წევრი გოგას მოუტანდა, მეკვლე სამჭკერ შეაგორებდა და მერე შევიდოდა სახლში. მერე გაუმართავდნენ სუფრას და რაც კი კარგი სასმელ-საჭმელი ჰქონდათ სახლში, ყველაფერს მოუტანდნენ. თაფლ-ერბო აუცილებელი იყო ახალ წელს, ყველა ოჯახში თაფლში გაყინულ ერბოს ჩაყრიდნენ და ისე მართმევდნენ მეკვლესაც და სხვა პატივსაცემ სტუმარსაც. მეკვლე თუ პატარა იყო, გაატანდნენ ჯამით თაფლ-ერბოს, ბოთლით არაყს, კაკალს, თხილს და ვაშლს. ამის შემდეგ ნება ჰქონდა ყველა მოსულს შინ შესვლისა.

წელწად ღღეს ყველანი ცდილობდნენ, რომ ჩხუბი და დავიდარაბა თავიდან აეცილებინათ, დამშვიდებული და მხიარული ყოფილიყვნენ, რადგან იტყოდნენ, რომ ამ ღღეს როგორც იქნება კაცი, ის „დაპკვალავდება“ და იმ წელს სულ ისე წავა ის საქმეო. ამიტომ იყო, რომ წელწად ღღეს ყველაზე მეტად მხიარულობდნენ, ყველაზე მეტად სტუმარმასპინძლობდნენ და სხვა. მტრებიც რომ ყოფილიყვნენ, ამ ღღეს შეუთრგდებოდნენ ერთიმეორეს. ასე დაღამდებოდა წელწადი ღღე მხიარულებაში. ხატშიც ამ საღამოს გამოილოცავდნენ, სოფელში კი გრძელდებოდა ორ-სამ ღღესაც და მეტსაც ერთიმეორის პატიუბა და მხიარულობა.

## აღება

წელწდის შემდეგ შაშათს მოდიოდა ხატობა აღება. აღებასაც რიგის დასტური ლუდს აღუღებდა. დილას ხატში მივიდოდნენ დაატურ-ხევისბრები, მხოლო საქობეში. დარბაზის და საბეროს კარს ამ დღეობაში არ აღებდნენ. საკლავი დაიკვლოდა სასოფლო. იგი ითვლებოდა უფრო სულის დღეობად. ხორცს მოხარშავდნენ და მიცვალებულთა სუფრას გამართავდნენ, სოფლიდანაც მიჰქონდათ სუფრები მიცვალებულებისათვის შენდობის სათქმელად. თან მოაყოლებდნენ ბოთლით არაყს, ლუდი სოფელშიც მიჰქონდათ და დედაკაცებსაც დაალევიებდნენ. ხატში დიდი დღეობა არ იყო, უფრო სოფელში იყო ერთიმეორის პატიუი და სტუმარმასპინძლობა. ხატში იმავე ღღეს



გამოილოცავენ, სოფელში კი დიდ მარხვამდინ გრძელდებოდა ასეთი ამბავი. შაბათის შემდეგ ხორციან რამჭს მიცვალებულთათვის შენდობას აღარ ეუბნებოდნენ. ახალი მიცვალებულების პატრონები კი არც თვითონ ჭამდნენ ხორცეულს. ამ კვირას ყველიერის კვირას ეძახოდნენ. ხორცის გარდა ყველაფერს ჭამდნენ დიდმარხვის შემოსვლამდე. მარხოშამაე-სალამოს ახლო ნათესავები ე. ი. ერთიმეორის განაყრები ერთ-ერთ სახლში მოიყრიდნენ თავს და იქ გამართავდნენ მარხვის შემოსაყვან ვახშამს. თითქმის თეთრად ათენებდნენ ამ ღამეს.

### ს უ ლ თ ა კ რ ე ფ ა

ს უ ლ თ ა კ რ ე ფ ი ს ხატში არაფერი მზადდებოდა. სოფელში ამზადებდნენ უფრო ახალი მიცვალებულის პატრონები მისი სულისთვის სამარხო სუფრას. მოხარშავდნენ ლობიოს, წანდილს, დააცხობდნენ თხელ ლავაშებს და დაპატიჟებდნენ უფრო ქალებს, ზოგ მამაკაცსაც. სუფრა დაილოცებოდა და ამავე სუფრით გაუმასპინძლდებოდნენ მოწვეულებს. ქალები ყველგან ყველანი მივიდოდნენ. სადაც ასეთი სუფრა იყო დამზადებული. თუ ვინმეს ოჯახში ახალი მიცვალებული იყო, რომ ჭერ წელი არ იყო გასული მისი სიკვდილის შემდეგ და „ტანისამოსნი ისხნენ“ (ხევსურულად ტალავარნი), იმართებოდა ტირილი (ტირილის წესებზე მიცვალებულთა ამბებში გვექნება საუბარი). ტირილის შემდეგ ისეთივე სამარხო სუფრა იცოდნენ. სხვა აქ განსაკუთრებული წესი არ იყო.

დიდმარხვაში როგორც ხევსურეთში, აქაც ისეთივე წესით იცოდნენ თავგ-ჩიტთ უქმი, მგელთ-უქმი და სხვა. დიდ ხუთშაბათს სალამოს იცოდნენ ჰიაკოკონობა. ყველა მცხოვრები თავის კარზე დაანთებდა დიდ ცეცხლს, რომელზედაც ახალგაზრდობა ხტებოდა. ურწყის ორშაბათი აქაც ხევსურულად იცოდნენ. ამის შემდეგ მოვიდოდა დღეობა ახვსება.

### ა ზ ა მ ა ბ ა

ახვსებას (აღდგომა) ლუდს აღულებდა რიგის დასტური. ახვსების წინა სალამოსვე ჩორხაული დასტური, ხვეისბრები და რიგის დასტური მოიყრიდნენ თავს. ყველა თავის საქმეს გააკეთებდა. საკლავს ამ სალამოსვე კლავდნენ და ღამითვე გაიხსნიდნენ მარხვას. დილით ხალხიც მოვიდოდა და დღეობა ისეთის წესით იმართებოდა, როგორც ამის წინა დღეობებში.

### ა მ ა ლ ე ბ ა

ახვსების შემდეგ იყო ამალეობა. ამალეობას დროშა ებმოდა. ამ დღეს დილით მოვიდოდნენ ხატში დასტურ-ხვეისბრები და, როგორც

ვიცი, ყველა თავთავის საქმეს მოაწესრიგებდა. კოდის გახსნის და სასოფლო საკლავის დაკეცილის შემდეგ მოიყრიდა სოფელი თავს და იმართებოდა სმა.. ზოგს მოჰქონდა ქადა-პური, სანთელი, ბოთლით არაყი. ისე რომ, ხატში ხელცარიელი არავინ მივიდოდა (ხევისურეთის ხატებში მეზღვნეების გარდა სოფელსა და სხვა მისულებს არაფერა მიჰქონდათ. ფშავში კი იშვიათად ვინმე მივიდოდა, რომ არ მიეტანა სანთელი, სასმელი ან ქადა-პური). ხატიდანაც ლუდი გამოჰქონდათ. ამდღეებს მეზღვნეებიც მოდიოდნენ, მხოლოდ ბევრი არა. ეს დღეობა იცოდნენ დიდიდან საღამომდე. საღამოზე გამოილოცავდნენ.

## ს მ რ ო ბ ა

სერობა აქაც მკათათვეში მოდიოდა და ყველაზე დიდი დღეობა იყო კოპალაში. ამ დღეობაში ლუდიც ბევრი მზადდებოდა. კოპალას ვენახი ახმეტაში სამ ადგილას ჰქონდა და ბლომად ღვინოს ამზადებდნენ. ყველა ვენახში თავთავისი მეზვრე ჰყავდათ და მუშასაც ამუშავებდნენ. სერობას მეკულუხე მიდიოდა კოპალას დროშით. თავი-ხევისბერი ააბამდა დროშას და მეკულუხეს წინ გაუძღვებოდა, თან გაჰყვებოდათ ჩორხაული დასტური და რიგის დასტურიც, ერთ-ორ კაცს სოფლიდან გაიყოლებდნენ. აქედან წასულები ზემო თიანეთში გადავიდოდნენ და კოპალას ნიშთან მივიდოდნენ იხინჭაში. აქ ღამეს გაათევდნენ, მლოცავიც ბევრი შეხვდებოდათ ნიშთან. ვისაც რაიმე მიზეზის გამო აქ წამოსვლა არ შეეძლო, იქ მიჰყავდა და კლავდნენ საკლავებს. ზემოთიანეთლებიც ყმობდნენ კოპალას, სანადო მამულელებიც იყო აქ და დღეობაც ისე სრულდებოდა, როგორც უძილაურთაში. იმ დღეს კი, როცა მეკულუხე მოდიოდა, ყველა ყმანი აქ ხვდებოდნენ კოპალას დროშის ჩავლაზედაც და ამოვლაზედაც, მოჰყავდათ საკლავები და კლავდნენ. მართავდნენ სუფრებს, მოჰქონდათ შესაწირავი, ზოგს ბაღდადი დროშისათვის, ზოგს ვერცხლის სამკაული, ვერცხლის თასი და სხვა. მოჰქონდა აგრეთვე ოჯახში დამზადებული სასმელ-საჭმელი მეკულუხეთათვის პატივისცემად. მხოლოდ ეს სუფრა გამზადებული უნდა ყოფილიყო არადედათწესიანი ქალღებისაგან, რადგან მეკულუხენი წმინდად უნდა ყოფილიყვნენ დაცულნი რიოშიანი სასმელ-საჭმელისა და მგზავრობისაგან.

ზემოთიანელებიდან ორი სოფელი იყო კოპალას ყმები — ტიღინანები და ახალსოფლები. ესენი ზოგი ჩავლაში და ზოგი ამოვლაში კოპალას დროშას პატივცემით ხვდებოდნენ. ვისაც საშუალება ჰქონდა, საკლავს კლავდა, ვისაც არა და სხვა რამე პატივისცემას გაუწევდნენ მეკულუხეთ. ეს სოფლები კოპალის მეკულუხეების მოლოდინზე ლუდსაც დაამზადებდნენ და დაახვედრებდნენ. ერთ ღამეს

მეკულუხე იხინჭაში გაათევედა და დილით ადრე გაემგზავრებოდნენ ახმეტისაკენ. ხევისბერი დროშას როცა დააბძანებდა, მაშინაც დაამწყალოებდა მოსულ მლოცავს და როცა ააბძანებდა, მაშინაც ეტყოდა: „წყალობით იყოს ჩვენი სალოცავი გმირი კობალა თქვენზედა, მოსულნო მლოცავნო და კობალას ყმანო. ის წყალობა გიბოძოს, რასაც თქვენი გული გამოელოდება, გიწინამძღვროსთ ყველა კარგ საქმეში და მრავალს მოგაგებოსთ ამ დღესა ერთურთის კარგა ყოფნითა“. ამ დამწყალობენებაში დროშა შინ ეყუდა, მარჯვენა ხელით ეჭირა და აწყარუნებდა ზარს. ხალხიც ქუდმოხდილი ფეხზე იდგა და პირჩვარის წერით ამბობდნენ: „თქვენ თავზედაც იყოს წყალობით დალოცვილი ჩვენი სალოცავი“.

ხევისბერი დროშას მარჯვენა მხარეზე გაიდებდა და გაემართებოდა ახმეტისაკენ. თან გაჰყვებოდნენ თანამგზავრებიც. მლოცავი ხალხი კარგა მანძილზე გააცილებდა და გზადაგზა სასმელს აძალებდნენ წამსვლელთ. მერე მობრუნდებოდნენ ისევ იხინჭაში. აქ უკვე დღეობა იყო დაწყებული. ყმანი და მლოცავნი ყველა სახატო წესებს ასრულებდნენ ისევე როგორც უძილაურთაში. დასტურ-ხევისბრები აქაც იყვნენ, სალუდე, დარბაზი, საზარე ყველაფერი ჰქონდათ. საკლავის დაკვლის წესები, დიდებანი, ყველაფერი ისე სრულდებოდა, როგორც უძილაურთაში. მხოლოდ აქ გართობა-მხიარულება მეტი იცოდნენ, გიდრე მთაში.

მეკულუხე ახმეტაში იმ დღესვე ჩავიდოდა. აქ ერთ-ერთ ვენახში ჰქონდათ მარანი (კობალას ახმეტაში სამი ვენახი ჰქონდა. სამივე ვენახიდან ყურძენი მიჰქონდათ ერთ ადგილზე და ერთ მარანში აყენებდნენ ღვინოს). მარანთან იყო დროშის საბძანი კოშკი და სასანთლე. დროშას მიაბძანებდა თავიხევისბერი საბძანთან და დაამწყალობენებდა იქ დამხვედრ მლოცავთა და ყმათ (მლოცავი აქაც ბევრი ხვდებოდა). მერე მიართმევდნენ იხინჭიდან წამოღებულ ლუდით საესე თასს, დადგამდნენ სასანთლესთან, აანთებდნენ სანთელს, დააკრავდნენ სასანთლეზე და ხევისბერი აღიდებდა კობალას: „დიდება შენდა, ღმერთო, ცისა და ქვეყნის დამაარსებლო, დიდება შენდა, კვირაჯხთის მაღლის მოკარვეო. დიდება შენდა, ჩვენო სალოცავო გმირო კობალო, დროშისად მყოლო მოგზაურო ანგელოზო. გახვეწებთ და გავედრებთ თქვენ ყმათა და ყმათაში შენს კულუხზე წამომსვლელთა და თანყოლთა. შენს მარანზე მოსულთა, შენის კარის და სახელის მლოცავთა“. დანარჩენი დიდება გრძელდებოდა ისე, როგორც იახსარში არის აღწერილი. დიდებას რომ დააბოლოვებდა, თასს აიღებდა და დაილოცებოდა, დალოცავდა ყმათა, მლოცავთა და მეკულუხეთ. თითო თას ლუდს სხვა დასტურ-ხევისბრები და მეკულუხენიც ასეთივე დალოცვით დალევდნენ, წამოაყენებდნენ მეკულუხეთ მოყვა-

ნილ საკლავსაც და დაკლავდნენ ჩვეულებრივი დიდებით და ყმათ დამწყალობნებით. ამის შემდეგ ცოტას დაისვენებდნენ და მერე შეუდგებოდნენ საკლავების დაკვლას. მარანში სანთელს აანთებდნენ ქვევრიდან ახალ ამოღებულ ღვინოზე, ადიდებდნენ კოპალას. ნათავარს ამოიღებდნენ, ერთ საცალოს აავსებდნენ და მერე თვითონაც დაღვედნენ. მარანზე სანთლის ანთებაში და ღვინოზე ხატის გადიდებაში ასენებდნენ: გმირ კოპალას, ქვევრ-მარნისა და ზედაშის მცველ მფარველ ანგელოზს (იგულისხმებოდა: კოპალას ჰყავდა თავისივე ნაწილი ანგელოზი, რომელიც იფარავდა ქვევრ-მარანს). ავსებდნენ ღვინით ყველა საცალოებს და ამზადებდნენ მეორე დილისათვის. აქვე ჰქონდათ ჰაკისაგან გამოხდილი არაყი და ესეც მოჰქონდათ თან. საკლავის ხორცისაგან სუფრას გამართავდნენ, რომელიც დაილოცებოდა იმ მიცვალებულთათვის, რომელნიც წინათ დადიოდნენ კულუხზე და ახლა აღარ არიან. აგრეთვე უპატრონო მკვდრებისათვის, რომელთაც დანამადლისი ჰქონდათ ამ ქვევრ-მარანზე — ჩვენ ვერ ვიგონებდეთ და ჩვენი სალოცავი არ ივიწყებდესო. მეზღვნეები გამართავდნენ თავის სუფრებს, მთელი ღამის განმავლობაში სვამდნენ ღვინოს და მხიარულობდნენ.

დღით ადრე ხევისბერი ააბძანებდა. დროშას, დაამწყალობნებდა ყმათ, მლოცავთ და გამოუძღვებოდა მეკულუხეს წინ. ამავე დღეს მოვადოდნენ ისევ იხინჭაში. აქ ზოგი ისეთი მლოცავი მოვიდოდა, რომ მეკულუხეს უძილაურთაში თან გამოჰყვებოდა, ზოგი კი იხინჭაშივე იზღვნობდა და ზღვნობის ყველა წესებს აქ შესარულებდა. მეკულუხეს სახარჯო ღვინო-არაყი მოჰქონდა და პატივისმცემელ მლოცავებს ამით უმასპინძლდებოდნენ. ღამეს აქ გაათევდნენ და დღით დამწყალობნების შემდეგ გამოუძღვებოდა ხევისბერი მეკულუხეს, თან გამოჰყვებოდა უძილაურთაში წამომსვლელი მლოცავი, ხალხიც კარგა მანძილზე გამოაცილებდა და გამოსიტუმრებდნენ მათ. აქედან წამოსული კოპალას მეკულუხე შუაფხოზე გამოივლიდა, იახსრისა და კოპალას დროშები აქ ერთიმეორეს შეხვდებოდნენ (შეხვედრის წესები მოთხრობილია იახსრის მეკულუხის აწერილობაში). ყველა წესების შესრულების შემდეგ კოპალას მეკულუხე უძილაურთისაკენ გაემართებოდა, იახსარის დროშა მას გააცილებდა, გამოემშვიდობებოდნენ ერთმანეთს და იმავე დღეს კოპალის მეკულუხე უძილაურთაში ავიდოდა, ღამეს იქ გაათევდა. სადაც მისი მთავარი საარსო-საბძანებელი იყო უძილაურთ სოფლის მარჯვეს. სალუდე, საზარე, საბერო და სხვა აქ იყო. აქაც სანთელს აანთებდა ხევისბერი სასანთლეში (სანთლის ანთების წესი იახსარში არის აწერილი), ლუდიან კოდს გახსნიდა და ვისაც რა შეეძლო, სვამდნენ, აქვე ათევდნენ ღამეს. ზღვნობა ამ დღეს არ იცოდნენ, რადგან მეკულუხე დაღლილი იყო.

მეორე დილით ხალხი მოიყრიდა თავს და იმართებოდა დღეობა; მეზღვნეც მოდიოდა და სხვადასხვა შემომწირველნიც. ღვინის ნათავარი ინახებოდა საყუინოსათვის, დანარჩენს აქ ხარჯავდნენ, მოსულ მეზღვნეს და სოფლელებს ყველას ასმევდნენ. ამ ხატში ორ დღეს გრძელდებოდა დღეობა; მოდიოდა მეზღვნე და სრულდებოდა ყველა წესი ისე, როგორც იახსარში. მოსული მლოცავი აქ გროვდებოდა და ემზადებოდნენ ჯერ ციხეთგორს წასასვლელად და მერე უძილაურთის მთაზე ამოსასვლელად. იყვნენ ისეთი მეზღვნეებიც, რომ მარტო უძილაურთას იზღვნობდნენ და უსახსრობის გამო მთაზე ვეღარ მიდიოდნენ. ისინი აქედანვე ბრუნდებოდნენ სახლში; მხოლოდ ასეთები გამონაკლისი იყო. მესამე დღეს ხევისბერი სანთელს მოანთებდა, ზარს დარეკდა, რაც ნიშანი იყო საციხეთგოროდ მზადებისა. ზარის ხმაზე მთელი მეზღვნე წამოიშლებოდა, პირჯვრის წერით ლოცულობდნენ და სთხოვდნენ კოპალას ყოველგვარ გასაჭირში დახმარებას, მერე გაამზადდნენ ბარგს და შეკაზმავდნენ ცხენებს. ხევისბერი საბეროდან გამოვიდოდა და დროშასთან მივიდოდა. ვერცხლის თასი მას ღვინოს მიუტანდნენ; თასს დროშასთან დადგამდნენ, სანთელს აანთებდა, თასთან ქვაზე დააკრავდა და ადრიდებდა გმირ კოპალას. მერე თასს გამოსკლიდა. თითო ღვინიანი თასით დასტურ-ხევისბრები დალოცავდნენ ყმათ და მეზღვნეთ, მერე ამ თასს მეგანძური ჩაიბარებდა და სხვა ვერცხლის თასებთან ერთად წამოიღებდა ციხეთგორს. ხევისბერი დროშას ააბრძანებდა, კიდევ დაამწყალობნებდა ყმათ და მლოცავთ. უსურვებდა კოპალას წყალობით მრავალი ასეთი დღეობის ლოცვას და სთხოვდა გმირ კოპალას, რომ ყმათ თავისი საგმიროთი დახმარებოდა ყოველი გაჭირვების დროს. დროშას მარცხენა მხრისაკენ ასწევდა, თავზე გადმოიტარებდა, მარჯვენა მხარეზე გაიდებდა და გაემართებოდა ციხეთგორისაკენ, თან გაჰყვებოდნენ ჯერ ხატის მსახურნი და მერე მლოცავი. ავიდოდნენ უძილაურთას თავს, იქ სანთლით და ზედაშით კოპალას ადიდებდნენ და გავიდოდნენ ციხეთგორას. აქ მათ დახვდებოდა სოფელ აკუშლების კოპალას დროშა.

მთავარი დროშა, სალოცავი და დასტურ-ხევისბრები იყვნენ უძილაურები და აკუშლებიც ემსახურებოდნენ კოპალას თავის მხრიდან. აკუშლებმა უძილაურების მისვლის დღე და დრო იცოდნენ და მზად იყვნენ (სოფელი აკუშო ციხეთგორასთან ახლო არის). კოპალის დროშა რომ უძილაურთის მთაზე გადმოვიდოდა, აკუშოდან დაინახავდნენ და ისინიც თავისი დროშით წამოვიდოდნენ. ციხეთგორს ერთმანეთს შეხვდებოდნენ — „გამარჯვება ბატონყმათ“ — პირველად აკუშლები ეტყოდნენ, რადგან მთავარი დროშა უძილაურებისა იყო და ნამდვილი ტახტის ყმადაც უძილაურნი ითვლებოდნენ. — „გაგამარჯოსთ ღმერთმა, წყალობა ჩვენის სალოცავისა, წყალობა“, — ეტყოდა უძილა-

ურთის ხევისბერი. წყალობით იყოს თქვენზედაც დალოცვილი, — ახლა ისინი უპასუხებდნენ. დააბძანებდნენ მარჯვნივ უძილაურების, ხოლო მარცხნივ აკუშლების დროშას. აკუშლებიც და უძილაურებიც თითო საკლავს მოიყვანდნენ. ორივე საკლავი მოსვლისთანავე, ვიდრე დასხდებოდნენ, დაიკვლოდა. ორივეს დაკლავდა უძილაურთის ხევისბერი. აკუშელი დასტურ-ხევისბრებიც აქ იყვნენ ამ დროს და სხვადასხვა მომსახურეობას უწევდნენ სახატო წესრიგს და საქმუანობას. დაკლულ საკლავებს ორივე მხარის დასტურები გაატყავებდნენ და ხორცს ერთ ქვაბში მოხარშავდნენ. აკუშლებს თავისი ლუდი ჰქონდათ, უძილაურები ღვინო-არაყს მიიტანდნენ. მაგრამ მთავარი ხარჯი ამ დღეობაში აკუშლებისა იყო. მათი ლუდი მეტი უნდა დახარჯულიყო, საყენოც მათი ლუდით იდგმოდა ციხეთგორს (უძილაურთისთავს კი უძილაურები დადგამდნენ საყენოს კულუხის ღვინით). საკლავებს რომ დახოცავდნენ, აკუშლები ვერცხლის თასებს დადგამდნენ კოშკთან და აავსებდნენ ლუდით, სანთელს აანთებდნენ და დააკრავდნენ თასებთან. უძილაურთის ხევისბერი აღიდებდა კოპალას და დაამწყალობებდა ყმათ ამ დღეს კოპალას კარის მლოცავ ფშაველსაც და ხევესურსაც. დამწყალობების შემდეგ თასებს აიღებდნენ, ერთს უძილაურთ თავხევისბერს მისცემდნენ, მეორე თასს აკუშოს მედროშე ხევისბერს და მესამეს ჩორხაულ დასტურს. ყველანი დაილოცებოდნენ, დაამწყალობებდნენ ყმათ და დასცილდნენ თასებს. ამას შემდეგ იწყებოდა ლუდის და ღვინო-არაყის სმა და თან ზღვნების ხოცვა, საკლავის დაკვლა და სხვა მთავარი შესასრულებელი წესები უძილაურთ ხევისბერს ეკუთვნოდა. აკუშელთ წვრილმანი დახმარების მეტა არაფერი ევალებოდათ; მხოლოდ ლუდი იმათი იყო და მეზღვნეებს ლუდით ისინი სცემდნენ პატივს. ამ დღეს და ერთ ღამეს დარჩებოდნენ ციხეთგორს. იმართებოდა სუფრები და ერთიმეორის პატიჟობა ბინებზე, მღერა და თამაშობა (ფშავეში ციხეთგორობა ისეთივე დიდ დღეობად ითვლებოდა, როგორც ლაშარობა).

ჩემო დედაო; გამიშვი, მიდიან ჯორობაშია,  
ან ლაშარობას ჰოგივალ, ან ციხეთგორობაშია.

ამ სახის სიმღერებს მღეროდნენ. ღამეს ყველა მლოცავი აქ ათევდა, მეორე დღესაც გრძელდებოდა ზღვნობა და რომ წამოსადილდებოდა, აკუშლები დადგამდნენ ლუდით საყენ საყენოს (საყენო იყო ვერცხლის დიდი თასი). ორივე დროშა აბრძანდებოდა, მათ საყენოსთან ტარით მიწაზე დააბჯენდნენ, აქანავებდნენ ნელ-ნელა ტარს და დროშის ზარებს აწყარუნებდნენ. ამ დროს მლოცავი ხალხი ქუდ-მოხდილი პირით დროშისკენ იდგა და პირჯვარს იწერდა. უძილაური ხევისბერი პირველი აღიდებდა კოპალას ისე, როგორც ვიცი თ იახსარის

დიდება, ამავე სახით (სანთლები საყეინოს პირზე იყო დაკრული). უძილური ხევისბერი რომ დიდებას გაათავებდა, ახლა აქუშოს ხევისბერი იხუცებდა: „ხთისაგან ვაგემარჯოს შენის გაჩენისაგან, გმირო კოპალაო, შამაძახილზე ნუ შამასწყინდები კორციელს, შენის სახელის ქირიმი. შენა სამთავრო გასამარჯოდ მაიკმარი ეს ჭიქა-ბარძიძო, სანთელსაწირი, შენტ ყმათ სახოიშნოდ მაიხმარი, ხთის კარზე შაიტანი შენიმც ძალი-სახელ დიდდებისა-დ ქსენდების“.

ამას მოჰყვებოდა „პირის ქარი“: „ა-ა-ა — დიდება ღმერთსა, მადლი ღმერთსა, დღეს დღესინდელისა, რჯულს საქრისტიანოს, მხესა შხის მყოლთ ანგელოზთა. დიდება დიდს კვირაეს მადლის ხთის მოკარვეს, დიდება და გამარჯვება შენდა, გმირო კოპალაო, ამ სამსახურზე ღმერთმა გადიდას, ღმერთმა გაძლიერას. შენ გამჩენ ღმერთი არ მაგიწყენს, არ მაგიძულებს, შენ შენტ ყმათ ნუ მაიწყენ, ნუ მაიძულებს, შენი გავლენითა-დ საგმიროთ დაეკმარი. სცევდი, ხფარავდი, შველოდი, სწყალობდი, დაიხსნიდი: ავის დღისგან, ლადის მტრისა და მწარის სიკვდილისაგან, სენის სარჯლისგან, თურა შაგოდვან, ან უღირსობით, ან პირის ქარით, ან ფეკის ნალით, აპატივიდი, ყმა შაუწყენ არ იქნებისა-დ ბატონ შაუნდობარი. თუ რა ეკერძებოდას საზიანო საქმე, გადაუდიდი, შენტ ყმათა-დ დღეს შენის კარისა-დ სახლის მლოცავთ, მიწრიელ-ქვეცრიელი შენის საგმიროთ დაულაგმიდი, ზაფხულობა მშვიდობისა დაუყენიდი, კაცსა კაცრიელობას მღმატიდი შენტ ყმათაში, მაგათ ყუდროში ღონესა ქონეს მღმატიდი, წულსა წულის აკვანს, თქვენ ზღვენთა ულუფათ მამემატების, დღეს მახრილ ჩოქი, მათხოილ მადლი, მაქსენებულ სამსახური, შენა სამთავრო, შენა გასამარჯოდ, შენტ ყმათად დღეს შენის კარის მლოცავთ სამწყალობნოდ მაიკმარი, მაგათ ყუდროში კაცისად, საქონისად, ორფეკოთხფეკისად, ქუდოსან-მანდილოსნისად, ნამაშერალ-ნამუშავლისად მშველელი, მლხენელ იქნები, ისმინე, გაიგონი, აგრემც ვაგემარჯვების, გმირო კოპალაო“.

ამას მოჰყვება კურთხევა: „დღეს.რჯულსა ხსნილობაია, ჯვარსა კურთხეულობა, კურთხეულ სია ღმერთია უფალი სამარატია, უკუნისამდე წმიდაო ღმერთო, წმიდაო სანებაო, წმიდაო შაგვიწყალენ ჩვენ ყოველნი, ჩვენნი ურჯულოებანი, შაგვიწყალნა ჩვენ სამებამა წმიდამა ჩვენ ყოველნი ჩვენი ურჯულოებანი, გამგულა და გავედრია, სულნი ჩვენნი ღმერთსა მამასა. მამაო და ძეო, რომენი ხარ ცათაჩია, აგრე ხოყანათაჩია, მაგვიშვი და მაგვიტანე პური ჩვენი არსობილთა, რაც უფალმა მაგვიტანა, ნუ შაგვასხამ განსაცდელსა. შავსწირავ ღმერთსა, ხატო, შენი მოხუტულობითა. ხატო, ნათქვამი შენზე იყო, შენ გვიხსნენ, ჩვენ გადიდებთ, თვალნი მალლა არიან მადლისა ხთისანი, ხოლო კაცთა რა ჟამი მასწყვია, კაცნი ცნრომლებად არიან დიჩინნი ამპარტავანნი ფეხ-

ნი ბირკოლებისაკენ სატნო მოვიდა ყოველსა წინასა სიე ცხოველსა. რატო ვერ იცნო დედამა თავი პეტრეა ხთისა მოწაფე, არსივნი შაშინებულან, არსივნი შაკვირებულან გალილიას და ეტყვიან მორე მორე მოდიოდა ადგილსა ამას, იესო ქრისტე ფილიპე ფერსა კითხულობდა ჩვენდა. რალა თქვიან დედაკაცისად. პეტრესა უთხრა: ეგე ვინ გგონიანუ იმერია მერვენელია, თავიც იხსნა, ჩვენც გვაკურთხა, იმაზედ ავაშენეთ ეკლესიანი ხთისანი, ეკლესიას ხთისას, შენი უკვდავი სიტყვაო. უკვდავი მარიემის შორით ექცეოდა, ხატი გამოჩინდე ვითარცა კაცთა შორით ექცეოდა, კაცნი ეწმუნოებით არიან წმინდანი, გამეე, გამააცხადე, თუ რამე იყვა ბნელშია, ხორცი უფლისანი, სისხლი მაცხოვრისანი ღაღანებენ, და ბძანებენ ჩვენ წინაწინ დავდეთთავ, ახლისა რაჟულია სამსახურია. სიგძით მახენე, იწამე ღმერთი. მამაო ჩვენო ყოფილო ჯერ ხთისა, ხოლო შობილო მამისა გამაშობილო, მამისა კი აგრე ბძანებდა, რომელმა შაღმასენ ცანი ღურბლითა ხოყანანი მწვანლიითა, რომენმა გადაანამზადენ წვიმა ხოყანათაზედა, თესლია შენია ჩვენო მაცხოვრებაო, დღეც შენ დაამკვირე, ნათელი, ბნელი. შენ კი არა ერმა უფალმა. უფალო, აკურთხე მარილი ესე, სიორდანე ღვინო გადასცვალე. ბაღდად დახვალ არა შუამე. დასთხიე სისხლი მისი ვითარცა მხალი, იყვა მიეტქველი სამოქმედო მოწყალე. მაგვანიჟე მას დღესა რაჟულისასა, ხსნილობაი ჯვარსა კურთხეულობა. ხსნილ-კურთხეულ ჯვარი და სისხლი შენი შეიწირე“.

კურთხევის დამთავრების შემდეგ პირველად ხევისბრები ჩავიადონენ საყეინოში. ან ვერცხლის ფულს ჩაადებდნენ შიგ ლუღში, ან თუ ვერცხლი არ ჰქონდათ, ქაღალდის ფულს ჩადებდნენ იქვე დადგმულ ცარიელ თასში. ჯერ დაილოცებოდა ჩამსვლელი: „ჩვენის სალოცავის დიდებით და გამარჯვებით, გაუმარჯოს ლაშარის ჯვარიანთა, პიროფლიანთა, რომელთაც ნატისა და ხალხის გულისად თავი შესწირეს და ბრძოლაში ოფლი და სისხლი დაღვარეს. დღეს ისინი ცოცხლები აღარ არიან, მაგრამ ჩვენი სალოცავი და ჩვენც მისნი ყმანი არ ვივიწყებთ იმათ სახელსა. გაუმარჯოს ლაშარის ჯვრის პიროფლიანთა, გაუმარჯოს“. „გაუმარჯოს!“ — დაიძახებდნენ ყველანი. ასე იწყებოდა საყეინოში ჩასვლა. მერე დროშებს თავის ადგილზე მიაბძანებდნენ. საყეინოში ჩასვლა კი გრძელდებოდა. როგორც ნათქვამია იყო, ერთიმეორესაც ეპატიებოდნენ საყეინოში. როცა ვინმე საყეინოში ჩავიდოდა და სვამდა; სხვები უკიჟინებდნენ და აქებებდნენ მეტი დაელია, ხმამაღლა იძახოდნენ: „გაუმარჯოს, გაუმარჯოს! შაიშრო, შაიშრო! აი ყოჩაღ, ყოჩაღ! აი დაეტყო თასსა, დაეტყო, რომ ვაჟკაცი ებძვის“. თასი რომ დანაკლულდებოდა, კოშით ლუღს უმატებდნენ, რომელიც იქვე ჩხუტით იდგა. ერთი დასტურთაგანი იყო ლუღის დამმატებლად დაყენებული. თასს ხელში არ იღებდნენ, მიწაზე იღ-



გა და ისე სვამდნენ. საყეინოს სმის დროს ზღვნებიც იხოებოდა. ყველა მეზღვნე თავთავის საკლავს უვლიდა, ატყავებდა, ხორცს ხარშავდა, სუფრას ამზადებდა. სუფრის წესები აღწერილია იაქსრიზ-დღეობაში და აქაც იმავე წესით სრულდება. მეზღვნეებს თავისი პურა-ჭკონდათ მოტანილი. სასოფლო საკლავის სუფრაზე კი ხალხისაგან მოტანილი საწირავი პური ჭკონდათ და იმას ანაწილებდნენ. მღერათამაშობა იმართებოდა. დღეობის დროს იყო ძალიან სიმთვრალე და ხშირ შემთხვევაში შუღლი და ჭრა-ჭრილობაც ხდებოდა. როცა დიდი ჩხუბი მოხდებოდა, დროშებით გადაუდგებოდნენ შუაზე და ისე გააშველებდნენ. ჩხუბის დროს დროშები რომ აბრძანდებოდა და გადაუდგებოდა, მოჩხუბრები იმ წამსვე ჩერდებოდნენ ხატის პატავისცემით და შიშით. თუ აღმოჩნდებოდა ისეთი ვინმე, რომ სიმთვრალის გამო ჩხუბს დროზე ვერ დაანებებდა თავს, ასეთებს ხევისბრები აჯურუმებდნენ: კურეტით, წელგამოვლილი (ერთ წელზე ზევით) საკლავით და სხვ. „ჯურუმი“ წინასწარ ჭკონდა ხევისბერისაგან გამოცხადებული — ვინც იჩხუბებდა. ვინც ჯურუმს არ შეასრულებდა, ხევისბრები იმის საკლავს აღარ დაკლავდნენ და არც იმის შესაწირავს შესწირავდნენ, ვიდრე არ შეასრულებდნენ დანადგებ ჯურუმს. ეს ამბავი კი ითვლებოდა საბოლოო ამოწყვეტად არა მარტო იმ ოჯახისა, მთელი გვარისთვისაც კი მოსალოდნელი იყო კოპალას რისხვა.

ეს დღე ამნაირად მოსალამოვდებოდა. საყეინოს ფული კოპალას მთავარ საბრძანებელში მიდიოდა უძილაურთაში, დანარჩენი რაც შემოსავალი იყო, მხარ-ტყავი ან სახსარი ტყავისა, ამას აკუშელი და უძილაური ხევისბრები იყოფდნენ.

სალამო ხანზე ხევისბერი ზარს დარეკდა და მლოცავი გაემზადებოდა წასასვლელად; დროშებს ააბძანებდნენ, ხალხს დაამწყალობნებდნენ, ერთმანეთს გამოემშვიდობებოდნენ და უძილაურთ დროშა გამოუძღვებოდა მლოცავს უძილაურთის მთისაკენ. ვისაც იქაც უნდოდა ზღვნობა, თან გაჰყვებოდა, ვისაც არა და აქედანვე წავიდოდნენ თავის სახლებში და სოფლებში. აკუშელი ჯვარიონიც წავიდოდნენ აკუშოში, სადაც ჭკონდათ კიდევ საკუთარი დღეობა.

უძილაურთ მთაზე არის დიდი მოედანი; ერთ ადგილას პატარა ამადლებული გორაკია, ამ ადგილას ეწოდება ირემთკალო; ამავე გორაზე არის კოპალას დროშის საბრძანი და საზარე, იმ ადგილზე, საიდანაც დევებმა და კოპალამ ქეები გაისროლეს. ხევისბერი მაღლა ავიდოდა დროშის საბრძანთან. დროშას ტარით დაბლა დაჰყურებდა აღმოსავლეთისაკენ დახრით და აწკარუნებდა დროშის ზარს, მლოცავები მოედანზე ქუდმოხდილნი პირდროშისაკენ იდგნენ. ხევისბერს მიართმევდნენ ღვინით სავსე ვერცხლის თასს, დადგამდნენ კოშკზე და ანთებულ სანთელსაც კოშკზე თასთან ახლოს დააკრავდნენ. ხევისბერი შუღლ-

გებოდა დიდებათ: „დიდება შენდა, ღმერთო მაღალო, ცისა და ქვეყნის გამჩენო, დიდება შენდა, კვირავ ძალიან-მადლიანო, ხთის მაღლის მოკარვეო, დიდება შენდა, ჩვენო სალოცაო გმირო კობალო, დედებერთად მეომარო! შენა სწყალობდე შენთ ყმათა და შენთ ყმათაში დღეს შენის კარის მლოცავთა. სასიხარულოდ გაუჟადე შენი ქსენება-დიდება, სასინანულოდ ნუ გაუჟდი, ზაფხულობა და სთვლობა მშვიდობისა და ღალიან ბარაქიანი დაუყენე“... დანარჩენი დიდება ჩვეულებრივია, როგორც იახსარშია დაწერილი.

დიდების შემდეგ მას თასს მისცემდნენ, ხევისბერი კიდევ დაილოცებოდა და დაამწყალობნებდა ყმათ. ამავე საღამოს სასოფლო საკლავსაც დაკლავდნენ, ან კობალას ცხვრის ფარიდან გამოყვანილ ცხვარს. მეზღვნე კი მეორე დღემდინ არ ზღვნობდა, თუ ვინმე დაკლავდა, გამონაკლის შემთხვევაში, განსაკუთრებული პირობების გამო, მაგალითად, თუ მისი წასვლა მეორე დღით აუცილებელი იყო. საღამოს იმართებოდა სმა, უძილაურებს ლუდიც ამოჰქონდათ, ღვინოც და არაყიც. აწალ მოსულ მლოცავსაც ყველას ჰქონდა თავ-თავის ბინაზე სასმელ-საჭმელი. ხორცი ციხეთგორიდან ჰქონდათ წამოღებული იქ დაკლული საკლავებისა და აქ ხარშავდნენ, მწვადებს აკეთებდნენ, ვიდრე მეორე დღეს ახალ საკლავს არ დაკლავდნენ. ამ დამეს ყველანა აქ გაათევდნენ. დასტურ-ხევისბრებსაც ეპატიებოდნენ სუფრებზე, ლხინი, მღერა და თამაშობა იყო მთელ დამეს. დღით დასტურებ: წყალს მოიტანდნენ, ხევისბერს პირს დააბანიებდნენ და ერთ ჰიქა არაყსაც დაალევინებდნენ. ის მივიდოდა საზარესთან, აანთებდა სანთელს. დიდი პირჯვრის წერით და თხოვნით, რომ — მე ხორციელი რომ შენს წმიდა ადგილში მოვდივარ და უღირსი შენს სამსახურს ვასრულებ, ამაზე ნუ გამიწყრებიო. ამ დროს ხევისბერი ფეხშიშველი იყო, შემოჰკარავდა ზარს სამჯერ ნელ-ნელა, თითო შემოკვრაზე პირჯვარს დაიწერდა და იტყოდა: „დიდება ძალსა შენსა, ჩვენო სალოცაო გმირო კობალო!“ სამჯერ დარეკვის შემდეგ ჩქარ-ჩქარა რეკდა, რაც, დაახლოებით, ექვს-შვიდ წუთს გრძელდებოდა. ზარის ხმაზე ყველა მლოცავი ცეხზე ადგებოდა, პირჯვარს იწერდნენ და ნელი ხმით ამბობდნენ: „დიდება ძალსა შენსა, ჩვენო სალოცაო. გმირო კობალო! შენ გვიშველე შენ ყმათა“. ხევისბერი ბოლოს კიდევ სამჯერ ნელ-ნელა შემოჰკარავდა ზარს პირჯვრისწერით. ამ დროს მოიტანდნენ სანთელს და ზედაშით სავსე თასებს. იგი სანთლებს სასანთლეებში აანთებდა და სადიდებელ ზედაშეზე ადიდებდა კობალას. მერე დაამწყვდევდა ყმათ. სასმელ ზედაშეს დასტურ-ხევისბრები გამოსცილდნენ. აქედან იწყებოდა ზღვნობა, წამოაყენებდნენ საკლავებს და სათითაოდ კლავდნენ ჩვეულებრივი დიდებით. იმართებოდა ლხინ-თამაშობა და სუფრები.

შუადღე რომ მოახლოვდებოდა, ჯერ დადგამდნენ საყეინოს (საყეინოს დადგმის წესი აწერილია იახსარშიც და ციხეთგორშიც). აქ საყეინო იყო ვერცხლის დიდი თასი. ერთი კაცი საყეინოსთან იჯდა, ზურგზე ღვინით სავსე ტიკი ჰქონდა წამოკიდებული და რამდენიც დანაკულდებოდა უმატებდა. სვამდნენ ერთმეორის ჯობნაზე და ლოცავდნენ აქაც ლაშარის ჯვრის პიროფლიანთათვის. დროშას აქაც მოაბრძანებდნენ საყეინოს პირველ დადგმაში. საყეინოს ფული ინახებოდა და მერე ხმარდებოდა სახატო საქშეს ან ვენახში სამუშაოდ დაქირავებულ მუშებს ეძლეოდა.

საყეინო რომ მოთავდებოდა და საკლავების დაკვლაც შეთხელდებოდა, ხევისბერი გამოაცხადებდა დოღს. ხმამალა ეტყოდა ხალხს: „ბაბა, ხალხო, რაც მოდენილობა ჰქონდა ჩვენს სალოცავს გმირს კობალას, იმ წესის შესრულება გვინდარის; დაამზადეთ ცხენები და დოღი წავიდეს, ახლა დრო არისო“. ახალგაზრდები მოაგროვებდნენ ცხენებს. შეკაზმავდნენ და თვითონაც მოემზადებოდნენ. ხევისბერი ავიდოდა საზარესთან, მას მთარმევდნენ ლუდიან თასს და სანთელს. პირველად ადიდებდა კობალას და დაამწყალობებდა ყმათ და მხედრებს, გამოცლიდა თასს, მივიდოდა, ზართან, ერთხელ შემოჰკრავდა და მოსთხოვდა მადღს. მხედრები პირველი ზარის ხმაზე ცხენებზე შესხდებოდნენ, მეორე ზარს ცოტა გვიან შემოჰკრავდა, მხედრები მწყრივად დადგებოდნენ პირალმოსავლეთისაკენ (იქით გრძელი მინდორი მიდის, დაახლოებით კილომეტრნახევარი სიგრძისა და მინდვრის ბოლოს ნაპირში ერთი პატარა კოშკი დგას დოღის მიჯნად). ხევისბერი ზარს მესამედ რომ შემოჰკრავდა, ყველანი მიანებებდნენ ცხენებს სადავეს და მათრახებსაც მიაყოლებდნენ.

მოედანი ქუჩაი ბალახით არის დაფარული და ცხენის სარბენად რბილი და ადვილია. ამ არემარეს არც ქვა მოიპოვება. ცოტა ხნის შემდეგ აღნიშნულ კოშკს გარს შემოუვლიდნენ გახელებული ცხენება. კოშკის წინ გადმოვიდოდნენ და განზე გაიშლებოდნენ მწყრივად პირსაზარისაკენ. ხევისბერი სამჯერ კიდევ დარეკავდა ზარს ნელ-ნელა. მესამე ზარის ხმაზე ერთბაშად გამოსხლტებოდა ყველა ცხენი. მათრახების ტყრილით უცბად მოიყრებოდნენ საზარის ძირას განსაზღვრულ ადგილზე. ხალხი კიჟინით შეხვდებოდა ცხენების მოსვლას. ჩამოხტებოდნენ მხედრები, ცხენებს სხეები ჩამოართმევდნენ და იქითაქით ატარებდნენ. პირველ მომსვლელ ცხენს „დოღი“ ჰქონდა ერთი თულუხი ლუდი, მეორეს ერთი კოში, მესამეს ერთი თასი. დანარჩენები რჩებოდნენ უდოლოდ. ლუღს, რაც დოღად ერგოთ, ყველანი დალევდნენ — მხედრებიც და სხვა ხალხიც. ეს იყო სახატო დოღი. აქვე იყო წესად მიცვალეზულის დოღიც. ვისაც ჰყავდა ახალი მიც-

ვალებული, ან ახალგაზრდა ვინმე იყო მკვდარი და პატრონს ემეტებოდა მისთვის, ისიც მართავდა აქ დოღს. ასეთ დოღში აყენებდნენ უფრო ხშირად პირველ მომსვლელისათვის ჭედელას, მეორისთვის ცხვარს, მერე ბატკანს, სხვებისთვის ფულს, მიცვალებულის ტანსაცმელს, ფეხსაცმელს და იარაღიც იცოდნენ დოღად. სასმელიც მიცვალებულის პატრონს ჰქონდა და სუფრასაც უმართავდა მხედრებს. ცხენებს გაისტუმრებდნენ აქაც ზარის რეკვით და იქიდანაც ისევ ზარის ხმაზე წამოვიდოდნენ. იმავე წესით სრულდებოდა ყველაფერი, როგორც ჭვარის დოღში. რაც ეძლეოდათ დოღში, იმავე ყველაფერს შენდობას ეუბნებოდნენ. აქ საკლავს დაკლავდა დოღის პატრონი, იმისაგან გამართულ სუფრას ეტყოდნენ შენდობას. იმ წესით იხარჯებოდა ყველაფერი, როგორც მიცვალებულის სუფრაზე. სალაღებელს ხელზე ურიგებდნენ პურსაც და ხორცსაც, გარდა ხნიერი ხალხისა და პატივსაცემი სტუმრებისა.

ასეთი დოღი რამდენჯერმე განმეორდებოდა. ამასობაში საღამოც მოატანდა, ხევისბერი დროშას ააბრძანებდა და ხალხს დაამწყალობებდა. ხალხი დამწყალობების დროს კოპალას სთხოვდა ხვეწნამუდარიტ, რომ, რაც რამ აწყენინეს, აპატიოს და მოწალმართე ანგელოზი გააყოლოს, მგზავრობაში ხელი მოუმართოს და კვლავად უკეთესი გულით მოიყვანოს დღეობაში კოპალას სახელისა და ძლიერების სალოცავად. ხალხი მოამზადებდა ცხენებს და დაიშლებოდნენ. ვისაც ცაბაურთის მთაწმინდას უნდოდა წასვლა (მისი დღეობაც მეორე დღეს იყო), ცაბაურთისკენ გადაბანაკდებოდნენ. დასტურ-ხევისბრები აქედან წამოიღებდნენ, რაც დღეობიდან ერგებოდა და დროშით ჩამოვიდოდნენ უძილაურთაში. აქ ერთ ღამეს კიდევ დარჩებოდნენ ხატში, მეორე დილას კი გამოილოცავდნენ და გაყოფდნენ „ნაქათარს“ (ნახორი — ხევისურულად, დარჩენილი სურსათ — სანოვავე), ხორცს, რაც ერგობ. უკანასნელად დასტურნი და ხევისბრები მადლს მოსთხოვდნენ, ერთიმეორეს დაამწყალობებდნენ და წავიდოდნენ თავთავიანთ სახლებში.

ამის შემდეგ მოდიოდა მ ა რ ი ა ნ ო ბ ა. მარიანობას ახალი წესი არაფერი იყო. სრულდებოდა ყველაფერი ისე, როგორც სხვა დღეობებში. მეზღვნე ამ დღეობაშიც ბლომად მრდიოდა, რადგან ყველგან გზა იყო გასული.

ამის შემდეგ იცოდნენ ნ ა დ ი. ნადში რიგის დასტური ლუღს აღულებდა და იმ წესით იმკებოდა სანადოები ყველგან, როგორც აქ ერთერთ ხატში არის აწერილი.

ამით მოთავდა დღეობების აღწერა.

კობალას ჰყავდა ბლომად კურეტები. ხალხი ცოცხლად სწირავდა ერთი წლისას და მეტისასაც. შეწირული კურეტები გაეროდა ძველ კურეტებში, ზაფხულობით მიუდიოდათ მთაში, აყენებდნენ მაშარას და უძილაურთის თავს, მთაზე. მეკურეტი მულამ იყო ერთი ან ორი მწყემსი. კურეტები ინახებოდა სიბერემდინ, მათი დაკოდევა არ შეიძლებოდა (ხევსურეთში ლიქოკში კი კოდავდნენ და ისე ინახავდნენ). აქაური კურეტები ისე ავდებოდნენ, რომ გარეული ცხოველივით დადიოდნენ სოფელ-სოფელ და საძოვარ მთებში დაეძებდნენ ნახირს. ზოგიერთი გაველელებული კურეტი ხევსურეთში როშკამდინ, ფშავში უკანა-ფშავამდე მიდიოდა. მათი რიცხვი აღიოდა ორმოცამდე და მეტიც. ზაფხულში მთაში, ზამთარში კი ორ-სამ ადგილსაც ინახავდნენ.

როგორც ვთქვით, ზემოთიანეთში კობალას ყმანი ჰყავდნენ და სანადოებიც ჰქონდათ. კურეტების ნაწილი იქ მიუდიოდათ და ინახავდნენ იქაური ყმები. ცალკე გომური ჰქონდათ და აჰმევედნენ სანადოების ჩალას. ნაწილი მიუდიოდათ კახეთში, ილტოზე, სოფელ შახვეტილაში. აქაც იყვნენ კობალას ყმანი — ლანიშანები. ესენი არიან ძირად ქისტები. კობალას მოუყვანია ქისტეთიდან ქისტი, დაუსახლებია შახვეტილაში და ჩაუბარებია თავისი კურეტები. აქ ნიშიც არის კობალასი, სადაც ლანიშანები დასტურ-ხევისბრობენ კიდეც. აქ ზამთარში ჰმევა არ სჭირდება, კურეტები ტყეში გადიოდნენ და გაჰქონდათ თავი. კურეტს ვერ დაკლავდნენ, თუ კობალას ბრძანება არ იქნებოდა. ხევისბერს ხატი გააგებინებდა, რომელი კურეტი უნდა დაკლულიყო და ის გამოუცხადებდა ყმათ. კურეტს დაკლავდნენ შობას, სხვა დღეობაში არ კლავდნენ. კურეტის ხორცი ნახევარი რჩებოდა მეკურეტეს (მომვლელს), ნახევარს სოფელი მოხარშავდა და ჰამდა. ტყავი რჩებოდა მეკურეტეს. ზოგი კურეტი ხუთმეტ-თექვსმეტ წლამდინ რჩებოდა დაუკლავი და სწორედ ისინი დადიოდნენ გაავებული. კობალას კურეტს ადვილად ვერც ნადირი რამეს გამორჩებოდა, არც ჭირნახულის წახდენაზე ვინმე წყრებოდა ძალიან. კაცი კაცს ეტყოდა: „შენ განა კობალანს კურეტი ხარ, რომ ეგრე დადიხარ თავისუფლად“. (კობალას კურეტი აქ არც იკოდებოდა და არც ამუშავებდნენ. ლიქოკში, სადაც კობალას სალოცავი იყო, კობალას ხარებს ეძახდნენ. დაკოდილებიც იყო და ამუშავებდნენ კიდეც დასტურები). კობალას ცხვირი ბევრი არ ჰყავდა, ორას-სამასზე მეტი არა.

ხევისბრობა მოდენილობით (მემკვიდრეობით) იყო, კოქლიანთ გვარში და თათარაშვილების გვარში.

უძილაურები კაცი და დედაკაცი ყველა ერთდებოდა ცივზე მისვლას, (ცივი: მიცვალელებული), არცერთი მიცვალელებულთან ახლო არ მივა.

მიცვალბულს სხვა სოფლიდან მოსული ხალხი ასაფლავებს. ვინც ცი-  
ვთან იყო, ის ვიდრე ტანს არ დაიბანდა და იაზმას არ ისხურებდა, უძი-  
ლაურების სახლში ვერ შევიდოდა. ნაცივარი სახლი ხომ სანამ სა-  
კლავით არ დაინათლებოდა, მასში შესვლა უძილაური კაცისათვის  
წამოუდგენელი იყო. მათი წარმოდგენით ცივსა და რიოშს კოპალა-  
ორივეს ერთნაირად ძალიან ჰკრთებოდა.

ს ხ ვ ა დ ა ს ხ ვ ა ა მ ბ ე ბ ი კ ო პ ა ლ ა ზ ე. ერთხელ კოპალას მე-  
კულუხე მიდიოდა. ჩაბანოში გაიარეს. აქ ერთ ბებერს საფქვავეი ეფინა.  
მეკულუხეს ძაღლები გამოუხტნენ და იმათთან ბრძოლაში საფქვავეი  
დაფანტეს. ბებერმა წყევლა-კრულვა და ლანძღვა-გინება-დაუწყო მეკუ-  
ლუხეს. ხევისბერმა ბებერს უთხრა: „ჩავლით ჩამიშვი, ბებერო, და  
ამოვლით ამბავი მიაგებო“. მეკულუხე ახმეტაში ჩავიდა. ამ ბებერს  
ორი ვაჟიშვილი ჰყავდა, ორივე ავად გაუხდა და მოუკვდა მეკულუხის  
ამოვლამდინ. ასე მოუვიდა ბებერს კოპალას მეკულუხის გალანძღვის  
გამო.

კოპალას ძალაზე ხეცურების წარმოდგენით მიაგებო შოშია ქერა-  
ულმა (ხადუში მცხოვრებმა 52 წლისამ): „ერთი თუში მიდიოდა თიანე-  
თიდან თუშეთისაკენ. თხილაში რომ გადავიდა, გზაში წამოეწია ძალიან  
ლამაზი ქალი, ერთის შეხედვით თუშსაც მოეწონა. ქალი თუშს მიუ-  
ახლოვდა და დაეჭაბა. მაშინვე გავსხვარივდიო, — თქვა თუშმა, —  
დავბორბოწიავდიო და მერე აღარაფერი ვიცი, რა მოხდა და სად ვიყა-  
ვითო. გონზე რომ მოვედი, ქაჯეთში ვიყავი, იქაურობა სავსე იყო  
ქაჯებით. ვინ იცის, იქ რამდენ ხანს ვიყავით, ქაჯები ორჯერ სადმე  
წავიდეს და მე არ წამიყვანესო, მესამედ რომ წავიდეს, მაშინ კი მეც  
თან წამიყვანეს. სადაც მივედიო, იქ ხთიშვილნიც იყვნეს და ქაჯნიც.  
გავიგე, რომ ხთის კარზე ვიყვენითო. ქაჯებს ხთიშვილნი ისეთ მი-  
ტუტკვილნი ხყვანდეს, რომ ჩუჩუნის საქნარი არ ჰქონდა. თურმე ქა-  
ჯებს ხთიდან ნება აქვს მზის დაბრუნვის დროს ხთის კარზე მისვლისა  
და თამამად ქცევისა. ამ დროს ხთისშვილნიც ხთის კარზე იყრიან თავს.  
მე ქაჯებს თან ვყავდი და არცად არ მიშვებდნენ, ხოლოთ შორიდან კი  
ხთიშვილთაც ვხედავდი და ვიცოდი, რასაც აკეთებდნენ. გავხენე და  
მინდორი ქაჯ-მანდილოსანთ სრუ ეჭირა, ხთიშვილნი იმათგან შეწუხე-  
ბულნი, მიტუტკვილიყვნენ ხთის კარზე. მემრე ხთიშვილთა ჯერ ერთხან  
საღამ წალალეს კაცი, არავინ მოვიდა. მემრე მეორედ საღამ წალა-  
ლეს კაცი, არავინ მოვიდა, მესამედაც რო კაც წალალეს (კაცში ნა-  
გულისხმევია ერთ-ერთი ხთიშვილი, მოპატიყე), ქაჯებს არევდარევა  
შაეტყვე, შაშინდეს საღამ; მემრე თქვეს: კოპალა მოვიო და ჩვენი საქ-  
მე ცუდად ასავ (კოპალა თურმე ხთიშვილთ დაუპატიყებლად არ მო-  
ვიდოდა, ისიც პირველ მაწევიარს არ გამოჰყვებოდა. მესამე მაწევიარის  
მოსვლამდინ არ წამოვიდოდა, როცა ხთიშვილნი ხთისკარზე იყრიდნენ

თავს). მავიდ კოპალაი-დ იმ მინდორს სრუ. ცეცხლ გაშინდ, სადაც ქაჯ-მანდილოსანნი იყენეს. სრუ დაკვლად აქცივ, ქაჯებ დაწვე ცეცხლში. სხვა ყველა დაიწვა და მე დავრჩივ მარტოივ — თქვა თუშმა. კოპალამ გიგ, რო მე ჯორციელ ვიყავი — იმით დავრჩი. მავიდ ჩემთან, მკითხ: „ვიჩ ხარავ, შენ აქ რას აკეთებავ?! მიაც უთხარი ჩემ თავს გადასავალ? საით მოვედ აქ — რა დაგჩავ შინავ კაივ, — მითხარ; მე მამგონდ, ცოლი-დ ცხენ დამჩესავ კაებივ. მაგრამ მანამ ვეტყოდი, — ყროლ მაგგონდავ, არ სთქოვ! მიაც მალევ მავისაზრე, ვუთხარ: „ქორან ჯარნიო-დ მამულნ მამჩესავ“. „ჯარნიო-დ მამულნი მიაო-დ შენ — ჯალაფნიივ“, მითხრ. ეს რო მითხრ, მემრ აღარ ვიცი, რაი ვქენი-დ წელწად შინ საითამ მავედ. მე ის არ ვიცოდი, ქაჯეთში რამთვენ ხან დავლიე. შინ მისულს მითხრეს: სამს წელს იყავივ დაკარგულივ“.

მერე ეს ხარებიც ორივე კარატის ჯვარისათვის ე. ი. კოპალასათვის დაუკლიათ, მამულიც კოპალას შესწირეს თურმე ამ თუშისა. წელო-ბამდინ იჭო იქ კოპალას მამული და კოპალას დროშაც დადიოდა იქ ლიქოკიდან.

### ცაბაურთის მთავარანგელოზი და მისი დღეობები

ჩამაწერინა მთავარანგელოზის ძველმა ხევისბერმა ლევან თათა-რაშვილმა, მცხოვრებმა სოფელ ჩარვალში, სამოცდახუთი წლისამ:

ერთი კაცი, ალბათ თუში იქნებოდა, ცხოვრობდა თუშეთში, სოფელ დანოში. ამავე დროს ყუარელში მდინარე ბურსას გვერდზე ყოფილა სატახტო ქალაქი, სადაც მეფე ცხოვრობდა. (ნაქალაქარი ახლაც ეტყობა ყუარლის ტყეში და ნატანტარს ეძახიან). დანოდან ეს კაცი წამოვიდა და მეფეს სთხოვა — აქ დავსახლდებო. მეფემაც ნება დართო. დაიწყო ცხოვრება ამ ქალაქში. მერე ქალაქს დაღისტანი შემოესია, მეფეც მოკლეს და ქალაქი გადაწვეს. ვინც მოასწრო, ქალაქიდან გაიქცნენ და შეიხიზნენ მთებში (ნატანტარს ახლაც ეტყობა დამწვრობა). ეს თუშიც გამოიქცა და გადმოვიდა იორზე. სოფელ კერნოვანში გაიკეთა ეკლესია და წმიდა გიორგის ჯვარზე ლოცულობდა. აიშენა ციხეც ოთხთვლიანი, რომელიც ახლაც ისევ დგას. აქ ეს კაცი ისე გამრავლდა, რომ მისი შვილ-შვილიშვილი აღარ დაითვლებოდა. გაკეთდა დიდი სოფელი და თანაც მდიდარი. გაიგეს ლეკებმა ამ სოფლის სიმდიდრეზეც. ორმა თავგამოჩენილმა ბელადმა შეკრიბა ჯარი და დაეცნენ ამ სოფელს. ჯერ პირველი ბელადის ჯარი ჩამოვიდა და ბელადმა ზევიდან დაჰკივლა. ხალხმა გაიგო მტრის მოსვლა და შეიარაღებულნი გამოვიდნენ ციხიდან. ბელადმა დაინახა, რომ ბევრი ხალხი გამოშალა და თქვა: „დახე, რა ხუხუნი გამოიღესო“. მას აქეთ დაერქვა ამ გვარს ხუხუნაშვილები. პირველი ბელადის ჯარი დაეცა სოფელსა და გაიმართა ბრძოლა. დამხვედრებმა სძლიეს და გაანადგურეს ჯარი,

მოჰყვა ამას მეორე ბელადი თავის ლაშქრით. ამასაც შეეგებნენ ხუხუნაშვილები, ლაშქარი დაამარცხეს და ბელადი ცოცხლად დაიჭირეს, მოსჭრეს ცხვირი, მარჯვენა ყური, მარჯვენა ხელი და ისე გაუშვეს, — წადი და შენს ლეკეთში თვითონ წაიღე შენი გამარჯვების ამბავიო. ამ ამბის შემდეგ იცოდნენ, რომ კარგი დღე აღარ დაადგებოდათ, ლეკის ჯარი დაესხმოდა თავს და გაანადგურებდნენ. აქედანაც აიყარნენ და წავიდნენ (ის ციხე და ეკლესია იქ ისევ არის), შემოიხიზნენ და მზილას დასახლდნენ, სიმაგრე კლდეებში, მდინარე ნაროულას სათავეში, ცაბაურთის გვერდზე. მათი ნასახლარები ახლაც ეტყობა ამ კლდეებში. აქედანაც აიყარნენ და გაიფანტნენ სხვადასხვა ადგილებში. ზოგი რუსეთში წასულა, ზოგი სათათრეში, ქართლში (კასპში) და ერთა სომხეთში, რომელიც მისულა ერთ წმიდა ბერთან. ეს ბერი ამავე დროს ყოფილა გმირი. ერევნის ქალაქი მას ემორჩილებოდა და მათგან ბეგარას იღებდა. მისული კაცი ამ ბერთან და მეზღვედ დამდგარა. მან რამდენიმე წელიწადი იცხოვრა აქ. მერე ხმა დავარდა, რომ ერევანს მტერი უნდა შემოსეოდა და გაენადგურებინა ქალაქი. ამის გამო ბერი წამოვიდა იქიდან და მეზღვეც გამოჰყვა. მოვიდნენ და თიანეთის ზემოთ პატარა გორზე დასახლდნენ. ააშენა ბერმა პატარა ეკლესია და ლოცულობდა აქ. ამ ადგილს ახლაც ბაღიანი გორი ჰქვია და მისი ეკლესიაც აქვე არის. აქედანაც მტრის შიშით აიყარა და წამოვიდა. ჯერ დასახლდა კაწალხევში, მერე მოწმარში და აქედან ცაბაურთაში. აქ დასახლდა ახლანდელ ბელლის კარს. თავისი მეზღვის მოდენილობიდან მოიყვანა სამი კომლი და ცაბაურთაში დაასახლა. აქაც აიშენა პატარა ეკლესია და ლოცულობდა. აქედან თავისი მეზღვეებით გადასახლდა მათურაში. აქაც სამლოცველო ეკლესია გაიკეთა. აქედან მტრისავე შიშით ისევ აიყარნენ და დასახლდნენ ცაბაურთაში. იმისი სამლოცველოს ადგილზე ახლა ბედელია და ბედლისკარი ჰქვია ამ ადგილს. ეს ბერი დეიდაშვილი იყო იახსარისა და კოპალასი. ლევანი ამბობს: „იახსარისა და კოპალას დედას რუსუდანი ერქვა, მთავარანგელოზის დედას მარიამი. ესენი დები იყვნენ. ეს ბერი მთავარი იყო და ბოლოს მთავარანგელოზად იქცა, როცა ზვთიშვილი გახდა. კოპალა და იახსარი გმირები იყვნენ და მეომრები, დევ-კერპთად მებრძოლები, მთავარანგელოზი ე. ი. ყოფილი ბერი იყო ხთვის მლოცველი.

ბოლოს ქისტის ჯარი დაეცა ცაბაურთას და ააოხრა. მთავარი ბერის ეკლესიაც ქისტებმა დაანგრიეს. ამის შემდეგ ბერი დაუმეგობრდა პირქუშს — მკედელს და თავისი სურათი გააკეთებინა დროშაზე. ჯერ თვითონვე დადიოდა ერევანში და თავის ყმებისაგან ბეგარს იღებდა: წელიწადში სამოც ცხვარს და სამოც ხარს. მოუდიოდა ბეგარი და ყმანი — ხოხორდაულნი ინაწილებდნენ. ცაბაურთას ქისტის ჯარი მეორედ დაეცა და იმის შემდეგ აღარავინ იცოდა, სად წავიდა ეს ბერ-



ყმანი ხოხორდაულნი კი აქ დარჩნენ. ბოლოს ეს ბერი გამოცხადდა მთაწმიდას მთავარანგელოზად და თავისი ყმები მთაწმიდას მოითხოვნა (ცაბაურთის თავი მაღალი მთაა, სადაც წელიწადში ორჯერ დღეობობდნენ: წელწადში და მთაწმიდობას ზაფხულში). ყმანი მთაწმიდას ავიდნენ. მთავარანგელოზმა თავისი პირველი ხევისბერის — გამახარე ხოხორდაულის პირით გამოუცხადა: „მე დამბადებელმა თქვენ სალოცავად ჩამომგზავნა, სისხლის ნამსა და მზის შუქს ჩამომაყოლა და თქვენი თავი ყმად ჩამაბარაო“. ხოხორდაულთ მაშინვე ყმობაზე თავი დასდევს და ხევისბერის ბრძანებით შეუდგნენ საკულტო წესების შესრულებას. ამის შემდეგ მთავარანგელოზმა დამბადებელს მოსთხოვა საბძანებელი და სანადო მამულები. დამბადებელმა მისცა ის ადგილი, სადაც ეკლესია ჰქონდა წინათ და აქვე მისცა სანადო მამულებიც. მერე ცაბაურთაში სამ ადგილას გაკეთდა მთავარანგელოზის სამლოცველო: ბელისკარი იყო სოფელ ცაბაურთიდან აღმოსავლეთ მხარეს, იქვე სოფლის ახლო, და მამულებიც აქ იყო სახატო. მეორე სამლოცველო იყო ღუნხევს — ცაბაურთის ზემოთ ჩრდილოეთ მხარეს. აქ მთავარანგელოზი ბურთაობდა. ხევისბერები ასე იტყოდნენ: „ღუნხევს მებურთავლო“. მერე მთაწმიდას, სადაც პირველად დაარსდა მაღალ მთაზე, საზარე და კოშკი ააშენეს, აქვე იყო საბეროც. ღუნხევსაც და ბელისკარსაც საზარე, სალუდე, საბერო და ბელელი იყო და ისევეც არის. ბელელი ინმარებოდა საპურედ. ახლაც ისევე არის, ოღონდ ცარიელი. დროშა დარჩა თვით ბერის სურათით პირქუშის გაკეთებული და თვითონაც დაუმატეს ზოგიერთი რამეები, მაგალითად: შუბები, ბლდადები და სხვა.

პირქუშის გაკეთებული დროშით, რომელიც ბერის სურათით იყო შემკული, დაიწყეს ერევანში სიარული და ბერის აღება ბერის ყმათაგან. მიდიოდნენ დასტურ-ხევისბერები და ყმანი ხოხორდაულნი. ხოხორდაულთ ცაბაურთის სხვა მცხოვრებნიც შემოუერთდნენ მთავარანგელოზის ყმად. მაგალითად: ჩიტონი, გოგნელანი და ბეკურაულნი. ესენიც ისეთივე ყმანი გახდნენ, როგორც იყვნენ ხოხორდაულნი და ასეთსავე მონაწილეობას ღებულობდნენ მთავარანგელოზის სამსახურში. ამათაც დაიწყეს ერევანში გაყოლა ბერის ასაღებად. მოტანილ ბეგარაშიც წილი ეღებოდათ. მოყვანილი ხარები ზოგი ცოცხლად ინახებოდა, ზოგს დაკლავდნენ და ხორცს ინაწილებდნენ. ცხვარს კი ხატის ცხვრად უშვებდნენ.

იახსარმა, კოპალამ და მთავარანგელოზმა ადგილებიც გაიძინეს. მთავარანგელოზმა და კოპალამ თავის ადგილებს მიჯნა არ გაუკეთეს, რადგან ორივენი უწყინრები და კარგები იყვნენ. იახსართან კი ორივემ მიჯნა გაიკეთა, რადგან იახსარი ავი და უხდინარი იყო. მთავარანგელოზი და კოპალა იახსარის ადგილში თავის ყმას არ მისცემდნენ

დასახლების უფლებას, არც იახსარის ყმას გაუშვებდნენ თავის ადგილში საცხოვრებლად.

ერთხელ წავიდნენ ერევანში ბევრის ასაღებად მთავარანგელოზის დროშით და პირქუშის გაკეთებული სურათით (ერევანში, დროშას და ზედ იმათ ბატონის სურათს რომ დაინახავდნენ, იცნობდნენ და დაუზარებლად აძლევდნენ ბეგარს). მისულებს ბევრი სასმელი დააღვეინეს. ერთმა მღვდელმა ჭვარი მოპარა და ხიდის ყურში დამალა. ეძებეს ხატი (ჭვარი) და ველარ იპოვნეს. ერევნელებმა უარი უთხრეს: ჩვენ არ ვიცით, ვინა ხართ. თუ ჩვენის ბატონის ყმანი ხართ, მოიტანეთ მისი დროშა და სურათიო. მისულებმა ველარაფერი უთხრეს, რადგან ხატო აღარ ჰქონდათ და წამოვიდნენ ცარიელები.

რამდენიმე წლის შემდეგ ერთმა ხოხორდაულმა მოიგონა მკითხაობა იმ მიზნით, რომ თავისი ხატი ეპოვნა და წავიდა ერევანში. მალე გაითქვა მკითხაობის სახელი. თან ჩუმად კითხულობდა, სად იყო მათი ხატი დამალული და ვინ მოიპარა. ეს ყველაფერი გაიგო. ახლა იმ ამბავმა შეუწყო ხელი, რომ რაც ეს ხატი მოიპარეს, მას აქეთ რამდენიმე წელი იყო და ერევანში ცას ნამი აღარ ჩამოვარდნილა. მოსავალი არ მოვიდა და ხალხი სიმშობით იხოცებოდა. აბრალებდნენ ხატის მოპარვას, მაგრამ სადაც დამალული იყო, იქიდან მის გამოძრახებასაც ვერვინ ბედავდა. ვინც მოიპარა, ის მღვდელი აღარ იყო ცოცხალი და იყო ხალხი შეწუხებული. ამ უწვიმრობის შესახებ მკითხავთან მოვიდნენ და მკითხავმა უთხრა: თქვენ მოგიპარიათ წმიდა ბერის დროშის ხატი, ის ხიდის ყურში არის დამალული და თუ არ მოიშორეთ, გვალვას კი ნუ სჩივიხართ, ერევანი ცეცხლში გადაიწვებაო. ხალხმა სთხოვა მას: ოღონდ ის ხატი მოგვაშორე და რაც გინდა გადაგვანდევინეო. მან უთხრა: მე საიდან მოგაშორებთ, ჯერ ქალაქი რა დღეში ხართ და მე ერთი კაცი მაგას რას გაუხდებო. ეს კაცი ხატის წამოსაბძანებლად იყო მოსული, მაგრამ ექვი რომ არ აეღოთ, მაინც უარს ეუბნებოდა. ბოლოს უთხრეს: თუ მოგვაშორებ ამ ხატს, ორი უღვლი ხარ-კამეჩი რასაც დასძრავს, ოქრო-ვერცხლს გაგატანთ და თუ არ მოგვაშორებ, მოგკლავთო. დათანხმდა ეს კაცი. ჭვარი ხიდის ყურიდან გამოაბძანა და წამოიღო მათი მიცემული ოქრო-ვერცხლიც და ჭვარიც.

ხოხორდაულები ზოგნი თიანეთში ცხოვრობდნენ, ზოგნი ცაბაურთაში. ამ კაცმა რაც კი ერევნიდან მოიტანა, ზოგი ხატს შესწირეს და ზოგი თვითონ ძმურად გაიყვეს.

## მამულე ბი

მამულეები, როგორც ვთქვით, ცაბაურთ სოფელთან ახლო იყო აღმოსავლეთ მხარეს და სახარნადოს ეძახოდნენ. იხვნოდა ნადით. ნადში ხარები აფშოდან, ჩარგლიდან და ცაბაურთიდან მოდიოდა, როცა ხე-

ვისბერი შეუთვლიდა დანიშნულ დღეს, ნადში ყველანი მოქუჩდებოდნენ და შეაბამდნენ ხარებს (ცაბაურთაში ერთულელა ხარით ხნავენ). ამ დროს დასტურ-ხევისბრებიც აქ იყვნენ. პირველად ხევისბერი მოიხდიდა ქუდს და დაამწყალობებდა ყმათ. ყმათაში ერთგულ მუშათ, სახატო საქმისად თავდადებულთ და უსურვებდა მთავარანგელოზის დიდებით და წყალობით მშვიდობიანი და ღალიან-ბარაქიანი ზაფხულის მოსვლას. მერე გაუჩავრდებოდა ხარებს და ერთ-ორ კვალს თვითონ გაატარებდა. სხვებიც შეეხვეწებოდნენ ღმერთს და მთავარანგელოზს მშვიდობიანი ზაფხულის დადგომას და დაიწყებდნენ ხვნას. აქედან დასტურ-ხევისბრები წავიდოდნენ და კოდს გახსნიდნენ. კოდის გახსნა იმავე წესით იკოდნენ, როგორც სხვა დღეობებში არის აწერილი. კოდის გახსნის შემდეგ დასტური წააყენებდა ერთ საკლავს სასაკლავოზე, სადაც ხევისბერი უკვე იდგა და შეუდგებოდა დიდებათ: „დიდება ღმერთსა, ცათა და ხმელთა დამდგმელსა, რკულ საქრისტიანოს დამაარსებელსა, დიდება დიდს კვირასა — ხთის მაღლის მოკარვესა. დიდება შენდა, ჩვენო სალოცაო დიდო მთავარანგელოზო. გეხვეწებითა და გვედრებით დალოცვილო ჩვენო სალოცაო, შენს ხსენებასა და შემოძახილზე ნუ გაგვიწყრები, ნუ გაგვირისხდები. გახვეწებთ და გვედრებთ შენთ ყმათა და საყმოში დღეს ნადში მომსვლელთა, ოფლით მაშვრალთა. შაიხვეწენი და შაივედრენი, შენი ხსენება-დიდება სასიხარულოდ გაუჟადე და სასინანულოდ ნუ გაუჯდი. ჯარის ნაწნავსა და ნამაშვრალს ჯვარი დაუწერე და მაღლი და ბარაქა დაუტანე, ზაფხულობა მშვიდობისა დაუყენე, ჯვარ დაუწერე თავის მარჯვენისა და ჯარის ქედის ნამაშვრალ-ნამუშავლისა, ნადობა სასიხარულოდ გაუჟადე, სასინანულოდ ნუ გაუჯდი და კვლავ უფრო მშვიდობით და სიხარულით დაასწერენ შენ ყმანი ნადსა და ზაფხულ-შემოდგომას“... დანარჩენი დიდება იმ წესით გრძელდება, როგორც აწერილია იახსარში.

ამის შემდეგ საკლავს დაკლავდნენ და ლუდიან თასებზე და სანთელ-საწირზე კიდევ ადიდებდნენ მთავარანგელოზს, დაამწყალობებდნენ ყმათ და ჩვეულებრივი წესით გამოცლიდნენ სადიდებელ ზედაშეს. მერე დაახსამდნენ ჩხუტში ლუდს, გაიტანდნენ სახარნადოში და დაალევიებდნენ ხალხს. ხარებს ყველანი ერთბაშად დაასვენებდნენ. თითო თას ლუდს დასტური ყველას დაალევიებდა. ხევისბერი მომავალი ზაფხულის სასოფლო საქმეებზე ელაპარაკებოდა, მაგალითად, ჭირნახულის დაცვაზე, ჭირნახულის დალევის (წახდენის) ჯურუმზე და სხვა სასოფლო-სახატო საქირბოროტო საკითხებზე. ამის შემდეგ შეუდგებოდნენ ხვნას. ლუდს დასტური თან მოაყოლებდა და ასმევდა ხალხს. ხენა რომ დამთავრდებოდა, ერთ-ერთ უღელ ხარს შეაბამდნენ ფარცხში. ერთი ხევისბერი, რომელსაც პური ებარა, ქუდმოხდილი თესლს დათესავდა და დასტურები დაფარავდნენ. გუთ-

ნის გაშვების შემდეგ ყველანი სალუდესთან მოიყრიდნენ თავს. ხორცი უკვე მოხარშული დახვდებოდათ. სუფრას გაამზადებდნენ (ხალხისაგან იყო მოტანილი საწირავები, ისეთივე, როგორც აწერილი არის იახსარში და სხვაგან), სუფრასთან ჩხუტით ლუდს დადგამდნენ, თასს ლუდით აავსებდნენ და იმასაც იქ დადგამდნენ, ანთებდნენ სანთელსაც და ხევისბერი შენდობას ეტყოდა მთავარანგელოზის ძველ და ახალ მიცვალებულ ყმათათვის და უპატრონო მკვდრებისათვის. შესანდობარ თასს ჩამოარიგებდნენ და ყველა დაღევდა. მერე ჩამოურიგებდნენ ხელზე ხორცს, პურს და იმართებოდა ლუდის სმა. დაღამებამდინ გრძელდებოდა ეს სუფრა, მერე დაიშლებოდნენ. მოხნულს მომკამდე დასტურები პატრონობდნენ. სათიბეებსაც ისინი თიბავდნენ თავის სასარგებლოდ.

ყანა რომ სამკლად შემოვიდოდა, ხევისბერი გამოუტყვადებდა ყმათ: ამა და ამ დღეს მთავარანგელოზის სახარნალოა სამკელი და აგრემც შეგეწევათ ჩვენი სალოცავი, ნურავინ დააკლდებით, სადიდებულო, მთავარანგელოზისა არის და სამწყალოზნო თქვენ თავ-ჯალაფობისაო. ხალხი დაემორჩილებოდა ხევისბერის სიტყვას და მოიყრიდნენ თავს ნამგალ-სათითეებით. ლუდი დასტურთაგან დამზადებული იყო. ჩვეულებრივად კოდს გახსნიდნენ და ლუდს მომკელებთან მიიტანდნენ, იმათაც დაალევენებდნენ. პირველად ხევისბერი დაიწყებდა მკას და სხვებიც მიჰყებოდნენ. ამ დღეს ორი ან სამი საკლავიც დაიკვლოდა და სადილი მზადდებოდა. თან მკიდნენ და თან მღეროდნენ:

ამ ყანას ზო მომკა გვინდა, საზიაროს ჩემსა, შენსა,  
თუ ეს ყანა ვერ მოვმკევით, დედა არ გაგვიშვებს მთელთა,

და სხვ. მკიდა ყველა, ქალი და კაცი; ქალები, რომლებსაც დედათწესი არ ჰქონდათ. თუ იმის შემდეგ ხუთი დღე არ იყო გასული, ქალი არც მივიდოდა ხატის ყანაზე. ქალ-ვაჟები მკაში ერთიმეორეს ეჯიბრებოდნენ. ზოგი მესვეური იქნებოდა, ზოგი მეკუდური. მესვეური წინ მიმკიდა და მისჭრიდა ყანას. სხვები თან მიჰყებოდნენ. მეკუდურა სულ უკან შისდევდა და ყანის ნარჩენ ნაპირს მიაჩრევდა-მიმკიდა. იყო ერთი ალიაქოთი — მკა, ლუდის სმა და სიცილ-ხუმრობა. გაიყოფოდნენ ორ გუნდად და აჩქარებული კილოთი მღეროდნენ. ჰერ ერთი სიმღერისთავი იმღერებდა, მერე მეორე გუნდის სიმღერისთავი, მეორე გუნდი კი ეტყოდა ბანს:

მესვეურმა დაუძახა — მეკუდურო ხარდაეო,  
თკინს კოსროს გაღმოგიგდებ, გახვრა შაგიძლავლიეო?

მომკელებს თან მკონავები მისდევდნენ ეჯიბრებოდნენ — ისინი უფრო მაღე შეკონავდნენ ძნებს, თუ მომკელები მეტ ხელეულს დააგროვებ-

დნენ და მკონავეები ველარ მოასწრებდნენ შეკონვას. სხვები აქუჩებ-  
დნენ (ავროვებდნენ) ძნებს, ზოგნი წერეებს დგამდნენ (წერა: ხუთი  
ძნა იყო და ერთიმეორეზე მიაყუდებდნენ გამოშრობის მიზნით. ძნა  
აქ წვრილი იციან, თითო ხელეულისა). სადამოხანზე მკა დამთავრდე-  
ბოდა, გამართებოდა პურის ჭამა. ზუფრა ილოცებოდა უპატრონო  
მკვდრებისათვის.

ძნა კარგა ხანს წერებად დარჩებოდა. როცა გამოშრებოდა, მერე  
დასტურები გადახუთულავდნენ. შემოდგომაზე დასტურნივე მათ მიი-  
ტანდნენ ხატის კალოზე, გალენწავდნენ და გაანიავებდნენ. აქ ხევის-  
ბერი იყო მეპურე, რომელსაც მარტო პურის შენახვა-გაცემა ევალე-  
ბოდა. როცა პურს გაანიავებდნენ, მოვიდოდა პურის შენახველი ხევის-  
ბერი და ერთ საკლავსაც მოიყოლებდა. ამ დროს თავხევისბერიც აქ  
იყო. პურის შემნახველის ხელმხრის სანათლავ საკლავს დაკლავდა  
ჩვეულებრივი დიდებით, ხელეზხედაც სისხლს იწვედა და გულზედაც-  
ტყავი და ხორცი სახლში მიჰქონდა. აქ მარტო მხარი რჩებოდა თავ-  
ხევისბერს. ხელმხრის ნათელის შემდეგ შევიდოდა ბელელში. გარე-  
დან დასტურები მიუტანდნენ ქერით სავსე ტომრებს, ის იქიდან გა-  
დაიტანდა და ბელელში დასცილიდა. რამდენი პურიც თესლობამდე  
დასჭირდებოდა დღეობებს, ამას ანგარიშით ცალკე ჩაყრიდნენ სალუ-  
დში ცარიელ კოდებში. დანარჩენი ინახებოდა ბელელში. ბელელში  
მეპურე ხევისბერი: წელიწადში ორჯერ შედიოდა: ერთხელ, როცა  
გაილეწებოდა, მაშინ ინათლავდა ხელმხარს და ჩაყრიდა პურს; მეო-  
რედ, როცა სათესლე პური უნდა გამოეტანა. მაშინაც გაიბანებოდა, სა-  
პურეში უქუდოდ და ფეხშიშველა შევიდოდა და გადმოუწყავდა სა-  
თესლე პურს, მაშინაც დიდის მოკრძალებით და ხევწნამუდარით: და-  
ლოცვილო ჩვენო სალოცაო მთავარანგელოზო, შენ გევედრები, გეხ-  
ვეწები. შამივედრე და შამიხვეწე. ნუ შამისაწყინდბი ჯორციელსა შენს  
წმიდა ბელელში შემოსვლაზედა და შენთ ქერ-ოქროთაში ველის არე-  
ვაზედა. შენ უშველე შენთ ყმათაცა, მშვიდობით გატანილი თესლის  
ჭირნახული, მშვიდობით მოაკლებიე და ზაფხულობა მშვიდობისა დაუ-  
ყენე, შენის ძალითა და ძლიერებითა, დალოცვილო“.

ასე გადმოუწყავდა თესლს, რომელიც დასტურს მიჰქონდა სახარ-  
ნადოზე დასათესავად. გალენწილი პურის ჩალა და ბზე დასტურს მი-  
ქონდა.

სალუდში კოდები და აქ დღეობებში საკმარი პური (ქერს)  
ინახებოდა. გამოანგარიშებული იყო, თითო დღეობაში რამდენი ქერს  
დასჭირდებოდათ და ამდენის რაოდენობით იყო ჩაყრილი. ამ კოდე-  
ბიდანაც ისევ მეპურე ხევისბერი გამოუწყავდა დასტურთ, რამდანიც  
სჭირდებოდათ. ეს თვითონ მეპურემ ზეპირად იცოდა და ისე აძლევდა.

სალუდებში შესვლა პურიან კოდებთან დასტურთაც შეეძლოთ, მხოლოდ ჩაყრა ქერისა და ამოღება ხევისბრის საქმე იყო.

ცალკე განსაკუთრებული სახატო სათიბეები, როგორც ხეესურეთში იცოდნენ, აქ არ იყო. არც ტყე ჰქონდა ცალკე ხატს გარდა იმ ადგილებისა, სადაც საარსო-საბრძანებელი იყო. საარსო ადგილებში კი ყველგან იყო ხალხისაგან დარგული იფნები, მუხები, ცაცხვები და ზოგან არყებიც, სადაც გვარობდა. ხეებს რგავდა ხალხი თავის სამწყალოვნოდ. ყველა ხატებში იყო დაცული მსხვილი ხეები. აქედან ერონაფოტსაც ვერავინ წაიღებდა სახლში. თითო ხის დარგვა თითო საკლავზე მეტად მიაჩნდათ სალოცავებს და მის დამრგველს მეტი წყალობის იმედი ჰქონდა. როგორც საკლავის შეთქმა იცოდნენ, ისევე შეუთქვამდნენ ხის დარგვასაც. შეარჩევდნენ ისეთ ხეს, სადაც როგორი გაიხარებდა. დარგულს უვლიდნენ, მანამ გამთელდებოდა, ან მანამ პირუტყვის მისაწვდენი იყო ტოტებისათვის, მას პატარა გოდორს შემოულობავდნენ. მკითხავეებისა და სახატო ენით ამ ხეებს „ხემხვივანთ“ უწოდებდნენ. შემომწირველთ ცოცხლებსაც ამწყალოვნებდნენ და ხატში, როცა სუფრას შენდობას ეტყოდნენ და უპატრონო მკვდარებს მოიკონებდნენ, იტყოდნენ: „თუ ვინმე უპატრონო მკვდარი იყოს და ჩვენ სახელდობრ ვერ ვიკსენიებდეთ, ჩვენი სალოცავი კი არ ივიწყებდენ, დანამადლისი ჰქონდეს ენითა, კელითა, არა და ხემხვივანთა“. ასეთი ხსენება სიკვდილის შემდეგაც ჰქონდათ ამ ხეების დამრგველებს. ამიტომ ხშირ შემთხვევაში ცდილობდნენ ძველები ხეების დარგვას. აქედან პატარა ჯოხიც რომ წაეღო ვისმე ბავშვს, მშობლები ისევე წაიღებდნენ და საიდანაც აიღო, იქ დადებდნენ, თან დიდის მულდარით. სთხოვდნენ ეპატიებინა ეს დანაშაული. აქედან რამის წაღება დიდ რისხვად მიაჩნდათ თავისი სალოცავთაგან. მოსალოდნელი იყო ოჯახისათვის დიდი უბედურება. ეს ხეები სიბერისაგან რაც თავისთავად მოტყდებოდა, ან ტოტები ჩამოვარდებოდა, იყენებდნენ ხატში ლუდის სადულელებად, ხორცის მოსახარშად. დასტურ-ხევისბრებიც ხატში ყოფნის დროს ამ შეშის ცეცხლს ინთებდნენ.

ხევისბრობა პირველად მოდენილობით იყო და მერე სხვებიც მიჰყავდა (ხატს) და თავთავის საქმეს აბარებდა. ზოგი იყო მაგანძური, სხვა მეპურე. მგზავრი დროშა, საკლავის დაკვლა და სანთლის მონთება თავხევისბერს ებარა, ხთიშობლის დროშა სხვას, სალაშქრო დროშა სხვას და ასე ცხრა-ათამდე ხევისბერი იყრიდა თავს, მხოლოდ ყველანი ემორჩილებოდნენ ერთ ხევისბერს, რომლის პირითაც სალოცავი მბრძანებლობდა და თავხევისბერადაც ის ითვლებოდა. პირველ გახევისბრებაზე ხევისბერი ცხრა საკლავით ინათლავდა ხელ-მხარს. თუ ერთბაშად შესაძლებლობა არ ჰქონდა, თანდათანობით შეასრულებდა საკლავების რაოდენობას. სიწმინდე აქაურმა ხევისბერებმაც ჩვეულებ-

რივად იცოდნენ. ერიდებოდნენ რიოშიან ადგილ-გზებს, ცივს (მიც-  
ვალეზულს), ნაცივარ სახლს და სხვ. იბანდნენ ტანს ცივ წყაროებზედ.  
ცაბაურთაში ერთ წყაროს ხატის ხელოსანთ წყალთ ეძახიან ახლაც.  
იმ წყაროზე ხევისბრები ახალწელსაც კი იბანდნენ ტანს. გახევისბრება  
ხდებოდა მომიზეზეებით, ან ავად გახდებოდა და მკითხავეები ურჩევ-  
დნენ. შეიძლება თვითონ ახლად მიმსვლელი ხევისბერი გაეჭადაგა  
და მისულიყო პირდაპირ ხატში, მერე თვითონ ხატივე ჩააბარებდა ერთ-  
ერთ საქმეს. ამას კი თავხევისბერის პირით ბრძანებდა.

## დასტურობა

დასტურები დგებოდნენ მორიგეობით, — ორი დასტური ერთ  
წელს და სხვები მეორე წელს. დასტურები აქ ხატში არ ცხოვრობდ-  
ნენ, როგორც ღელეს და ზოგიერთ სხვა სალოცავეებში. წმინდობდნენ,  
მაგრამ ღლეობამდე თავთავის სახლებში ცხოვრობდნენ, დასტურობ-  
დნენ როგორც ცაბაურები, ისე სხვადასხვა სოფლებიდანაც. ჩარგლე-  
ლები, ბეტისჩდილელები და აფშოვლები. ერთ-ერთი დასტური იქნე-  
ბოდა ცაბაურთიდან, მეორე კი სხვა სოფლიდან მოდიოდა. აქაც რიგით  
მოაყოლებდა სოფელი და სხვა სოფლებშიც რიგით მოუდიოდათ. სა-  
ფორე ქერს სხვა სოფლის დასტური აქედან წაიღებდა და იქ დაამ-  
ზადებდა. ფქვილს და სვეს მოიტანდა და ლულს აქ უღუღებდნენ სალუ-  
ღეში.

პირველი დასტურობა იწყებოდა ახალწლიდან. ძველი დასტურებო  
გამოიცივლებოდნენ და ახლები დადგებოდნენ. როგორც იახსარში  
გვაქვს აღწერილი, ისეთივე წესით. აქაც გადამდგომი დასტურნი დაკ-  
ლავდნენ გამოსალოც საკლავს და დამდგომი დასტურნი შესალოცს.  
პირველი საკლავი დაიკვლებოდა გამოსალოცი, ხევისბერი გადამდგომ  
დასტურთ დაამწყალობნებდა საკლავით და მთავარანგელოზს სთხოვ-  
და: ამ ერთი წლის განმავლობაში რაც სცოდეს, აპატიოს და დასტუ-  
რობა სასიხარულოდ გაუხადოს. მეორედ დაკლავდა დამდგომ დას-  
ტურთ საკლავს. სთხოვდა მთავარანგელოზს, რომ მშვიდობით დაწყე-  
ბული დასტურობა მშვიდობით მოათავონ თავის ხიზან-ჯალაფობით.  
ეს ხდებოდა წელწდის წინა ღელეს. ამ დროს ხევისბრები და ძველ-  
ახალი დასტურები აქ იყვნენ. ყველა ხევისბრები ამწყალობებდნენ გა-  
დამდგომ დასტურთაც და დამდგომთაც. დასტურებიც ერთიმეორე,  
ამწყალობნებდნენ. გადამდომ დასტურთ, მხარ-ტყავის გარდა, საკლავ-  
ვი შინ მიჰქონდათ, დამდგომ დასტურთ საკლავს კი აქ იტოვებდნენ.

საკლავების დაკვლის შემდეგ ოთხივე დასტური და ხევისბრები  
შვიდობდნენ საბეროში. ჯერ ხევისბრები დადგებოდნენ მარჯვნივ, მერე  
შათ გვერდზე გადამდგომი დასტურნი და სულ მარცხნივ დამდგომი

დასტურნი. მთავარი ხევისბერი კელაპტარს დაანთებდა და აქვე კოშით დადგმულ ლუდთან დააკრავდა, მერე აღიდებდა მთავარანგელოზს და ამწყალობებდა გადამდგომ და დამდგომ დასტურთ. მერე ხევისბერი (ხევისბერს რომ ვასახელებთ, იგულისხმება მუდამ მთავარი ხევისბერი, ისე სხვა ხევისბრებიც იყვნენ აქ და სხვადასხვა საქმე ებარათ). დალევდა ამ კოშიდან და სხვა ხევისბერს მისცემდა კოშითვე. ისინიც დაამწყალობებდნენ ორივე დასტურთ და დალევდნენ. მერე კოშს ძველ დასტურთ მისცემდა, ისინიც დაამწყალობებდნენ ერთიმეორესაც და ახალ დასტურთ. კოშს დასცილდნენ. მესამე კოშს აავსებდნენ. ძველი დასტურნი გადმოდგებოდნენ მარცხნივ, ახალი დასტურნი კი მარჯვნივ. ხევისბერი ამ კოშს მიულოცავდა ახალ დასტურთ და ეტყოდა: „ამ ზედაშით გილოცავთ ახალ დადგომას დასტურად და ვთხოვ ჩვენს სალოცავს მთავარანგელოზს, რომა მშვიდობით დაწყობილი დასტურობა, მშვიდობით და შაუცოდ-შაუწყინრად გადაგაყრიოსთ თქვენი ხიზან-ჯალაფობით“.

დასტურნი თასს გამოართმევდნენ და მადლობას გადაუხდიდნენ. მერე დაილოცებოდნენ და დალევდნენ. ამ წესით შესცვლიდნენ ახალნი ძველთ. ძველ დასტურნი გადააბარებდნენ სახატო ქონებას ახალთ, რაც კი მათ ებარებოდათ — სალუდე, ლუდის დასამზადებელი მოწყობილობა და სხვა. განძი კი აქ ერთ-ერთ ხევისბერს ებარა — მაგანძურს. ახალი დასტურნი აქედანვე შეუდგებოდნენ დასტურის მოვალეობას. ამ დროს მოიყრიდა თავს სოფლის ხალხიც, მეკვლენი, მოიყვანდნენ სამ საკლავს, ყველა მოიტანდა საწირავთ და სათეო პურს (მოგრძო ლავაშებს), პურ-საწირავს დასტური იბარებდა და აწყობდა ამისათვის განკუთვნილ სიპის თაროზე. მერე ხევისბერი მოვიდოდა სასაკლავოსთან და დასტურები წამოაყენებდნენ საკლავებს, ხევისბერი შეუდგებოდა დიდებათ: „დიდება შენდა, ღმერთო, ცისა და ქვეყნის დამაარსებელო, დიდება შენდა, კვირავ ხთის მადლის მოკარვეო. დიდება შენდა, ჩვენო სალოცავო მთავარანგელოზო. გვედრებითა და გეხვეწებით, ხვეწნა-მუდარაზე ნე გაგვიწყრებით, ნუ გაგვირისხდებით, გეხვეწებით და გვედრებთ შენთ ყმათა, დღეს შენის კარის მლოცავთა, მეკვლეთა, შაიხვეწენ და შაივედრენ, სასიხარულოდ გაუჯადე შენი ჭსენება, დიდება. სასინანულოდ ნუ გაუხდი. დღეს მოყენებული შენი სამსაზური სადიდებულო შენი იყოს და სამწყალობნელო შენთ ყმათი, შენთ მლოცავთი. ახლის წლის გამოცვლაზედა ბედნიერა და მშვიდობის წელი და კვალი დაუყენე, მადლიან-ბარაქიანი, კაცოსიც და ნაქონ-საქონისიც. უმატე დალოცვილო წულსა, წულის აკავანსა, კაც-საქონსა. ცხვარ-საწყემსოსა. მშვიდობიან ანგელოზი დააბატრონე, მავნე მაცილი მამორე და შემდეგი გაგრძელება დიდებისა, ისეა როგორც იახსარში ჩაიწერა.



დიდების დამთავრებისას სამივე საკლავი დაიკვლოდა. დასტურებუ-  
გაატყავებდნენ და ღარბაზში დაკიდებდნენ საკლავების დასაკიდებ ჩან-  
გალზე. ხევისბერი ღროშას ააბამდა, ლუდით ტიკებს აავსებდნენ, ყვე-  
ლა მეკვლე თავთავის ბარგს მოამზადებდა, ხევისბერი ღროშას ააბ-  
ძანებდა და გაუძღვებოდა მთაწმიდისაკენ (მთაწმიდა ძალიან მაღლა  
არის ცაბურთიდან, ვერსნახევერის დაშორებით), ხალხიც თან გაჰყვე-  
ბოდა, ყველას მიჰქონდა ქადა-საწირავი და მიჰყავდა ერთი ორი-სამი  
წლის ქედილა. აქ გზადაგზა საკვალავი თოვლი იყო და რიგრიგობით  
გაუძღვებოდნენ ღროშას. გზას გაკვალავდნენ ახალგაზრდები. თავ-  
თავის ოჯახებიდან წამოდებული არაყი მიჰქონდათ და გზადაგზა ამასაც  
სვამდნენ. ავიდოდნენ როგორც იყო მთაწმიდაზე. აქ საზარე და საბე-  
რო იყო (ამ მთაზე შეშა არ არის და ძველი დასტური ვალდებულნი  
იყვნენ, ჯორით მიეტანა შეშა მეკვლეთათვის ლიტანია-ლამეს საკმარი).  
ხევისბერი ღროშას მიაბრძანებდა ღროშის საბძანთან, ვერცხლის თა-  
სით ლუდს დასდგამდნენ ღროშასთან და სანთელსაც დაანთებდნენ  
სასანთლეში. ხევისბერი სანთელ-ზედაშეზე მთავარანგელოზს ადი-  
დებდა და ყმათ დაამწყალობებდა, ლუდიან თასს ჯერ თვითონ გა-  
მოსცილიდა, მერე დასტური და შემდეგ მეკვლეთ ჩამოურიგებდნენ.  
ყველა ამწყალობებდა ყმათ და მეკვლეთ.

ეს რომ მოთავდებოდა, საკლავსაც დაკლავდნენ (მეკვლეში ყველა  
მიდიოდა, ვისაც კი იქ ასვლა შეეძლო, თუნდა ორი-სამიცი ყოფილიყო  
ერთი ოჯახიდან). ხევისბერი გააღებდა საბეროს კარს დიდი პირჯერის-  
წერით და მადლის თხოვით, მერე ყველანი ქუდმოხდილნი თითოობით  
დაიჩოქებდნენ საბეროს ზღურბლზე, პირჯერის წერით და ხეწნით,  
რომ საბეროში შესვლაზე მთავარანგელოზი არ გაუწყრეს. აკოცებდნენ  
შესასვლელ კარებში მარჯვენა და მარცხენა მხარეს ზღურბლს და ისე  
შევიდოდნენ საბეროში. დაღამდებოდა კიდევ. დაანთებდნენ დიდ  
ციცხლს და საკლავსაც გაატყავებდა დასტური, ქვაბი თან ჰქონდათ  
მოტანილი და მოხარშავდნენ ხორცს. აქ წყალი ახლოს არ იყო.  
დაადნობდნენ და თოვლის წყალში ხარშავდნენ ხორცს, რადგან საზვავე  
თოვლების გამო წყალზე არ იყო წასასვლელი გზა. გამართავდნენ  
სუფრას, სანთელსაც ანთებდნენ, სუფრაზე მეკვლეთ მოტანილი სა-  
თეო პურებს აწყობდნენ, ხევისბერი დალოცავდა ძველ დასტურ-  
ხევისბერთათვის და მთავარანგელოზის ყმათაში უპატრონო მიცვა-  
ლებულთათვის, რომელთაც დანამადლი ჰქონდათ სახატო საქმისა და  
ხალხისათვის. ამ სუფრაზე ხელზე ჩამორიგება წილობებისა წესი არ  
იყო. პურს და ხორცს დაუწყობდნენ წინ დაფენილ ნაბდებზე, რომე-  
ლიც ღამის გასათევად ჰქონდათ მიტანილი. ზოგს გუდაზე, რომლითაც  
საგძალი აიტანეს. დასტურ-ხევისბერებისათვის კი იქ სპილენძის სუფრა  
ინახებოდა მუდმივად და ამით მოართმევდნენ არჩეული ხორცის ნა-

წილებსა და სხვა საკმელს. პურის პირველად აღების დროს ყველა დაილოცებოდა: „ღმერთო და ჩვენო სალოცაო, დიდო მთავარო ანგელოზო, შენა სწყალობდე შენთ ყმათა და ყმათაში დღეს შენს წმიდა მთაზე მოსულ მეკვლეთა, მრავალი გამოუცვალე ბედნიერი წელი და კვალი“.

მთელ ღამეს სუფრა გაშლილი იყო, დიდი ცეცხლი ენთო და ზმასა და მხიარულებაში ათევდნენ ღამეს. დაძინება ნაკლებად იცოდნენ. თენებაზე ხევისბერი გავიდოდა და ზარს დარეკდა, მეკვლენი პირჯვარს იწერდნენ. ხევისბერი დაბრუნდებოდა და კარებთან გოგას შიამებებდნენ. ის დაილოცებოდა: „ღმერთო და ჩვენო სალოცაო მთავარო ანგელოზო, გვედრები და გეხვეწები, გახვეწებ შენთ ყმათა, ბევრი ახალი წელი გამოუცვალე მშვიდობისი და კარგად ყოფნისი, ახლის წლის გამოცვლაზედა წელი მშვიდობისი და მადლიან ბარაქიანი დაუყენე“. ამ ღოცვაში თან გოგას სამჯერ შეაგორებდა, ყურადღება ექცეოდა რომელ გვერდზე დადგებოდა გაგორებულნი, წაღმართზე თუ არა, წაღმართი გვერდი დაქრულებული იყო, უკუღმართი კი გლუვი.

შემდეგ ხევისბერი აიღებდა ხელში თოვლს, მეკვლეთ გადააშლიდა და ეტყოდა: „ეგრე თეთრად დაგაბეროსთ ჩვენმა მთავარანგელოზმა“. მერე შევიდოდა და მეკვლეთ ახალ წელს მიულოცავდა. „გილოცავთ, მეკვლენო, ახალ წელს, დიდი გიმატებით, დიდი გიმატოსთ ჩვენმა მთავარანგელოზმა, ახლის წლდს გამოცვლაზედა ბედნიერი წელი და კვალი დაგიყენოსთ“. მეკვლენი პასუხობენ: „აგრევე თქვენა, გალოცვინოს ჩვენმა სალოცავმა მრავალი ახალი წელი შენის ცოლშვილით მშვიდობისი და კარგად ყოფნისი“. ხევისბერი ყველას გადაკოცნიდა. მერე დასხდებოდნენ, სადილაო არაყს დალევდნენ და მოემზადებოდნენ. ხევისბერი დროშას ააბძანებდა, ხალხს დაამწყალობებდა და გამოუძღვებოდა ცაბაურთისაკენ. ჩამოვიდოდნენ ბელლისკარს. აქ ზოგიერთი ხევისბერები, ერთი დასტური და ვისაც მთაწმიდაზე ასვლა არ შეეძლო, დარბაზში დაუხვდებოდნენ. მთაწმიდიდან მეკვლეთ მისვლაზე ისინი კვალს დაიჭერდნენ და გარეთ აღარ გამოდიოდნენ. ხევისბერი დროშას დროშის საბძანთან მიაბძანებდა, მეკვლეთ დაამწყალობებდა. ამ დროს მეკვლენი ქუდმოხდილნი დარბაზთან ახლო იდგნენ. ხევისბერი მივიდოდა დარბაზის კართან და აქ მყოფნი (რომლებიც მთაწმიდაზე არ იყვნენ წასულნი) გოგას შიამებებდნენ კარებთან. იმავე ღოცვით, როგორც მთაწმიდაზე, ხევისბერი აქაც შეაგორებდა გოგას სამჯერ, მერე აქაც თოვლს გადააშლიდა — ეგრე თეთრად დამბერდითო და პირველი შევიდოდა, აქ მყოფთ ახალწელს მიულოცავდა და თითობით ყველას გადაკოცნიდა. მას მიჰყვებოდნენ მეკვლენიც, ულოცავდნენ ერთიმეორეს ახალ წელს. მერე ყველანი თავთავის აღგილზე დასხდებოდნენ, აქ დაკლული საკლავების ხორცი უკვე მოხარ-

შული იყო და მოსულებს გაუმართავდნენ სუფრას. ხევისბერი ამ სუფრასაც შენდობას ეტყოდა, თუ ვინმე ყმათაგანი ამ წელს დააკლდა, მოიგონებდა ძველ დასტურ-ხევისბერთ და ხატის მსახურთ, აგრეთვე უპატრონო მკვდრებს. პურის ჭამის შემდეგ გაშლიდნენ ნაბადს, მეკვლეთა ქულებს ზედ დააგროვებდნენ, და მეორე კალთას გადააფარებდნენ. აანთებდნენ სანთელს და ქულებთან ახლო დააკრავდნენ ქვაზე. ხევისბერი იტყოდა: „დიდება შენდა, ღმერთო, ცისა და ხმელთა გამჩენო, დიდება შენდა, კვირავ ხთის მადლის მოკარვეო, დიდება შენდა, ჩვენო სალოცაო დიდო მთავაროანგელოზო, შენ უშველე შენთ ყმათა და ახლის წლის გამოცვლაზედა ბედნიერი წელი და კვალი დაუყენე. დალოცვილო, ჩვენო სალოცაო, ამ ახლის წლის გამოცვლაზედა შენთ ყმათაში, ვისიც კვალი ხედებოდეს შენის ძალითა და დიდებით, არგინე მეკვლეობა და მილოცვა შენთ ყმათადა. დიდება ძალსა შენსა“. ამ სიტყვებს რომ დაამთავრებდა, ნაბადში ხელს შეჭყოფდა და ვიპი ქუდიც შეხედებოდა, გადმოაგდებდა. მისი პატრონი იქნებოდა პირველი მეკვლე, მეორე ქუდისა მეორე მეკვლე, მესამე ქუდისა — მესამე მეკვლე. პირველ მეკვლეს ლუდით სავსე თუნჯს მისცემდნენ, მეორე მეკვლეს ლუდით სავსე კოშს და მესამეს ლუდიან თასს. ხევისბერი გამოისტუმრებდა სოფლისაკენ და ეტყოდა: „კეთილი და ბედნიერი იყოს თქვენი მიკვლევა, ფეხი თქვენი იყოს და კვალი ანგელოზისი“. ამის შემდეგ მეკვლენი წამოვიდოდნენ სოფელში, ერთი ნაპირიდან დაიწყებდნენ და ყველა ოჯახში მივიდოდნენ, ყველგან გოგას შეუგორებდნენ და მიულოცავდნენ ახალწელს. არ შეიძლებოდა, რომ ოჯახში თაფლ-ერბო არ ყოფილიყო და მოსულები ამით ტკბილად არ დაეზარებინათ.

მეკვლეებიც თავისი ლუდიდან ყველა ოჯახში დაალევინებდნენ. ლუდს ყველანი მოხატრებით დალევდნენ — მეკვლეთაგან მოტანილი ლუდი მიაჩნდათ ღვთიდან და სალოცავიდან ნაკურთხ და დამლევინათვის სასარგებლო სასმელად, მავნე სულის მომშორებლადაც კი. ამიტომ ყველანი დალევდნენ, ვერ დალევდა ის ქალი, თუ სამი დღის წინ „რიოშიანი“ ადგილიდან იყო მოსული და ხუთი დღე მანც არ იყო გასული მისი „რიოშიანობის“ შემდეგ. სოფელში ყველა ცდალობდა მეკვლეებისათვის მეტი პატივი ეცა, მეტი სასმელი დაეღვინებინა, განსაკუთრებულ კარგ არაყსაც მათთვის ინახავდნენ და რაც შეეძლო, საჭმელსაც კარგნ ამზადებდნენ. ამასთან თხილით და კაკლით უვსებდნენ ჭიბეებს. მეკვლეები სოფელს შემოუვლიდნენ და დათრობასაც არ ასცდებოდნენ. როგორც იქნებოდა დაბრუნდებოდნენ ზატში, სადაც ამათ გარდა სოფლის სხვა ხალხი დღეობობდა. წინა დღეს დაკლული საკლავების ხორციც მოიხარშებოდა და სუფრა იყო გამართული. მეკვლენი მოუტანდნენ ხალხს სოფელში მიცემულ თხილს,

კაკალს, თაფლ-ერბოს და სხვა. ხალხი აქ კარგა ხანს იყო და მერე სოფელში დაპატივებდნენ ერთიმეორეს, იმართებოდა სმა და მხიარულება.

ხატში დღეობა ერთ დღეს არის, გამოილოცავდნენ, როცა მოსალამოვდებოდა. წყალკურთხევამდე გრძელდებოდა სოფელში დღეობა, ხევისბრებიც მიდიოდნენ დაპატივების დროს სოფელში, მხოლოდ ისეთ სახლში, სადაც „ნალაჯი“ არ იყო. მაგრამ მაინც წმინდად ინახავდნენ თავს: ყოველ დღე „ხელოსანთ წყალს“ ეძახდნენ და აქ იბანდნენ ტანს, რაც უნდა სიცივე ყოფილიყო. მხოლოდ გაბანის დროს სვამდნენ მაგარ არაყს და სიცივისაგან ის იცავდა. წყალკურთხევა დღეს ისევ ხატში მოიყრიდნენ თავს დასტურ-ხევისბრები და სოფელიც. ერთ საკლავს დაკლავდნენ სასოფლოს, კოდს გახსნიდნენ ჩვეულებრივი წესით, ხორცსაც მოხარშავდნენ და სუფრაც დაილოცებოდა მიცვალებულთათვის. იმართებოდა სმა-ჭამა და მხიარულება.

დროშა ამ დღემდე გარეთ იყო (დროშა ცაბაურთაში სამი იყო: სალაშქრო ორტოტი შუბით, მგზავრი დროშა ვერცხლის ჯვარით და ასეთივე ჯვრით ხთიშობლის დროშა. ყოველ დროშას მედროშავეც: თავისი ჰყავდა, მხოლოდ თავხევისბერის განკარგულებაში იყო ეს დროშებიც და მედროშავეებიც). როგორც ვთქვით, ქრისტეს გამოყვანილი დროშა წყალკურთხევამდინ გარეთ იყო (დღეობები დავიწყვეთ წელწდიდგან, რადგან დასტურნი მაშინ იცვლებიან, ქრისტეზე მერე, დღეობების ბოლოს, წელწდამდინ გვექნება საუბარი), თუ ლაშქრობა არ იყო ან ხთიშობლის დღეობა არ ემთხვევა, მაშინ მგზავრი დროშა არ გამოდიოდა გარეთ.

წყალკურთხევას ჩაატარებდნენ ჩვეულებრივი წესით. სოფლიდან მოდიოდა ქადაპური, საწირავნი. ზოგიერთები დასტურ-ხევისბერები-სათვის პატივსაცემად სადილსაც მოიტანდნენ, სუფრა და ერთი კოშში ლუდი დაილოცებოდა მიმტანის მიცვალებულთათვის. საკლავებით მეზღვნე ამ დღეობებში ბევრი არ მოდიოდა, რადგან ზამთარში სოფლებში გზა არ იყო. ასე დამთავრდებოდა ეს დღეობა. მედროშე თავხევისბერი დროშას ჩამოხსნიდა, განძს მეგანძური ჩაიბარებდა და დროშის მასალაც განძს მიჰყვებოდა. გაინაწილებდნენ ნაქათრს (ნაქათრი — ნარჩენები პურის, ქადის და ხორცისა), მოსთხოვდნენ მთავარანგელოზს მადლს და წავიდოდნენ.

გადმოცემა ხოხორდაულზე. ერთხელ, უძველეს დროს, მთაწმიდას მეკვლეთ დიდი თოვლი მოუვიდა. ლიტანია-დღეს შეიცვალა: ამინდა, მაგრამ მეკვლენი მაინც ავიდნენ მთაწმიდას. ყველა წესები შეასრულეს. ღამე თოვა დაიწყო. დილისათვის ყელამდინ თოვლი დადო. მთაწმიდას სადღეობო ისეთ გორაზე არის, რომ გარშემო სულ საზვავე ადგილები, დაქანებული გვერდალი კლდეები ახვევია, ხან ერთ მხა-

რეს მოეშადნენ და ხან მეორეს, მაგრამ წამოსვლა ვერ გაბედეს. ბოლოს გააქადაგა მთავარანგელოზმა ხევისბერი გამახარე ხოხორდაული. მან აიღო ხელში სამი ვერცხლის თასი, მხარზე დროშა გაიღო და ქადაგობით პირდაპირ საზვავე კლდეზე დაეშვა პირთაქვე. გატყდა მთის დიდი ზვავი და წამოიღო ხევისბერი. ერთი დიდი კლდე წამოიღო და ხევისბერი ზედ მოხვდა. კლდე ვერსნახევარზე ისე ჩამოიტანა რომ გვერდი არ გადაუქცევია და ხევისბერიც თან ჩამოაყოლა. ჩამოვიდა ხატთ პირდაპირ მზილას. რომ გაჩერდა, ხევისბერი მშვიდად გადმოვიდა კლდიდან და დროშის წკარუნით გავიდა ხატში. დროშაც მხარზე ედო და თასებიც ისევე ხელში ეჭირა. მთაწმიდას ხალხი შეშინდა და დაეშენენ ნაზოვარზე პირთაქვე; რომ ჩამოვიდნენ, ნახეს კვალი ბელლისკარისაკენ. გამახარე ხევისბერი საბეროში იჯდა და მთაწმიდას ამბებს უამბობდა ხალხს. ამ ხალხმაც დაინახა ზვავი, კლდეზე ნაჭდომი გამახარეც და დიდი მოკრძალებით შეხვდნენ, როგორც ხთიშვილისაგან გადარჩენილ კაცს. ამის შემდეგ გამახარეს ხთიშვილთან ერთად სცემდნენ პატივს. ის კლდე, რომელზედაც გამახარე იჯდა, ახლაც მზილას არის და იმის ახლოს მირეული ქალი არ გაივლის. პატივს სცემენ როგორც წმიდა ადგილს. 'ხოხორდაული რომ ზვავმა წამოიღო, შემოსძახნა: მიშველე, მთავარანგელოზო! როცა გადარჩა, იმის შემდეგ თვითონვე გააქადაგა და თქვა: „წინ-წინ რომ შამომძახნე, ერევანში ვიყავი, მეორედ კახეთის თავს და მესამედ მთაწმიდას ვიქენი და მოგეშველე კიდევცაო“. ლექსადაც არის ეს ამბავი. მთავარანგელოზი ამბობს.

წინწინ რო იძახ, მსახურო, ერევანს ვიყავ ყმისასა,  
მეორედაც რომ იძახენ, თავს ვიქენ კახეთისასა,  
მესამედა რომ მიძახენ, წვერს ვიქენ მთაწმიდისასა,  
მაღუდავ ჩამოგეშველე, მაღლსა იმ შენის ხთისასა.

მერე ხევისბერმა დაიკვებნა: — მთავარანგელოზო, ჩემმა დავლათმა გიშველა, თორემ დროშაც დაგეკარგებოდა, თასნიც და ხევისბერიც მოგიკვდებოდაო. ეს იწყინა მთავარანგელოზმა. გამახარეს დალევა (ამოწყვეტა) დაუპირა, მაგრამ ლაშარის ჯვარმა არ დაანება, უთხრა: მე დასალეენი ყმანი არა მყვანო.

ეს ხოხორდაულნი ცხრანი ძმანი ყოფილან და ძალიან ამაყნი. არც ხატს ემორჩილებოდნენ ბევრად და არც ხალხს რამეს ჰკითხავდნენ. ამიტომ მთავარანგელოზი მათზე კარგი გულით არ იყო, მაგრამ ლაშარის ჯვარი იცავდა და მათი ზიანის ნებას არ აძლევდა. ბოლოს მთავარანგელოზმა უთხრა: ამ ცხრა ძმათ მოგცემ და შენი ყმებიდან ერთი კაცი მომეციო. ლაშარის ჯვარმა ცხრა ძმაში ერთი კოჭლი კაცი მისცა — მჭედელი, ხოშარელი, ისინი კი აიყვანა თავის ყმად. იმ კოჭლი მჭედლის მოდენილობის (შთამომავლობა) ხალხი მჭედლურები ეხლაც

არიან, ცხოვრობენ სოფელ აფშოში, ქუთხში და თითო-ოროლა სხვა. სოფლებშიც. ამ მკვდელმა მთავარანგელოზში ბევრი რამე გააკეთა: სალუდე ქვაბები, საკიდელი და სხვა რამეები, რაც სჭირდებოდათ ხატში (სალუდე ქვაბი იყო ჯერ „კურობეში“ ჩასმული და მერე რკინის საკიდელით ჭერში ჩამოკიდებული. „ქობ-საკიდელი“ ერქვა). ბოლოს მთავარანგელოზმა ხვეისბრად დაიჭირა ეს მკვდელი. ამაზე გახდნენ მკვდელურები მთავარანგელოზის ნამდვილი ყმანი.

## აღება

წელწდის შემდეგ მოდიოდა დღეობა აღება. აღების წინა დღეს იცოდნენ ბერაკობა. მორთავდნენ ერთ ან ორ ბერაკას, გაუკეთებდნენ უფრო ხშირ შემთხვევაში თხის წვერებს, თხის რქებს, ტანზედაც ჩაიცვამდნენ თხის ტყავს ბეწვით გარეთ და რაც შეიძლება სასაცილო სახეს მიაღებინებდნენ. შემოღამებაზე ახალგაზრდობა მოიყრიდა ერთგან თავს, ყველა გააკეთებდა ხის ხმალს, დაიჭერდნენ ხელში და მთელი ღამის განმავლობაში შემოივლიდნენ სოფელს. ჩონგურის დაკვრით ყველა ოჯახში მივიდოდნენ, თავისუფლად გააღებდნენ კარებს და შევიდოდნენ სახლში. ყველამ იცოდა, რომ ღამე ბერიკანი მოვიდოდნენ და მათი მოსვლისათვის მზად იყვნენ. შენახული ჭქონდათ არაყი, ერბო, კვერცხი, ფქვილი და სხვა. ბერაკანი ოჯახში ხუმრობით და ჭყვივით შეცვივდებოდნენ, სახლის პატრონი ანთებდა ცეცხლს, შესულები მაშინვე ჩონგურს დაუკრავდნენ და ბერაკა დაიწყებდა სასაცილოდ ხტუნვას, ვითომ ცეკვას. ახალგაზრდობა და ბავშვები (ვისაც შეეძლო სიარული, ყველა მიდიოდა ბერაკაში) ეხუმრებოდნენ ბერაკას. ზოგი ხმლით სცემდა, ზოგი ხელს კრავდა და ისიც მოხუცი კაცის ხმით და ენით საწუმარო სიტყვებით ეხუმრებოდა მათ. ისე იყო მორთული, რომ თავის მშობლებიც ვერ იცნობდნენ; ხმასა და ენასაც იცვლიდა. პირში ყალიონს დააჭერინებდნენ — ყანწში გაჩრილ გრძელ სირას. ხანდახან ყალიონსაც გაართყვამდა ახალგაზრდებს, როცა გააჯავრებდნენ. ყალიონში თივის ნაფშვენს ჩაუყრიდნენ, ვითომც ეწეოდა, მალ-მალე დაადებდნენ ნაღვერდალს. ნავთის შემოღების შემდეგ ნავთიან რამესაც ჩადებდნენ ყანწში და რომელ ოჯახშიც შევიდოდნენ, მოუკიდებდნენ ცეცხლს (ყანწი იყო ძროხის რქისა) და ყანწიდან ამოდიოდა ცეცხლის ალი. ჯერ ბერაკად მორთული კაცი ითამაშებდა, თუ ორი იყო ორივე ერთად, მერე სხვებიც გამართავდნენ თამაშობას. დიდი და პატარა ყველა ითამაშებდა. მასპინძელი გაუმასპინძლებოდა სასმელ-საჭეპლით, იცოდნენ წინასწარ ხინკლის მოხარშვა და მათთვის შენახვა (ფშავში ხინკალი არის მიღებული ყველაზე მეტ პატივისცემად). თუ ხინკალი არ ექნებოდათ, კეცეულებს გამოუცხო-

დნენ (კეცეულები: პატარა ზომის გამომცხვარი ხაჭაპურებია). არა-  
ციც ჰქონდათ მათთვის შენახული და ასმევდნენ. ბერაკათ თან ჰქონ-  
დათ გულა, ფქვილის ჩასაყრელი, პატარა ქვაბი ებოს ჩასადებად, კა-  
ლათი კვერცხებისათვის. აგრეთვე ყველის, ხორცის და ხაჭოს ჩასადები  
ჭურჭელი. ყველა ოჯახიდან მისცემდნენ, ვისაც რის შესაძლებლობა  
ჰქონდა. მათვე ჰქონდათ ტიკი არაყისათვის. ყველა ოჯახი ჩაუსხამდა  
არაყს. როცა მასპინძელი არაყით გაუმასპინძლებოდა, ისინი თავისი  
ტიკიდან დააღვენიებდნენ მასპინძლებს გამომშვიდობებოდნენ ერთ-  
ოჯახს და გადავიდოდნენ მეორეში.

სოფელს რომ შემოუვლიდნენ გათენდებოდა კიდეც. მივიდოდნენ  
ერთ-ერთ ოჯახში, სადაც სახლის პატრონთან წინასწარ შეთანხმებულნი  
იყვნენ და დაიდებდნენ სინას (ბერიკაში ღამე ქალები არ დადიოდნენ),  
გათენების შემდეგ მოიწვევდნენ ქალებსაც და იმართებოდა მხიარულო-  
ბა, ქალები გაცხრიდნენ ფქვილს, გაამზადებდნენ ხინკალის გულს. ქა-  
ლები და ვაჟი ახალგაზრდები ხელებს დაიბანდნენ, ყველა ოჯახში აქეთ  
სახინკლედ გაკეთებული პატარ-პატარა სუფრები ფიცრებისაგან. ამ  
სუფრებს ჩაიდებდნენ კალთაში და დაიწყებდნენ ხინკლის კეთებას. ხინ-  
კალი რომ მოიხარშებოდა, დიდებს სუფრით დაუდგამდნენ, პატარებს  
ხელზე ურიგებდნენ. მოხარშულ კვერცხებსაც ხელზე ურიგებდნენ,  
თხილ-კაკალსაც დაარიგებდნენ ხელზე.

ხუმრობით ზოგი ფქვილს ჩაყრიდა ხინკალში გულის მაგიერ და  
იმას შეახვედრებდნენ, ვისაც ეხუმრებოდნენ. ხინკალს რომ მოკებო-  
და, პირი ფქვილით აევსებოდა და იყო სიცილი და ერთი ამბავი. და-  
ღამებამდე აქ ატარებდნენ დროს და ასე დამთავრდებოდა ბერაკა-  
ობა. ბერაკაობა ფშავში ყველა სოფლებში იცოდნენ, მხოლოდ ზო-  
გიერთებმა ყველიერში, ზოგმა აღებას, ხოლო სოფელ ხოშარაში,  
წელწადი რომ დაღამდებოდა, მაშინ. ამ საღამოს ხოშარაში ხატში სან-  
თელი მოენთებოდა, ქალებიც მოვიდოდნენ, საღამღინაც შეიძლებოდა  
მათი მისვლა. სანთლის მონთება რომ მოთავდებოდა, ხნიერი კაცება  
ხნიერ ქალებს ასტაცებდნენ თავჩითებს (თავზე მოსახვევებს) და იღებ-  
დნენ თავჩითების სახსარს. როგორც ბერაკათ წესია, მერე მიჰქონდათ  
ერთ ოჯახში და იმართებოდა ისეთივე ამბავი, როგორც აიწერა ცაბა-  
ურთაში. ბერაკაობა ძალიან სასიხარულო დღეობა იყო ახალგაზრდო-  
ბისათვის.

### ახმსება

ახსევბას დილით დასტურ-ხევისბერები ყველანი ხატში მოიყრიდ-  
ნენ თავს და თავისი მოვალეობის შესრულებას შეუდგებოდნენ. პირ-  
ველად მოიყვანდნენ სასოფლო საკლავს და დარბაზის სანათლავად დაკ-  
ლავდნენ. დარბაზის სანათლავი ნიშანი იყო მარხვის გახსნილებისა. სა-

კლავის სისხლით დაინათლებოდა დარბაზი და მისი მიდამო. ხორცი მოიხარშებოდა, ხალხი და დასტურ-ხევისბრები ყველანი აქ იყვნენ. სუფრას გამართავდნენ და შენდობის თქმის შემდეგ ყველანი დასხდებოდნენ. ხორცს და პურს ხელზე ჩამოურიგებდნენ. აქ ხალხის მიერ მოტანილი პური, საწირავები და ქადის წილობები იყო. ახალი წესი არათფერი სრულდებოდა. დღეობა დილიდან საღამომდე გრძელდებოდა. საღამო-ხანზე დროშასაც ჩამოხსნიდნენ. რაც ნაქათრი დარჩებოდა, დასტურ-ხევისბრები გაიყოფდნენ, გამოილოცავდნენ და წამოვიდოდნენ თავთავის სახლებში.

#### ა მ ა ლ ლ ე ბ ა

აღდგომის შემდეგ იყო დღეობა ამალლება. ამალლების დღეობაც ისეთივე იყო ყველა წესებით. როგორც აღდგომა. იცოდნენ ერთი დღე. ამ დღეობაში უფრო მოდიოდა ქადა-საწირავი, ზღვრობა ბევრმა არ იცოდა, სასოფლო საკლავი კი, როგორც სხვა დღეობებში, ამალლებასაც ისე იკვლოდა.

#### ა მ ი რ ი ს ჯ ვ რ ო ბ ა

ამალლების სწორზე მოდიოდა კვირისჯვრობა. კვირისჯვრობას ხატში ბევრი ხალხი მოდიოდა. ცაბაურთ გარდა ყმანი ყველა სოფლებიდან მოდიოდნენ — ჩარგლიდან, მიგრიაულთიდან, აფშოდან და ბეტისჩილიდან. ყველას მოჰქონდა ქადა-საწირავი. ამ დღეს დროშაც გამოდიოდა, იკვლოდა ცხრა საკლავი. საკლავები განაწილებული იყო სოფლებზე და რამდენიც ვის ხვდებოდა, იმდენი მოჰყავდათ. მაგალითად, აფშო და ბეტისჩილი მოიყვანდა სამ საკლავს, მიგრიაულთა — სამს და სამი საკლავი ცაბაურთისა იყო. საკლავები უნდა ყოფილიყო საუკეთესო, არჩეული. ამ დღეს იცოდნენ სამხთო, ხსენდებოდნენ ფშავის ხთიშვილნი და ზოგიერთი ხევსურეთის ხატებიც. სანთელიც ყველა ხთიშვილთან ენთებოდა და სადიდებელზედაც ახსენებდნენ ჯერ ღმერთს და კვირას, მერე ყველა ხთიშვილთ. ამ საკლავების ხორცი მოიხარშებოდა და გაიმართებოდა სუფრა. სუფრას შენდობას ეტყოდნენ ჭეულებრივი წესით. ქალებსაც სუფრას გაუშლიდნენ და კაცებსაც. ამ დღეს ხორცს ხელზე არ არიგებდნენ, რადგან წესად არ ჰქონდათ ხელზე დარიგება სამხთოში. ერთ-ერთი საკლავი დროშათ სანათლავად დაიკვლოდა და დროშას სისხლს უწევდნენ. ამ დღეს მხიარულობით და სმა-ჭამით დააღამებდნენ, საღამოზე ყველანი წავეიდ-წამოვიდოდნენ, დასტურ-ხევისბრებიც გამოილოცავდნენ.



მკათათვეში, ორ რიცხვში მოვიდოდა დღეობა მთაწმიდობა. ამ თვეში ფშავ-ხევსურეთის სალოცავეებში ყველგან იცოდნენ დიდი დღეობები, მხოლოდ სხვადასხვა რიცხვებში. ფშავში ერთიმეორეზე მიყოლებით, ორი სამი კვირის განმავლობაში ხალხი სულ ხატებში იყო: ერთი ხატიდან მეორეში მიდიოდნენ, მეორედან მესამეში და ა. შ. მთავარანგელოზში მკათათვის დღეობას მთაწმიდობას ეძახოდნენ — სანამ დღეობა დაიწყებოდა, მეკულუხე მიდიოდა. თავხევისბერი მეკულუხეს. დროშით გაუძღვებოდა, გაჰყვებოდა დასტური და ზოგი სხვა ხალხი სოფლებიდან. ამბობენ, რომ ძველად სამოცი ცხენის საპალნე ღვინო (ყულუხი) მოჰქონდათო, მერე ცამეტ საპალნეზე რომ ჩამოვიდა, ეს კი ახსოვს ამის ჩამწერინებ ლევანს.

როგორც აწვევრეთ იახსარის და კობალას მეკულუხე, აქაც ამ სახით წავიდოდნენ. მეორე დღეს ახმეტაში მივიდოდნენ (აქ მათ სამი ვენახი ჰქონდათ და დიდძალ ღვინოს აზადებდნენ. ვენახები ორი მთავარანგელოზისა იყო, ერთი კი ზდიშობლისა, სამივე მაინც ერთი იყო, რადგან მთავარანგელოზის საქმეს ემსახურებოდა. ხთიშობელი, ე. ი. ადგილისდედაც, მთავარანგელოზს ემორჩილებოდა. ის იყო მეორეხარისხოვანი სალოცავი. პირველი კი მთავარანგელოზი იყო). ახმეტაში ერთ-ერთი ვენახი იყო მთავარი, სადაც მარანი და დროშის საბძანისი იყო. მეკულუხე აქ მივიდოდა, საკლავს დაკლავდნენ, სანთელს აანთებდნენ და საუკეთესო ღვინის ნათავარს ამოიღებდნენ ზედაშედ. ერთი ცხენის საპალნე ზედაშეს დაამზადებდნენ და მერე თვითონაც დაღვედნენ ღვინოს.

ვისაც მთაში წამოსვლის საშუალება არ ჰქონდა, ან ყმა იყო მთავარანგელოზისა ბარში გადასული, ან ქალ-დისწული, ისინი აქ მოდიოდნენ ზღვნით. კარგა ბლომად საკლავები დაიკვლოდა პირველსავე დღეს, როცა მეკულუხე მოვიდოდა. მეორე დილით კი ადრე წამოვიდოდნენ უკან და დრო საკლავების დაკვლისა აღარ ჰქონდათ. როგორც სხვა საკლავების მეკულუხის წესი ვიცით, ყველაფერი ისე შესრულდებოდა და მოვიდოდნენ ცაბაურთას ცხრამეტში. აქ დღეობა უკვე დაწყებული იყო ბელისკარს და ლუნხევს. ხევისბერი მგზავრ დროშას დააბრძანებდა სალაშქრო და ხთიშობლის დროშებთან ერთად. სანთლის ანთება და სხვა ჩვეულებრივი დღეობის წესები სრულდებოდა. მეორე დღეს დილით, თუ ვინმეს წასვლა ეჩქარებოდა, იზღვნობდნენ, დანარჩენები ემზადებოდნენ მთაწმიდას წასასვლელად.

წამოსადილების შემდეგ ხევისბერი მივიდოდა საზარესთან და ზარს დარეკდა. მლოცავეები ფეხზე ადგებოდნენ, პირსაზარისაკენ დადგებოდნენ, იწერდნენ პირჯვარს და ევედრებოდნენ მთავარანგელოზს

— შეიწიროს მათი მოსვლა და ზღვენი, წყალობით იყოს მათზედა: ზარის რეკას რომ დაამთავრებდა. ხევისბერი, მგზავრ დროშას ააბრძანებდა და დაამწალობნებდა მლოცავთ და ყმათ: „გწყალობდესთ მთავარ ანგელოზი ყმათა და ყმათაში დღეს თავის კარის მლოცავთა. შეიწიროს დალოცვილმა თქვენი მოსვლა და მოყვანილი სამსახური, მთავარანგელოზის სადიდებულო და თქვენი თვალჯალაფობის სამწყალობნო. მრავალი თავისი კარის დღეობა გალოცვინოსთ დალოცვილმა მშვიდობით და კარგად ყოფნით. სასინანულოდ ნურა გაგიკადოსთ, სასიხარულოდ გაგიკადოსთ მისი ქსენება და დიდება“. „თქვენიცამც მწყალობელია“ — იტყოდნენ ყველანი. ხევისბერი დროშას მარცხენა მხრისაკენ ასწევდა, თავზე გადმოატარებდა, მარჯვენა ხარეზე დაიდებდა და გაემართებოდა მთაწმიდისაკენ. თან გაჰყვებოდნენ დასტურ-ხევისბრები და სხვა მლოცავები. მთაწმიდამდე კარგა დიდი აღმართია და ორ-სამ ადგილას იყო დანიშნული ადგილები დროშის დასაბძანებლად. დაისვენებდნენ, ცოტა სასმელს დალევდნენ და ყველა დასვენებაზე მოკლე სიტყვებით აღიღებდნენ მთავარანგელოზს. მთაწმიდაზე ღვინით სავსე სამ ვერცხლის თასს დადგამდნენ და სანთელს აანთებდნენ. ხევისბერი ზედაშით მთავარანგელოზს აღიღებდა და დაამწყალობნებდა ყმათ და მთავარანგელოზის სალოცავად იმის წმიდა მთაზე მომსვლელთ. ყმანი მუხლმოყრით იწერდნენ პირჯვარს და სთხოვდნენ მთავარანგელოზს, რომ აპატიოს ხორციელის ფეხით მისი წმინდა ადგილის დალახვა და შეიწიროს მათ მიერ მოყვანილი სამსახური.

დამწყალობნება რომ მოთავდებოდა, მლოცავნი ფეხზე ადგებოდნენ. აქ პირველად სასოფლო საკლავი დაიკვლებოდა, და მერე მოჰყვებოდა სხვა ზღვენების დახოცა, სუფრები „არ უწესობდა“, მარტო სასოფლო საკლავის ხორცს მოხარშავდნენ და დასტურ-ხევისბრების გარდა სხვებსაც დაურიგებდნენ ხელზე. საკლავების თითო მხარი ხატის მსახურთ ეძლეოდათ, დანარჩენი პატრონისა იყო. საკლავს გულად გაატყავებდნენ, ხორცს ასჭრიდნენ და ჩააწყობდნენ ათვისავე ტყეში. მღერათამაშობა აქაც იყო მხოლოდ ერთ დღეს. სასმელი ხალხს თავთავისი ჰქონდა: ღვინო, უფრო კი არაყი. სახატო ლუდი და ღვინოც მოჰქონდათ დასტურებს და უმასპინძლებოდნენ ხალხს. საღამო-დროს ჰევისბერი ზარს დარეკდა, მლოცავი წამოიშლებოდა, პირჯვარს დაიწერდნენ და მოემზადებოდნენ წამოსაველად. ხევისბერი სანთელს აანთებდა, ღვინით სავსე ვერცხლის თასს დადგამდნენ და სანთელსაც იმასთან დააკრავდნენ. იგი კიდევ აღიღებდა მთავარანგელოზს, დაამწყალობნებდა ყმათ, ააბძანებდა დროშას და გაუძღვებოდა მლოცავს. ჩამოვიდოდნენ ღუნხევს, აქ იყო მლოცავი და ზოგიერთი დასტურ-ხევისბრებიც. დროშას გაეგებებოდნენ პირჯვარის წერით და მადლის თხოვ-

ნით. ხევისბერი დროშას მიაბძანებდა და ხალხს დაამწყალობებდა: „წყალობა მოგიტანეთ მთავარანგელოზისა, წყალობა! წყალობით იყოს თქვენზედა ჩვენი სალოცავი და დაგასწვრასთ მრავალს ამ დღესასწაულსა თქვენის თავჯალაფობითა. სასინანულოდ ნურა გაგიჯადოსთ, მისი კარის ლოცვა სასიხარულოდ გაგიჯადოსთ დალოცვილმა“. „თქვენიცამც მწყალობელი“ — იტყოდნენ ყმანი და მლოცავნი. მოსულები ცოტახანს დაისვენებდნენ, ბინებს დაიდებდნენ და ყველა შეუდგებოდა სუფრის სამზადისს. აქ ვისაც საკლავი ჰყავდა მოყვანილი, ისიც დაკლავდა და ამზადებდა სუფრას. უმრავლესობას სუფრა ჰქონდა შეთქმული. მთავარანგელოზის ყმებში ამ წელს ვისაც ვაჟი ეყოლებოდა, უფრო ამ დღეობაში მოჰყავდათ ხატში გასაყვანად, რადგან სიბორო იყო. წულის პატრონი იმის „გასამყვანლოს“ მოიყვანდა ერთ ხარს და ერთ ცხვარს. ორივეს ერთად წააყენებდნენ სასაკლაოზე და ერთი ხევისბერი წულს დაიჭერდა ხელში, თავხევისბერი კი შეუდგებოდა დიდებათ: „დიდება შენდა, ღმერთო, ცისა და ქვეყნის დამაარსებლო, დიდება შენდა, კვირავ ხთის მალღის მოკარვეო, დიდება და გამარჯვება შენდა, ჩვენო სალოცავო მთავარო ანგელოზო. შენ გვედრებით და გეხვეწებით, ხეწნა-მუდარაზე ნუ გავვიწყრები ნუ გავვირისხდები, გახვეწებთ და გვედრებთ დღეს წულსა, შენს ყმასა, შენთ ყმათად შამამატებულსა და წულის პატრონსა და შენს კარზე სამსახურის მომყვანსა. შენთვის სამსახური და რიგი არ დაუყრავ; მთავარო ანგელოზო, და შენს წყალობას ნუ დაიშურებ, გაზარდე შენი ახალი შამამატებული ყმა შენის სახელის მადლსა, გამოიყვანე ბედიანი და დავლათიანი, შენთ ზღვენთა და დიდებათ მოემატება, დიდებულო მთავარანგელოზო, წულის პატრონსა სიხარულად გაუჟადე, სასინანულოდ ნუ გაუჟდი შენს კარზე წულის მოყვანას სამსახურითა, აგრემც იდიდები შენის გამჩენის ხთისაგან. კაცს უმატე კაცრიელობასა, წულსა, წულის აკვანსა და კვლავ უკეთესის გულით იმსახურე...“

დაწარჩენი დიდება ისეთი იყო, როგორიც იახსარში. დიდებათ შემდეგ თავხევისბერი წულს აიყვანდა, სამჯერ მალღა ასწედა და იტყოდა: „დალოცვილო ჩვენო სალოცავო, ახალ შემომატებული შენთვის ყმად მოუბარებია, იყმე და მიიბარე, შენის ძალით შეინახე და დაიფარე მავნე მაცილისაგანა და ავადობისაგან, გაზარდე და ღირსიული ყმა გამაიყვანე შენის სახელის სადიდებლად. მაგის გაზრითა და დაკაცებით შენთ ზღვენთა და ულუფათ მოემატება, დიდება სახელსა შენსა“.

ამის შემდეგ მშობელს გადასცემდა წულს და მიულოცავდა: „გაზარდოსთ ღმერთმა და ჩვენმა სალოცავმა ახალშემომატებული და კვლავად კიდევ წულით მოგიყვანოსთ ჩვენმა დიდმა მთავარანგელოზ-

მა“. ხარს წააქცევდნენ და დაკლავდნენ, ცხვარსაც დაკლავდნენ და იმის სისხლს გულზე უწევდნენ ყმაწვილს. მერე წაიყვანდნენ და გადასცემდნენ ღელას, მიულოცავდნენ როგორც დასტური, ისე სხვა იქ დამსწრენი. საკლავებს გაატყავებდნენ. ბეჭებს ხატის მსახურთ მისცემდნენ. თავებსაც და ტყავების სახსარსაც, თითო აბაზ ვერცხლს, ხატში მისცემდნენ. ცხვარს მოხარშავდნენ და სუფრას გააკეთებდნენ. სუფრა ილოცებოდა ამ წულის მოსახელისათვის (მოსახელე როგორც ხევსურეთში, ისევე ფშავშიც იცოდნენ. ან მკითხავი ეტყოდა, ან სიზმარში ნახავდნენ და თავისი მახლობელი მიცვალებულის სახელს დაარქმევდნენ. შეიძლება შორეულიც ყოფილიყო, უნათესაოც, თუ ის სიცოცხლეში თვალსაჩინო კაცი იყო. ბავშვი რომ ტირილს დაიწყებდა ან ავად გახდებოდა, მაშინ მკითხავს მოიყვანდნენ და მიცვალებულის პირით ის გადასცემდა: მე ვუზივარ აკვანს და ჩემი სახელი „მოაქვივნეთო“. შეიძლება ბავშვი არ დაწყენარებულიყო, მაშინ კიდევ გამოუცვლიდნენ სახელს. სწორედ ასეთი მესახელისათვის ხშირ შემთხვევაში ილოცებოდა სუფრა). ამ სუფრაზე ბევრი რამ იცოდნენ — ხილი, თხილი, კაკალი, მოხარშული კვერცხები, ხავიწიანი ქადის ნაჭრები და სხვა. დანარჩენი წესი ამ სუფრაზეც ჩვეულებრივი იყო. სხვა მეზღვენეებიც ხორცს მოხარშავდნენ და გაიმართებოდა სუფრებზე გადააბატონება და ქეიფი.

დასტური დადგამდა დიდ ვერცხლის თასს საყეინოს, მოიტანდა ნათვრად წამოდებულ ღვინიან ტიქს და ამასაც გვერდზე მიუდებდა. აავსებდა საყეინო თასს ზედაშით, სანთელსაც აანთებდა და დააკრავდა თასზე. ხვეისბერი პირჯვარისწერით მივიდოდა დროშასთან, მუხლს მოიყრიდა და დროშის ტარს ემთხვეოდა. მერე დროშას ააბძანებდა, მარჯვნიდან მარცხნისაკენ დახრით დაიქერდა და ზარის წკრიალით მოვიდოდა საყეინოსთან (ეს მგზავრი დროშა იყო), დროშის ტარს მარჯვენა ფეხზე დაიდგამდა და შეუდგებოდა დიდებათ: აღიდებდა, ღმერთს, კვირას და თავის სალოცავ მთავარანგელოზს. როგორც ვიცით, იმავე წესით დაამწყალობნებდა ყმათ, პირველი თვითონ ჩავიდოდა საყეინოში და მერე დაიწყებდნენ სხვებიც. საყეინოში ჩასვლის წესები ყველაფერი აწერილი გვაქვს უძილაურთაში და შუათხზოში. აქ დროშა საყეინოსთან იყო, ვიდრე არ მოთავდებოდა მისი წესი.

შემდეგ ხვეისბერი დროშას თავის ადგილზე მიაბძანებდა. ფულსაც დასთვლიდნენ და მეგანძურ ხვეისბერს ჩააბარებდნენ. ის განძთან და სხვა ფულთან ერთად შეინახავდა და საჭიროების დროს გამოიყენებდნენ. ხვეისბერი სანთელს მოანთებდა, ზარს დარეკდა და კიდევ დაამწყალობნებდა ყმათა და მლოცავთ.

ცაბაურთაში ღუნხევს დიდი ღლეობა იცოდნენ, მღერა-თამაშობა და სუფრებზე ერთიმეორის პატიჟი. ამ ღამეს ყველა მლოცავი აქ

გათენებდა, მიდი-მოდოდნენ ერთიმეორის ბინებზე და ატარებდნენ დროს. ღამით ფშავლური წაწლობაც ხდებოდა მლოცავეებს შორის. ასეთი ამბებით გაათევდნენ და მეორე დილას კიდევ იწყებოდა გვიან მოყვანილი საკლავების დაკვლა და დღეობის ყველა წესების შესრულებით ღვინი და მხიარულება. თუ შენიშნეს ქალ-ვაჟი წაწლობაში, ან ქუდს მოხდიდნენ, უფრო ჩიქილას ქალებს და აჯარიმებდნენ ერთი ბოთლი არაყით. იყო ამაზე სიცილი, ხუმრობა, ხან „სასამართლოს“ დაუნიშნავდნენ და სხვა.

ხევისბერი ამ დღესაც სანთელს მოანთებდა, ზარს დარეკდა და ამწყალობებდა მთავარანგელოზის ყმათ და დღეს ძმის კარის მლოცავთ. ამ ამბით გაივლიდა ეს დღეც და საღამო ხანზე თანდათანობით დაიშლებოდა ხალხი. მოსთხოვდნენ მადლს წამსვლელები: „დალოცვილო ჩვენო სალოცაო მთავარო ანგელოზო, ნუ რაით გაგვირისხდება, თუ რამეს ჩვენის ხორციელობით გცოდავთ, გვაპატიე და შენი ხსენება დიდება სასიხარულოდ გაგვიკადე; სასინანულოდ ნუ გაგვიკადი“ ამ სიტყვებით მუხლს მოიყრიდნენ და მიწას აკოცებდნენ. ადგებოდნენ და ხატის მსახურთ ეტყოდნენ: „მშვიდობით იყენით, მშვიდობითა ხატიცა და კაცებიც, ყველამ გვაპატიეთ, თუ რამე უცოდრობით გაწყენინეთ და ცუდს გულს და თვალს ნუ გამოგვაყოლებთ“. „მშვიდობით წადით, მშვიდობითა, წადმა დაგყვეს ჩვენი სალოცავი და მოწოდმართე ანგელოზი გამოგაყოლოსთ“. — უპასუხებდნენ ისინი. ხატის მსახურნიც გაიყოფდნენ ნაქათარს თანასწორად. მედროშავე დროშას დარბაზში შეაბძანებდა და ჩამოხსნიდა. მეგანძური განძს წაიღებდა თავის დანიშნულ ადგილას და წავიდოდნენ სახლებში.

კულუხის აღწერაში აღინიშნა, რომ მთავარანგელოზს სამი ვენახი ჰქონდა. სხვა ხატების ხევისბრები ამბობდნენ, რომ ფშავ-ხევსურეთის სალოცავეებს ვენახები მიცემული ჰქონდა ბახტრიონის აღების დროს, რომელი სალოცავის დროშაც იქ იყო. მაშინ მეფეს უთქვამს ფშაველ-ხევსურთათვის — ამ გამარჯვებისათვის მინდა ყველა დაგასაჩუქროთ და თვითონ თქვით, ვის რა გინდათო. თუშებმა ალვანი მოითხოვეს და მეფემ უბოძა, ფშავ-ხევსურებმა უთხრეს: „ჩვენ მთის ხალხი ვართ, აქ ვერ ვიცხოვრებთ. მხოლოდ ჩვენს სალოცავეებს ახმეტაში თითო ვენახი შემოსწირეთო“. მეფემ ამათი სურვილიც დააკმაყოფილა და ყველა იმ სალოცავეებს შესწირა თითო ვენახი, რომელთა დროშები ამ გამარჯვების მონაწილენი იყვნენ. ცაბაურთის მთავარანგელოზის ხევისბერმა ლევან თათარაშვილმა თავის წინაპართა გადმოცემა სხვანაირად ჩამოაწერინა. მან თქვა: მთავარანგელოზს ერთი ვენახი მაშინდელი ჰქონდა, ორი ვენახი კი ტყვეობის დროინდელიაო. საქართველოს რომ დაღისტანი ეცემოდა და ტყვეები მიუდიოდნენ, მაშინ ტყვის დასახსნელად სამოცი ვერცხლი იყო საჭირო. ტყვის პატ-

რონი ამდენ ვერცხლს ვერ შოულობდა და მომართავდა ფშავში ქონებით შეძლებულ (მდიდარ) ხატებს. ხატის ყმათ და მსახურთ სთხოვდა დახმარებას და აღუთქვამდა შესაწირავად რამდენიმე დღიურ ვენახს. იმ დროს აქ ხატებში ქონება იყო. მისცემდნენ სამოც ვერცხლს, ის ტყვეს დაიხსნიდა და ვენახი სახატოდ რჩებოდა. ლევანმა თქვა: ჩვენი სალოცავის ორი ვენახი ასეთი ვერცხლის მიცემით არის შექმნილიო.

## ს ა ყ ე ი ნ ო

სიტყვა საყეინო, ან თასი და შიგ ფულის ჩაყრა საიდან წარმოიშვა, ვისაც ვკითხე, სხვადასხვანაირად ხსნიან. ერთნი ამბობენ: საქართველოში ყეინობის დროს დაიდგმოდა საყეინო, რაც ფული შემოვიდოდა — ყეინს მიართმევდნენ და ამ თასს საყეინო იმიტომ დაერქვაო. მეორენი ამბობენ: საქართველოში როცა ყეინი იყო, აქ რაც ქონება გროვდებოდა, სულ იმას მიჰქონდა და ივსებდა ოქრო-ვერცხლით. ხალხი მას ემონებოდაო. იმის მსგავსად ყეინობის შემდეგ ქართველები მორთავდნენ ერთ კაცს ყეინად. ყეინობა დღეობა იყო დანიშნული, ყეინი იყო მდიდრულად მორთული, მას ხალხი დაჰყვებოდა; რომელ სოფელშიც მივიდოდნენ, ასეთ თასს დასდგამდნენ და რაც ფული შემოვიდოდა, ყეინობის წარმომდგენი ხალხი იყენებდა ამ დღეობაში დროს გასატარებლად (ე. ი. წარმოდგენას მართავდნენ ყეინობის დროინდელსო).

ლევან თათარაშვილმა საყეინოს ამბები სულ სხვანაირად ჩამაწერინა. მან თქვა: როცა თათრებმა საქართველო ააოხრეს, მაშინ ყეინობა დაიწყო იორზე ბოქორმის მარჯვეს. იმ ადგილს, სადაც ის ყეინი სადილობდა, ახლაც სასადილო ჰქვიათ. პირველ შემოსვლაზე ბარის სოფლები მოაოხრა და მთაში ვერ შემოვიდა, მთიელები ყველა ამაგრებდა თავ-თავის ადგილს, ყარაულობდნენ მთის გადასასვლელებსაც და ჭალისგზებსაც. იყო ერთი სახელოვანი კაცი ლუხუმში. ის ცხოვრობდა აფხუშოში და ძალიან იცავდა ჩარგალს და საერთოდ ფშავს მტრებისაგან. თათრები ბევრი ეცადნენ, მაგრამ ვერ შემოვიდნენ ამ ვიწრო ხეობაში. ბოლოს ცხენებს ნალები უკულმა დააკრეს (უკულმა დაჰედეს) და ისე გამოიპარნენ ღამით ჩარგლის მთაზე. ყარაულებმა ცხენის კვალი ნახეს და მოსულებად კი არა, აქედან წასულებად ჩასთვალეს. თათრები იმ დღეს ტყეში დაიმაღნენ და ღამით აფხუშოს დაეცნენ. ზოგი დახოცეს და ზოგი ტყვედ წაიყვანეს. ლუხუმის ორი ვაჟიც ტყვედ მოჰყვა — ლაჭური და ივანე. მოიარეს ფშავში სხვა სოფლებიც და მოაოხრეს. ლუხუმის უმცროსი ვაჟი ლაჭური მაშინ ხუთმეტრი წლისა იყო, როცა ტყვედ წაიყვანეს. შესახედავად მეტისმეტად კარგი და ყოჩალი ახალგაზრდა თათრის ყეინს ძალიან მოეწონა და

„შვილა, რადგან თვითონ უშვილო იყო. ლაქაურიც ისე იქცეოდა, რომ ყეინთან დიდი ნდობა დაიმსახურა. თვრამეტი წლისა რომ გახდა, ყეინი სადავლოდ ჯარით გზავნიდა მას და სარდლობას ავალებდა. ისიც უსრულებდა სამსახურს. ყეინმა კიდევ მოინდომა ფშავ-ხევსურეთის დაბეგვრა, წამოვიდა ჯარითა და თავისი ერთგული ფშავლებიც თან წამოიყვანა: ლაქაური, ივანე და სხვები. ამოვიდნენ ფშავში და ნადავლით დაბრუნდნენ უკან. ლაქაურმა ველარ მოითმინა, რომ თავის სამშობლოს თვითონვე ანადგურებინებდნენ, თან ხალხიც ეცოდებოდა მტრისაგან გათელილი და გადაწყვიტა — რადაც არ უნდა დამიჯდეს, სამშობლო უნდა ვიხსნა თათრებისაგანაო. მივიდა ყეინთან და სთხოვა: „სამი კაცი მომეცი. წავალ, სადაც ვერ მივსწვდით და დავლა ვერ ავიღეთ, ამ სოფლებს მოვივლით და ნადავლით დავბრუნდებით“. ყეინს ექვი არ შეჰპარვია და უთხრა: „რომლებიც გინდა წაიყვანე, მხოლოდ ძალიან ნუ დავგიანდებო. ლაქაურმა წაიყვანა თავისი ძმა ივანე, ერთი ხევსური და ერთი მთიული, ესენი ყველანი ტყვეები იყვნენ. მხოლოდ მის თვალში ნდობა ჰქონდათ დამსახურებული. ასე წამოვიდნენ სადავლოდ. იორზე, საყარაულოში რომ მივიდნენ, გადაწყვიტეს — ერთი წასულიყო ივრის ხეობაზე, მეორე ალაზანზე, მესამე ფშავ-ხევსურეთის არაგვზე და მეოთხე მთიულეთში, და მოეგროვებინათ ჯარი, დანიშნეს დღე, როცა ჩარგლის კართ უნდა მოეყარათ თავი თავისი ლაშქრით. ფშავ-ხევსურეთში წამოსვლა ლაქაურს ერგო, მთიულეთში მთიული წავიდა, იორზე ხევსური და ალაზანზე ივანე. პირველად ხალხი ლაქაურს ცუდად შეხვდა და არ ენდობოდნენ, მერე ფიცით დაუმტყიცა, რომ დასახსნელად არის მოსული და ხალხიც გამოჰყვა.

დანიშნულ დღეს ჩარგლისკართ მოიყარეს თავი და მოიყვანეს სამასი მეომარი. აქ ლაქაურმა მთიელებს თავისი სურვილი გამოუცხადა. დაიფიცეს ერთგულებაზე და თავის დადება გადაწყვიტეს სამშობლოს განთავისუფლებისათვის. წავიდნენ ლაქაურის წინამძღოლობით. დღე მიდიოდნენ, დამით ტყეში იყვნენ დამალულნი. მიუახლოვდნენ სოფელ სასადილოს, ლაქაურმა მთიელთა ლაშქარი ტყეში დამალა და თვითონ წავიდა ყეინთან. ლაშქარს უთხრა ყეინს მივესალმები და მივულოცავ, თუ შეიარაღებულები არიან, წითელ ალამს გაჩვენებთ და თუ შეიარაღებულები არა, მაშინ თეთრ ალამსო. თუ იარაღდაყრილები არიან და იმისი ნიშანი მოგეცით, მოულოდნელად თავს დაგვესხით, შეც იქ ვიქნები და გავანადგუროთ მტერიო. წავიდა ლაქაური, მივიდა ყეინთან, მიესალმა და მიულოცა ვითომც თავისი გამარჯვება. უთხრა: დავლით და ტყვეებით სავსე მოვდივარო. ყეინმა დაუმაღლა და მისი შგზავრობის ამბის გამოკითხვა დაუწყო. ლაქაურმა საუბარი განგებ გააჰკიანურა. ამ დროს გარედან ყიჟინა შემოსიმა, ყეინი შეკრთა და იკითხა, რა ამბავი მოხდაო? ვითომც ამბის გასაგებად ლაქაური გარეთ

გავარდა, იმიშვლა ხმალი და მთიელთა ლაშქარს შეუერთდა. ყეინის ხალხი უცბად შეკრთა და აირია. მთიელები ეცნენ და ამოხოცეს თათრის ჯარი. ვინც გადაარჩა, თავს უშველეს და გაიქცნენ. ამ დროს ყეინი კარავში შეიმალა. ლაჭაური რაკი მისი ნაშვილობი იყო, თავისი ხელით მოკვლა არ უნდოდა და თავისი ძმა ივანე შეგზავნა, უთხრა: წელსზეთ მაგას სუ რკინის იარაღი ასხია, ხმალი არ გასკრის, ხმალი წელს ქვევით შემოჰკარო. ივანე ალბათ შეკრთა და დაავიწყდა დავალება. შესულმა ხმლითა სცა თავში, ყეინს მუზარადი ეხურა და ივანეს ხმალი გაუტყდა. ლაჭაურმა ეს შენიშნა და მაშინ შეეკრდა კარავში, ყეინს წელზე შემოჰკრა ხმალი და შუაზე გადასკრა. თათრები გაანადგურეს და გაანთავისუფლეს სოფლები მათი ბატონობისგან. აქ თათრებს ბევრი დავლა ჰქონდათ — ოქრო და ვერცხლი. ეს დავლა მთიელებმა ერთგან მოაგროვეს. ლაჭაურმა უთხრა: ძმურად გავიყოთ ნადავლიო. ხალხმა უპასუხა: ეს გამარჯვება და მტრის განადგურება თქვენგან არის და ეს დავლა თქვენი იყოსო. ივანემ და ლაჭაურმა ბევრი იბრძოლეს, რომ დავლა გაეყოთ, მაგრამ ხალხმა მაინც არ აიღო. ბოლოს ლაჭაურმა წამოიღო და ფშავ-ხევსურეთის სალოცავებს შესწირა. აფხუშოში თავის სალოცავ წმიდა გიორგის შესწირა ყეინის მუზარადი და საყეინოდ ის იხმარებოდა. ლაშარის ჯვარს შესწირა ბევრი რამ, მაგრამ მაინც ვაწყრა — მე მოლაშქრე ვარ და მუზარადი მე შეკუთვნოდაო. ლაშარის ჯვარმა ეს მუზარადი მიატანინა, მაგრამ ლაჭაურს ბედში წილი მაინც აღარ ჩაუდვა, იგი უშვილო დარჩა და ისე მოკვდა. იმის ძმას ივანეს კი ჰყავდა ვაჟიშვილი და იმის მოღვენილობისანი არიან ხუხუნაშვილები.

აქაური ნადავლის ნაწილი ყველა ხატებს შესწირა, მაგრამ გამოორჩა კოტიას წმიდა გიორგი. ლაჭაური ვახდა ავად და კინაღამ მოკვდა. მერე გამოუვიდა მიზეზი; წმინდა გიორგიმ მკითხავის სირით ბრძანა: „მე სხვა ხტიშვილთან ერთად გეხმარებოდით თათრებთან ომში, ნადავლში წილი არ დამიდევითო“. ადგა ლაჭაური და თვრამეტი ვერცხლის თასი შესწირა. ცაბაურთაში თავის მთავარანგელოზს შესწირა შვიდი საყეინო. საყეინოები იყო ბაკნის ოდენი ვერცხლის თასები. ნელობამდინ იყო ეს საყეინოები, ბოლოს მოიპარეს ჩიტოთ სუსლიკამ. ცქიტათ თირილამ და თირილას ცოლმა. გამოუჩნდათ თასების მოპარვა და აზღვევინეს. მხოლოდ საყეინოები ველარ მოიტანეს, რადგან გაყიდული იყო სადღაც შორს. ეს ქურდები იტყოდნენ: „შვიდი ტომარა წავიღეთ ვერცხლით სავსეო, საყეინოები ისეთი დიდები იყო, რომ დაუჭრელად ტომარაში არ ჩავიდაო. შვიდი საყეინოდან დარჩა მარტო ერთი, რომელიც ყველაზე პატარა იყო. ამ ერთი ქურდისაგან პატარა ლექსი არის მაშინდელი ნათქვამი:



თირილი ვარ ცქიფათი, თას-სურაების ხიფათი,  
დედა გიტირე, დასტურო, ეხლა დაჯე და ხითა სვი.

მთავარანგელოზში ბოლოს რომელი საყეინო თასიც დარჩა, იმაზე ლომისა და ტრედის სახეები იყო გამოყვანილი. ბოლოს ისიც ვილაცამ მოიპარა. ლევანი ამბობს, რომ სახელწოდება საყეინო იმაზე წარმოიშვა, რომ ყეინისათვის წართმული იყო ეს საყეინო თასებიო. ლაშარის ჯვრის პიროფლიანთაში იყენენ ჩარიცხული, აქ ვინც დაიხოცნენ სამშობლოსათვის ბრძოლაში. აგრეთვე ქისტებთან ბრძოლაში დაღუპულნიც ითვლებოდნენ პიროფლიანად და საყეინო მათ შესანდობრად იღებოდა. ლაშარის ჯვრის პიროფლიანად საერთოდ ისინი ითვლებოდნენ, ვინც ლაშარის ჯვრის დროშის წინამძღოლობით სადმე ბრძოლაში იყენენ და იქ დაიხოცნენ. საყეინოს სახელწოდების წარმოშობის შესახებ ლევანის თქმა არასწორად მიმაჩნია. სწორია უფრო, რომ ყეინად მორთავდნენ ერთ კაცს, ხალხი დაჰყვებოდა სოფლებში და რაც შემოსავალი გროვდებოდა, ამით იგივე თანამყოლი ხალხი ქეიფობდა მორთული ყეინი მბრძანებლობდა, როგორც ყოფილი ყეინი და ხალხს ახსენდებოდა თავისი წარსული მწარე დრო ყეინის ხელში. ერთი სიტყვით, წარმოდგენის სახით იმართებოდა ყეინობა და საყეინო თასი დაიდგებოდა შემოსავლისათვის. შემოსული ფულით იგივე ხალხი ატარებდა დროს. უმრავლესობა საყეინოს ასე ხსნის. ლაშარის ჯვარის პიროფლიანთ ქისტებთან ბრძოლიდან იწყებდნენ და ზოგნი თათრებთან ბრძოლაში დაღუპულებსაც პიროფლიანთან სთვლიდნენ.

პირველი პიროფლიანი ლაშარის ჯვარის ხევისბერი იყო გარა თურმანული. ეს კაცი ლაშარის ჯვარის დროშით მუდამ დადიოდა ლაშქრის წინამძღვრად. გარას ორი სხვა ძმა ჰყავდა და სამივენი ძალიან ამაყები იყენენ. ორმა ძმამ ფშავში სხვისი ცოლები შეიყვარეს, წაართვეს და თვითონ მოიყვანეს, გარა კი უცოლო იყო. ერთი ქიჩოელი კაცი იყო თავმომწონე და იმან თქვა: თურმანაულები რომ სხვებს ცოლებს ართმენ, აბა ჩემს ყელდილიანს მოჰკიდონ ხელი და მერე ნახავენ რას ვუზამო. ამ კაცს ცაბაურთიდან ჰყავდა ცოლად ჩიტოთ ქალი. ის ერთხელ მამისახლში წავიდა და ერთი ძალღი გაიყოლა. ცაბაურთის გზა გოგოლაურთ სოფელზე გადიოდა. ქიჩოელი კაცის ნათქვამი თურმანაულებს გაგონილი ჰქონდათ და გადაწყვიტეს იმისათვის ცოლის წართმევა და გარასთვის მოყვანა. ამ ქალმა ცაბაურთისაკენ აიარა, ჩამომავალს გზა შეუკრეს და მოაბრუნეს გარას ცოლად. თავაყრილი ხალხი იყო თურმანაულები და არავის არაფრად ავლებდნენ. იმათ შიშით ველარც ქალმა თქვა გარას ცოლობაზე უარი. ამ ქალის ქმარმა ბევრი იწვალა, მაგრამ თურმანაულებს ვერაფერი დააკლო.

ამ დროს ლაშარის ჯვრის ხევისბრებთან ასაჩივრებდნენ ასეთ სა-  
ჭირობოროტო საკითხებს და ისინი ასამართლებდნენ ხალხს. ჭიჩოელმა  
კაცმა აქ გაასაჩივრა თავისი საქმე, მაგრამ გარა აქ თავხევისბერი  
იყო და იმის შიშით ვინ რა სამართალს მისცემდა. ბოლოს გარამ თვი-  
თონ უთხრა: ახლა ლაშარის ჯვრის ბრძანება არის მითხოში ლაშქრით  
უნდა გადავიდეთ და დავლა წამოვიღოთ. ეგ ჭიჩოელი თუ ვაჟკაცობაზე  
თავსა სდებს, გამოგვეყვას იქ, ლაშქარში თავი ისახელოს და მაგ ქალს  
ისევე დავუბრუნებო. ჭიჩოელმა იქ წასვლაზე უარი თქვა. გარა სალაშ-  
ქროდ მოემზადა, მაგრამ ბევრი ხალხი არ გაჰყვა. გაჰყვნენ მარტო  
გოგოლაურნი. მითხოში ჩავიდნენ, დაეცნენ სოფლებს და დიდძალი  
ცხვარ-ძროხა გამორეკეს, იმდენი, რომ წინა პირი ლაშარს იყო მისუ-  
ლი და ბოლო ხოშარაში გადიოდა. ხალხმა ეს რომ დაინახა, შურით  
აივსნენ და ამბობდნენ: უყურეთ, მაგ ხეყენის მექალბრდეთ რა უქნიათ,  
რამდენი დავლა მოიტანესო. რამდენიმე წლის შემდეგ გარამ კიდევ  
გამოაცხადა ლაშარის ჯვრის ბრძანება — მითხოში უნდა წავიდეთ,  
გამარჯვება ჩვენია და დიდი დავლა დავგრჩებთ. ხალხი მოემზადა და  
გაჰყვა. მითხოში გარა ლაშარის ჯვრის დროშით ჩაუძღვა ლაშქარს,  
მაგრამ ქისტებმა ადრე გაუგეს, გზა შეუკრეს და ბრძოლაში ბევრი  
ხალხი დაიღუპა. ვინც დარჩნენ, იმათ კი წამოიღეს ნადავლი და ლა-  
შარის გორზე გაინაწილეს. იქ დაღუპულთათვის დააწესეს შესანდო-  
ბარი, რომელიც ქორწილშიც იდგმება, საყენოშიც იხსენიებენ და ხან  
სხვა დროსაც მოიგონებენ. „პიროფლიანნი“ ნიშნავს იმას, რომ ბრძო-  
ლაში დაიხოცნენ დაღლილები და ოფლიანები, თავის ხალხისა და  
ლაშარის ჯვრის დროშის გულისათვის. პიროფლიანნი პირველად ესენი  
იყვნენ. ზოგი ამბობს: მითხოს ბრძოლაში შვიდი კაცი გაიფიცა, რომ  
თავი დაედოთ და ნალწი გადაერჩინათ. შვიდივე მოკვდა, ხალხს კი  
გზა გაუხსნეს და ქისტების გარშემორტყმისაგან გაანთავისუფლეს,  
ესენი არიან პიროფლიანნიო.

აქ აიწერა მთაწმილობა და მასთან დაკავშირებული ამბები: საყე-  
ნო, პიროფლიანნი და სხვა. მთაწმილობის შემდეგ მოდიოდა მარიან-  
ლობა.

## მ ა რ ი ა ნ ო ბ ა

მარიანობა ტარდებოდა ისეთივე წესით, როგორითაც სხვა დღე-  
ობები. დასტურნი ამზადებდნენ ლუდს. ხალხი, მეზღვენეც მოდიოდა  
ამ დღეობაში, რადგან გზები ყველგან იყო, სასოფლო საკლავიც იქ-  
ვლოდა და სუფრა კეთდებოდა. მარიანობას დროშა არ გამოდიოდა.

## პიორგოზა

გიორგოზასაც ლუდი, საკლავი, სასოფლო და სხვა წესები ყველა ჩვეულებრივ სრულდებოდა. ახალი წესი არაფერი იყო. ამ დღეობაში დროშა არ გამოდიოდა.

## ქრისტეშობა

ქრისტეშობას ყველა დასტურ-ხევისბრები თავს მოიყრიდნენ დარბაზში (საბეროში აქ ყველა ხევისბერი ვერ შედიოდა), ყველა თავთავის საქმეს აკეთებდა, მაგანძური განძს მოიტანდა და დაალავებდა თავ-თავის ადგილზე, მედროშაე დროშას ააბამდა, გამოაბძანებდა და თავის ადგილზე დააბძანებდა. კოდს გახსნიდნენ, სასოფლო საკლავს დაკლავდნენ და ყველა იმ წესს შეასრულებდნენ, რა წესიც სრულდებოდა სხვა დღეობებში. ხალხი — სოფელი, მეზღენე და ყმანი ყველა მოვიდოდა, მოსულებს ქადა, საწირავი, სანთელი და არაყი მოჰქონდათ, შობას სიცივის გამო ქალები ვერ მოდიოდნენ. მოსული ხალხი სალუდეში ანთებდა ცეცხლს, იქ სვამდნენ ლუდსაც და სასოფლო საკლავის სუფრასაც აქ გამართავდნენ. დღეობა აქ ერთ დღეს იყო, სადამო-ხანზე სოფელი და სხვა ხალხი დაიშლებოდა, დარჩებოდნენ მარტო დასტურ-ხევისბრები. ახალწლამდე დროშაც გარეთ არჩებოდა. ხევისბრებს მოუდიოდა სოფლიდან ზღვენი, ხინკალი, კეცეული, არაყი და სხვა. როგორც შუაფხოში არის აწერილი, აქაც ისეთი წესი სრულდებოდა ახალწლამდინ. აქ ძღვენი მოჰქონდათ სხვადასხვა სოფლებიდანაც მთავარანგელოზების ყმათ. სუფრა ილოცებოდა მომტანის მიცვალებულთათვის. ლუდი და არაყი დასტურ-ხევისბერს თავისიც ჰქონდათ და სოფლიდანაც ყოველდღიურად მოუდიოდათ და შთელი კვირის განმავლობაში ქეიფობდნენ. ლიტანია-დღეს მოვადლოდა ხალხი და დაიწყებოდა წელწადი.

## დღეობები პირაქუში

(ჩამაწერიანა ქრელ გოდერძაულმა, სოფელ ახადში მცხოვრებმა, 60 წლისამ). პირაქუში ხევსურეთშიც არის სოფელ ბაცალიგოში და ფშავეში სოფელ ახადშიც. რაკი ერთი სალოცავი ჰქვიან, ახადში მცხოვრებთ და ბაცალიგლებს ძმობაც ჰქონიათ. ჯერაც ერთიმეორეს ბიძაშვილს ეძახიან. პირაქუში პირველად იყო კაცი. სახელგანთქმული მჭედელი და ამისთან ხთისმლოცავი. ხეთიდან ჰქონია გავლენა დეეკერბთაზედაც.

უკანაშუაგვში მდგარა ერთი თავადი და დევები თურმე ავიწროებდნენ მას. ისინი მდგარან უკანაშუაგვის სოფლის უფრო შეღმა ხევზე, — წყაროსთავს. წყაროსთავი მოხერხებული ადგილია საარსებოდ და აქ დადგომა სდომებია წყაროსთაულს. დევებს არ გაუშვიათ. ამ დროს პირქუში იორზე მდგარა. წასულა ეს თავადი, პირქუშისათვის მშვილდისარი გაუკეთებინებია და ზროიანი ისრები. პირქუში თვითონაც გამოპოლია. იქ, სადაც დევები მდგარან, ახლო ერთი პატარა გორიამაშალოს გორს ეძახიან, მოჰპარებიან მაშალოს გორიდან წყაროსთაული და პირქუში და ისრებით ეს დევები სულ ამოუწყვეტიათ. მას შემდეგ წყაროსთაული წყაროსთავს დამდგარა და ხთიშვილად გადაქცეულა. ახლა ასე ახსენებენ: „თავადო წყაროსთავ წმიდაო გიორგიო, დევდებდებრთ ამომწყვეტო“.

ახადს აქვს ორი ადგილი: ერთი პირიქითს, ივრის კუდებში აონგორი. პირქუში როცა გადაქცეულა ხთიშვილად, სალოცავად პირველად დაარსებულა აონგორს. აქაც ახადელი ხალხი მდგარა, სამოცი კომლი. პირველად აქ ლოცულობდნენ პირქუშს, მერე ახადსაც მოვიდა და დაარსდა. აონგორსაც აქვს სალუდე, დარბასი, საბერო, საჯარე და საზარე: ზოდებურებიც აქ უფრო ბევრი ჰქონდა, დასტურ-ხევისბერებიც ჰყავდა თავისი და დღეობის წესრიგიც ახადს და აონგორს ერთნაირად სრულდებოდა. ახადს ჰქონდა საზარე, სალუდე, საბერო და სადასტურო. საპურე ბელელი აონგორსაც იყო და ახადსაც. ახადს თავისი ხევისბერ-დასტურები ჰყავდა, მხოლოდ ერთიმეორეში ზაფხულობით თავისუფლად მიდი-მოდრიოდნენ. გარჩევა არ ჰქონდა, რომელი ხევისბერიც უნდა ყოფილიყო, იქაური თუ აქაური. ორივენი ერთნაირად ასრულდებდნენ სახატო სამსახურს ორგანვე.

ახადში ზოდებურებს ნადით ხნავდნენ. ასეთ მამულებს ეწოდებოდა: ზოდებურები, სანადოები და ნაყევრალეები. ნადისათვის დასტურები აღუდებდნენ ლუდს. ერთ სასოფლო საკლავს მოიყვანდნენ და დაკლავდნენ. მამულეები დაყოფილი იყო ნაყევრალეზად და ყველა გააბამდა ხარ-გუთანს თავის ნარგენ ნაყევრალეზზე. ვიდრე ხენას დაიწყებდნენ, ხარებს დააყენებდნენ პირადმოსავლეთისაკენ. ხევისბერი მოვიდოდა, დასტურნიც საწლით ლუდს და სანთელს მოიტანდნენ ზოდებურზე. აავსებდნენ თასს, დააკრავდნენ სანთელს, ხევისბერი დაიჭერდა მარცხენა ხელში, დაიწერდა პირჯვარს და იტყოდა: „შენამც იდიდები, დიდებულო ღმერთო, ცათა და ხმელთა გამჩენ-დამდგმელო, შენამც იდიდები, კვირავ ხთის მალის მოკარვეო“. გადიდოს, გაძლიეროს ღმერთმა პირქუშო ყაწიმშვენიერო ზინზილიანო, დევ-დებდებრო ამომწყვეტო. შენი სადიდებულო იყოს. ეს ჭიქა-ბარზიმი, სანთელკელაპტარი და სამწყალობნელო იყოს შენთ ყმათი, შენთ ყმათაში დღეს შენის ზოდებურის ნადში მომსვლელთათვის, ხარისა და კაცის დამალ-

ველთათვის, თავის ვალის პირნათლად მომკდელ-შემსრულებელთათვის. მოსულან შენ ყმანი თავის კარ-გუთნითა, წესი და რიგი არ დაუკლავის და შენ შენს წყალობას ნუ დააკლებ. უშველე, დალოცვილო, ველთაცა და შინაცა, მაგათ კაცსაცა, საქონსაცა, კარსაცა და გუთანსაცა. მაგათ ნაშვრალ-ნამუშევარსაცა, წელი მშვიდობისა დაუყენე და თავის ნაშრომს მადლი და ბარაქა დაუტანე, შენამც იდიდები შენის გამჩენის ხთის კარზედა“. ამ დროს ხალხიც ხევისბერთან იყო მოგროვილი და ქუდ მოხდილნი პირჯვარს იწერდნენ. ხევისბერი დიდებათ რომ გაათევებდა, კიდევ დაამწყალობნებდა: „გწყალობდესთ პირქუშის დავლათი ყმათა. თავის ხარისა და თავის მარჯვენის დამდლავეთა ნაღშია და სახატო საქმეზე თავდადებულთა, წელი მშვიდობიანი და ღალიანი-ბარაქიანი დაგიყენოსთ, მრავალი გაზაფხული და შემოდგომა მშვიდობისა მოგვაროსთ ჩვენმა სალოცავმა პირქუშმა, ნუ შეგანანოსთ გუთნისა და კარის და მარჯვენის დაღალვა, სასიხარულოდ გაგიკადოსთ დალოცვილმა“.

ხალხიც პასუხობდა: „თქვენმც მწყალობელი იყოს“. ხევისბერო თასს გამოსცლიდა და თითოს ყველას დააღვივებდნენ. ყველანი დაილოცებოდნენ და უსურვებდნენ ერთმანეთს მადლიანი და მშვიდობიანი წლის დადგომას. მერე გაეშურებოდნენ და გაირეკავდნენ ხარებს. ხენის დროს მხიარულობა იყო. დამღეროდნენ გუთანზე, დაჰკიოდნენ ხარებს და იყო ერთი კიჟინი. დასტურები თესლს მოიტანდნენ და ლიტრობით გაყოფდნენ. ყველა გაიტანდა თავის ნაყევრალის საკმარ თესლს, თვითონ დათესავდა და დაფარავდა. ხენა რომ გათავდებოდა, ნორციც მზად იყო მოხარშული. ხალხის მიერ მოტანილი საწირავს გრძელი ფიცრის სუფრაზე დააწყობდნენ და ზედ ხორცს დაალაგებდნენ. დადგამდნენ სამ ლუდით სავსე თასს, დააკრავდნენ ზედ სანთელს. ხევისბერი შენდობას იტყოდა: „ღმერთო, შენა ხარ ცისა და ქვეყნის გამჩენი, შენ გააჩინენ კაცნი და ხთიშვილნი, შენდა სადიდებლად, შენ დაარსენ ხთიშვილნი ხთიშვილად და ჩვენ კაცნი თქვედა და ხთიშვილთ სამსახურის შემსრულებლად. შენ იდიდე და იძრიელე შენის გამჩენის ხთისაგანა, კვირავ ხთის მადლის მოკარვეო. შენი გამჩენ ღმერთი შენც გადიდებს, გაძრიელებს, პირქუშო, ყაწიმ-მშვენიერო, ზინზილიანო, დევ-დედაბერთ ამომწყვეტო — შენის გაჩენის ხთის კარზე იდიდე და იძლიერე. სადიდებულთ თქვენი იყოს ეს დადგმული ჭიქა ბარძიმი და დაჰკრეთილნი სეფისკვერნი და სამწყალობნო შენთ ყმათი. მაივსენივნეს ჩვენმა სალოცავმა ჩვენს წინათ ვინც მკადრენი ჰყვანდნენ და აღარა ჰყვან ცოცხალნი. მოივსენივნეს ისინიცა, ვასაც ჰქონდეს დანამადვილისი ჩვენი სალოცავისადა, ჩვენ სახელდობრ ვერ ვიგონებდეთ და ჩვენი სალოცავი კი არ ივიწყებდეს, დანამადლისი ჰქონდეს ან ენითა, ან კელითა, არადა სხვა საქმითა. აგრეთვე მოივ-

სენიენეს ის უპატრონო მკვდრებიცა, რომენთაცა მოშგონებელი არაჰყავ და შანდობის თქმას მოგელოდებოდენ. შანდობა ჰქონდეს იმათ სულებსა და პირქუშის ყმათა და შემოსწრებულ სტუჟრებს სიცოცხლე და დღევრძელობა“. ასეთ შესანდობარს ყველა დაღევდა და დასხდებოდნენ. ხელზე ჩამოურიგებდნენ ხორცის და პურის წილობებს. თან იმართებოდა სმა და ფშაური სიმღერები. ასე მთავრდებოდა ნადი.

ზაფხულის განმავლობაში თავთავის ნაყევრალებს აქცევდნენ ყურადღებას, იცავდნენ პირუტყვისაგან-საერთო ჭირნახულს უვლიდნენ დასტურნი. ყანის ნაპირყურეს, ყამირებსა და სათიბებს დასტურებოთიბავდნენ. შემოდგომაზე ყანები რომ სამკალად მოვიდოდა, ხევისბერი ერთ-ერთ დღეს (უფრო შაბათი დღე იცოდნენ) დანიშნავდა და ხალხში გამოაცხადებდა: ამადაამ დღეს ნადი არის და ყველა მოვიდეს, ნურავინ დააკლდებათ. დანიშნულ დღეს ყველანი მოვიდოდნენ დასტურ-ხევისბრებიანად. ხევისბერი პირველი აიღებდა ნამგალს, გამოსჭირდა ყანას და იტყოდა: „ღმერთო“ და ჩვენო სალოცაო, პირქუშო ყაწიმ-მშვენიერო, თქვენ უშველეთ თქვენ ყმათა, სთველი მშვიდობისა და ღალიან ბარაქიანი დაუყენეთ და მრავალს ნადობას დაასწვრენით ნადში მსჯელნი და ოფლის მღვრელნი. თავის ნაშვრალ ნამუშევარიც მშვიდობას მოაგმარეთ და მადლ-ბარაქა დაუტანეთ“. ყველანი შეუდგებოდნენ მკას და ამავე სიტყვებს გაიმეორებდნენ მკის პირველი დაწყებისას. მერე ჩვეულებრივი წესით გაიხსნებოდა კოდი და მოიტანდნენ ლუდს, თან მკიდნენ, თან იმღერებდნენ და მხიარულობდნენ. დაიკვლოდა ორი საკლავი, ხორცი სრულად აქ მოიხარშებოდა, პური ხალხის მოტანილი იყო. მკის დამთავრების შემდეგ იმართებოდა სუფრა იმავე წესით, რა წესითაც ხვნის ნადშია აწერილი. ძნას ყველანი აავებდნენ წერად, უფრო თავთავის ნაყევრალს მიაქცევდნენ ყურადღებას, თავთავს მოკრეფდნენ და წერაებს კარგად დასდგამდნენ. ამის შემდეგ მთლიან ძნას უვლიდნენ დასტურნი. როცა დრო მოვიდოდა, მოიტანდნენ ხატის კალოზე, მამაკაცები გაღეწავდნენ, ახალ დამდგომ დასტურნი ხელმხარს ინათლავდნენ თითო საკლავით და ჩაყრიდნენ საპურე ბედელში პურს.

აქ დასტურები წელწადში ორჯერ დგებოდნენ, პირველი დასტურნი (ორი კაცი) დადგებოდნენ გიორგობას და ამაღლებამდინ რაც დღეობები და საჯარო სადასტურო საქმეები არის, ისინი უძღვებოდნენ. ამაღლებას შევიდოდნენ მეორე დასტურნი (ახალნი) და გიორგობამდინ ისინი ემსახურებოდნენ სადასტურო საქმეებს. გიორგობას შემსვლელი დასტურნი ლეწავდნენ ჯვარის ძნასაც, ხელმხარს ინათლავდნენ და მერე შეიტანდნენ პურს საპურე ბედელში. ცალკე ინახავდნენ თესლობამდინ საკმარ პურს, რამდენიც დღეობებს დასჭირდებოდა იმიტომ, რომ ხელმხარის უნათლავად ბედელში ვერავინ შევიდო-

და. შედიოდნენ წელიწადში ორჯერ: პურის ჩაყრაში და სათესლე პურის გამოტანაში. ჩალაც პურის გამლეწავ დასტურთ რჩებოდათ, ხოლო სათიბეებს ამალლებას დამდგომნი დასტურნი თიბდნენ და ზაფხულში სახატო ყანა-სათიბებსაც ისინი პატრონობდნენ.

პირველად შემსვლელ დასტურთ მოჰქონდათ ქადა-პური, საწირავნი-ხელმზარს ორივენი ინათლავდნენ თითო საკლავით. ერთი საკლავი შესალოცი მოჰყავდა ორივეს ერთად. ეს ორი დასტური ერთ-ერთ შესალოც საკლავს დაკლავდა და როცა გამოილოცავდნენ მათთვის დავალებული დღეობების დამთავრების შემდეგ, მეორე დასტური გამოსალოც საკლავს დაკლავდა. ეს ორივესთვის საერთო იყო და ერთად მწყალობდნებოდნენ (დამწყალობნების წესები აქ არ იწერება, რადგან ფშავში ერთი და იმავე წესით ამწყალობნებენ და სხვა დღეობებში და ხატებში არის აღწერილი). ძველი დასტურნი ახლებს გადააბარებდნენ სახატო თას-განძს (ფშავში ამბობენ: ხატი, სახატო და ხევსურეთში: ჭვარნი; საჭვარო და სხვა), პურიან ბელელს და დანარჩენ სახატო ქონებას. აქ იყო სადასტურო, სადაც დასტურნი მუდმივად ცხოვრობდნენ და თავს ძალიან წმინდად იჭერდნენ. არ შედიოდნენ სოფელში თავისი დასტურობის დამთავრებამდენ, სახლში შესვლა ხომ დაუშვებელი და უპატიებელი დანაშაული იყო. წმიდად იყვნენ და ამიტომ მათ ეწოდებოდა „წლის ბერები“. არ ჰამდნენ მიცვალებულთათვის ნალოც პურს, არ სვამდნენ სასმელს იმ ყანწით, რითაც ხალხი სვამდა. მათ თავისი ყანწი ჰქონდათ ან მათარა (მათარა იყო მოზერის უკანა ფეხის ტყავის სასმისი. ტყავი კარვად მოიზილებოდა, მოიქნებოდა ბეწვის გაცლის შემდეგ. წვრილ პირს ღვედით დაკერავდნენ და ჰამარზე ჩამოსაკიდს გაუკეთებდნენ და სასმელს ამით დალევდნენ). თუ ვინმეს სახლი სოფლის ნაპირზე იყო, სადაც რიო-შიანი გზა არ შეხვდებოდათ (ქალების ნასიარულევი გზა), ასეთი სახლის ბანზე მისვლა შეეძლოთ, თუ იქ სმულობა და ხალხიანობა იყო და დაპატიებდნენ. ძალიან ერიდებოდნენ ისეთ გზას, სადაც ქალებს ფეხით სასიარულო იყო. პირსაც კი არიდებდნენ ქალებს, რომ გულშიც წმიდა ყოფილიყვნენ. სამუშაოზე რომ წავიდოდნენ, ცდილობდნენ, ოფლი არ გამოსვლოდათ და თუ გაოფლიანდებოდნენ, ტანდაუბანლები ხატში არ მივიდოდნენ, რადგან ხატს ოფლიანი ეჭაერებოდა.

სახატო ქონება დასტურთ ხელში იყო. ძველი დასტურნი ახალთ ჩაბარებდნენ თვლით. ჩაბარებას ესწრებოდა თავხევისბერი. მას ზეპირად ახსოვდა, რა იყო ხატის ქონებაში და რა არა. ჩაბარების დროს თუ რამე დააკლდებოდათ, ხევისბერი ეტყოდა და მოატანინებდა. მანამ არ მოიტანდნენ და სახეზე არ ნახავდა, ვინც იბარებდა, არ შეიძლებოდა. დათანხმებულიყო იმის თქმას, რომ ნივთი იქ სადმე

არის და მერე მოვიტანთო. გადაბარების დროს უკლებლად უნდა ყოფილიყო ყველა ნივთი.

პირველი დასტურნი დღეობას იწყებდნენ გიორგობიდან. ახალი დასტურნი გიორგობას თითო საკლავს მიიყვანდნენ და საწირავთ მიიტანდნენ პირველად ხევისბერი დასტურების ხელმძღვანელის სანთლავებს დაკლავდა. ისინი საკლავის სისხლს გულზე, ხელებზე და შუბლზე იწვევდნენ. მერე დასტურთა მიერ მოტანილ საწირავთაზე აღიდებდა პირქუშს და გახსნიდა კოდს. ამ დროს ერთი სანთელი კოდს ეკრა, ერთი კი ლუდიან თასთან ერთად ხევისბერს ეჭირა. დაამწყალობნებდა ახალდამდგომ დასტურთა და მაგათ სახლ-ჯალაფობას. უსურვებდა, მშვიდობით დაწყებული დასტურობა მშვიდობით გადაეყარათ, შეუცოდვრად და შეუწყინრად. გამოიტანდნენ ლუდს საჯარეში, სადაც სოფლის ხალხი იხსდა. ლუდის მომტანს მოეგებებოდნენ, ჩამოართმევდნენ ლუდიან ქვაბს, ერთი მრიგე დადგებოდა და დაარიგებდა ლუდს. ყველანი ამწყალობნებდნენ ახალ დამდგომ დასტურთ და ყმათ. ამასობაში დასტურთ დაკლული საკლავების ხორციც მოიხარშებოდა, ხალისაგან მთანილ საწირავებზე სუფრა მზადდებოდა. სუფრას შენდობას ეტყოდნენ, ხელზე პურსა და ხორცს დაარიგებდნენ. იმართებოდა დღეობა, სმა და მღერა, მოვიდოდნენ მეზღვნეებიც, დაიკვლოდა საკლავები და ისინიც მართავდნენ ჩვეულებრივ სუფრას.

დასტურთ დამზადებული სუფრა ასე ილოცებოდა: „დიდება შენდა, ჩვენო სალოცავო პირქუშო ყაწიმშვენიერო, ზინზილიანო. ამ გამართული სუფრით, დაკვრეთილი სეფეებითა და დადგმული ჭიქა-ბარზიმითა მოიხსენივნეს ჩვენმა პირქუშმა მოლაშქრენი და ვინც კიდენ ჩვენს უწინ იყვნენ პირქუშის მკადრენი, დასტურნი და კვეისბერნი და დღეს აღარ არიან. აგრეთვე უპატრონო შკვდრები, რომელთაც ჩვენი სალოცავისად დანამადლისი ჰქონდეს, ჩვენი სალოცავი არ ივიწყებდეს და ჩვენ სახეზე არ გვაჯსონან და ვერ ვიგონებთ და ისინი კი ამ ჩვენის სალოცავის კარზე შენდობის თქმას მოგველოდებოდნენ“.

ხევისბერი შენდობის შემდეგ ცოტა ლუდს დაასხამდა ყველაფერზე, რაც კი სუფრაზე იყო დაწყობილი. შასანდობარს მთელ ხალხში ჩამოატარებდნენ და ყველა დაღევდა. აქ დაყოფილი იყო ადგილები, თუ სად ვის ეკუთვნოდა მისვლა და დაჯდომა. საბეროში ხევისბრების მეტს არავის შეეძლო შესვლა. ადგილობრივი ორი ხევისბერი იყო და საბეროში მარტო ისინი შედიოდნენ. სადასტუროში მარტო ორი დასტური შედიოდა და აქ შესვლაც შეეძლოთ ხევისბრებს. დანარჩენი ხალხი ვერ შედიოდა. საპურე ბელელში შესვლა შეეძლო მარტო დასტურს, იმასაც მაშინ, როცა ხელმძღვანელს ინათლავდა. აქ ვერც ხევის-



ბერები შევიდოდნენ და ვერც დასტური ხელმხრის ნათელის გარეშე. საზარესთან თავხევისბრის მეტი ვერავინ მივიდოდა — ისიც მაშინ. როცა დაწესებული იყო ზარის დარეკა. ფეხსაცმლიანი აქ ვერც ის მივიდოდა. — ან უნდა ყოფილიყო წინდებით, ან ფეხშიშველი. საპურეში დასტური ტანდაბანილი, ფეხდაბანილი, ფეხშიშველი და ახალმხარნანათლი უნდა ყოფილიყო, უიმისოდ შესვლა არ შეიძლებოდა. საჯარეში სოფლის ხალხი ყველა შედიოდა, თუ შინაღარ არ იყო უწმიდურად, თუ ცოლი ქოხში ჰყავდა მშობიარობაზე, ან ბოსელში დედათქვისის დროს.

საჯარე დაფარებული იყო და სოფლის ჯარი აქ სხდებოდა. ხატთან კარგა მანძილით დაშორებით ისხდნენ დედაკაცები. მათ ჰქონდათ განსაზღვრული ადგილი და როგორც „უწმიდური არსებანი“ ხატთან ახლო ვერ მივიდოდნენ. დედაკაცები ხატში არც მოვიდოდნენ, თუ შესაწირავი არაფერი ჰქონდათ. მამაკაცები კი მარტო სასმლის დასალევებად მოდიოდნენ. დედაკაცებს მიჰქონდათ ქაღები, სანთელი. საწირავნი ქადას დასჭირდა ხევისბერი ან დასტური და ერთ კოტორს გამოსჭრიდა ხატის მსახურთათვის. სამი კოტორი კი პატრონს რჩებოდა. ერთი ქადა იყო, რომელსაც „ფურთ ნათავარს“ ეძახოდნენ (ძროხების ნათავარი). ფურთ ნათავარზე ახვეწებდნენ მარტო ფურებს და სთხოვდნენ პირქუშს და ადგილისდედას ფურების ღალიან-მადლიანობას. ფურთ ნათავარის ქადა ჩვეულებრივ ხავიწიანი იყო ფურების სამხვეწროდ. ის გაჭრის დროს მარტო გაისერებოდა და კოტორს არ გამოსჭრიდნენ. ოთხივე კოტორი პატრონს მიჰქონდა. მხოლოდ ზედ მოყოლებული სანთელი ენთებოდა სახატოდ. ქადა მიჰქონდათ ადგილისდედაში (ხთიშობელს ეძახდნენ). ეს იყო პირქუშის ხელქვეითი და მისი დამხმარე ადგილისა და პირუტყვის დაცვაში. ხთიშობელს ცალკე არაფერი ჰქონდა და არც ჰყავდა. ის იყო დამოკიდებული პირქუშზე. თუ კაცი დააკვირდებოდა, პირქუშის გარეშე იგი ცალკე არსებად არც ჩანდა.

ხევისბრობა აქ მემკვიდრეობით გადადიოდა, მაგრამ მაინც მომიზეზებით და მკითხავის საშუალებით მიდიოდნენ ხევისბრებად. ერთ-ერთი ხევისბერი ჰყავდა აყვანილი მედროშედ და დროშა მუდმივად მას ებარა, ააბამდა, ჩამოხსნიდა და სადაც საჭირო იყო, ატარებდა, ოღონდ როცა ჩამოხსნიდა, მისი სამკაულების შენახვა დასტურს ევალებოდა, ინახავდა თას-განძთან ერთად, ზარის დარეკვა კი თავხევისბერს ებარა.

## შოგა ანუ მრისტი

ქრისტე-დღეს პირველად დასტურ-ხევისბრები მოიყრიდნენ თავს სადასტუროში. ყველა თავ-თავის მოვალეობას შეასრულებდა, მაგან-

ძური დასტური განძს მოიტანდა, მედროშე ხევისბერი დროშას ააბამდა, კოდს გახსნიდნენ, დროშას გამოაბძანებდნენ, სასოფლო საკლავიც დაიკვლოდა, ხევისბერი ზარს დარეკდა და იწყებოდა ჩვეულებრივი დღეობა.

ქრისტე-დღე რომ დაღამდებოდა, ყველანი წავიდოდნენ თავთავის სახლებში. იქ რჩებოდნენ დასტურნი და ხევისბერები. დასტურნი მუდმივად აქ იყვნენ და ამ კვირას წელწად-დღემდინ ხევისბერებიც აქ რჩებოდნენ. ვინც აქ დარჩებოდა, მათ ერთი კოდი საუკეთესოდ დამზადებული ლუდი ჰქონდათ. ხორცი ქრისტეს ბლომად რჩებოდა, სოფლიდანაც ყველა კომლს მოჰქონდა მოსაკითხი: ხინკალი, კეცეული და სხვა. მოსაკითხს მოაყოლებდნენ ერთ ხელადა არაყს, თხილ-კაკალს და, თუ ჰქონდათ, სხვა ხილს, სამ ფეხ სანთელს. ხევისბერი სუფრას შენდობას ეტყოდა ანთებული სანთლით, და დადგმული თასით მოსაკითხის მომტანის მიცვალეულთათვის. ერთ თუნგლულდს თან გაატანდნენ მოსაკითხის მომტანს ოჯახის წევრების და ამ სუფრის დამამზადებელი დიასახლისის პატივსაცემად. ასე გრძელდებოდა ერთი კვირის მანძილზე ზატის მსახურთა ცხოვრება ლიტანია-დღემდინ (ლიტანია-დღეს ფშავლები წელწადის წინა დღეს უწოდებდნენ).

ლიტანია-დღეს მთელი სოფლის ხალხი საჯარეში მოიყრიდა თავს. ესენი იყვნენ მეკვლენი. მეკვლეში ყველა ქუდიანი მოდოდა, ვისაც კი შეეძლო, ოჯახიდან თუნდა ოთხი-ხუთი კაცი ყოფილიყო. რამდენიც მოვიდოდა, ყველას მოჰქონდა თითო კონა შეშა ამ ღამისათვის, თითო დიდ მრგვალი ხშიადი (ამას ეწოდებოდა სათეო პური), საწულადო კელაპტარი იმდენი, რამდენი ქუდიანიც იყო ამ ოჯახში, გუდით ხაჭო, ყველი და სხვა ამ ღამის საგძლად, თითო ჩარეკა არაყი და ყანწი. მეკვლენი როცა მოგროვდებოდნენ, მოიყვანდნენ ცხვარს ან ჰედილას და თხას. თხა დაიკვლოდა ხთიშობელში და ცხვარი კი პირქუშში. გაატყავებდნენ და ხორცი მთლიანად მოიხარშებოდა ერთ ქვაბში. დიასახლისობდნენ დასტურნი. ამ დროს მეკვლენი მართავდნენ სმას და სიმღერას. მღეროდნენ ძველ ლექსებსაც და თავისპირის ლექსებსაც (თავისპირის ლექსი ეწოდება ისეთ ლექსს, რომელიც აქამდინ ნათქვამი არ იყო და მღერის დროს იგონებდნენ). უფრო იცოდნენ მოკლე ლექსები მოსწრებული სიტყვებით. მაგალითად:

პირველი მომღერალი: „ხევისბერ არაყს დამპირდა, უნდა ვილექსო ეხლადა“. მეორე: „გუშინ რაც არაყ დაღიე, ისიც მოგექცეს ცაცხლადა“.

მეკვლენი სვამდნენ და მხიარულობდნენ (ფშავლები მშვიდი და მომთმენი ხალხია სმის დროს, ჩხუბი ადვილად არ იციან. ხევისურები კი სულ ჩხუბზე ფიქრობენ). ხორცი რომ მოიხარშებოდა, დასდებდნენ

გრძელს ფიცრის სუფრას, დააწყობდნენ სათეო პურებს, ზედ დაწილობებულ ხორცს, დაუდგამდენ გვერდით ქვაბით ან ჩხუტით ლუღს, დააკრავდნენ ანთებულ სანთლებს ლუღზეც და სუფრაზედაც. ვერცხლის თასს აავსებდნენ ლუღით, სანთელდაკრულს ხევისბერი დაიჭერდა და აღიდებდა პირქუშს ჩვეულებრივი დიდებით. მერე თითო თასს ყველას დაალევინებდნენ ყმათ საშწყალობნოს. მერე თასს აავსებდნენ და ხევისბერი შენდობას ეტყოდა სუფრას, შესანდობასაც ყველა დალევდა, მერე დასხდებოდნენ და დასტურნი პურს და ხორცს ხელზე დაურიგებდნენ. დასტურ-ხევისბრები კი სუფრიდან შეექცეოდნენ. თავის კერძ (კუთენილ) წილობას რამდენიც უნდოდათ ჭამდნენ, რაც არა, გუდაში ჩაიწყობდნენ. მთელი ღამის განმავლობაში სვამდნენ სასმელს, საჭმელი თავისი გულებიდან ამოჰქონდათ და ჭამდნენ. დასტურ-ხევისბრებიც მეკვლეებთან ისხდნენ დამათთან ერთად ღებულობდნენ მონაწილეობას მღერა-მხიარულობაში. როცა შუაღამე გადავიდოდა და დასტურ-ხევისბერები დასაძინებლად წასვლას მოისურვებდნენ (მეკვლენი საჯარეში ათევდნენ ღამეს), აანთებდნენ მეკვლეთ მოტანილ საწულო სანთლებს, დადგამდენ ლუღით სავსე სამ ვერცხლის თასს, სანთელს დააკრავდნენ და ხევისბერი კიდევ იტყოდა დიდებით. ამ ჭიქა-ბარძიმით და სანთელ-კელაპტრით ახვეწებდა პირქუშს თავის ყმებს, სთხოვდა, რომ წულს და წულის აკვანს მომატებოდა მის ყმათაში, რითაც პირქუშის ზღვენთა და დიდებათ მოემატებოდა. დიდებათა დამთავრების შემდეგ მთავარ თანს ხევისბერს მისცემდნენ, დანარჩენ ორ თასს კი დასტურნი დაიჭერდნენ. ყველანი დაამწყალობნებდნენ პირქუშის ყმათ და ყმათაში წულსა და წულის აკვანს. მეკვლეთათვის კიდევ დაასხამდნენ კოდიდან ლუღს და წავიდოდნენ დასაძინებლად. მეკვლენი არ იძინებდნენ. თითო-ოროლს თუ დაეძინებოდა. იმასაც არ ასვენებდნენ, შეუყრიდენ ცხვირში დაფშვნილ თამბაქოს ან სხვა რამე ოინს გაუკეთებდნენ. გაელვიძებოდა და მაშინვე შესთავაზებდნენ სასმელს. ამასობაში მოატანდა თენება და მეკვლენი დაიჭერდნენ კვალს. ვარსკვლავები ჰქონდათ დასწავლილი. დასტურნი ამ ვარსკვლავებს თვალყურს ადევნებდნენ და როცა ისინი სათენებო ადგილას მივიდოდნენ, მოხათრებით გაალვიძებდნენ ხევისბერს. დაეტყობოდა თუ არა თენება, ხევისბერი გაიხდიდა ქალამნებს და წინდიანი მივიდოდა პირჯვრისწერით და მადლის თხოვით საზარესთან. სამჯერ მოიყრიდა მუხლს, მერე აღგებოდა და სამჯერ ნელ-ნელა შემოჰკრავდა ზარს, დაიწერდა პირჯვარს და შეეხვეწებოდა პირქუშს — როგორც ხორციელს მის წმინდა ზართან მისვლა აპატიოს და არ გაუწყრეს უღირსობისათვის. ასე გაიმეორებდა სამჯერ და მერე ჩქარ-ჩქარა რეკდა კარგა ხანს. ზარის ხმაზე მეკვლენი აიშლებოდნენ და იწერდნენ პირჯვარს. ხევისბერი პირდაპირ საჯარეში მეკვლეებთან მივიდოდა,

შემოიყოლებდა მარჯვენა ხელით თოვლს და გადააშლიდა — ეგრე თეთრად დამიბერდითო და მერე მოულოცავდა ახალი წლის გამოცვლას: „გილოცავთ ახალი წლის გამოცვლას, ახლის წლის გამოცვლაზე ბედნიერი წელი და კვალი დაგიყენოსთ ჩვენმა სალოცავმა პირქუშმა, დიდი გიმატებიათ, დიდი გიმატოსთ კაცითა და საქონითა, წუღითა და წუღის აკავანითა, გალოცვინოსთ მრავალი ახალი წელი, ერთხელ ახლა და ათათასჯერ კვლავადა“.

ამ ლოცვაზე გოგას შეგორება არ იცოდნენ როგორც ზოგიერთ სხვა ხატებში ფშავში. მილოცვა რომ გათავდებოდა, ყველანი გარეთ გამოვიდოდნენ და სასაკლაოზე დასტური წამოაყენებდა ერთ კარგ ჰედილას, რომელიც შერჩეული იყო წელწად-დილისათვის. დაკლავდენ ყმათა და მეკვლეთ სამწყალობნოდ. საკლავი რომ დაიკვლოდა, აავსებდნენ ლუდით თასს და მისცემდენ ხევისბერს. ის იტყოდა: „შეიწყალოს წიწნაურნი ძაღლითა და ციციითაო, იმათი სული კრული და წყეული იყოს და შუა ჯოჯოხეთში იყოს საიქიოსაო“. ამას იტყოდა და დაღვრიდა თასს. ორჯელ კიდევ აუვსებდნენ თასს და კიდევ დაღვრიდა ასეთივე წყევა-კრულით. ხალხიც აქ იდგა ამ თასის დაღვრაში და „ამინ!“ ეუბნებოდნენ.

წიწნაურნი ყოფილან სოფლის გამტეხნი და მოლაღატენი. იმათი მამაშვილობა სოფელში თურმე არავის და არაფერს ინდობდა, სცემდნენ და აგინებდნენ ხალხს, ქურდობდნენ და არავეითარ ბოროტებას არ ურიდებოდნენ. სოფელში ყველას ერეოდნენ და ვერაჟენ ვერაფერს უბედავდა. მერე სოფელს მოულაპარაკია: ერთიმეორეს ავუტეხნოთ ჩხუბი. ისინი მეშველად მოვლენ და დავზოცოთო. წიწნაურთ გვარში ორი ძმანი ყოფილან საშიში და მათი მოშორება უნდოდა სოფელს. გახადეს ჩხუბი და სოფელში ამ დროს ერთი ძმის მეტი არ აღმოჩნდა. მოვიდა მეშველად, ვითომ ერთიმეორეს გაუქანეს ხანჯალი, იმას მოახვედრეს და მოკლეს. მეორე ძმა სადღაცა სოფლებში იყო წასული, გაიგო, რომ ძმა მომიკლესო, წამოვიდა და ანადის პირდაპირიდან დაუძახა: მანდ ხომ არაფერი ამბავია, ხომ არავინ მომიკლესო? დედამ დაუძახა: ძმა მოგიკლესო. ის კაცი სოფელში აღარ მოვიდა და მოკლა ერთი ბერიკაცი თირილაურთ გვარისა, ხბოებში ნამყოფი. ეს იყო ახადში ძალიან კარგი კაცი. მეორე იყო ყაფარში ახადელთაზე კაი კაცი. წიწნაურთ კაცი პირდაპირ ყაფარში წავიდა — იმასაც მოკვლავო. იმას ერქვა გოდერძი, რომლის მოსაკლავადაც წავიდა. რომ მივიდა, ქორწილი იყო და მთვრალ ხალხს საბძელში ეძინა, წიწნაურთ კაცი საბძელში შევიდა და ათვალეირებდა, გაუგეს გოდერძის მოკვლა უნდაო და ეს აქ მოკლეს.

ხატში თასს იმიტომ ღვრიდნენ, რომ წიწნაურები წყევა-კრულით იყვნენ მოხსენიებულნი და თუ ვინმე იმათი მონათესავე არის,

ისინც ასე დაიღვარნენ და გათავდნენ, როგორც ეს თასი დაიღვარა და გათავდაო. ხალხის გასაფრთხილებლადაც იყო ეს წესი, რომ გავ-გოთ, ცუდ ხალხს როგორი წყევლა-კრულვით იხსენიებს სოფელი, რომ მომავალში აღარავის გაებედა სოფელში ავენობა და ავხელობა. თუ ვინმე გაბედავს სიცუდეს, ყველამ უნდა იცოდეს, რომ სიკვდილის შემდეგაც და სიცოცხლითაც ასეთი ცუდი ხსენება ექნებათ. ამიტომ ახადს ძალიან კარგი სოფლობა აქვს.

საკლავის ხორცს დასტურნი მთლიანად მოხარშავდნენ. ხევისბერი დაჭრიდა წნელისაგან წილებს და ჩაყრიდა ქუდში, ეს წილები დანიშნული იყო: ზოგს ორგან დაუჭდედა, ზოგს მეტ ადგილას, ზოგს ერთგან, ზოგს ისრის კილოს გაუკეთებდა და ასე იხსომებდნენ თავთავის ნიშნებს. ხევისბერი წილებიან ქუდს დაიჭერდა და იტყოდა: „დალოცვილო ჩვენი სალოცაო, შენ უშველე შენთ ყმათა და ბევრი ახალი წელი მშვიდობისა ალოცვიე, შენის სახელით მთარგინე მეკვლეობა, მეკვლეთად გაძლოა იმასა, ვისაც კვალი კეთილად ხვდებოდეს“. დასტური წილს ამოიღებდა, ვისაც იქნებოდა, იმას ერგებოდა მეკვლეთათვის წინ გაძლოა. გადმოიშლებოდნენ მეკვლენი სოფლისაკენ. გამოუძღვებოდა წინ გამძლოლი მეკვლე, დანარჩენები მღერა-მხიარულობით მოდიოდნენ და ასე შემოვიდოდნენ სოფელში. სხვა სოფლებში ხატიდან წამოსული მეკვლეები ყველგან მივიდოდნენ და ყოველ კომლს შეუგორებდნენ გოგას. აქ კი ასე არ იყო. ზოგან ოჯახის წევრი მეკვლე შეაგორებდა გოგას, ახადში არც ეს ყოფილა. მეკვლენი რომ დაიშლებოდნენ, ზოგი აქედანვე წაიყვანდა კვალის შემტანს და ზოგი მერე დაუძახებდა, ვისი კვალიც კარგად ჰქონდა დაცდილი. როგორც ვიცით, სხვა სოფლებშიც იცოდნენ კვალის შემტანად ნამდვილი მეკვლის გარდა კიდევ სხვა მეკვლის მიყვანა. აქ ასეთი მეკვლე შეაგორებდა გოგას. აქაც დიასახლისი გოგაზე დანიშნავდა ცხვრის მხარეს, ძროხის მხარეს, პურის და სხვა ოჯახური ქონების მხარეებს და გამოცხობის შემდეგ რომელი ადგილიც უფრო მაღლა ამოიბერებოდა, ნიშანი იყო იმისი კეთილდღეობისა და უხვი მოსავლისა. შემოგორების დროსაც აქცევდნენ ყურადღებას: რომელ გვერდზე დადგებოდა გოგა, წაღმა თუ უკუღმა. თუ წაღმა მოვიდოდა, ოჯახი გახარებული რჩებოდა და თუ უკუღმა, საწყინო იყო. მეკვლეს სამჭერ შეაგორებინებდნენ გოგას, მერე გადააბიჯებდა ზღურბლზე და მიულოცავდა: „შემოვლგი ფეხი, გწყალობდეთ ღმერთი, ფეხი ჩემი, კვალი ანგელოზისა; ბევრი გიმატებიანთ, ბევრი გომატოსთ ახალის წლის გამოცვლაზედა ჩვენმა სალოცავმა და ღმერთმა, მრავალი გალოცვიოსთ ახალი წელი ერთურთის სიცოცხლით და კარგად ყოფნითა“. ახლა ისინიც ულოცავდნენ ამავე სიტყვებით...

გოგას შეინახავდნენ ამ სახით წყალკუთხევაში. წყალკუთხე-  
ვას ხარის კისერზე გასტეხდნენ და იტყოდნენ: „ღმერთო და ჩვენო  
სალოცაო, შენ უშველე ჩვენს ოჯახში კარსა, გუთანსა, კაცსა, საქონსა,  
კარის ნაქნავსა, ფურის ნაწველსა და კაცის ალალი ოფლით ნაშვრალ-  
ნაშუშვევარსა, წელი მშვიდობისა და მადლიან-ბარაქიანი დაგვიყენე, მი-  
გვაგებე მრავალს ახალწელსა მშვიდობით და კარგად ყოფნითა“. გო-  
გას ხარის კისერზე ორად გატეხდნენ, ნახევარს კიდევ ორად და მეო-  
თხედს ამ ხარს შეაქმევდნენ. მეორე ხარსაც შეაქმევდნენ გოგას ნა-  
წილს. გოგას გასტეხდნენ იმ ხარის კისერზე, რომელიც ხნით უფროსი  
იყო და ოჯახზედაც მეტი ამაგი ჰქონდა.

მეკვლენი რომ სოფელში მივიდოდნენ, ყველას დაეშურებოდა,  
რომ სხვაზე ადრე გაეშვა ძროხები და გაერეკა წყალზე. ცხენსაც ადრე  
წაიყვანდნენ წყალზე. თან მიიტანდნენ ნაყრს: პატარა პურს და ყველს,  
ჩააგდებდნენ წყალში და იტყოდნენ: „წყალო, შენთვის ნაყრი არ და-  
მიყრავ და შენ შენს წყალობას ნუ დაგვაკლებ — შენის გამჩენის  
ხთვისაგან. წელი მშვიდობისა დაგვიყენე და მრავალს მიგვაგებეთ ახალ-  
წელს კაცითა და საქონით“.

ეს წესები რომ მოთავდებოდა, მეკვლენი ისევ ხატში წავიდოდნენ.  
იქ გამართავდნენ სუფრას. იმართებოდა ღვინო. სმა-ჰამა რომ მოთავ-  
დებოდა, წამოვიდოდნენ სოფელში. სოფლის გვერდზე შარა იყო, სა-  
დაც მიიტანდნენ ლუდს, მოვიდოდა ქალ-რძალიც და იმართებოდა:  
სმა და მღერა-თამაშობა. ამ მხიარულ მღერაში თავის პირისლექსით  
ქალებსაც შეეხუმრებოდნენ:

ქალებს ჰრელებ კაბები სცევა, ბულუღით ნაყიდები,  
ყელზე ვერცხლის შიბებ უსხავ, ბოლო-ბოლო საიწმები,  
რახან გზაში შამხვლებიან, გამწყალივით გავსილდები,  
რა გავსდები, გაღმოხედნებ, ობოლივით ავტირდები.

აქ რომ მოთავებენ სმას და მხიარულებას, მერე ვინმე დაპატი-  
ყებს ხალხს და ყველანი იქ წავლენ. სხვა სოფლებში არ იციან, ახადში  
კი, ხევსურების მსგავსად, ბედისკვერას აცხოვენ, მხოლოდ „კვერას“  
ეძახიან. კვერას ყველას უცხოვენ, რამდენიც არის ოჯახში კაცი და  
ქალი, დიდი და პატარა. თუ სადმე ვინმე წასული ჰყავდათ, იმისთვისაც  
გამოაცხოვდნენ კვერას და მოსვლამდე შეუნახავდნენ, ან იქ გაუ-  
გზავნიდნენ. ვისთვისაც გამოცხვარი იყო, იმას უნდა შეეჭამა კვერა.  
თაფლ-ერბოსთან ან მარტო ერბოსთან ერთად. კვერა იყო პატარა, მომ-  
რგვალებული პური, ერთ გვერდზე დაქრელებული და ერბოთი გაპოხი-  
ლი. სულერთი იყო, რომელ დღეს შეჭამდნენ.

ახალწლისათვის ყველა მომზადებული იყო სასმელ-საჭმელით და  
სამი დღის განმავლობაში ეპატიყებოდნენ ერთმანეთს (წელწადი აქ

სამს დღეს გრძელდებოდა. მეორე დღეს გათენდება „კუმეტ-დღე“ (ამ დღეს აქაც კუმეტს ეძახიან, როგორც ხევსურეთში). კუმეტს ყველა კომლი ამზადებს ხინკალს და დილიდანვე იწყებენ ხატში მიტანას. ხინკალს თან მიაყოლებენ თითო ჩარეკა არაყს. ხევისბერი ყველას ერთად ეტყვის შენდობას, თქმის დროს აანთებს სანთელს. დადგამენ ლუდიან თასებს; ხევისბერი დაიჭერს ერთ თასს, სანთელს და იწყებს შენდობის თქმას: „დიდება ღმერთსა ცისა და ქვეყნის გამჩენსა, დიდება დიდს კვირასა — ხთის მალღის მოკარვესა, დიდება შენდა, ჩვენო სალოცაო პირქუშო, ყაწიმშვენიერო, ზინზილიანო. შენ უშველე შენთ ყმათა ცოცხალთა და დაასწოენ მრავალს წელწად-კუმეტსა. შენს საყმოში მიცვალებულნი კი მოივსენივნეს ღმერთმა ძველნი და ახალნი, რომელნიც იყვნენ და ემსახურებოდნენ თავის სალოცავსა და სოფელშიც სვინდის-ნამუსიანნი იყვნენ, ენითაცა, კელითაცა და ყველა საქმითა; ქალსთანაცა და რძალსთანაცა. დღეს კი ისინი აღარ არიან და ვეღარა ვხედავთ. სულწმიდანი არიან, შენდობას გამოგველიან და ჩვენ ყველას სახელდობრ ვერ მოვიგონებთ. ამ სუფრითაცა, სასმელითაცა და სანთელ-კელაპტრითაცა გაანათლოს ისინი თავის ქვეყანაშია. თუ კიდენა ვინმე მისადევარი იყოს პირქუშის ყმათაში, დისწულ-დედიძმა იყოსა, არადა სიძე-ცოლური, დობილ-ძმობილი, მოგბიროოდეს ამ სუფრასა და ჩვენ არ ვიცოდეთ — შეიწყალოს ისინიცა პირქუშის ყმათაში დაკლებულ სულიწმიდათ მასპინძლობითა. ამ საყმოთ პირქუშმაცა და მალაღმა ღმერთმაცა მადლი და ბარაქა დაუტანოს და კვლავად მშვიდობით მოაგებოს წელწად-კუმეტსა“.

ხევისბერი ამ თასიდან სუფრებზე ცოტა ლუდს დაასხამდა და მერე გამოცლიდა. შესანდობარს ყველანი დაღვედნენ. დასტური ხინკალს ყველას ხელზე ჩამოურიგებდა. დასტურ-ხევისბრები კი სადასტუროში წაიღებდნენ, გაათბობდნენ და ჭამდნენ. ხალხი ზოგი აქ შეჭამდა თავის წილ ხინკალს, ზოგი შინაც წაიღებდა. დაასხამდენ ლუდს და კიდევ იმართებოდა სმა. მერე დაასხამდნენ კიდევ ლუდს და ამოიტანდნენ შარაში. აქ მოვიდოდა ქალიც და რძალიც. მოიტანდნენ თხილს, კაკალს და დაურიგებდნენ ყველას. იმართებოდა კიდევ სმა, მღერა და თამაშობა. ქალ-ვაყები ერთობოდნენ თხილ-კაკლის ლუწიკენტობით, თამაშობდნენ ქალ-ვაყები ოროლი ერთად. ხნიერმა კაც-დედაკაცებმაც იცოდნენ ერთად თამაშობა. მღეროდნენ, ალექსებდნენ ერთმანეთს მოსწრებული სიტყვებით. საღამომდე აქ ატარებდნენ დროს.

## აღიბა

აღება იყო დიდი მარხვის შემოსვლის წინა შაბათს. აღებას ლუდო ხატში არ მზადდებოდა, მხოლოდ ხევისბერი სანთელს მოანათებდა

ხატში და შეიძლება სოფლიდან ვინმეს მიეყვანა საკლავი ან ზვარაზბო და სასმელიც მიეყოლებინა. ამ სასმელით ადიდებდნენ ხატს, დაამწყალობებდნენ არყის მომტანს და დაღვედნენ (ზვარა არის დეკეულის ხბო, ძროხა როცა პირველ ხბოს მოიგებს, ამას არც ფშავლები გაზრდიან და არც ხევსურები. ხევსურები თავ-თავის ხატში კლავენ, ფშავლები კი თავის ხატთან არსებულ ადგილისდღედაში ანუ ხთიშობელში. აქ ყველა ხატთან არსებობს ადგილისდღედა და მას ხთიშობელსაც უწოდებენ). ალებას შეიკროდა ხორცის პირი და უმრავლესობა აღდგომამდინ ხორცს აღარ ჰკამდა. ეს იყო შაბათი დღე და ორშაბათს იყო თავგ-ჩიტო უქმი.

### თ ა გ ვ - ჩ ი ტ თ შ ა მ ი

ყველა უქმობდა, არ მუშაობდნენ. იტყოდნენ: თუ ვინმემ იმუშავა, თავგები და ჩიტები ჭირნახულს გაუნადგურებენო და ასეთ ბევრ მაგალითს მოიყვანდნენ. ვინც გატეხა უქმი, რა ზარალი მიაყენეს. ვილაც ჭალმა გატეხა თავგ-ჩიტო უქმი და თავგებმა ძილის დროს თმა მოაკვნიტეს ერთი ნაქაპნიო (ნაწნავი), დაუჭრეს ტანსაცმელი და ნახელსაქმარი და სხვა.

თავ-ჩიტო უქმ დღეს ყველა მოხარშავდა ფაფას („ჩიტო ფაფას“ უწოდებდნენ). პატარა წიწნით (ჯამით) ფაფას გაიტანდნენ და გარეთ დადგამდნენ, რომ ჩიტებს ეკამათ. თავგებს კი არ სცემდნენ იმდენ პატივს, რომ მათთვისაც საჭმელი მიეცათ. ეშინოდა კი, რომ იმათაც შეეძლო ადამიანისათვის ზარალის მიყენება. ჩიტები თუ ფაფიან წიწნას არ მიეკარებოდნენ, მაშინ იქვე სადმე ჭეაზე დადებდნენ ფაფას, სადაც ადამიანები ხშირად არ დადიოდნენ და არ დააფრთხობდნენ მათ. ეს ჩიტებისათვის პატივისცემა იყო, ვითომ ისინიც მიხვდებოდნენ და აღარ დააზიანებდნენ პატივისცემლის ჭირნახულს.

### შ რ წ ყ ის ო რ შ ა ბ ა თ ი

ურწყის ორშაბათი არის ორი: ერთი ხსნილით და ერთი დამარხვების შემდეგ. ურწყნი ღვებთან მარხვა-შემოსვლის წინა ორშაბათს და გრძელდება ორ კვირას, ერთი ხსნილის და ერთი მარხვის კვირა. მარხვის ერთი კვირა რომ გავა, იმ ორშაბათს არის ურწყის მეორე ორშაბათი, მანამდე ორი კვირის ყველა დღეებს ურწყით ეძახოდნენ. ამ ორი კვირის განმავლობაში ოთხშაბათ-პარასკეობით საკაცო საქმეს არ გააკეთებდნენ. ქალები საკაცო ტანსაცმელს არც მოქსოვდნენ, არც დაართავდნენ საკაცო ტანსაცმლისათვის, არც შეეკრავდნენ კაცის ტანსაცმელს. ურწყით დღეებში არც მკითხავეები მკითხაობდნენ, არც საკლავი დაიკვლოდა, რადგან ეს დღეები ხეთიდან ურწყითათვის.



იყო მიცემული და ხთიშვილნი აღარ ხსენდებოდნენ. ურწყნი წარმოდგენილნი იყვნენ დედაკაცების სახით და მავნებლად. ამ დღეებში ჰქონდათ ძალა ადამიანთა ვნებისა. ამიტომ იყო, რომ ქალები და ბავშვები სოფლის გარეთ მარტოები არ მიდიოდნენ ურწყთ შიშით. დედაკაცებს და ბავშვებს პატრონობდა პატარა ანგელოზი, რომელიც ურწყთაზე გავლენას ვერ მოახდენდა, რომ დაეცვა თავისი საპატრონო ადამიანი, ამიტომ იმათთვის უფრო საშიში იყო. კაცების, ნამეტნავად ზოგიერთი მამაკაცის, ანგელოზი მძლავრი იყო და იმის ყისმათს ურწყნი ახლო ვერ მოეკარებოდნენ. ურწყნი ავებდნენ მაშინ, თუ ვინმე გზაში შეხვდებოდათ, ან მათთვის მოლოცვილ დღეებში იმუშავებდა. ისე ისინი სავენებლად სახლში არ ეძებდნენ ადამიანსა და არც ჰქონდათ უფლება დამბადებელიდან, რომ უმიზეზოდ დაესაჯათ ადამიანი და რამე ზიანი მიეყენებინათ.

## მ გ ე ლ თ უ ქ მ ი

მგელთ უქმი მოდიოდა მარხვის პირველ შაბათს. ამ უქმესაც მგლების შიშით ყველა უქმობდა, კაცი და დედაკაცი. თუ ვინმე რამეს იმუშავებდა, მეზობლები იტყოდნენ: არ შეინახა კი მგელთ უქმი და ნახავთ, მგელი რას უზამსო. თუ მოხდებოდა და მგელი მართლა ზარალს მიაყენებდა უქმის გამტეხის ცხვარ-ძროხას, მაშინ ხომ მეტიც აღარ უნდოდათ. შეიქმნებოდა მითქმა-მოთქმა — მგელთ უქმს არ ინახვენ და მაშ რა კარგი უნდა მოუვიდესო: ეგონათ, მგლები მათი უქმის გამტეხას შეარჩენდნენ და ახლა ხომ ნახეს, რა დაემართათო.

ხევსურეთში იცოდნენ მგლის პირის შეკვრა. ცხვრის საპარსავ დუქარზე ბაწარს დაახვევდნენ და იტყოდნენ: მგელო, პირი შეგიკარი. პირი იც შეგიკვრის და ნულარამც გექნების ლაშთ დაძვრის ნება ჩემის საქონის შესაკმელადო. ვითომც ამის შემდეგ მგელი პირის შემკვრელის პირუტყვს რომ მიუახლოვდებოდა, პირი ან გადებული დარჩებოდა ან შეკრული და პირუტყვისათვის ზიანის მიყენება აღარ შეეძლო. ფშავში კი ამ მიზნით დაბმა იციან მგლისა. შეკრავენ ბაწრით ერთ გურჩს (გურჩი: ფილთაქვა), დანას და კოვზს და იტყვიან: „მგელო, ეგრემც დაემბი, როცა ჩემს ცხვარ-ძროხას მიუახლოვდები, როგორც ეს გურჩნია, დანა და კოვზი არიან შეკრულ-დამბულნი. ჩემს საქონსა და ცხვარს რო ნახავ, ნუმცალ გექნება ძალა მათი დაზიანებისა. შეკრულიმცა ხარ ცათა და კმელეთის გამჩენის ხთის ძალითა და ნუმცარას ზიანს მოგვაყენებ“. მგლის დაბმა ხდებოდა მგელთ უქმედეს. ამის შემდეგ ამის შემსრულებელი დაიმედებული იყო, რომ მგელი ზიანს ვეღარ მიაყენებდა.

მგელთ უქმის სწორზე, ე. ი. მარხვის მეორე შაბათს, არის სულთ-აკრეფა, სულების დღეობა. სულთაკრეფისათვის ემზადებოდა ყველა კომლი, აცხობდნენ ლავაშებს და პურებს, მოხარშავდნენ ლობიოს, კარტოფილს, ვისაც რისი საშუალება ჰქონდა. გამართავდნენ სამარხო სუფრას, ოჯახში ვისაც უფრო ეხერხებოდა, ის დალოცავდა სუფრას თავისი მიცვალებულებისათვის. დალოცვა უფრო ევალებოდა ოჯახში უფროს კაცს ან დედაკაცს. ახალი მიცვალებულის პატრონი კი (იქ წელს გარდაცვლილსა) სასმელსაც ამზადებდა და მეზობლებს და-პატიებდა. უფრო ქალებმა იცოდნენ სულის დღეობაში მიცვალებულთა ხარჯებში და ტირილ-სატირობაში მისვლა. იცოდნენ ძალიან თხელი ლავაშების გამოცხობა წმიდა პურის ან სვილის ფქვილისაგან. გააწყობდნენ სამარხვო სუფრას და ხნიერი ვინმე იმ სულისათვის შენდობას ეტყოდა, ვისთვისაც გამეტებული იყო ეს სუფრა. ასეთ სუფრაზე სანთელსაც ანთებდნენ, უბრალო ოჯახური სუფრის დალოცვაში კი სანთელს არ ანთებდნენ. როცა განსაკუთრებული სულისათვის ილოცებოდა, სანთლის ანთებით ლოცავდნენ. სუფრაზე დააწყობდნენ ლავაშებს, ჯამებით ლობიოს, ბაქნით მოხარშულ, დაფქვნილ კარტოფილს, მეორე ბაქნით თხილ-კაკალს, ვაშლს (ყველაფერს ერთად ეწოდებოდა „სალადებელი“, ვითომც ამითი ვალადებოდნენ მიცვალებულები). აქვე დადგამდნენ ხელადით სასმელს, თუნგით წყალს, აანთებდნენ სამ ფეხ სანთელს, აავსებდნენ სასმლით ყანწს და მისცემდნენ ერთ-ერთ უფროსს კაცს ან დედაკაცს (დიდ სუფრას უფრო ზშირად კაცები ლოცავდნენ, პატარა სუფრას — შინაურს, დედაკაცები). ის ყანწს დაიჭერდა ხელში და იტყოდა: „დიდება შენდა, ღმერთო, ცისა და ქვეყნის გამჩენო. ცის ნამთა და დედამიწის მწვანელითა დამაარსებელო. ღმერთო, შენგან არის გაჩენილი კაცისა სიკვდილ-სიცოცხლეცა, შენგან არის გაჩენილი ვსნილი და მარხვეცა და სულის ვსენებაცა. შენ მიეც მადლი და ბარაქა ამ სუფრის პატრონსა (სახელი), მწუხარება კეთილად მოათმენინე და ნულარას მიჰკერძებ ამის გარდა სამწუხარო საქმესა. გაუმეტებია და გაუმზადებია ეს სუფრა, სასმელი და სანთელ-კელაპტარი (მიცვალებულის სახელი: მაგალითად — ხეთისო). ხეთისოსთვისა, როგორც გამეტებული იყოს, ისე მოკვსენიოს ხთისოს სული ღმერთმა, ამ სუფისკვერითა, ზედაშითა და სანთელ-კელაპტრითა. თუ ვინმე მოჰბიროოდეს ამ სუფრაზედა და ჩვენ ვერ ვიცოდეთ, ხთისოს მასპინძლობით მოივსენივნეს ისინიცა, იქაურის წეს-სამართლითა. თავის ნებითამც გასცემს ხთისო ამ სუფრიდან, ვისადაც რა ემეტებოდეს, ძალითამც ნურას ვინ გამოედავ-გამოეკიდება. ცოტამც ღილად ეჩვენება, რიოში — წმიდად.

ამ სიტბოთა და სინათლითამც მიუვა, მზის შუქითა და სანთელ-კელაპ-ტრითა. იმას შანდობა ჰქონდეს, იმის დანარჩენებს სიცოცხლე და დღეგძელობა. დანარჩენ ცოცხლებს ჯვარი დაუწეროს ღმერთმა და ნულარა სამწუხარო მოარგინოს. აკმაროს ზარალი ზარალად და დღეის გარდა სალხინო სამშვიდობო სუფრა ამზადებინოს“.

ასე დაამთავრებდა შენდობის მთქმელი და ყანწიდან დაასხამდა პურზე ცოტა სასმელს. „ამინ!“ — იტყოდნენ სხვებიცა. — „შეიწყალოს ღმერთმა ხთისო და დანარჩენ ჯალაფობას ჯვარი დასწეროს და ნულარა ავი და ურიგო მიარგინოს“. დამლოცავი დაღვედა და ყანწს გადასცემდა მასპინძელს, ან მრიგეს. ის დაასხამდა და ყველას და-ღვეინებდა შესანდობარს. მერე დედაკაცები გაშლიდნენ ტანისამოსს და ტიროდნენ (ტირილის წესები ცალ-ცალკე იქნება აწერილი). ტი-რილს რომ მოათავებდნენ, გაუშლიდნენ სუფრას და თან სას-მელს მოაყოლებდნენ. სასმელი ასეთ სუფრაზე იცოდნენ. ისე ოჯა-ხებში კი უსასმელოდ იცოდნენ სუფრები და არც არავის ეპატიებოდ-ნენ. ზულთაყრეფა ერთ-ერთი აუცილებელი ხარჯი იყო ახალი მიცვა-ლებულისათვის გადასანდელი.

## შუამარხვა

სულთაყრეფის შემდეგ მოდიოდა შუამარხვა. შუამარხვაში იცოდ-ნენ თავ-თავის ოჯახში სამარხვო სუფრები. ახალი მიცვალებულისათვის სახელის შედება სავალდებულო არ იყო, როგორც სულთაყრეფას. უქმობდენ კიდევ. შვილების პატრონი ამ დღეს ხელუძრავად ინახავდა. ამ დღეს გაკეთებული საქმე ორად იყოფაო: ნახევარი სასარგებლოა, ნახევარი ეშმაკისთვის არისო. შვილების პატრონმა თუ იმუშავა, შვი-ლნი ორად გაეყოფიანო, ვითომც ნახევარი შვილები დაეხოცებაო. შუამარხვაში თუ ფრჩხილი მოიჭრეს, ორად გაყოფილი გამოვაო (ეს ხევესურეთშიც ასე სწამდათ. მე მახსოვს, ჩემს ბებიას შუათითის ფრჩხილი ორად გაყოფილი გამოუდიოდა, ის იტყოდა: ეს ფრჩხილი შარხოშუაობას მოვიჭერი და იმიტომ ასეთი გამოვიდაო).

ამ დღეს ფშავში ყველა კომლის ერთი კაცი წავიდოდა ლაშარის ჯვარში, წაიღებდნენ კარგად გარჩეულ ერთ ჯამს კარგ ქერს, ერთ ჩარეჭა არაყს და სანთელს. ხვეისბერი ქერს ლაშარის ჯვარის კომქ-თან მიიტანდა, მოაბნევდა და იტყოდა: „დალოცვილო ლაშარის ჯვა-რო, შენ სასახელოდ იყოს ეს მხვიმე და შენის ლურჯაის სასარგებ-ლოდ“. ვითომც ლაშარის ჯვარის ლურჯას ქერი სჭირდება საქმელად და ხალხს მიაქვს მისთვის შესაწირავად თავის ჰირნახულის ნათავარი (მიტანილ ქერს მხვიმეს უწოდებდნენ). ახიელში (არხოტის თემი, ხე-სურეთი) კი ქერსა და სვეს სოფელზე მოკრეფდნენ, ლუდს ადუღებ-

დნენ და ამალლებას ერთ დღეს ამით დღეობობდნენ. ამ ლუდს ეძახოდნენ მხვიმეს, ლუდის მღუღეთ ე. ი. ქერის შემკრეფთ და დასტურის წესრიგის შემსრულებელთ — მხვიმის დასტურთ. ფშაგ-ხევისურეთში სხვაგან არ შემხვედრია მხვიმე. ახადში კი ლაშარის ჯვარში მისატან ქერს უწოდებდნენ თურმე მხვიმეს. ხევისბერი ქერს რომ გადაშლიდა, დაიწყებდნენ არაყის სმას. თანდათან ხალხი მოგროვდებოდა და იმართებოდა დღეობა. მხოლოდ მარხვაში საკლავს არ კლავდნენ. სვამდნენ, გუღებთ მიჰქონდათ სამარხო საჰმელი და სმის დროს აყოლებდნენ. როცა ხალხის მსვლელობა მოთავდებოდა, ხევისბერი მოტანილ სანთელს ყველას ერთად აანთებდა და დაამწყალობებდა ლაშარის ჯვარის ყმათ, მხვიმის შიმტანთ. ფშაველნი მთლიანად ითვლებოდნენ ლაშარის ჯვარის ყმად. ეს ჯვარი მთელ ფშაველთ ეკუთვნოდა.

ყველაფერი რომ მოთავდებოდა, დაიშლებოდა ხალხი.

### კუდიან დღე-ღამენი

კუდიანი დღე იყო ოთხშაბათი, ამ დღეს კუდიანებს ჰქონდათ ნება სიარულისა, ხთიშვილნიც ნებას აძლევდნენ და ღმერთიც. ხთიდან წელიწადში მარტო ეს ერთი დღე ჰქონდათ მიცემული მათ. კუდიან-დღეს ქალები და ბავშვები მარტონი ვერსად წავიდოდნენ კუდიანების შიშით. ისინი ვითომც გამოღვიძლავდნენ ადამიანს, როცა შეხვდებოდნენ. გამოღვიძლული ადამიანი ავად გახდებოდა და მოკვდებოდა. კუდიანები იყვნენ მამაკაცებიც და დედაკაცებიც. ისინი ციცებად გადაიქცეოდნენ, გაძვრებოდნენ სახლიდან, როცა ოჯახის წევრები დაიძინებდნენ და წავდოდნენ შორს მინდორში, სადაც იმ ღამეს კუდიანები იყრიდნენ თავს (ხევისურების წარმოდგენით, აჩხოტის მინდორში იყრიდნენ თავს, ყაზბეგთან ახლო. ფშაველები ზოგი იქ ამბობს, ზოგი სადაც იორზე). მთელ ღამეს იქ იყვნენ, არიგებდნენ, სად რა ვის ავნონ, ვინ წყალში ჩააგდონ, ვინ მოკლან ზეავით და სხვა. ავალებდნენ: შენ ის უნდა გამოღვიძლო და შენ ისაო, თუნდაც იმისი ნათესავი იყოს.

ერთ კუდიან ქალს თურმე უყვარდა თავისი მაზლი ნათესაურად, რადგან ის ძალიან კარგი იყო. დაავალეს თურმე კუდიანებმა მისი გამოღვიძლვა. თუ არ გამოტეხილიყო, აუცილებელიც უნდა შეესრულებინა დავალება. გამოტყდა იმის გულისათვის, რომ მაზლი ვერ გაიმეტა. გამოვიდა და სახალხოდ თქვა: მე კუდიანო ვარ და გავტეხილვარო. თუ გამოტყდებოდა, რომ ის კუდიანია, კუდიანობის უნარს კარგავდა, ჩვეულებრივ ადამიანად იქცეოდა.

კუდიანი დედაკაცი ძალიან მავნებელი და დაუზოგავია. იშვიათად მოხდება ვინმე რომ დაზოგოს. რომ დაავალონ, შვილსაც გამოღვიძლავს.

ან სხვა რამით მოკლავს (იტყვიან, თუ ვინმეს შეილება დაეხოცა: კუდი-  
 ანია, შეილება ამოიჭამაო. ზოგი შეილებ და სხვა ოჯახის წევრებ ამო-  
 წყვეტილი დედაკაცი თვითონაც იტყვის: ყველა დამეხოცა და მე დავ-  
 რჩი, ცოცხალი კუდიანი ვარ, ასე რად მომივიდაო). კუდიანი კაცი კი  
 არ ყოფილა მკენებელი. ის ყოფილა მშვიდი, იმას ვერც ავალებდნენ  
 კუდიანები ვინმეს გამოღვიძლავს და არც შეასრულებდა. ის ყოველ-  
 თვის იტავდა თავის გვარს და თავის ნათესაობას. როგორც კუდიანი,  
 ის წინასწარ მიხვდებოდა თავის გვარში და ნათესაობაში მომავალ  
 უბედურებას. არ იტყოდა, რომ კუდიანი ვარ და გავიგეო, მაგრამ მა-  
 ნამდინ ეცდებოდა, სანამ არ ააცილებდა მომავალ ხიფათს. ამიტომ  
 იტყოდნენ: ნეტავინ იმ მამიშვილობას, რომელ მამიშვილობაშიც კუ-  
 დიანი კაცია და ვაი იმ მამიშვილობას, ვის მამაშიც კუდიანი დედა-  
 კაციაო. თუ ეჭვი ეპარებოდათ, რომ ვინმე კუდიანი იყო, ძალით  
 გააშიშვლებდნენ და წყალში ჩასვამდნენ: წყალში გამოჩნდება კუდი-  
 ანი ადამიანის კუდი თითის ოდნადო. თუ ასეთი მართლა აღმოჩნდე-  
 ბოდა, უნდა გამოტეხილიყო და დაკარგავდა კუდიანურ თვისებებს.  
 გამოტეხილი კუდიანი ბევრ რამეს ილაპარაკებდა. მაზლის გულისა-  
 თვის რომ გამოტყდა, იმ კუდიანმა ილაპარაკა: ერთი კაცი მოდიოდა  
 მთაზე საზვავე თოვლში, იმის მოკვლა გვინდოდა ზვავით, მაგრამ  
 დავლათიანი ყოფილიყო და ვერ მოკვალითო. თოვლიან მთაზე რომელი  
 გზაც უნდა გაველო, იქ წავედით და სადაც უფრო საზვავე თოვლი  
 იყო, ბალახი ისე გავაკეთეთ; ვითომც თოვლი ძალიან თხლად იყო  
 და გამხმარი ბალახი მიწის პირიდან ისევა ჩანდაო. ეს კაცი რომ  
 მოვიდა, ჩვენ გვიხაროდა — ახლა კი მოკვალეთო, მაგრამ დადგა, მი-  
 იხედ-მოიხედა და არგნით გასინჯა თოვლის სიმაღლე. არგანი ღრმად  
 წავიდა, გაუკვირდა და თქვა: დიდება შენდა, ღმერთო, ეს რა ამბავია,  
 ამსისხო თოვლია და ეს ბალახები როგორღა ჩანსო. ღმერთის ხსენე-  
 ზაზე მისთვის დამზადებული საზვავე თოვლი გატყდა, ისეთი ზვავი  
 ჩავიდა ქალაში, რომ ციხეზე კიდევ მალა იყო. ეს კაცი ჭერ თოვ-  
 ლზე არ შემდგარიყო და თავისი დავლათით გადარჩა (ამიტომ იციან  
 მგზავრებმა და მონადირეებმა, რომ ნაქარზე არ შედგებიან, თუ არგნით  
 არ გასინჯეს და ღმერთი არ ახსენეს პირჯვრის დაწერით, არ ენდობიან  
 — ვაითუ, ეშმაკებმა და კუდიენებმა კარგი გასავალი მოგვაჩვენონ  
 და ზვავი გატყდესო). ასეთი ბევრი რამ უთქვამს გამოტეხილ კუდიანს.  
 კუდიანი ადამიანი როცა კაცის სახეს მიიღებს და მიდის სადმე, შავია.  
 ამიტომ იყო, რომ შავ ციცას თუ ხელში ჩაიგდებდნენ, გაშანთებუ-  
 ლი რკინით დადავდნენ პირისახეზე — ადამიანად რომ იქცევა, და-  
 დალული კარგად შეეტყობა სახეზეო. ერთი ასეთი ციცა დაუდალავთ  
 და რომელ დედაკაცზეც ეჭვი ჰქონდათ, მეორე დღეს სახეშეხვეულა

გამოსულა, დაიჭირეს თურმე, შეხსნეს შეხვეული და აღმოჩნდა ლოყებზე დაღაღული, როგორც შავ კატას დაუღაღეს.

კუდიანთ ოთხშაბათი რომ დაღამდებოდა, ყველა ოჯახის კარზე დაანთებდნენ დიდ ცეცხლს — ჭიაკოკონას. იცოდნენ თოფების სროლაც ჰაერში კუდიანების დასაშინებლად; ეკლებსაც გაუკეთებდნენ საკვამლეში, კარის თავებზე, საპურე გოდრებზე, ძროხებთან შესასვლელ კარებში, გარეთ დაგროვილ ძროხის ნაკელზე. ერთი სიტყვით, სადაც რა სასარგებლო ჰქონდა ოჯახს, ყველგან გაუკეთებდნენ ეკლებს. კუდიანებს ეკალი აშინებდა, ახლოს ველარაფერს მიეკარებოდნენ და მადლ-ბარაქას ველარ დაუკარგავდნენ. კარისთავზე რომ ეკალი იყო, კუდიანი შიშით სახლში ველარ შეძვრებოდა და სხვაგან წავიდოდა. თუ ვინმეს შემთხვევით უეკლოდ დარჩა საკვამი ან კარები, იქ შეძვრებოდნენ და ოჯახს ზიანს მიაყენებდნენ. ოჯახში იცოდნენ ბუნაგთ დაბეჭდვა ნახშირით, ძროხების და ცხვრების დაბეჭდვაც. მიიტანდნენ წახშირს, ყველგან დაყრიდნენ და იტყოდნენ: „ჯვარი გეწეროსთ წმიდის გიორგის დაწერილი“. მოხუცი ქალები დაწოლის შემდეგ თავისი ოჯახის ქალ-რძლებსა და ბავშვებსაც დაბეჭდიდნენ: „ჯვარი გეწეროსთ წმიდის გიორგის დაწერილი“ — ამ სიტყვებით ლოგინში მწოლიარეებს გადააყრიდნენ ნახშირს. დედაბრებმა ამ წესის შესრულება კუდიან-დღის გარდა სხვა დღეებშიც იცოდნენ ეშმაკების შიშით. თუ ოჯახში კაცი არ იყო და ეშმაკებისა ეშინოდათ, ყოველ ღამე ნახშირს გადააშლიდნენ ოჯახის წევრებს და ჯვარს დასწერდნენ. თუ სამგზავროდ წავიდოდა ქალი ან ბავშვი და კაცი არ ახლდა, იმასაც ჯვარის დაწერით უბეში ჩაუღებდნენ ნახშირს და წასულს გადააშლიდნენ; ეშმაკებსა და კუდიანებს ნახშირისა ეშინოდათ. ნახშირით გადაბეჭდილს და წმიდის გიორგის სახელით ჯვარწერილს სავენებლად ველარ მიეკარებოდნენ. კუდიან-საღამოს ნახშირს გამოიტანდნენ, ან ცეცხლიან ნაღვერდლებს და სახლის გარშემო გადააშლიდნენ. თუ ვინ-მეზე ეჭვი ეპარებოდათ — კუდიანიო, კუდიან-ღამეს ყარაულობდნენ — იგი აუცილებლად შავ კატად გადაიქცეოდა და სადღაცა გადაიკარგებოდა, თენებაზე ისევ მოვიდოდა, შეძვრებოდა შინ და ადამიანად იქცეოდა.

#### ა ლ გ ო მ ა (ახმაზა)

ეს დღეობა კვირას დღით იწყება. დასტურნი ხომ მუდამ სალოცავში იყვნენ და ლუდიც მათგან იყო დამზადებული. დილას ხევისბრებიც მოვიდოდნენ. ხატში მოსვლამდინ ხევისბრები ხუთმეტი დღით ადრე წმიდობდნენ. იბანდნენ ხშირად ტანს და ისეთ ადგილებში არ გაივლიდნენ, სადაც დედათწესიანი ქალები დადიოდნენ. დღეობის წეს-

რიგი ჩვეულებრივ მიმდინარეობდა, მხოლოდ აღდგომა-დღეს ყველა კომლი ხატში მიიტანდა ქადა-საწირავთ. ქადაზე დებდნენ სამ ხაეწიან პატარა ქადისკვერს. ქადს დაჭრიდნენ ხთიშობელში ნაწველ-ნადღეების სამხვეწროდ. ერთ კოტორს გამოჭრიდნენ და სამ წილს პატრონს უბრუნებდნენ. ქადისკვერს აგროვებდნენ ბავშვებისათვის დასარჩევლად. აღდგომას ზვარაც (ზვარაკი) ბევრი მოდიოდა. დამარხვებოდა თუ არა, ფშავის ხატებში საკლავს აღარ დაკლავდნენ. ზვარას გაზრდა არ შეიძლებოდა და დაკვლამდე არც დედისათვის მოშორება (ასხლეტა). ზვარა უნდა დაკლულიყო პირიქიანი. ისე ჩვეულებრივ ოთხი კვირისას კლავდნენ. ახლა კი რადგან მარხვა გრძელია, ბევრს უხდებოდა ექვსი-შვიდი კვირაც აღდგომამდინ, ამიტომ ძალიან გათამამებული ზვარები მოდიოდა. ფშავლებს ბევრი ძროხები ჰყავდათ და ზვარაც ბევრი იყო, განსაკუთრებით ამ დღეებში, რადგან დიდმარხვის ხანებში იცის ხბოიანობა ძროხების უმრავლესობამ. როგორც ქადა იჭრებოდა ნაწველ-ნადღეების სამხვეწროდ, ისევე ზვარა დაიკვლოდა საქონლის სამხვეწროდ. ხევისბერი იტყოდა: „შენ სასახლოდ იყოს ეს ზვარაკი და შენ მეხვეწურთ კაცისა და საქონის სამწყალობნელოდ, ადგილის დედაო ხთიშობელო, ჩვენო სალოცაო (ხევისბერების და მკითხავეების ენით ზვარაკი იყო, ხალხი კი ზვარას უწოდებდა). უშველე შენთ მეხვეწურთა, მადლი და ბარაქა დაუტანე წარის ნაქნავსა და ფურის ნაწველსა“ და სხვა.

ზვარების მიმყვანთა გარდა სხვა მეზღვნეც მოდიოდა და იმართებოდა კარგი დღეობა. სოფელი მოვიდოდა და საჯარეში დასხდებოდა. ამათ მისცემდნენ თავის კუთვნილ ლუდს და აქაც სმა იმართებოდა. ქალებს ქადები მოჰქონდათ. მათი ჯარი იმართებოდა ხატიდან მოშორებით. იმათთანაც გაჰქონდათ ლუდი. ახალგაზრდა ვაჟებიც გავიდოდნენ და იმართებოდა ლხინი და თამაშობა-მხიარულობა. რომ მოშუადღევდებოდა, ხევისბერი ჩვეულებრივად წინდებიანი მივიდოდა საზარესთან და დარეკდა. სოფელი და სხვა მლოცავეი ხალხი ქუდმოხდილები დგებოდნენ და იწერდნენ პირჯვარს. ზარის ხმაზე ბავშვები ცალკე გაერჩეოდნენ და უყურებდნენ ხევისბერს. ხევისბერი რომ დაბრუნდებოდა, მიუტანდნენ ქადისკვერებიან ბაკანს. ის ოროლ-სამსამობით იღებდა და უგორებდა ბავშვებს. ბავშვები, ვინც რას მოასწრებდა, იტაცებდნენ. ვინც პატარები იყვნენ, მათ დაუძახებდა და ხელზე დაუდებდა კვერებს. აქედან მობრუნებული მოვიდოდა ხალხთან და ეტყოდა: „წყალობა მოგიტანეთ პირქუშისა, წყალობით იყოს თქვენზე და თავის ყმათაზე“. — „თქვენიც მწყალობელი იყოს“, უპასუხებდა ხალხი. ამის შემდეგ თუ ვინმეს შეთქმული ჰქონდა, სუფრებს გამართავდნენ; იმართებოდა სმა-ჭამა და მხიარულება. ზვარას ხორცი პატრონს მიჰქონდა, რჩებოდა დასტურ-ხევისბერებს თავი და ერთი მხარი.

აღდგომა იყო ერთ დღეს, საღამოზე გამოილოცავენ. დასტურნი აქ რჩებოდნენ, ხალხი და ხევისბერები კი შინ წავიდოდნენ.

აღდგომის სამშაბათს ყველა ოჯახში დიასახლისები ცხრა-ცხრა ჭავიწიან კვირებს გამოაცხობდნენ და ერთს უგულო საწირავს (საწირავი აწერილია სხვა ხატებში და ყველგან ერთნაირი იცინან). ნატეხარაში გააღნობდნენ სანთელს (ნატეხარა იყო თიხის ჯამის ნატეხარამე ან სხვა ისეთი რამ, რომ სანთელი გამდნარიყო), ჩააგდებდნენ შიგ გამდნარ სანთელში თიკვის პირს რამეს (ფაბრიკული ქსოვილის ნაჭერი) და მოუკიდებდნენ ცეცხლს. თიკვის პირს ცეცხლი აღარ გაუქრებოდა მანამ სანთელი სულ არ ამოიშრიტებოდა. დედაკაცები თვითონ ახსენებდნენ ამ კვერებს და ანთებულ სანთელს სახლის ანგელოზისთვის (ფშავში სახლის ანგელოზს ეძახიან, ხევსურეთში სახლის ანგელოზსაც და მეკეზისწვრე ანგელოზსაც, წარმოდგენა სახლის ანგელოზზე ერთნაირი იყო, ფიქრობდნენ, რომ ყველა სახლს ჰყავდა ანგელოზი. უამასოდ არ შეიძლებოდა. დედაკაცები დაწოლის დროს ჯერ ღმერთს სთხოვდნენ და იმ ადგილის სალოცავს, რომ ღამით მშვიდობიანი ძილი და მშვიდობის დილა გასთენებოდა თავისი ოჯახის წევრებით. მერე იტყოდნენ: სახლის მამკაურო მეკეზისწვრეო ანგელოზო, და იმასაც თხოვდნენ (დახმარებას). ხსენებაში საჭირო არ იყო არც ხევისბერი და არც სხვა მამაკაცი. დედაკაცს უფლება ჰქონდა სახლის ანგელოზისათვის თვითონ მოეხსენებინა კვერები და სანთელი.

## ამაღლება

ამაღლება სხვა დღეობების მსგავსად არ იცოდნენ, დასტურნი ლუღს არ ამზადებდნენ. არ წესობდა ლუღის დუღება ამაღლებას. მხოლოდ ხევისბერი კი მოვიდოდა და თუ ქადას ვინმე მოიტანდა, იმას გასჭრიდა.

## სერობა

ამაღლების შემდეგ მოვიდოდა დღეობა სერობა. დასტურნი, როგორც ზემოთ ითქვა, წელწადში ორჯერ იცვლებოდნენ — გიორგობას და ამაღლებას (ეს ამბავი ამაღლების მოკლე აღწერაში გამოგვრჩა). ამაღლებას გამოიცვლებოდნენ ორივენი, ზელმხარს ინათლავდნენ და დაიწყებდნენ სადასტუროში ცხოვრებას. რადგან ამაღლებას ლუღი არ არის და პატარა დღეობა იყო, არც თას-განძი მიჰქონდათ და სერობამდე რჩებოდა ისევე ძველ დასტურთა განკარგულებაში. სერობას ლუღიც მზადდებოდა, დრომაც გამოდიოდა, სასანთლეში სანთლებიც ენთებოდა, ზარიც ირეკებოდა. ყველა წესი სრულდებოდა, რაც კი ხატს უწესობს. ამიტომ ძველი დასტურნი ახალთ აბარებდნენ თას-განძსაც



და სხვა რახატო ქონებასაც. ლუდი ამ დღეობაში ახალ დასტურთაგან მზადდებოდა, პურიან ბეღელსაც იმათ გადააბარებდნენ ძველი დასტურები. ერთ-ერთი მათგანი ჩაიბარებდა, მხოლოდ ვიდრე საჭირო არ იქნებოდა, შიგ არავინ შევიდოდა (საპურეში შედიოდნენ შემოდგომაზე და გაზაფხულზე და მაშინ ინათლავდნენ ხელ-მხარს). სერობას შეასრულებდნენ ყველა იმ წესს, რაც სხვა ხატებში არის აღწერილი. მეზღვენ ბევრი მოდიოდა, რადგან ამ დღეობაში გზა ყველგან არის გასული და საკლავსაც ადვილად შოულობდნენ, რადგან მთებში ზევრი ცხვარი იყო მოსული (ხატებში ფშაველები გაბეჩავებულ საკლავს არ დაკლავდნენ, რეტიანი ხომ შეუძლებელი იყო ხატში დაეკლათ; ყოველთვის კლავდნენ შერჩეულს. ხევსურეთში პირიქით; ვისაც ზღვრობა უნდოდა და თავისი ცხვარი არ ჰყავდა, სოფლებს შემოიკვლიდნენ — სახარჯო ბატკანი თუ ვისმე გყავთ მოგვეყიდეთ, სული ედგეს, ხატში მიაღწიოს ცოცხალმა და სხვა არაფერი მინდაო. არც რეტიანს იწუნებდნენ და მოპარულის დაკვლასაც არ ერიდებოდნენ). ამ დღეობაში შორიდანაც მოდიოდნენ. უმრავლესობას შეთქმული ჰქონდა სუფრის გაკეთება. ეს ისეთივე წესით სრულდებოდა, როგორც იახსარში გვაქვს აღწერილი. იდგა საყეინო და სვამდნენ ლაშარის ჯვრის პიროფლიანთ შასანდობარს. დანარჩენი წესები სრულდებოდა ყველგან ერთნაირად. სერობას პირქუში კურეტიბიც ბევრს მოუდიოდათ. დღეობა იყო ერთ დღე-ღამეს, მეორე დილას გამოილოცავდნენ. სერობას პირქუშში ფერხისა იცოდნენ. პირქუშისა და ხთიშობლის ნიშნები ახლო-ახლო იყო. პირქუშში დააბამდნენ ფერხისას და გადავიდოდნენ ხთიშობელში ფერხისულის მღერით. აქ ლუდი პირქუშიდან იყო გადატანილი და ფერხისაში ჩაბმულ ხალხს დაშლამდე დაალევიებდნენ. როცა ყველა დალევდა, სიმღერისთავი იმღერებდა:

„მცხეთა აივსო კირითა, თქვენი ღუშმანი კირითა“

და დამთავრდებოდა ფერხისა. მეორე დღეს საღამო ხანზე გამოილოცავდნენ.

## შ ა რ ი ა ნ ო ბ ა

სერობის შემდეგ მოდიოდა შარიანობა. იგი ჩვეულებრივი დღეობა იყო. ახალი წესი არაფერი სრულდებოდა. ლუდი დამზადებული იყო დასტურთაგან და მეზღვენს ამით სცემდნენ პატივს. სოფელიც მოვიდოდა, საჯარეში დასხდებოდნენ და თავის კუთვნილ ლუდს მოიკითხავდნენ. იმართებოდა მხიარულება. მერე მოვიდოდა გიორგობა და დასტურნი იცვლებოდნენ. ამალეობას დამდგარი დასტურნი განთავისუფლდებიან გიორგობას.

ხთიშობელი ანუ ადგილის დედა ყველა თემს ჰყავდა; თემში შემავალ სოფლებსაც ჰყავდა თავ-თავისი ხთიშობელი თითო-ოროლა სოფლის გამოკლებით. ვიცით, რომ ყველა მცხოვრებს მიჰქონდა ხთიშობელში ძროხის ნაწველის ნათავარის ქადა, კლავდნენ ზვარას, მიჰქონდათ კელაპტარი და საკლავსაც კლავდნენ. მაგრამ ხთიშობელს ყველაზე პაწაწინა თავისი საკუთარი მამულიც არ ჰქონდა სალუდე-სადასტურო, ზაბერო და სხვა. არც დასტურ-ხევისბრები ჰყავდა საკუთარი. პირიქით-პირაქეთ ფშავში სამი ხთიშობილი იყო (პირიქით ფშავი — ივრის ფშავი და პირაქეთი — ფშავის ხეობა): ერთი მუქუში, მეორე უკანა-ფშავში და მესამე ბაჩალში (ბაჩალი სოფელია ივრის სათევეში), რომელთაც ჰქონდა ყველაფერი საკუთარი: მამული, სადასტურო, საბერო, ზალუდე, საზარე, ბელელი, საღვინე ანუ მარანი და სხვა. ჰყავდა საკუთარი დასტურ-ხევისბრებიც — ასეთ ხთიშობელს ეწოდებოდა „მოხარნადე ხთიშობელი“. მოხარნადე იმიტომ, რომ სანადო მამულები ჰქონდა და მისი დამუშავება ხარ-ნადით ხდებოდა. ყველას ხარები მუშაობდა ნადით, ერთობით. მოხარნადე ხთიშობელი ყოფილა დიდი და ძლიერა სალოცავი. სხვა ხთიშვილებში მასზე ძლიერია მხოლოდ ლაშარის ჯვარი, რადგან ბევრნი ყმანი ჰყავდნენ.

მუქუს ხთიშობელს ჰქონდა საკუთარი მამული თავისი საარსებო ადგილის დასაველეთ მხარეს; ეწოდებოდა ხატის სანადო. ხატიდან ასე შეტრის მანძილით დამორებული ჰქონდა აგრეთვე მამული ხოდაშენში, კახეთში, თელავის რაიონში, სადაც ვენახი ჰქონდა გაშენებული. ჰყავდა თავისი მეზვრე, ჰქონდა მარანი, სადაც პატარა კოშკიც იდგა დროშის ჯაბძანით. მეკულუხე რომ მივიდოდა, დროშა ამ კოშკთან დაბძანდებოდა, აქ მოსული მეზღვის საკლავებიც კოშკთან იხოცებოდა (ზემთ გამოგვრჩა: ხსენებულ დიდ ხთიშობლებს დროშებიც თავისი ჰქონდა და მედროშეებიც თავისნი ჰყავდა. დანარჩენ წვრილ ხთიშობლებს დროშები არ ჰქონდათ და არც მედროშენი ჰყავდათ. აქ დროშა შიჰყავდათ ან სათემო, ან სასოფლო ხატებიდან, რომელ სალოცავთანაც ახლო იყო, იმისი დროშა მიდიოდა).

მამულებს ეწოდებოდა სანადოც და ხოდაბუნიც. ამუშავებდა სოფელი. აგრეთვე მათი განაყრებიც მოდიოდნენ სხვა სოფლებიდან და ეხმარებოდნენ ხენასა და მკაში. ხენაში მოხმარება გადასულეებისაგან ძნელი იყო, რადგან შორს იყვნენ გადასახლებულნი და ხარების მოყვანა უძნელდებოდათ, მკაში კი მოდიოდნენ და ეხმარებოდნენ. ისეთ დროს ხნავდნენ გამოანგარიშებით, რომ მარიანობას სამკალი ყოფილიყო. მაშინ აქ მთავარი დღეობა იყო და სალოცავად უპირველესობა მოდიოდა. მოსული მლოცავი ხოდაბუნებსაც მომკიდა, თუ ამინ-

დი ხელს არ შეუშლიდა. ნადისათვის განსაკუთრებით ცალკე იყო  
ლუდი დამზადებული და საკლავებსაც ცალკე კლავდნენ. მომკილ  
ძნებს დააგროვებდა ადგილ-ადგილ ხალხი და დასტურები ააგებდნენ.  
ამის შემდეგაც უვლიდნენ, რომ არ დაშლილიყო და არ დამპალიყო.  
შემოდგომაზე დასტურნივე მოიტანდნენ ძნებს კალოზე, დადგამდნენ,  
გალეწავდნენ, ერთ-ერთი დასტური ხელ-მხარს ინათლავდა და პურს  
ჩაყრიდა ქვისგან აშენებულ საბურე ბელელში (ბელელი ქვითყირისაჲ  
და დღესაც არ არის დაზიანებული, მხოლოდ პური აღარ ინახება შიგ.  
რადგან ხალხი არ ამუშავენს ნადით, თავ-თავისთვის ხნავენ და პურს  
ოჯახიდან ხარჯავენ საჭირო დროს). ნადის დროს თავზევისბერი გა-  
შოაცხადებდა: ამა და ამ დღეს ხატის მამულზე ნადი არის დანიშნული  
და ყველა მოდიოთ გამართული ხარ-გუთნითო. ხალხი დანიშნულ დღეს  
მოგროვდებოდა და ყველა შეაბამდა გუთანში ხარებს. ხევისბერი და-  
მწყალობნებდა: „გწყალობდესთ დედა ხთიშობელი ყმათა და ხარნად-  
ში მონაწილე ხალიხით მომსვლელთა, ერთგულ მუშათა, მშვიდობისა  
და ღალიან ბარაქიანი წელი დაფიყენოსთ, კარგი მოსავალი მოგვე-  
როსთ და მრავალჯერ მშვიდობით მოგიყვანოსთ დალოცვილის კარ-  
ნადში“. გუთნისდედა, მეხრეები ყველანი თავ-თავის გუთნებთან იდ-  
გნენ ქუდმოხდილნი და ხევისბერის დამწყალობნების შემდეგ იტყო-  
დნენ: „გწყალობდესთ ყმათა, დასტურ-ქვევისბერთა და ერთგულ მუშა-  
თა“. ამის შემდეგ ყველა გაუჯვარდებოდა ხარებს და დაიწყებოდა  
ხენა. დასტურ-ხევისბრები კი ლუდიან კოდს ჩვეულებრივი წესით გახ-  
სნიდნენ, ორს ან სამს სასოფლო საკლავს დაკლავდნენ. დასტურნი  
ხორცს მთლიანად მოხარშავდნენ. ეს ხდებოდა იქვე ახლო, ხატში. ქვა-  
ბით ლუდს მიიტანდნენ ერთ-ერთ საშუალო ადგილზე და კიდევ და-  
მწყალობნებდნენ: „გწყალობდესთ ხთიშობლის ხოდაბუნზე მოხარნა-  
დეთა ყმათა და ერთგულ მუშათა“. მერე ხარებს პირალმოსავლეთისაკენ  
დააყენებდნენ, ლუდთან მოგროვდებოდნენ და ყველანი დალევდნენ.  
ყველა დაილოცებოდა და დამწყალობნებდა ყმათ და ყმათაგან  
ხარნადში მონაწილეობის მიმღებთ. კარგა ხანს ისვენებდნენ და  
წვამდნენ ლუდს (მოსულეებს მოჰქონდათ საწირავნი. აწერილია  
იახსარის დღეობებში). ხენა რომ მოთავდებოდა, თესლს თესავდა  
ხელმხარნაათლი დასტური, რომელსაც ებარა ბელელი. ერთი დას-  
ტური ფარცხავდა, ფარცხზე ბავში ეჯდა. რომ მორჩებოდნენ, წა-  
მოვიდოდნენ ხატში. აქ დახვდებოდათ მოხარშული ხორცი და პური  
(საწირავები დაიჭრებოდა), ხალხი დასხდებოდა ბუხნოზე უსკამოდ.  
ხელზე ჩამოარიგებდნენ პურს და ხორცს. ყველანი დაილოცებოდნენ:  
„ღმერთო და დედაო ხთიშობელო, უშველე შენთ ყმათა და კარნადში  
მონაწილეთა, შენის წყალობით შეინახენ, ბევრი მშვიდობის კარნადო-

ბა მოკვვარე, დალოცვილო, შინ მშვიდობა მიეცი და ველთ გამარჯვება“. ამის შემდეგ დაიწყებოდა სმა-ჭამა დაღამებამდე.

დასტურები დგებოდნენ მარიანობას (ორი კაცი). ხატის არჩევით, მკითხავითა და უფრო ხევისბერის სიტყვით, რადგან ხევისბერი ასრულებდა შუამდგომლურ თანამდებობას ხატსა და ხალხს შორის. დასტურად დგებოდა წოწკურაულთ გვარში ყველა მამიდან, როცა ხატი უბძანებდა თავის ხევისბერის პირით. დასტური ერთ წელიწადს იცხოვრებდა სადასტუროში. მას არ შეეძლო თავის სახლში მისვლა, არც იმ ადგილებში გავლა, სადაც „მირეული ქალები“ დადიოდნენ. პურსაც არ ჭამდნენ ქალის გამომცხვარს, თუ ის ხნიერი არ იქნებოდა. ხევისბრობა უფრო ხუმარათ მამაშვილობას მოუდიოდა. დასტურობასაც კი ასრულებდნენ შეხვედრის დროს ხუმარათ მამის კაცები, მაგრამ თავხევისბერი იმათ მამიდან უფრო დგებოდა. ხთიშობელს ეყმობოდნენ მთლიანად წოწკურაულნი, ესენი კიდევ იყოფოდნენ მამებად. წოწკურაულთა ძველი გვარი იყო გიგაური და მერე წოწკურაულად დაეწერნენ (გიგაური იყო ბლოელი ხევსური და იმისგან გამრავლებულან). მათი მამებია: პაპიანი, ცქიფანი (ცხოვრობენ არბაჩხანში — მაღაროსკარის სასოფლო საბჭოში, ნაწილობრივ ხეობაში, ნოჯასა და ფიქვიანში), ხუმარანი (ცხოვრობენ: ნოჯაში, ხეობასა და ფიქვიანში), ღვდლიანნი (ხეობაში), ზარავანდანი (ხეობაში), ბერანი (მუქქუში), ხადილანი (არბაჩხანში და პანკისში, ჩაბანოში), ლომანიც, ცქიფათ ახლობლები. არბაჩხანში არიან, ლუბიანურნი არიან ჯარით გაფიცულნი. ისინი ახლა იწერებიან წოწკურაულად. არიან ძირად ზვიადაურნი, არდოტიდან გადმოსულნი. ბაწაწანიც არიან კახეთიდან გამოქცეული კაცის შთამომავლობიდან. გამოქცევივა ბატონს და შეხიზნულა წოწკურაულთ თემში, გაფიცულა ხთიშობლის ხატში და დაწერებულა წოწკურაულად. ახლა არიან სრული ყმანი.

მთავარი დღეობა მარიანობა იყო ხთიშობელში.

## მარიანობა

ხსენებულ დღეობაში ძველი დასტური, რომელსაც საპურე ებარა და ხელმხარი ჰქონდა ნანათლი, ახალ დასტურთ პურს აუწყავდა იმ რაოდენობით, რამდენიც დაწესებული იყო მარიანობისათვის. ახალდამდგომი დასტური ალაოს გააკეთებდენ (ფორი ხევსურულია, ალაო ფშაური) და, როგორც ვიცით, იმავე წესით დაამზადებდნენ ლუღს. მარიანობა-დილას დასტური მდინარეში ან ხადმე წყაროზე გაიბანებოდნენ (ტანს დაიბანდნენ), გამოაცხოზდნენ ჭადას, საწირავთ, დაახვევდნენ თითო კელაპტარს, წაიყვანდნენ თითო საკლავს და მივიდოდნენ ხატში. ამ დროს ხევისბერი, ძველი და ახალი დასტური დადგებოდნენ სასაკლავოსთან (ძველ დას-

ტურთაც თითო საკლავი ჰყავდათ მოყვანილი, ქადა-საწირავთან ერთად), პირველად ძველი დასტურნი დადგებოდნენ მარჯვენა მხარეზე და ხევისბერი მათ გამოსალოც საკლავებს დაკლავდა. შეახვეწებდა გადამდგომ დასტურთ და სთხოვდა ხთიშობელს ეპატიებინა მათთვის, რაც სცოდეს ამ ერთი წლის მანძილზე მის სამსახურში და სთხოვს, რომ კვლავ მშვიდობით მიარგინოს დასტურობა. საკლავები რომ დაიკვლებოდა, ძველი დასტურნი გადმოდგებოდნენ მარცხნივ, ახალი დასტურნი კი მარჯვენა მხარეზე დადგებოდნენ. ხევისბერი ახალ დასტურთ დაამწყალობებდა და დაკლავდა მათ საკლავებს. დასტურნი საკლავის სისხლით ხელებს გადაიბანდნენ, გულს გაიხსნიდნენ და ხევისბერი სისხლით ჭვარს გამოუსახავდა. მერე იქ მყოფნი წყალობას ეტყოდნენ: „გწყალობდესთ ახალ დამდგომ დასტურთ, მშვიდობით გაგატარებოთ შისი სამსახური და კვლავად კიდევ უკეთესი გულით მოგარგინოსთ დასტურობა“. მერე ერთ-ერთი დასტური კოშით ლუდს მოიტანდა, რომელიც წინასწარ იყო გამზადებული ამ დროისათვის, ანთებულ კელაბტარს დააკრავდა და ხევისბერი კიდევ დაილოცებოდა, დაამწყალობებდა ახალ დასტურთ, სხვებიც დაღვედნენ ლუდს და ანთებული სანთლითა და თასით ახალდამდგომ დასტურთ ამწყალობებდნენ. ეს თასიც რომ მოთავდებოდა (ეს ხდებოდა გარეთ, სასაკლაოზე, ვიდრე ახალი დასტურნი ხატში შევიდოდნენ), ხევისბერი ახალ დასტურთ დარბაზში შეუძღვებოდა. ისინიც ქუდმოხდილები მუხლზე დასხდებოდნენ. კარის ასთევებს (ჩარჩოებს) აკოცებდნენ და მუხლის კერით (ჩოქით) შევიდოდნენ დარბაზში, თან ეხვეწებოდნენ ხთიშობელს: გვაპატიე უღირსთ, რომ შენი ზღურბლი დაველახეთო. ადგებოდნენ ფეხზე და ხევისბერი მოულოცავდა დასტურობის დაწყებას და ხატში შესვლის ღირსების მოპოვებას. უსურვებდა სამსახურის მშვიდობით და უცოდველად შესრულებას. კიდევ აანთებდნენ კელაბტარს და სთხოვდნენ ხთიშობელს: იმსახუროს უღირსი ყმები და მისცეს იმდენი გონება, რომ ამ წლის ბერობის მანძილზე განზრახვა და ფიქრიც კი არაფერზე მოუვიდეს ისეთი, რაც ეწინააღმდეგება წლის ბერის ცხოვრების წესებს. ხევისბერი ესაუბრებოდა მათ, თუ რა ევალეობდათ, რა შეუძლიათ გააკეთონ და რა არ შეიძლება, რა ადგილზე შეუძლიათ მისვლა, რომელია აქ მათი კუთვნილი სკამი და ადგილი და სად არა აქვთ უფლება დაჯდომისა. მერე გავიდოდნენ გარეთ, გაუტანდნენ ხალხსაც ლუდს და ახალ დასტურთ სადღეგრძელოს ყველა დაღვედა.

ახალი დასტური ძველისაგან ამავე დღეობაში ჩაიბარებდა განძს, მარტო სპილენძს. ვერცხლის თას-განძი კი ერთ-ერთ ხევისბერს ებარა (განძი ხევსურეთში მარტო ვერცხლეულს ეწოდება, ფშავში კი სპილენძის ჭურჭელსაც, რაც ხატში არის). ახალი დასტურნი უვლიდნენ

ხალხს, მეზღვნეებს. საკლავების გატყავება აქ დასტურს. არ ევალეზობდა, თვითონ პატრონი ვაატყავებდა, საკლავის ნასხეპს ხატის მსახურთ მისცემდა, მეორე ნასხეპი თვითონ რჩებოდა (ნასხეპი — ხეცსურულად „ფელკი“, — ჰქვიან საკლავის ნახევიარს ზურგის ტვინზე ვაჰრილს), ვისაც „სუფრის დაგება“ ჰქონდა შეთქმული, ამ ნასხეპსაც მოხარშავებდა, სუფრას გამართავდა და ხევისბერს მოიყვანდა. ის შენდობას ეტყოდა ამ სუფრის პატრონის მიცვალებულისათვის. სუფრის პატრონი ხალხს მოიწვევდა, ხორცს და პურს ხელზე ჩამოარიგებდა, სალაღებელსაც. სუფრაზე დაუწყობდა თავის წილ პურს და ხორცს, ვინც პატივსაცემი კაცი იყო. მერე მოაყოლებდა ერთი ყანწით და ხალხს დალაღვინებდა პირველად ამ მიცვალებულის შესანდობარს. მერე მოაყოლებდნენ სხვადასხვა შესანდობარს საღღეგრძელოებს. ასეთი ამბები მთელ დღეს გრძელდებოდა. დასტურებიც მოხარშავდნენ მათთვის მიცემული ნასხეპების ხორცს, დაჰრიდნენ ქადა-საწირავების ნაწილ პურებს და გამართავდნენ სუფრას დარბაზში. ამ სუფრას ჰაერთოდ ეტყოდნენ შენდობას, საკლავების შემომწირველთა ე. ი. მეზღვნეების მიცვალებულთათვის. შეიძლება გარეთაც გამოეტანათ სუფრის ნაწილი და ხალხი დაეპატიჟათ.

ხევისბერი ხალხს ეტყოდა: ხატი უნდა გამოვაბძანოთო. ხალხი ქუდმოხდილი ფეხზე ადგებოდა, ხევისბერი გამოაბძანებდა ღვთიშობლის ხატს, ქრისტიანული ღვთიშობლის სურათს. ხელში დიდი კელაპტარიც ეჭირა და დაამწყალობებდა ხალხს. ხალხი დააბამდა ფერხისას, შემოუვლიდნენ ეკლესიას გარშემო ფერხისით (აქ ძველი ეკლესია იდგა, მთხრობელმა თქვა: ვიდრე ეს ეკლესია იქნებოდა, ალბათ დარბაზს და ან სხვა ასეთ რამეს შემოუვლიდნენო); ფერხისა იყო ხელი-ხელს ჩაკიდებული ხალხის წრე. მღეროდნენ ორ გუნდად. სიმღერის თავი ერთი იყო და იმის მოპირდაპირე მხარეს მეორე მომღერალი იმეორებდა პირველი სიმღერისავე სიტყვებს, პირველს პირველი მხარე აძლევდა ბანს. მეორე მხარე ჩუმად იყო, ვიდრე პირველნი სიტყვას სიმღერთ დააბოლოებდნენ; შემდეგ ამავე სიტყვებს მეორე მომღერალი მღეროდა და მისი მხარის ხალხი ბანს აძლევდა. მღეროდნენ საგმირო სიმღერებს. უფრო ვავრცელებული იყო შემდეგი სიმღერები:

თუ მკითხნათ, ამბავს ვიამბობთ: ჩემსა და ხირჩლას ძისასა,  
შევიყარენით მარტონი სამძღვარსა მუხრანისასა,  
პური მთხოვა და ვაჰამე, ირჩევდა თათუხისასა,  
კორცი მთხოვა და მივართვი, ირჩევდა ხოხობისასა,  
ღვინო მთხოვა და მივართვი, ირჩევდა ბადაგისასა,  
ცოლი მთხოვა და ვერ მივეცი, მიმყვანდა სიღერისასა,  
წამოსწავდა, ხელს ვაჰკიდა ნაჰაანსა ვიშლის თმისასა.

ქალმა დაიწყო ტირილი — იმედს ვარ ცუდაისასა,  
კელი გავიკარ ხანჯარსა, ნაჩუქარს ცოლისძმისასა.  
წინ-წინ იმანავ დამასწერა, ელესა ჰგევანდა ცისასა,  
ერთ კი მეც გადაუქნიე, წვერი უწვდინე ქვიშასა,  
მე აქ მოგივედ, ბატონო, ის იქავა ქამს მიწასა.

აქვე ახლო, ხატის აღმოსავლეთ მხარეს, პატარა კოშკი იდგა და ფერხისა იქით გაემართებოდა: ჩავიდოდნენ კოშკთან სიმღერით. ფერხისას წინ მიუძღვებოდა ხევისბერი, რომელსაც ხატი ეჭირა ხელში. ამ ნიშნაც სამჯერ გარშემო შემოუვლიდნენ. მესამედ რომ შემოუვლიდნენ, ფერხისა დაიშლებოდა. ყველას ჰქონდა სანთელი და ხევისბერებს აძლევდნენ. ხევისბერი სანთლებს ერთად აანთებდა და ახვეწებდა ყმათა და სანთელ-კელაპტრის შემომწირველთ. ხალხი ამ ნიშთან ახლო დასხდებოდა და გამართავდნენ ღვინს. სასმელი ხალხსაც მოჰქონდა და ხატის ლუდიც ჰქონდათ. საკლავი კი ამ ნიშთან არ დაიკვლოდა. კლავდნენ მარტო დარბაზთან დანიშნულ სასაკლაოზე. იცოდნენ ერთმანეთისათვის შემღერება. თურმე ერთი გოგოლაური ამ ხატში მოვიდა და საკლავი და სანოვაგე სახედარით ამოზიდა. ამავე ხატში მოსულმა წოწკურაულმა შემღერნა მას:

მე კი არ გამოგონავის ხატში წამოსვლა ვირითა,  
ამოჩნდა საჯარეშია, იმ დღეს სუ მოკვდა ყვირილსა,  
გულ მეწეის იმის ცოდვითა, აღარა მიკლავ ტირილსა.

ასეთი შემღერებები მთელ დღეს გრძელდებოდა, იმართებოდა ჩონგურ-გარმონის დაკვრა და თამაშობა. საღამომდე ამ ნიშთან ატარებდნენ დროს. საღამოზე ხევისბერი გამოაცხადებდა ხატის და დროშის მიბძანებას თავის ადგილზე (ზემოთ გამოგვჩა: დროშა გამობძანდება შარტო მარიანობას, სხვა დღეობებში არ გამოდის. ფერხისას რომ დაამბენ და ნიშისაკენ ხატის წინამძღვრობით გაემართებიან, მაშინ დროშაც მხარდამხარ მიჰყვება ხატს. დროშას ნიშზე მიაყუდებენ და ხატს კი კოშკზე დაბძანებენ მისთვის განკუთვნილ ადგილზე). მედროშე ააბძანებდა დროშას, ხოლო თავხევისბერი ხატს; ხალხი ისევ ფერხისას დაზამდა და მღერით გამოემართებოდნენ დარბაზისაკენ, რომლის გვერდით საჯარეც იყო ხალხისათვის. სიმღერით და დროშის ზარის წყარუნით ხალხი მივიდოდა თავის ადგილზე. აქ დასტურნი ჩადგებოდნენ ფერხისის შუაში, დაიდგამდნენ ლუდიან ჩხუტს და მომღერლებს თასით ასმევდნენ. ამ დროს ფერხისა ნელ-ნელა გარშემო ტრიალებდა. თუ ერთი სიმღერისთავი დაიღლებოდა, ან საფერხისო სიმღერები შემოაკლდებოდა, ამ შემთხვევაში სხვა ახალი მომღერალი შეცვლიდა. როცა მოთავდებოდა სასმელი, მომღერალი გამოვიდოდა და დაიძახებდა: თუ გინდათ კიდევ ვიმღეროთ, თუ გინდათ გავათავოთო. მეორე

მომღერალი: არაღე, გავათავოთო. პირველი მომღერალი: მცხეთა აიგ-  
სო კირითა, თქვენი ღუშმანი კირითა. მერე დაიშლებოდა ფერხისა. ამ  
ლამეს მთელი ხალხი აქ გაათევდა მღერა-თამაშით და ერთიმეორის  
თავ-თავის ბინაზე გადაპატიყებით (მოსულ მლოცავებს ყველას თავ-  
თავისთვის ბინა ჰქონდა. ერთიმეორის ახლობლები ერთად დებდნენ  
ბინას).

მეორე დღეს ხევისბერი დილით ადრე სანთელს აანთებდა სასან-  
თლეში (სასანთლე იყო პატარა კოშკი, რომელსაც, „შუკუმი“ ჰქონდა  
დატოვებული და სანთელი ხმაში ენთებოდა, რადგან დაცული იყო  
ქარისაგან), საზარესთან მივიდოდა და მუხლმოყრილი შეეხვეწებოდა  
ხთიშობელს, რათა ეპატიებინა მისთვის მის წმინდა საზარესთან მის-  
ვლა. მერე აღგებოდა, შემოჰკრავდა ზარს და დაამწყალობნებდა ყმათა  
და მლოცავთ. ზარის ხმის გაგონებაზე ყველანი აღგებოდნენ ფეხზე  
და იწერდნენ პირჯვარს. ხევისბერი ხალხს ეტყოდა: „გწყალობდესთ  
ხატი“. „გწყალობდეს ხატიცა და ღმერთიც“ — უპასუხებდნენ ყვე-  
ლანი. თუ ვინმე გვიან მოსული იყო და წინა დღეს ვერ მოასწრო  
საკლავის დაკვლა, ახლა დაკლავდნენ. ხევისბერი და დასტურები გა-  
მოიტანდნენ „საყეინოს“ (საყეინოს დადგმა და კულუხის მოტანა აწე-  
რილია კოპალას და იახსარის დღეობებში და აქაც იმავე წესით სრულ-  
დებოდა). ზოგნი ცეკვავდნენ, ზოგნი ფშაურ სიმღერას მღეროდ-  
ნენ:

ჩენის ბატონის კარზედა ხე იღვად ამოსულაო,  
წვერად მოუსხამ ყურძენი, საჭმელად შემოსულაო.  
მაგის უკმელი ქალ-ვაჟი უდროოდ დაშულაო.

როცა კაცები საყეინოსთან იყვნენ, სვამდნენ და მხიარულობდნენ.  
მაშინ ქალები ხატის მოშორებით ერთ-ერთ ბინაზე მართავდნენ თამა-  
შობას. უკრავდნენ გარშონს და ცეკვავდნენ. მათი ხნის ახალგაზრდე-  
ბიც ხანდახან შორდებოდნენ საყეინოს და ქალებთან ერთად ცეკვა-  
ვდნენ. მლოცავებს ყველას მოჰქონდა კელაპტრები საკმაო რაოდენობით  
და მთელი ღამის განმავლობაში ანთებდნენ. მეორე ღამესაც აქვე გა-  
ათევდნენ. ღამით რამდენიმე კაცი დასტურ-ხევისბრებიდან მუდმივად  
იყო დროშასთან. სხვა ახალგაზრდებიც მიდიოდნენ და თეთრად ათე-  
ნებდნენ ღამეს, თან სასმელ-საჭმელიც ჰქონდათ და დროს ატარებ-  
დნენ. მესამე დღის ბოლოს ხევისბერი დაიძახებდა: ხატი შევებძანო-  
თო. ხალხი აიშლებოდა, დაბამდენ ფერხისას, დროშას და ხატს.  
მათი მკადრეები ააბძანებდნენ და წავიდოდნენ თავისი. სამკვიდროსა-  
კენ. ფერხისა თან გაჰყვებოდა და მიაცილებდნენ დარბაზის კარამ-  
დე სიმღერით. ეს იყო უკანასკნელი წესი ამ დღეობისა, ამის შემდეგ



შეიძლო ხალხს შინ წასვლა. თუ სამკალი იყო და ამინდიც ხელს უწყობდა, კიდევ დარჩებოდნენ მომკამლი.

## ზიორგობა

მარიამობის შემდეგ მოდიოდა გიორგობა. გიორგობას ჩვეულებრივად წესით დღეობდნენ, ერთ დღეს დასტურნი ლუდს ამზადებდნენ, თასგანძს მოიტანდა ის, ვისაც ებარა და იწყებოდა დღეობა. ხალხი აქ დღეობაშიც საკმარისი რაოდენობით მოდიოდა. ამ დღეობაში ახალწესი არაფერი სრულდებოდა, მხოლოდ „სასუქი“ ხარკურეტები და ცხვრები იხოცებოდა. „სასუქი“ შეიძლება მარტო საზამთრო სახორცედ შეენახათ და ის დაეკლათ გიორგობას, მაგალითად, დაკოპლებული ბებერი ხარი, ქედილა და სხვა. შეიძლება მომიზეზებოდაც: „აესახელა“ და გიორგობას დაეკლა, თან ხატის მიზეზით და თანაც საზამთრო სახორცედ. კურეტსაც კლავდნენ, ოღონდ ხბობიდანვე: „აასახლებდნენ“. მაგალითად, ვაჟი თუ ეყოლებოდა, ან რომელიმე ავადმყოფი მოურჩებოდა, ან სახიფათო მდგომარეობიდან ვინმე დაუბრუნდებოდა, ამისათვის ხატს შეპირდებოდა: ამ ხბოს გავზრდი, როცა ან სამი წლისა გახდება ან ხუთისა, მაშინ დავკლავო. წლოვანება უნდა ყოფილიყო კენტი, უფრო სამი ან ხუთი, ოთხის ან ორი წლისას. შემთხვევით თუ დაკლავდნენ, თორემ შესახელებით სამ წელს იტყობდნენ ან ხუთს. შესახელებულ კურეტს უფრო გიორგობას კლავდნენ იმიტომ, რომ ამ დროს საქონელი მსუქანი იყო, ზამთარიც ახლო იყო და ხორცს ინახავდნენ კასრებში ზამთრისათვის. საწველ ძროხას ან დეკეულს აქ არ კლავდნენ. სახარეს და საფურე ხბოს კი არ გაარჩევდნენ, ორივეს კლავდნენ ზღვანადაც და ზვარას დაკვლა ხომ სავალდებულო იყო. კურეტის, ხარის, თუნდ ცხვისას ერთ მხარს აძლევდნენ დასტურ-ხევისბრებს, დანარჩენი ხორცი სახლში მიჰქონდათ. თუ სუფრა ჰქონდათ შეთქმული, ხორცის ნაწილს მოხარშავდნენ და სუფრას გამართავდნენ. როცა კურეტს კლავდნენ, ხშირ შემთხვევაში ერთ საკლავსაც აყოლებდნენ თან და ამ საკლავის ხორცს უფრო მოხარშავდნენ ხატში სუფრისათვის. კურეტის ხორცი იშვიათად იხარშებოდა ხატში (ხევისურეთში კურეტს და ცხვარ-ქედილას ხატში კლავდნენ, სასუქ ხარს კი ხატში მიიყვანდნენ, იხუცებდნენ, ყურს მოსჭრიდნენ, მერე შინ წაიყვანდნენ და იქ კლავდნენ ფშავში ხარსაც ხატში კლავდნენ და აქედან მიჰქონდათ ხორცი შინ). ხატში „გაგებულ“ სუფრას აქ „ტაბლობასაც“ ეძახიან და „სუფრის გაგრძელებასაც“. ამ წესით გიორგობა გრძელდებოდა საღამომდინ. საღამოს ხანზე მლოცავიც წავიდოდა და დასტურ-ხევისბრებიც თავის მოვალეობის შესრულების შემდეგ თავ-თავის ადგილს ჩაბარდებოდნენ.

გიორგობის შემდეგ მოდიოდა ღლეობა — შობა. ღლეობა ერთი ღლე იყო ისეთივე წესით, როგორც გიორგობა. მეზღვნე ამ ღლეობაში ნაკლებად იყო, რადგან ზამთარში აქ შორიდან ადვილად ვერ მოდიოდნენ. ღლეობა დილიდან საღამომდინ გრძელდებოდა. საღამოზე ხალხი წავიდოდა. დასტურ-ხევისბრები კი აქ რჩებოდნენ წელწლის მეორე ღლემდე. ამ კვირას, ე. ი. შობიდან წელწდამდინ, ეწოდებოდა თევის კვირა. ამ კვირის მანძილზე სოფელი ღლეგამოშვებით კლავდა თითო სასოფლო საკლავს, რის ხორციც ხმარდებოდა აქ მყოფ დასტურ ხევისბრებს (ეს ამბავი აწერილია იახსარის ღლეობებში და აქაც იმავე წესით მიდიოდა შობა-ახალწლის შუა კვირა). დასტურ-ხევისბრების მოსაკითხი სოფლიდან ყველა კომლს მორიგეობით მოჰქონდა. მოსაკითხით მოსული ერთი-ორი კაცი დასტურ-ხევისბრებთან მუდამ იყო. სასმელ-საჭმელსაც არ იკლებდნენ და თან სოფლის საჭირბოროტო საქმეებზეც მსჯელობდნენ. რა ჭურჭლითაც არაყი მოჰქონდათ მოსულებს, ამავე ჭურჭელს ლუდით უვსებდნენ და ატანდნენ შინ. ამ წესით გაივლიდა ერთი კვირა და მოვიდოდა წელწადი, ე. ი. ლიტანიობა საღამო.

#### წელწადი

ლიტანია-საღამოს ყველა მამაკაცი მოიყრიდა თავს, მოიტანდნენ კელაპტრებს და საწირავთ. მოიყვანდნენ და დაკლავდნენ ერთ თიკანს, რომელსაც ეწოდებოდა სალიტანიო თიკანი (როგორც ბასილ წოჭკურაულმა ჩამაწერინა, ლიტანია-საღამოს თიკანი სხვა ხატებშიც იკვლოდა, წესად იყო თიკნის დაკვლა პირდაპირ ხტიშობლისათვის. ლიტანია-საღამოს გარდა, თიკანი ხატისთვის არ დაიკვლოდა, გარდა კვირისა. თიკანს უფრო კლავდნენ უქმის სანათლავად და ახსენებდნენ კვირას). ამ საღამოს სასოფლო თიკნის გარდა არაფერი იკვლოდა. ხორცს მოხარშავდნენ და მეკვლეებს ხელზე დაურიგებდნენ. სასმელ-საჭმელი მათ სახლიდან მოტანილი ჰქონდათ, ლუდი კი ხატში იყო მათთვის დამზადებული. ლიტანია-ღამეს მთელი სოფელი ხატში იყო, სახლებში თენებაზე წავიდოდნენ; დაამზადებდნენ სუფრებს და მიჰქონდათ ხატში. ყველა ცდილობდა, ადრე მოსულიყო და დასტურ-ხევისბრებისათვის ნაყრი ადრე მოეტანა (ნაყრი ეწოდებოდა დილას მოტანილ საჭმელს, საერთოდ საუზმეს ნაყრი ჰქვიან ფშავში). ნაყრს რომ მიიტანდნენ, თან მიაცოლებდნენ არაყს, თაფლ-ერბოს, ხილს და სხვა, თუ კი რამე კარგი სასმელ-საჭმელი ექნებოდათ სახლში; ხევისბერი დალოცავდა მომტანის მიცვალებულთათვის. დალოცვის დროს ანთებდნენ ერთ ფეხს სანთელს, რომელსაც მომტანი სახლიდან

მოაყოლებდა. ნაყრი რომ დაილოცებოდა, ყველა იქ მყოფნი ჰამდნენ. ამის შემდეგ დასტურ-ხევისბრების გარდა ყველანი სახლში ბრუნდებოდნენ. ყველას მიჰყავდა თავის შერჩეული მეკვლე. თუ მეკვლე არ დანებდებოდა, მაგალითად ერთი და იგივე მეკვლე რამდენიმე ოჯახს უნდოდა მიეყვანა, ამ შემთხვევაში ელოდებოდნენ მის მისვლას. ერთიმეორესაც სთხოვდენ — პირველად მე დამითმე მეკვლე, მე წავიყვანო, ხანდახან წილისყრამდე მიდიოდა საქმე.

მეკვლეს რომ მიიყვანდნენ, კარებთან მოაგებებდენ გოგას. მეკვლე დაიწყებდა ლოცვასა და თან სამჯერ გოგას შეაგორებდა: „ფენი ჩემი კვალი ანგელოზისა. დიდი გიმატებიათ, დიდი გიმატოსთ ახალი წლის გამოცვლამა, წულიანი, პურიანი, მადლიანი და ბარაქიანი წელი დაგიყენოსთ ჩვენმა სალოცავმა, მრავალი წელი გამოგიცვალოსთ მშვიდობისი და კარგად ყოფნისი“. გოგას შემოგორების წესი ჩვეულებრივი იყო. ოჯახის ერთ-ერთი წევრი წყალზე წავიდოდა და წაიღებდა ნაყრს. ნაყრში ეხვია პური, ქერი, გამომცხვარი პურის ნაწილი, ნახშირი, ყველის და ერბოს ნაწილი და ოჯახში რაც კი ადამიანის საზრდო იყო, გარდა ხორცისა. ნაყრს წყალში ჩააგდებდნენ და იტყოდნენ: „წყალო, ნაყრი მოგიტანე (ხევისურულად — ნიჭი), ბედი გამომაყოლეო. შენის მადლით და ხვთისა და ჩვენის სალოცავის შეწევნით წელი მშვიდობისი, კარგად ყოფნისი და მადლიან-ბარაქიანი დაგვიყენე — ერთურთის კარგად ყოფნისი და ჯანმრთელობისი“. შემდეგ წყალს ამოიღებდნენ და მოიტანდნენ შინ. ძროხებს პურს შეაქმევდნენ და ამ წყალს იაზმის მაგივრად ასხურებდნენ ყარტის კონით. ზოგიერთები ამ დილას ადრე წყალზედაც გარეკდნენ ცხენ-ძროხას და წყალს იქ დააღვეინებდნენ.

მეკვლეობა რომ მოთავდებოდა, მამაკაცები ისევ ხატში წავიდოდნენ, მიიყვანდნენ ორ სასოფლო საკლავს, დაკლავდნენ და იმართებოდა ჩვეულებრივი დღეობა. ლუდი სოფელშიც მიჰქონდათ ქალებთან და იმართებოდა ღვინო ერთ-ერთ სახლში.

წელწადი იცოდნენ ერთი დღე. წელწადის შემდეგ მეექვსე დღეს შოდიოდა წყალკურთხევა. წყალკურთხევა-დღეს მარტო სანთელი ჟნთებოდა ხატში და საწირავთაც მიიტანდა სოფლის ზოგიერთი კაცი. სასმელსაც მოაყოლებდნენ და დასტურ-ხევისბრებთან ერთად დაღვეინდნენ. ამ სასმელზე ხატსაც ადიდებდნენ.

## წი ს ო ბ ა

დიდი მარხვის მეოთხე კვირას დასტურ-ხევისბრები მივიდოდნენ ხატში და დაანთებდნენ სანთელს. სანთელს ანთებდნენ ყოველ დღე ბზობის კვირამდე. ამას ეწოდებოდა წესობა.

აღდგომა ტარდებოდა ისეთივე წესით, როგორც ზემოთ აიწერა წერილმანი დღეობები. სასოფლო საკლავი დაიკვლება, მოიხარშება და ხორცი ხელზე ურიგდებათ. ლუდი დამზადებულია დასტურთაგან და იხარჯება ჩვეულებრივი წესით.

ამაღღეზა

ამაღღეზაც ჩვეულებრივ სრულდება. ამ დღეობაში, როგორც აღდგომას, ახალი წესი არაფერია, დღეობის წესები ჩვენთვის ცნობილია. და გამეორება არ არის საჭირო.

ხატის მამულები კარგა ხანია ხალხის ხელში გადავიდა და თითო დღეობაში თითო საკლავს კლავენ ისინი, ვინც ამ მამულებს ღალავენ.

ბასილ წოწყურაულმა მიამბო: ჩვენ წოწყურაულებს მუცელგველიანთ გვეძახიან იმიტომ, რომ ზურაბ ერისთავს ჩვენი წინაპრისათვის გველის ხორცი უჭმევია. ერისთავი ტეხდა თურმე ხატებს და გაჰქონდა სიმდიდრე, თან უნდოდა ლაშარის ჯვრის მუხის მოჭრა, რომელზედაც ოქროს შიბი ყოფილა გაბმული. ზურაბმა თემ-თემის კაცები დაიბარა: და წოწყურაულთ თემის უფროსს დაავალა: ან გველის ხორცი ჰქამე, ან მასწავლე ლაშარის ჯვარის მუხა როგორ მოჭერა, ან როგორ გაეტეხო ლაშარის ჯვარიო. წოწყურაულმა არ ასწავლა, ერისთავმა დაიჭირა და აჭამა გველის ხორცი. ამიტომ დაგვედო საყვედური — მუცელგველიანნი. ცაბაურთ თემის უფროსი დაიბარა და დაავალა ძაღლის ხორცის ჰქამა, თუ არ ასწავლიდა მუხის მოჭრის ხერხს. არც ცაბაურმა ასწავლა და აჭამა მოხარული ძაღლის ხორცი, ამიტომ არის ძველი ნატირალი ცაბაურ კაცზე:

იქით მიმიდევ, ცაბაურო,  
ძაღლის მკამელო გოგოჭურო.

მესამე თემის კაცისთვის დაუვალებია: თუ გვასწავლი, გვასწავლი, თუ არა — ძმას მოგიკლავთ, იმის ხორცს მოგიხარშავთო (ეს რომელი თემის წინაპარი იყო, ბასილმა არ იცის). ეს კაციც არ დათანხმდა და აჭამეს თავისი ძმის ხორცი, მერე აფციანურს დაჰპირდა ერისთავისაჩუქრებს და იმან ასწავლა ლაშარის ჯვრის მუხის მოჭრა. მუხის ძირში დაკლეს შავი კატა და მოსჭრეს (ასეთივე თქმულება არის ბარისახოს ხმალას ხესთან, რომელსაც თურმე მირონი ჩამოსდიოდა, ძირში ქვევრები ედგა, მირონი ქვევრებში ჩადიოდა და იქიდან ხალხი იღებდაო. წვევრზე მუხას ოქროს შიბი ება და ერისთავმა რომ მოჭრა (ღულელმა არემოულმა ასეთივე მოჭრის ხერხი ასწავლა), შიბი მოწყდა,

ზეცას წავიდა, ხემ შურისციენეს დაჰკრა წვერი და ხე სულ დაიმსხვრაო. შურისციხე ხმალას სალოცავის პირდაპირ არის მაღალ ციცაბო კლდეზე.

ბასილმა დასძინა: გველი მარტო ერთ კაცს აჭამა და რა საქმელშიც ის მოხარმა, მთელ წოწყურაულთ გვარს აჭამა, ვინც ხელში ჩაიგდო. მაშინ ოცდაათობმეტი კაცი მომკვდარა გველისაგან მოწამლულიო.

## ლაშარის ჯვრის ამბავი

ლაშარის ჯვარზე და თამარ ნეფეზე ბევრ მცოდნე და ძველ ფშავლებს (ქრელ ჩიხვიაშვილს, ბიჭურ ბადრიშვილს, ბიჭუა ხახაშვილს, ივანე ნაკვეთაურს და ქრელ გოდერძაულს) დაეკითხე და, სამწუხაროდ, ეს ამბები როგორც საჭირო იყო, ისე მაინც არ ჩანს; არ ვიცი, მთხრობლებმა არ იცოდნენ, თუ მართლა მეტი არაფერი იყო.

ლაშარის ჯვარს სანადო მამულები არ ჰქონია. ჰქონდა მარტო ვენახები კახეთში. იქ ჰყავდა მეზვრე და ერთი ხევისბერიც დადიოდა ყველა დღეობაში. ღვინის ნაფასური ისევ ვენახის მუშებზე იხარჯებოდა — აქ მოჰქონდათ კულუხი სერობას (ლაშარის ჯვრის ამბები, მუხის მოჭრა და სხვა, აწერილია დღეობათა წლიურ კალენდართან, ახლა ხელმეორედ იწერება დანარჩენი ნაკრები ამბები). აქ ოთხჯვრ სცოდნით დღეობა: მთავარი დღეობა ყოფილა სერობას, მეორე მარიანობას, ახალ კვირეს და გიორგობას. ამ დღეობებში მოდიოდა ბევრი მლოცავი, თავს იყრიდნენ ბჷე-ხევისბრები და ბევრი ხალხიც ზღვენსანთლით.

მთელი თორმეტი თემი იყრიდა თავს ახალკვირეს მაისში, აღდგომის სწორის სწორზე. ამ დღეობაში მოდიოდა დროშები ყველა თემიდან, რომელთაც ლაშარის ჯვარის დროშა გამობძანებული დახვდებოდათ. გომეწარი შედის გოგოლაურთ თემში, მაგრამ სოფელ გომეწარში ჰყავდათ თავისი სასოფლო სალოცავი კოპალა, უძილაურთ კოპალას მოძმე. გომეწარი მდებარეობს ლაშარიდან დაახლოებით ოცდაათი კილომეტრის დაშორებით. ამ სალოცავს თავისი საკუთარი დროშაც ჰქონდა სხვა სახატო ქონებასთან ერთად. ახალკვირეს აქაური ხევისბერი ხელმხარს ინათლავდა, დროშას აბძანებდა და წამოვიდოდა. გამოჰყვებოდა თან ლაშარის ჯვარის მლოცავი ხალხიც. ყველას მოჰყავდა საკლავები და კარგა ბლომად ცხვარი მოიყრიდა თავს. მლოცავს წინ მოუძღვებოდა დროშა. გზადაგზა ისვენებდნენ და სმით და მღერა-თამაშით ატარებდნენ დროს. ასეთი სიარულით მოვიდოდნენ შუაფხოში. მლოცავი ხალხი ჭალაში დაბინავდებოდა, დროშა კი პირდაპირ იახსარში წაბრძანდებოდა. კოპალას დროშის ზარის ხმას რომ გაიგონებდნენ, იახსარის ხატის გამძღონიც გამოვიდოდნენ, მედროშე

დროშას ააბძანებდა და გაეგებებოდნენ გზაში; გაიტანდნენ კოშით ლუდს. მოსული და იახსრის მედროშენი ხმამაჟღერებლად წინ წამოდგებოდნენ, დროშებს მხრიდან ჩამოიღებდნენ და თითქოს კაცმა კაცს აკოცაო, ერთი დროშის ჯვარს მეორე დროშის ჯვარზე დაამთხვევდნენ. მერე ცოტა განზე გადგამდნენ ნაბიჯს და ერთიმეორეს ეტყოდნენ: გამარჯვება ბატონ-ყმათ, გწყალობდესთ ბატონი. ამ სიტყვებით მედროშენი ერთიმეორეს ხელს ჩამოართმევდნენ, პირზე აკოცებდნენ და მოულოცავდნენ: „გწყალობდესთ ჩვენი სალოცავები. ბევრი ეს დრო მშვიდობისა მოგგვაროსთ დალოცვილმა, მშვიდობის და კარგად ყოფნისი“.

ამის შემდეგ სანთელს აანთებდნენ, დააკრავდნენ ლუდიან კოშზე და ადგილობრივი ხევისბერი აღიდებდა ფშავის სალოცავებს. პირველად ახსენებდა ლაშარის ჯვარს და დაამწყალობებდა ფშაველთ, ლაშარის ჯვარის ყმათ. მერე მოჰყვებოდა და თორმეტი თემის ყველა სათემო სალოცავს ახსენებდა და ყველა სალოცავის სახელით ამწყალობებდა ლაშარის ჯვარის ყმათ. შემდეგ ამ თასიდან ცოტას დალევდა ის, ვინაც ახსენა და ახლა მოსულ ხევისბერს გადაულოცავდა. ისიც დაამწყალობებდა და დალევდა ცოტას. მერე გადასცემდნენ იქ მყოფ დასტურებსაც და ასე ბოლომდინ ჩამოირიგებდნენ, ყველანი დაამწყალობებდნენ ლაშარის ჯვარის ყმათ. მეორედაც ჩამოირიგებდნენ ამ თასს და, თუ არ გამოიცილებოდა, მესამედაც. როცა გამოიცილებოდა, მაშინ თასს ადგილობრივი დასტური წაიღებდა. მედროშავეები კი დროშებს წამოაბძანებდნენ. იახსარში დროშის საბრძანო კოშკია და იქ მიაბრძანებდნენ. შეიძლება უძილაურთის კოპალას დროშას მოესწრო მოსვლა იახსარში და ისაც ამავე წესით შეხვდებოდა იახსარის დროშასაც და გომეწრიდან მოსულ კოპალას დროშასაც. მოსულ დასტურ-ხევისბერებს იახსარში რითაც შეეძლოთ, კარგად გაუმასპინძლებოდნენ. მერე ააბძანებდნენ დროშებს და გაემართებოდნენ ლაშარისაკენ. ლაშარი შუაფხოდან დაახლოებით ათი კილომეტრით იქნება დაშორებული. მნიშვნელობა არ ჰქონდა, რომელი დროშები წინ გაუძღვებოდა და რომელი არა. გაუძღვებოდა ის მედროშე, რომელიც ხნით უფროსი იყო. აქედან წასულს გზაში შეხვდებოდა ცაბაურთ თემის სალოცავი მთავარანგელოზის დროშა. იმ დროშის შეხვედრაც ამავე წესით ხდებოდა. შეხვედრისას ჯერ დროშებს დაამთხვევდნენ ერთიმეორეს და მერე ხევისბერებიც ერთმანეთს გადაკოცნიდნენ. ამავე წესით შეხვდებოდა გოგოლაურთ წმინდა გიორგის, მუქუს ღვთისმშობლის, მათურის მთავარანგელოზის, ხოშარის თამარნეფის, კიჩოს პირკეცხლის, ახაღის პირქუშის, წითელაურთის კოტიას წმიდა გიორგის, უკანაფშავის წყაროსთაურის და, თუ მთაზე გზა იქნებოდა გამოსული, ხახაბოს წმიდა გიორგის დროშები ერთმანეთს და ყველანი ლაშარის დროშას. გზა-

დაგზა რაც სალოცავები შეხვდებოდათ, ყველგან დაანთებდნენ სან-  
თლებს. მაგალითად: მათურთხევს — დამასტურში, ხოშარას — სახუთ-  
შეტოში და სხვა. სანთლების ანთებისას თუ ჰქონდათ სადიდებლად ლუ-  
დი ან ღვინო, ხატებსაც გაადიდებდნენ, ცოტა ხანს შეისვენებდნენ და  
დალევდნენ (უწინდელ დროში ჯვართ ადიდებ-ახსენებდნენ მარტო  
ღვინოზე და ლუღზე. თუ ეს არ ჰქონდათ, თაფლში წყალს გაურევე-  
დნენ, ე. ი. თაფლ-წყალს გააკეთებდნენ და იმაზე ადიდებდნენ ხატებს.  
თუ თაფლიც არ ჰქონდათ და ხატის გადიდება კი წესის მიხედვით აუ-  
ცილებელი იყო, იმ შემთხვევაში წყალში ჩაყრიდნენ დაფხვნილ პურის  
გულს, ფშაური სიტყვით: „გურგულას“, და იმაზე ადიდებდნენ. არაყ-  
ზე ხატების გადიდება არ შეიძლებოდა. მერე კი თანდათანობით  
შემოიღეს და არაყზედაც ადიდებდნენ ხატებს).

ბოლოს ყველანი ლაშარს მოიყრიდნენ თავს. აქ ერთი განიერი  
კოშკი ანუ კვრივი იდგა და ყველა დროშა იქ დაბძანდებოდა. მხო-  
ლოდ ყველა მისულ დროშას გამოეგებებოდა ლაშარის ჯვარის დრო-  
შა, როგორც ზემოთ ითქვა, იმ წესით: ერთიმეორეს ემთხვეოდნენ ჯერ  
დროშები და მერე ხევისბერები. მერე ზემოთ თქმული წესის მიხედ-  
ვით დააბძანებდნენ დროშებს. არა მარტო ლაშარის ჯვარის დროშა  
გამოეგებებოდა მოსულს, არამედ ის დროშაც და იმავე წესით შეხ-  
ვდებოდა, რომელიც ახალ მოსულ დროშაზე თუნდა ერთის ბიჯითაც  
წინ მოვიდოდა. ამნაირად თორმეტი თემის დროშები ლაშარს მოი-  
ყრიდა თავს და მეცამეტე ლაშარის ჯვარის დროშა აქ დახვდებოდა.  
ეს იყო მთლიანად ფშაველთა სალოცავი და ყველა სათემო სალოცა-  
ვებზე უფროსი. პირველად მარჯვენა მხარეს ლაშარის ჯვარის დროშა  
დაბძანდებოდა, მერე კოპალას დროშა, მერე იახსარისა და ასე  
შემდეგ მოყოლებით. ცოტა ხანს შეისვენებდნენ და ლაშარის ჯვარის  
ხევისბერი ყველა თემის ხევისბერის მოტანილ სანთელს აანთებდა სასან-  
თლეში, ახსენებდა ჯერ ლაშარის ჯვარს და მერე ყველა ხთიშვილთ,  
რომლის დროშებიც აქ მოვიდა. ამის შემდეგ იმართებოდა სამხთო.  
ეს სამხთო დიდ სამხთოდ ითვლებოდა (ასე უწოდებდნენ), დაწესე-  
ბულია ჭირვეულობის, ქარ-სეტყვის და მიწისძვრის თავიდან ასაცი-  
ლებელ სახვეწრად. ამით სთხოვდნენ ლაშარის ჯვარს და ყველა ამ  
ხთიშვილთ, რომ იშუამდგომლონ იმ ანგელოზთან ან ხთიშვილთან,  
რომელთაც აქვთ შოლოცვილი ასეთი მოვლენების მოვლენა ქვეყნად,  
რომ თავიდან ააცილონ ქვეყანას ზარალი, ყველა თემს ჰყავს თითო  
ღირეული საკლავი ლაშარის ჯვარისათვის, თითო თავისი სალოცავისათ-  
ვის, თითო კვირაისათვის (მეორე დღეს საკვირაოს გავლენ და კვი-  
რისათვის იქ იქნება სამხთო), თითო საკლავი კი დამასტურისათვის  
(აქ მაშინ ვადაიხდიან სამხთოს, როცა ლაშარიდან დაბრუნდებიან). და-  
მასტური მათურხევს არის, სადაც ყველა დროშები ამ გზით გაივლიდნენ.

და აქ „იზამდნენ“ სამშთოს. ყველა საკლავს ლაშარის ჯვარში დაკლავდა ლაშარის ჯვრის თავხვეისბერი. თუ ვინციობაა აქ რაიმე შემთხვევით ლაშარის ჯვრის ხვეისბერი არ არის, მაშინ ან კოპალას ხვეისბერი გაუძღვებოდა ყველა საქმეს, ან იახსარისა. აქ სხვა ხვეისბერს გაძლოა, საკლავის დაკვლა და სხვა რაიმე სამსახურის შესრულება არ შეეძლო: საკლავები დაიკვლებოდა ლაშარის ჯვარისათვის ლაშარის ჯვრის ყმათ სამხვეწროდ. მერე თავისი სალოცავებისათვის თავთავის ხვეისბერი დაკლავდა თითო საკლავს. ორივეს საკლავს გაატყავებდნენ ყველა თემის სალოცავის საკუთარი დასტურები (ლაშარის ჯვარისა და თავისი სალოცავებისათვის დაკლულებს), ხორცს მთლიანად აქ მოხარშავდნენ.

აქ იყო თორმეტი თემი, თორმეტივეს საჯარეები ცალ-ცალკე ჰქონდათ მინდორზე. საჯარეები დაფარებული არ იყო, მაგრამ თავისი საჯარე ყველამ იცოდა და იქ დაბინავდებოდა. აქ მარტო დასტურ-ხვეისბრები კი არ იყვნენ, მლოცავიც ბევრი მოდიოდა. მლოცავიც თავთავისი თემის საჯარეში მოდიოდა და იქ ბინავდებოდა. იმართებოდა საკლავების დაკვლა, ხორცის მოხარშვა და სუფრების გამართვა. სათემო საკლავები რომ მოიხარშებოდა და სუფრას გამართავდნენ, სასმელიც ყველას ჰქონდა თავთავის ხატიდან წამოღებული. ოჯახებიდანაც საკმარისად მომზადებულნი მოდიოდნენ სასმელ-საჭმელით. ერთ-ერთი თემის საჯარეში გაიმართებოდა სუფრა და ქეიფი, ყველა საჯარედან აქ მოიპატიჟებდნენ ხალხს და სმა-ჭამასთან ერთად იმართებოდა ლხინი, სიმღერა და ფერხისული. ფერხისულ სიმღერებს უფრო ისეთს მღეროდნენ, რომლებიც დაკავშირებული იყო ლაშარის ჯვართან და ფშავლების გმირობასთან. მაგალითად:

ლაშარს მოიდა თილიზში, გულდიდად დაჯდა ჯარიო,  
შამაეხვიენეს ფშავლები, ბატონს რო თავის ყმანიო,  
შენ აქ არ მოგვესლებოდა, დიდი ჰქენ ცოდვა-ბრალოო,  
დასწვი, დაზღაგე ხოშარა, ცამდინ გაუშვი ალიო.  
თავ გასჭერ დიაც-ყმაწვილისა, კალოდ გაღეწე მკვდარიო.  
ნაკვეთაურის ჭერხოსა შენ შაჰსენ რკინის კარიო,  
— აცათ, მაცაღეთ, ფშავლებო, მალოცეთ თქვენი ჯვარიო  
სახვეწრად მომიყვანავის თეთრი ქორაი ჯარიო,  
თანაც კი მომიყოლებავ რქაჯანგიანი ცხვარიო.  
ეგ მაშინ გაუარიგოდეთ, რახან გამავლენ მთანიო,  
ვისაი ჭებდეს მაჟარი, ვისაი ჭრიდეს წმალიო,  
უბისთავ დანათლებიან თილიზძის ცხენის ნალნიო.  
ცხენს ეჭდეს თილიზძისსა ჩაქუნაურის ქალიო,  
არ დაიჭერეს ფშავლებმა, ჰალას გაიღეს მკვდარიო.

თუშები თურმე ხშირად ლაშქრავდნენ ფშავს და მიჰქონდათ დავლა. ერთხელ დაეცნენ სოფელ ხოშარას თუში თილიზძის მეთაურობით.



თილისძე თუშეთში სახელგანთქმული მეომარი იყო და კარგა მძიმე ლაშქრით დაეცა ხოშარას, დავლა წაიღო, სახლები ცეცხლით დაწვა და დიაც-ყმაწვილიც დახოცა. ახლა ხოშარაში მცხოვრები ნაკვეთაურების პაპა მაშინ ცხოვრობდა მისრიანთკარის ახლო, გზის ქვემოთ. ეს ნაკვეთაური ლაშარის ჯვარის დაქვრივი ხელწმიდა კაცი ყოფილა და მისი ძალით ნაწილიანი ისარნი ჰქონიან. როცა მტერი მოახლოვდებოდა და საბრძოლო დრო დადგებოდა, ისარნი ჩუჩუნს დაიწყებდნენ. თილისძემ რომ ხოშარა დალაშქრა, ნაკვეთაურის ისრებმა ჩუჩუნი დაიწყეს. ახლო ერთი გორია, საიდანაც სოფელი ხოშარა ჩანს. ნაკვეთაურმა ცოლი გაგზავნა, — ისრები ჩუჩუნებენ, რალაც ამბავია, აბა ხოშარას გადაუხედნენ, ხომ არაფერი ცუდი ამბავი დაეცაო. ცოლმა დაინახა, რომ ხოშარას ცეცხლი ჰქონდა წაყიდებული, მაგრამ ქმარს დაუშალა, მერე დედა გამოგზავნა, იმანაც დაუშალა. ისრები ისევ ჩუჩუნებდნენ. მესამედ ნაკვეთაური თვითონ გამოვიდა ღელის გორზე და გადაუხედნა. დაინახა, რომ სოფელს ცეცხლი აქვს წაყიდებული და ალი ცამდე ადის. „აიხვნა“ (აილო) ისარნი, მშვილდი და წამოვიდა საბრძოლველად. ხოშარას ბოლოდან მოეპარა და დაინახა, რომ თუშები სალუდე ქვაბს უკრიდნენ (იმ დროს სპილენძი ისეთი ძვირი ყოფილა, რომ როცა ლაშქარი დავლას აიღებდა, პირველ რიგში სპილენძს შოაგროვებდნენ წასაღებად. უკრიდნენ სალუდე და სხვა დიდ ქვაბებს, რაც მთლიანად წასაღები არ იყო სიმძიმის გამო ან ნაკრებად მიჰქონდათ). ნაკვეთაურმა ესროლა ნაწილიანი ისარი და ერთი თუში ზედ ქვაბს შიაკრა. თუშებმა გაიგეს, რომ ფშავში ხმა გაუტყდათ და კარგი დღე აღარ მოელოდათ, დაანებეს თავი დავლას და გაიქცნენ. დაედევნა ფშაველთ მღვდარი და ძალიან აზარალეს თუშის ლაშქარი. მთხრობელმა თქვა: იმდენი თუშები დახოცეს მაშინ, რომ მარტო ჩითები გაყვეს თურმე გოდრითო (ჩითა თუშური ფეხსაცმელი წინდისებურად მოქსოვილი სქელი და მაგარი ძირით). მაგრამ ამ ბრძოლაში ერთმა დაქვრივმა და მკვდრებთან ჩამალულმა თუშმა ისრით მოკლა ნაკვეთაური (იმ ნაკვეთაურის ჩამომავლობის კაცმა ივანე ნაკვეთაურმა მიაგებო: ის ჩვენი პაპა ნაკვეთაური ელიაწმიდას ერთი ფიჭვი დგას და იქ მარხიაო. დღესაც ვიხდით იმის საფლავზე სამხტოს და ვიხსენიებთ იმის სულსაო. მაშინ ჩვენ გავთავებულვართ. იმისი ცოლი დამრჩალა ორსული, ვაჟი ეყოლა და იმაზე ისევ გავთესლებულვართო). სხვა ყველა დახოცეს და გაიქცა მარტო ლაშქრის წინამძღვარი თილისძე. მას დაედევნა სახელგანთქმული მებრძოლი სუმელჯი წოწკურაული სოფელ მუქუდან (სუმელჯი ლექსშიც არის მოხსენიებული ცნობილ მებრძოლად). მან მოკლუნე გზა გადაუჭრა, მთა შეუჭრა და თილისძე ტყვედ დაიჭირა. თილისძეს ისრები აღარ ჰქონიყო და სუმელჯიმ ამიტომ ჩაიგდო ხელში, წამოიყვანა და ლაშარს მოიყვანა. ხალხი შეი-

ყარა მის გასასამართლებლად. თილისძე სუმელჯის შახევეწა — გამიშვოდა შენი სალოცავის ყმა გავხდებო. სუმელჯი თვითონ დაუდგა თილისძეს თავდებად, სთხოვა ხალხს — ჩემი თავდებობით ცოცხალი წავიდეს, პირობას იძლევა, ჩვენი ლაშარის ჯვრის ყმა გახდესო. ხალხი დათანხმდა და უთხრა: შენი ტყვე არის და როგორც გინდა, ისე მოიქეცი, ჩვენ თანახმა ვართო. სუმელჯიმ თილისძე გაუშვა.

თილისძემ პირობა არ გატეხა და ლაშარის ჯვარის ერთ-ერთ დღეობაში მოვიდა. გასაფიცავად მოიყვანა თეთრი ხარი და ერთი ცხვარი.

ამ ამბავზე ბევრს დავკითხე. ზოგნი ამბობენ: თილისძე შეირიგეს და ლაშარის ჯვარის ყმა გახდაო. სხვები ამბობენ: ლაშარს რომ მოვიდა, ლაპარაკში ისევე მუქარას ითხოვებოდა, ფშავლებმა ვეღარ მოუთმინეს და იქვე მოკლესო. ზოგმა კი თქვა: ეს ტყუილია, გაფიცვის შემდეგ ფშავლები თილისძეს აღარ მოკლავდნენო.

ლაშარის ჯვარი ლურჯცხენიანი ჰყავთ წარმოდგენილი ფშავლებს და იმის ლურჯას ხშირად ლექსშიაც ასხენებენ:

ლაშარელაის ლურჯასა ასხავ ფაფარი გიშლისა,  
რახან სამცხეთოდ წავიდეს, კოტორ გაჰყევა ნისლისა,  
საჩქაროდ შემოჩინდება, ხან რომ არ იყოს მისვლისა.

ბრძოლებშიაც ვითომც ლაშარის ჯვარის ლურჯა ანადგურებდა მტერს.

როგორც ვთქვით, თორმეტ თემს თავ-თავისი საჯარე ჰქონდა. საჯარეები ისე იყო მიყოლებული მრგვლად, როგორც თემები არის მოყოლებული ფშავის ხევის გაღმა-გამოდმა: ჯერ ერთს საჯარეში იმართებოდა სმა-ჰამა და მხიარულება, მერე მეორე საჯარეში გადაიპატივებდნენ და ასე გრძელდებოდა ერთ დღე-ღამეს. ლაშარის პირდაპირ არის საკვირაო, სადაც ლოცულობენ კვირას. საკვირაოზე გასვლაჲდე ლაშარის ჯვარში იმართებოდა საბჭო. აქ სიბით დახურული გრძელი დარბაზი იყო (ჯიხვიშვილი ჰრელას თქმით) და სახელად „საბჭო“ ერქვა. ამ საბჭოს ორ მხარეზე ჰქონდა დაწყობილი ჰქვის სკამები. ორივე მხარეს დასხდებოდნენ ყველა თემის ბჭე-ხევისბრები. ბჭეში შედიოდნენ უფრო ხევისბრები და ხნიერი მცოდნე კაცებიც. ასეთებს ფვითონ ხალხი ასახელებდა. ხევისბრები ხომ ხატისაგან იყვნენ მოყვანილი და ბჭეშიც თავისთავად შედიოდნენ. ლაშარის ჯვარის საბჭო არჩევდა ისეთ საქმეებს, რაც ეხებოდა მთლიანად ფშაველთ, როგორც არის ლაშქრობა, ლაშარის ჯვარის ირგვლივ გასაკეთებელი რამე და სხვა. თუ რომელიმე თემს ჰქონდა სადაო მეორე თემთან (ადგილის საზღვარი, სადაო მიწები და ტყეები), ამასაც გაასაჩივრებდნენ და არჩევდა ლაშარის ჯვარის საბჭო. თუ რომელიმე თემს გაუჩინდებოდა შიგნით სადაო საკითხები და თავის თემში ვერ მოწესრიგდებოდა, ასეთი საჩივარიც ლაშარის ჯვარის საბჭოში შედიოდა გასარჩევად. თუ ერთი ხატის ყმა-

თაში ქალის თხოვა-გათხოვება, გაყოლა ან უკანონო შეილის ყოლა რამე მოხდებოდა, ეს საქმეც ლაშარის ჯვარის საბჭოში შედიოდა გასარჩევად იმ შემთხვევაში, თუ თავის თემში ვერ მოწესრიგდებოდა. ლაშარის ჯვარის საბჭო რასაც გადაწყვეტდა, ეს უცვლელი იყო და აუცილებლივ უნდა შესრულებულიყო. ლაშარის ჯვარის ძლიერების და სიმტკიცისათვის ამ დადგენილება-გადაწყვეტილებას მთლიანად ფშაველნი დაუჭერდნენ მხარს და სისრულეში მოჰყავდათ.

... საბჭო იმართებოდა ხატობის დროს. მაგრამ თუ გაჩნდებოდა რამე აუცილებლად გადასაჭრელი საჩქარო საკითხი, ამ შემთხვევაში ხატობის გარეშეც მოიწვევდნენ ლაშარის ჯვარის საბჭოს და გადაწყვეტდნენ საკითხს. საბჭო რომ გასარჩევ საქმეს მოათავებდა, ყველა მდროშე ხევისბერი დროშებთან მივიდოდნენ და თავ-თავის დროშას ააბძანებდნენ. ლაშარის ჯვარის ხევისბერი ერთ თას-სადიდებელზე და სანთელზე ადიდებდა ჯერ ლაშარის ჯვარს და მერე ფშავის ყველა ხთიშვილთ და ანგელოზთ. ამ სადიდებლის დროს თავ-თავის დროშა ყველას ხელში ეჭირა და ნელა აწკარუნებდნენ დროშის ზარს. ეს სადიდებელი ყველა ხევისბერს ჩამოურიგდებოდა და ამწყალობებდნენ ლაშარის ჯვარის ყმათ. შემდეგ ყველანი მხარზე გაიდებდნენ თავ-თავის დროშას და წავიდოდნენ საკვირაოსაყენ. წინ გამოუძღვებოდათ ლაშარის ჯვარის დროშა, მერე კობალა, იახსარი და სხვები. საკვირაო ლაშარიდან შორს არ არის, არაგვი ჩამოუღის შუაზე — ერთი წყალს გაღმაა, მეორე გამოღმა; დროშები რომ გაუძღვებოდა, ხალხი ფერხისას დააბამდა და გაემართებოდა საკვირაოსაყენ. აქ იყო დარბაზი, სალუდე, საზარე. აქვე იყო კოშკი ანუ კვრივი იმდენი სიდიდისა, რომ თორმეტივე თემის დროშა ზედ მიყუდებული თავსდებოდა. ხალხი თავის სადღეობო ადგილას გაჩერდებოდა, დროშებს კი მიაბრძანებდნენ საკვირაოს კვრივზე. აქ ცალ-ცალკე თემებს თავ-თავისი საჯარე არ ჰქონდა, ყველანი ერთ საჯარეში მხოლოდ ცალ-ცალკე ბინად დაბინავდებოდნენ, სადაც ვის შეხვდებოდა. დროშებს რომ მიაბრძანებდნენ, სადიდებელს, რომელზედაც კელაპტარი ენთო, დადგამდნენ. ლაშარის ჯვარის ხევისბერი ადიდებდა ჯერ კვირას, რადგან მისი დღეობა იყო, და მერე ყველა ხთიშვილთ. კვირას საკუთარი დასტურ-ხევისბრები არ ჰყავდა. აქ ხევისბრობას ასრულებდნენ ლაშარის ჯვარის ხევისბრები. სადიდებელთ, ჩეულებრივ, ყველა ხევისბრები ჩამოირიგებდნენ და ამწყალობებდნენ მთლიანად ფშაველთ (საკვირაოც მთლიანად ფშაველთ ეკუთვნოდა, როგორც ლაშარის ჯვარი. ეს არ იყო რომელიმე თემის ცალკე კუთვნილი სალოცავი). მერე ყველას მოტანილ კელაპტრებს სასანთლეში დაანთებდა ლაშარის ჯვარის ხევისბერი. დარეკდა ზარს და ამწყალობებდნენ ყმათ. ამ დროს ხალხი

ქედმოხილი პირხატისაკენ იდგა, ყველა პირჯვარს იწერდა და ჩუმის საუბრით სთხოვდა კვირას ღმერთთან და ხვთიშვილთან შუამდგომლობას და დახსნას უბედურებიდან.

სადიდებელი, ზარის დარეკა და ეს ყველა რომ მოთავდებოდა, დაიწყებოდა სათემოდ მოყვანილი საკლავების დაკვლა ისევე ლაშარის ჯვარის ხევისბერის ხელმძღვანელობით (ზემოთ ითქვა, რომ ყველა თემს მოჰყავდა თითო საკლავი ლაშარის ჯვარისათვის, თითო თავის სათემო სალოცავისათვის, თითო საკვირაოზე და თითო მათურხევეს დამასტურში. ეს საკლავები სასოფლო იყო. სოფელს მორიგეობით მოუდიოდა და ვისი რიგიც იყო, ის თავისი ოჯახიდან მოიყვანდა. მხოლოდ ამ დღეობაში ღირსეული ცხვარი ჰქედილა უნდა ყოფილიყო, რომ სხვებზე მდარე საკლავი არ ჰყოლოდა თემსა და სათემო სალოცავის ყმათ). საკლავებს კლავდა ლაშარის ჯვარის ხევისბერი, მხოლოდ საკლავის დაკვლაში ეხმარებოდა ის ხევისბერი, რომლის თემის საკლავიც იყო. აქ ზღვნობა-სანთლობასაც დიდი სამხთო ანუ ფშაველთა სამხთო ეწოდებოდა. როცა მოთავდებოდა სათემო ზღვნების დაკვლა, მერე იწყებოდა კერძო ზღვნობა. კერძო ზღვნებით ოჯახები ეხვეწებოდნენ ხატს დახმარებას, სათემო საკლავებზე კი ჯერ თემს ახვეწებდნენ და აქვე ჩაურთავდნენ ლაშარის ჯვარის ყმათ, მთელ ფშაველთ. სათემო საკლავებს მოუვლიდნენ თემის სალოცავის დასტურნი, ხოლო თავის საკლავებს პატრონები. სათემო საკლავების ხორცი რომ მოიხარშებოდა, ყველა გამართავდა ცალ-ცალკე სუფრას და პატიობდნენ ერთიმეორეს. კერძო მეზღვნეებიც მართავდნენ სუფრებს და პატიობდნენ ხალხს. სათემო სუფრა ილოცებოდა თემის ძველი ხევისბრების, დასტურებისა და მიცვალებულებისათვის. კერძო სუფრები კი დაილოცებოდა კერძო ოჯახის მიცვალებულებისათვის: ან მთლიანად იმ ოჯახის მიცვალებულთათვის, ვისი საკლავიც იყო, ან ერთ-ერთი მიცვალებულისათვის. ან ახალი სული იქნებოდა, ან მკითხავის თქმით, რომელიმე მიცვალებული მოითხოვდა სუფრის გამართვას ამათუიმ ხატში, ან ვინმე ძველი ხელწმინდა კაცი ამ ოჯახის მიცვალებული. რძალი, ან სხვა ვინმე ოჯახის წევრი გამართავდა სუფრას. მლოცველები, ქალი და კაცი, ერთად იყვნენ, დასტურ-ხევისბრები კი საკვირაოს ხატში ცალკე. აქ პატარა მდინარე ჩამოდის, არაგვის შენაკადი, მას წაწადს უწოდებენ, რომლის გაღმა საკვირაოს ხატია, გამოღმა კი ხალხის საჭარე-საბინაო.

ამ დღეობაში რაკი მთელი ფშავი იყრიდა თავს, უცოლო, უქმრო ქალ-ვაჟი აქ მოდიოდა ერთიმეორის გასაცნობად და მოსალაპარაკებლად. ამ თვალსაზრისით არა მარტო ახალგაზრდები ზვერავენენ ერთიმეორეს, არამედ მათი ნათესავეებიც მოდიოდნენ ქალების დასათვალიერებლად. უფრო ისინი უმართავდენ ახალგაზრდა ქალებს მო-

ლაპარაკებს და ეძებდნენ მოხერხებულ დროს, ქალ-ვაჟი ერთიმეორისათვის გაეცნოთ და შეეხვედრებინათ. აქვე მიდიოდა ლაპარაკი მშობლებთანაც ქალ-ვაჟის შესახებ. ახალგაზრდები ქალებს თავის პირობის ლექსებს უმღეროდნენ, ეხუმრებოდნენ და ეთამაშებოდნენ.

ქალებმაც იცოდნენ გაშიარება. თუ კარგა ხნის ქალი იქნებოდა, ის არაფრის თქმას არ ერიდებოდა, ახალგაზრდა ქალები კი მორიდებულნი იყვნენ:

არტანს ქორწილში მოვიდა ფეტვიაშვილი შაფვერა,  
ერთმა თქვა — კარგი ყოფილა, სხვამ თქვა — ჩემობამც დასწერა,  
მესამემ — არა ყოფილა, ერთ ბარკალი მაქვ მაგთვენა.

ასეთი ქალ-ვაჟური გაშიარებებით ერთობოდნენ ახალგაზრდები. საღამო ხანზე თავ-თავის ბანაში ყველა მოზიდავდა შეშას, ანთებდნენ ცეცხლს და თეთრად ღამეს ათევდნენ. თუ ვინმე ნადობ-ნაძმობი გაიპარებოდა და საღამე მოფარებულ ადგილას ერთად დაწვებოდნენ, ზოგიერთი ახალგაზრდები ეძებდნენ სახუმაროდ, მწოლარეებს მოპარავდნენ ან ქუდის, ქალის თავჩითას, ფეხსაცმელს და მეორე დღეს აღარ მისცემდნენ, მანამ ჭარიმას — ერთ ბოთლ არაყს არ გადაიხდიდნენ. ამ ამბავს სხვებიც გაიგებდნენ და იყო ერთი ხუმრობა და სიცილი. ეს უფრო ხდებოდა მონათესავე ქალ-ვაჟს შორის, რომ მათზე ცუდი არაფერი იყო საფიქრობელი, თორემ უნათესაო ქალ-ვაჟი კი ასე აშკარად ერთად ვერ გაბედავდნენ ღამის გათევას, მას ქალის ნათესავეების გაანჩხლება და უსიამოვნება მოჰყვებოდა. ერთი ხატის ყმა ე. ი. ერთი თემის ქალ-ვაჟები უფრო ახლო იდგნენ ერთიმეორესთან. და-ძმას უწოდებდნენ, რადგან ცოლ-ქმრობა აკრძალული იყო ერთი ხატის ყმებში და ამათზე ცუდი არაფერი ითქმოდა.

მეორე დილას კიდევ იმართებოდა ერთიმეორის პატივი და მხიარულება. შუადღის დროს ლაშარის ხევისბერი საკვირაოს სასანთლესში ანთებდა სანთლებს, დარეკდა ზარს და დაამწყალობებდა ლაშარის ჭვარის ყმათ. აიშლებოდა მლოცავი, მედროშეები თავ-თავიანთ დროშებს ააბრძანებდნენ და გამოუძღვებოდნენ მლოცავს. ლაშარის ჭვარი დროშას გამოემშვიდობებოდნენ იმიტომ, რომ ის სხვა წვრილმან და სათემო ხატებში არ წავიდოდა და მაინც უკანაფშავის, წითელაურთის, ახადის, ხოშარისა და ჭიჩოს დროშები იმ გზით აღარ გამოივლიდნენ, სადაც დამასტურს ილოცავდნენ. დამასტური არის მათურხევეს; მათურის, გოგოლაურთის, შუაფხოს, ცაბაურთის და უძილაურთის დროშები კი მათურხევეზე გაივლიდნენ, აგრეთვე გომეწრის დროშაც, ხანდახან კი ჭიჩოს დროშაიც ამ გზით გაივლიდა, როცა მთიდი-მთიე არ წავიდოდნენ და ჭალაზე ხიდი იყო არაგვზე გასავალი. წყალდიდობაში აქ ხიდი არ იყო და მათზე დადიოდნენ. ხსენებული დროშები მათურ-

ხევს გამოივლიდნენ და საკლავებსაც ყველა მოიყვანდა დამასტურში. აქაც მთელი ფშაველნი სამხთოს გადაიხდიდნენ. უფრო ჭირნახელის სამხვეწრო სამხთო იყო, რადგან, ფშაველთა რწმენით, ცა და ღრუბელი, დარი და ავდარი მას აბარია და მოსავლის ავ კარგანია. ამ ზატზე არის დამოკიდებული. აქ არამარტო სამხთოს იხდიდნენ დანიშნულ დროს, სხვა მეზღენეც ამ დროს მოდიოდა საკუთარი ჭირნახელის სამხვეწრო საკლავით. გარდა ამისა, ფშაველნი გადაჭარბებულ წვიმიანობაში და გვალვის დროსაც დათქვამდნენ და რიგგარეშე (ე. ი. არა დღეობაში) დანიშნავდნენ დღეს, მოკრეფდნენ სალუდე სვე-ფორს, დაამზადებდნენ ლუდს, მოიყვანდნენ საკლავებს და გადაიხდიდნენ სამხთოს. ამ დროს ყველა თემი არ მოდიოდა — ეს მოუდიოდა თემებს მორიგეობით და რომელ თემსაც შეხვდებოდა, ის გადაიხდიდა სამხთოს თორმეტისავე თემის ჭირნახელის სამხვეწროდ და ხალხთა სავწყალობნელოდ.

ახლანდელ სამხთოში, ჩვენ ვთქვით, რომ ნაწილი დროშები მოვიდოდნენ დამასტურში, რომლებიც არ მოვიდოდნენ, იმ თემიდანაც სოფლის კაცები საკლავებს მოიყვანდნენ, ვისი რიგიც იყო სასოფლო საკლავის დაკვლა. დროშები რომ მოვიდოდნენ, აქაც იყო დიდი კვრივი და ყველა იქ მიბრძანდებოდა. დახვდებოდათ გოგოლაურთაში მცხოვრები ხევისბერი მგელაშვილების გვარიდან (გვარების აღწერაში უკვე ნათქვამია, რომ დამასტურში ხევისბრობა მოუდიოდა მგელათ პაპიდანვე).<sup>1</sup>

დროშებს როცა მიაბრძანებდნენ, სადიდებელს დადგამდნენ და ზედ კელაპტარს დააკრავდნენ, დამასტურის ხევისბერი ადიდებდა აქ ხატს, შეახვეწებდა ფშაველთ ჭირნახულს, ქონებას და ხალხს, აგრეთვე სთხოვდა ეშუამდგომლა ყველა ხთიშვილთან, რომ ჭირვეულობაც (ავადმყოფობა, ჭირიხნობა) ასცილებოდა ხალხს თავიდან და თუ ხთისპირს გადმოსული იყო აქ ჭირვეულობის გაჩენა, ხთიშვილთა და ანგელოზთ დახმარებით გადაეტანა სადმე სხვა კუთხის ხალხზე და აქ მშვიდობა ყოფილიყო. ამ სადიდებელს ჯერ ხსენებული ხევისბერი დალევდა, მერე სხვა ხევისბრებიც დაილოცებოდნენ, დაამწყალობნებდნენ ლაშარის ჯვრის მთლიან ყმათ და ამ დროს აქ მოსულ მლოცავთ. სადიდებელი რომ ბოლოს გავიდოდა, ცოტა შესვენების შემდეგ დაიწყებოდა სათემო საკლავების დაკვლა, შემდეგ კერძოდ მოყვანილი საკლავებისა. ხსენება ასეთი იყო დამასტურისა: „მათურხევს მარიაშ წმიდაო გიორგიო, და რ-ავ-დ-არ-თ-მო-უ-რ-ა-ვ-ო“ (თავშიაც მოვიხსენიეთ, რომ გავლაზე აქ მარტო სანთელს ანთებდნენ, აქ დასაკლავი საკლავები თან მიჰყავდათ და როცა დაბრუნდებოდნენ, მაშინ იმართებოდა აქაური სამხთო). იმართებოდა დიდი სმა და მხიარულება. აქ ღამეს აღარ გაათევდნენ. რომ მოსაღამოვდებოდა, ხევისბერი პირჯვრის წერით

შივიდოდა საზარესთან და დარეკდა ზარს, მოემზადებოდა წასასვლელად. მედროშეები დროშებს ააბძანებდნენ. უკანასკნელად დაამწყალობნებდნენ ფშაველთ და გამოემგზავრებოდნენ. დროშები როცა გზასაყარში მივიდოდნენ — ერთიმეორეს ჯერ დროშები ემთხვეოდნენ, როგორც ზემოთ აღვნიშნეთ, მერე ხევისბერებიც აკოცებდნენ ერთმანეთს. საგზაო სასმელი ყველას ჰქონდა და გაყრის დროს აძალებდნენ ერთმანეთს.

მათურხევიდან პირველად მათურის მთავარანგელოზის დროშა გაეყრებოდა და წავიდოდა მათურის გზით. მერე მუქუს დროშა წავიდოდა მუქუსაკენ. მერე გოგოლაურთ წმიდა გიორგის დროშა, მერე ცაბაურთ მთავარანგელოზისა, მერე ჩამოვიდოდნენ შუაფხოში და გაივლიდნენ იახსარში. აქ აუცილებლად სასმელი ექნებოდათ შენახული და პატივს სცემდნენ მოსულებს. აქ ნართაული ხალხი აღარ იყო, მარტო ხატის გამძღონი დაჰყვებოდნენ დროშებს. იახსარიდან გამოემშვიდობებოდა და წავიდოდა უძილაურთის კოპალის დროშა და საბოლოოდ გაისტუმრებდნენ გომეწრის კოპალას დროშას. გომეწარში არიან გოგოლაურთ თემიდან გადასულნი წმინდა გიორგის ყმანი, მაგრამ იქ თავის საოფელში ჰყავდათ კოპალა და საკუთარი დროშაც ჰქონდათ. საკლავები რაც სათემოდ დაიხოცა, მათი ტყავი და ხორცი რაც დარჩა, ხატის გამძღოთ რჩებოდათ. კერძოდ, საკვირაოზე და ლაშარის ჯვარში დაკლული საკლავებისას ტყავს ან ტყავის სახსარ ფულს აძლევდნენ ლაშარის ჯვარის გამძღოთ, დამასტურში დაკლული ტყავის სახსარი და მხარი კი აქაურ ხევისბერებს მიჰქონდა.

კვირის ჯვრობას ამ ხატებში დიდძალი საკლავი იხოცებოდა. სოფელ ახადში მცხოვრებ ჭრელ გოდერძაულისაგან ჩავიწერე აქაური ამბები და, არ ვიცი; რამდენად მართალია, მან მითხრა: „ერთხელ ლაშარის ჯვარში კვირისჯვრობას ორასი საკლავი დაიკლავ“.

ლაშარის წმიდა გიორგი ადრევე იყო ფშაველთა სალოცავიო, — ჩამაწერინა ჭრელ ჩიხვიაშვილმა: ერთხელ ლაშა გიორგის დროს აქ ფშაველთა დღეობა იყო და მთელი ფშავი შეკრებილიყო. ამ დროს მოვიდა ლაშა გიორგი თავისი მხლებლებით: ფშავლები კარგად გაუმასპინძლდნენ და გიორგი როცა წავიდა, ოქროს ჯვარი გამოუგზავნა, შიგნით ოქრო იყო ის ჯვარი და გარეთ ვერცხლი ჰქონდა გადაკრული. ეს ჯვარი ძალიან დიდი იყო და ინახებოდა ლაშარის ჯვარში. მას შემდეგ დაერქვა ამ სალოცავს ლაშარის ჯვარიო. ბოლოს ეს ჯვარი სადღაცა ერთმა ბერმა წაიღო და დაიკარგა. ეს ბერი იყო ახადელი ფშაველი ილარიონი.

ლაშარის ჯვარში ხევისბერი შეიძლებოდა ყოფილიყო ყველა თემიდან, თუ მას ლაშარის ჯვარი მოიყითხავდა (უკენა ფშავლები, ახადლები, ხოშარლები, წითელაურები და სხვ.).

ლაშარის ჯვარს ნაწილიანი ჯვარი ჰქონდაო — ჩამაწერინა ივანე ნაკვეთაურმა (ს. ხოშარა). როცა ფშაველნი სალაშქროდ წავიდოდნენ, ეს ჯვარი მიჰქონდათ და ამიტომ იმარჯვებდნენ მტერზეო (ნაწილიანი ნიშნავს ზებუნებრივი ძალის მქონეს, რომელსაც ვერაფერი ვერ მოეხერხებოდა).

ლაშარის ჯვარი იყო მოლაშქრე. მისი დროშა ლაშქარს უძღვებოდა. ის თვითონაც ეხმარებოდა ბრძოლაში ყმათ. ამას ცალკე გამოყოფილი ყმანი არ ჰყავდნენ, როგორც სხვადასხვა სალოცავებში. ლაშარის ჯვარი მთლიანად ფშაველთა სალოცავი იყო და ყველა ფშაველი ითვლებოდა ლაშარის ჯვარის ყმად. ლაშარის ჯვარს სანადო მამულები არ ჰქონდა. ის ისეთ ადგილას არის დაარსებული, რომ იქ არც მამულია და არც სოფელი. აქ უცხოვრიათ ბერებს; მათი საფლავებიც ისევ არის ლაშარის გორზე.

ლაშარის ჯვარს ემსახურებოდნენ სხვადასხვა სოფლებიდან ხევისბრები. სალუდე და ლუდის დამზადება აქ არ იცოდნენ, არც დასტურთ იყო. მოსული ხალხი თავის სასმელ-საქმელსაც მოიტანდა, სალუდე ქერი და სვე ხალხზე იკრიფებოდა და სხვაგან ადუღებდნენ. ლუდს სხვა ხატებში დამზადებულს მიიტანდნენ. აქ მთავარ დღეობაში დიდძალი მლოცავი იყრიდა თავს. აქ იყო მხოლოდ საბერო და საზარე; დანარჩენი აქ არა იყო რა. განძი და დროშა თავისი ჰქონდა და ხევისბრებს ებარა. გადმოცემით აქ იდგა ერთი დიდი მუხა. ციდან სვეტი იყო მასზე ჩამოსული და ოქროს შიბით ცას იყო მიბმული. ამ მუხას ფოთოლიც სხვანაირი ჰქონდა. ზურაბ ერისთავმა ამ მუხის ფოთოლი უნვალში ნახა და გაიგო, რომ ამაზე ოქროს შიბი იყო. მოინდომა მისი მოჭრა, მაგრამ ფშაველურთ შიშით ვერ მოდიოდა. მერე ერთ აფციურს. საჩუქრებს დაპირდა, თუ ამ მუხას მოჭრიდა. აფციურმა ვერ მოჭრა, ცულს დაჰკრავდა და მუხა ისევ გამთელდებოდა. მერე ერთმა ახადელმა, გვარად აფციურმა ასწავლა: მუხის ქვეშ ციცა დაკალი და მერე მოიჭრებაო. დაკლა ციცა. ოქროს შიბი მოსწყდა მუხას და ზეცაში წივილით წავიდა. მუხა წამოიქცა და წვერი გაღმა მხარეს საკვირაოს დაჰკრა. მუხის მოჭრამდინ იქ მარტო ბერები ცხოვრობდნენ, სხვა კაცს იქ მისვლა არ შეეძლო, მლოცავი დაბლიდან ლოცულობდა. მაშინდელი ლექსია:

დიდი ვარ ლაშარის ჯვარი, ცასა ვკიდევარ შიბითა,  
ქმელ გორზე მიდგა ბერ მუხა, ასავალია კიბითა.  
წყეულმა ერისთვიშვილმა, გადამაბრუნა ძირითა,  
ველი გაუსვა, გაწმინდა, მინდორზე გაიჭირითა.  
გამამივიდა ბძანება დამზადებელის პირითა:  
ჭერ სუ ძეობით დავლიე, შემერე ქალ-ქალიშვილითა.  
უქულმ ჩაუდევ საყელო შვილითა, შვილიშვილითა.



მას შემდეგ აფციაურებს შეუდგა ავადობა და ილეოდნენ. მოვიდნენ სალოცავად და ხატმა აღარ მიიღო. მას შემდეგ მათ საყულო პერანგისა უკუღმა უდგას მარცხნისაკენ, ლაშარის ჯვარი წალმა საყულოს გაკეთების ნებას არ აძლევს. მას შემდეგ აკრძალულია ლაშარის ჯვარის ყმის ე. ი. ფშავლის ქალის აფციაურზე გათხოვება და თუ გათხოვდა, არ იხეირებს. ამ ჩვეულებას ახლაც იცავენ ზოგიერთები.

### წყაროსთავ წმ. გიორგისა და მოხარნადე ღვთისმშობლის ღვთობები\*

წყაროსთავ წმიდა გიორგის ხატი იყო უკანაფშავის თემის სალოცავი. მას არ ჰქონდა სანადოები, დასტურ-ხევისბრები კი ჰყავდა. ხევისბრები ორი გვარიდან დგებოდნენ — ბობლიაშვილები და სოხურაშვილები, დასტურად კი წლობით დგებოდა ორი კაცი მორიგეობით — მთლიანად უკანაფშავის თემში ყველა გვარიდან.

წყაროსთავ წმიდა გიორგის სალოცავი მოთავსებულია ორ პატარა მდინარეს შუა გორის ცხვირში. აქ არის სალუდე, საზარე და დარბაზიც იყო. ხატში დარგულია შემოწირული ხეები (ხემხვიანნი — ხატის ენით): იფნი და ცაცხვი. გარშემოც ბუნებრივი ტყე იყო — არყი, თხილი, ცაცხვი, ცირცელი, წნორი და ადგილ-ადგილ მუხაც (ეს სოფელი რადგან ბორბალოს მთის ძირშია, მუხა კარგად ვერა გვარობს). წყაროსთავი სოფელ ელიაგზიდან აღმოსავლეთ მხარეს არის და დაშორებულია სოფლიდან ერთნახევარი ვერსით. აქ წინათ დევები ყოფილან. წმიდა გიორგის ეს ადგილი მოსწონებია და თვითონ მოუსურვებია აქ დადგომა. დევებისათვის შეუთვლია: დაცალეთ ეგ ადგილი, თორემ სულ ამოგწყვეტთ. დევებს არად ჩაუგდავ წმიდა გიორგის ნათქვამი და არ აყრილან. მაშინ წმიდა გიორგი მიჰპარვია და გორზეით ისრით ამოუწყვეტია, ერთი დევისად ისრით ფეხი მოუტეხია, რომელიც ტყეში შემალულა. წმიდა გიორგის ის აღარაად ჩაუგდავ, აღარ მიუტყევეია ყურადღება. მერე რო მოუძებნია, იქ ვეღარ მოუტელავ, გაპარულა და გადაკარგულა სადღაცა.

მას შემდეგ დაარსებულა აქ წმიდა გიორგი და ხალხსაც მადლი მოსვლია, დევ-კერბთ ვეღარ უვლიათ წმიდა გიორგის შიშით.

წმიდა გიორგის, როგორც ვთქვით, სანადოები არ ჰქონდა, ჰქონდა. მამულები და ვენახები კახეთში, მეფეებისაგან მიცემული. როცა თათრებს ებრძოდნენ, მაშინ წყაროსთავის დროშაც უვლევავთ იქა

\* შიამბო გიორგი მამიაურმა, მცხოვრებმა უკანაფშავში, სოფელ ელიაგზაში, 55 წლისამ.

და ხალხსაც უვლავ საბრძოლველად. მტერი რომ დაუმარცხებიათ, მეფეს შეუწირავს წყაროსთაულისათვის ერთი მამული ლალისყურეში და ერთი ფშაველში. ფშაველში მარანიც იყო თავის ვენახში (ამისი ქალაღი იყო მეფის მიერ მიცემული. მთხრობელმა ახლა არ იცის, ის ქალაღი სად არის, წინათ კი უნახავს). ვენახში ჰყავდათ ხატის მიერ არჩეული კაცები ხევისბერებიდან, რომელთაც ებარათ ვენახის და ქვევრ-მარნის მოვლა-პატრონობა. ერთი კაცი მუღმივად იქ ცხოვრობდა, დანარჩენები კი როცა საჭირო სამუშაო იყო, მაგალითად, ყურძნის დაკრეფა და სხვა, იმ დროს მიეშველებოდნენ. ამ მარანზედაც იყო პატარა კოშკი ქვისაგან აშენებული. ყველა სამუშაოს დაწყების დროს აქ საკლავი იკვლოდა წმიდა გიორგისათვის, ახვეწებდნენ ჯერ მთლიანად ყმათ და მერე ყმათაში ერთგულ მუშას და თავდადებულს სახატო საქმეზე. აქ ზედაშე ლეინოც გამოუღვეველი იყო, პატარა დღეობას გადაიხდიდნენ და გაიხსნებოდა ესა თუ ის სამუშაო (ეს ლეინო სად იხარჯებოდა, ამაზე შემდეგ გვექნება ლაპარაკი).

წმიდა გიორგის ივრის კულებში (ივრის სათავეებში) ჰქონდა საძოვარი მთები. ამ მთებს აქირავებდნენ მეცხვარე ხალხზე, რომლებსაც მოუდიოდათ ზაფხულში შირაქიდან დაბრუნებული ცხვრის ფარები. ისინი საბალახეს იხდიდნენ (საბალახეში იღებდნენ საუკეთესო ცხვრებს და ჰედილებს განსაზღვრული რაოდენობით). საბალახე ჩაბარდებოდა დასტურებს, რომლებიც ინახავდნენ, მანამ დაკვლა არ დაჰქირდებოდათ. ეს ჰედილები და ცხვრები დაწესებული რაოდენობით იკვლებოდა ამა თუ იმ დღეობაში. მაგალითად, ქრისტეს (შობას) დაკლავდნენ ერთ საუკეთესო ჰედილას, წელწადში უნდა დაეკლათ საში, რადგან წელწადი სამ დღეს იყო და თითო დღეს თითოს კლავდნენ. ხორცი იხარშებოდა და სოფელი ჰამდა, ტყავი კი ცხვრის შემნახველს მიჰქონდა.

ხევისბერები იყვნენ ბევრნი. ყველას თავისი საკუთარი საქმე ჰქონდა ხატისაგან ჩაბარებული. ჩაბარებას ხატი გამოუცხადებდა მკითხავის პირით: ამა და ამ ხევისბერს ვაბარებ ზარს და საკლავის დაკვლასო (ეს ორივე ერთ ხევისბერს უნდა შეესრულებინა); მეორე ხევისბერს — ლალისყურის მამულის მოვლას; მესამეს — ფშაველში ვენახის და ქვევრ-მარნის პატრონობას; მეოთხეს — ქადა-პურის დაჭრას; მეხუთეს — დარბას-სალუღეში სისუფთავის დაცვას; მეექვსეს — თას-განძთა მოვლა-პატრონობას, მის დარეცხა-დასუფთავებას, დათვლას, თავის დანიშნულ ადგილზე დაწყობა-დალაგებას და ხანდახან დამალვას სხვა-დასხვა ადგილებში, როცა მტრის დაცემის შიში იყო. როცა დამალავდნენ თას-განძს, ეს სამ კაცს უნდა სცოდნოდა — მტრის დაცემის დროს ამ სამში ერთი მაინც გადარჩებოდა და თას-განძი არ დაიკარგებოდა. ასევე ყველას ჰქონდა თავ-თავისი ქვის სკამი და სხვა სხვის ადგილზე

არ დაჯდებოდა. ამათში უფროსად ანუ თავხევისბრად ის ითვლებოდა, ვისაც ზარი ებარა და საკლავის დაკვლა ევალებოდა. მეტწილად იმის სიტყვას ემორჩილებოდნენ, სხვადასხვა სახატო საქმეზე მას ეკუთხებოდნენ და თუ მისი ნებართვა არ იქნებოდა, ისე არაფერს გააკეთებდნენ. ხშირ შემთხვევაში ასეთი ხევისბრები მკითხავებიც იყვნენ, უფრო სიზმრით. თუ ვისმეს სამკითხაო ექნებოდა, მასთან მიიტანდნენ სანთელს, ის დაახვევდა (ჩამოქნიდა) და ერთ ღამეს ჩამოქნილ სანთელს თავისი ლოგინის თავით დააწყობდა (სამ ფეხ სანთელს). მეორე დილას აანთებდა და რაც იმ ღამეს სანთლის პატრონისათვის სიზმარში მოიხილა (ნახა), გამოუცხადებდა. თავხევისბერი აწესრიგებდა, ხატის ბრძანებით ვის რა უნდა ჩაბარებოდა სახატო საქმე. დაევალებდა კახეთში წამსვლელებს, რა უნდა გაეკეთათ ხატის მამულში ან ვენახში. ერთი სიტყვით, თავხევისბერი წმიდა კაცად იყო მიღებული და თემიც ემორჩილებოდა მის სიტყვას. სათემო საკითხებში მის დაუსწრებლად არაფერი გადაწყდებოდა, სალაშქრო საქმეებსაც ის განაგებდა. როცა სალაშქროდ მიდიოდნენ, დალოცავდა (დაამწყალობებდა საკლავის დაკვლით) წამსვლელებს. დრომას მედროშე ხევისბერი ააბრძანებდა და გაუძღვებოდა ლაშქარს. თუ ძალიან ხნიერი არ იქნებოდა, თავხევისბერიც თან გაჰყვებოდა და მართავდა ლაშქრის მგზავრობას. თან გამარჯვება-დამარცხების საკითხებზედაც მკითხაობდა სიზმრებით.

## დასტურები

უკანაფშავის თემი იყოფოდა სამ თემად: ერთი თემი იყო ელიაგზა, მეორე თემი — ჭიდალი და მესამე — ვაკის სოფელი და ვაკის სოფლის ცოტა ზემოთ სოფელი გოჭცი (ამ თემებს ერთად ერქვა უკანაფშავის თემი — ეწით-ერთი, ფშავის თორმეტთაგანი). სამივე თემიდან ერთი წლის ვადით ღებობდა თითო თემში ორი დასტური — სულ ოცქვსი დასტური. დასტურებს დაყოფილი ჰქონდათ დღეობები და დიდ დღეობებში (ე. ი. რამდენიმე დღიან დღეობაში) კიდევ დღეები ჰქონდათ განაწილებული. დასტურები იცვლებოდნენ წელწადში. ახალ დამდგომ ექვსივე დასტურს მოჰყავდა ხატში შესამლოცაო თითო საკლავი, ხოლო ძველ დასტურებს თითო გამოსალოცი საკლავი. თხის გარდა ყველაფერი შეიძლებოდა — ცხვარი, ჭედლა, თოხლი, ხბო განურჩევლად მისი დედალ-მამლობისა. მიჰქონდათ ქადა-პურები, მიაყოლებდნენ საწირავთ (ერთი ხშიადი და სამი მრგვალი პატარა პური, რომლის გულში ჩადგმულია ღრმად ბერა თითი). საწირავთა და ქადა-პურებს მიჰყვება სანთელი, რასაც შესახვლების დროს ანთებდნენ და ახვეწებდნენ მომტანს: „წყაროსთავ წმიდაო გიორგიო, უშველე შენთ მეხვეწურთა,

ხალიზი მიეცი, ბალინჯი აშორე და წელიწადი მშვიდობისა დაუყენე“. პირველად მარჯვენა მხარეზე დააყენებდნენ ძველ, გადამდგომ დასტურთ, მათ ქადა-პურებზე ანთებდნენ სანთელს და ახვეწებდნენ, რომელთაც შეასრულეს თავისი მოვალეობა. საკლავებიც მათი დაიკვლებოდა პირველად. ახალდამდგომ დასტურთ დააყენებდნენ მათ ადგილზე, ძველ დასტურთ კი მარცხენა მხარეს გადმოაყენებდნენ. ანთებდნენ სამ-სამ ღერ სანთელს და შეუსახელებდნენ ქადა-პურებს. ახალდამდგომ დასტურთ სამწყალობნოდ. შემდეგ წამოაყენებდნენ ახალდასტურთ მოყვანილ საკლავებს და ხევისბერი წელსაწელებდა შესამლოცაოდ: „დიდება შენდა, ღმერთო მაღალო, ცისა და ქვეყნის გამჩენო, ხმელეთის დამდგმელო, კორციელ-უკორცოთ გამჩენო და იმათთან წესრიგის დამაარსებელო. დიდება შენდა, კვირაჲ ძალიან-მადლიანო, ზთის მალღის მოკარვეო. დიდება ძალსა და სახელსა შენსა, წყაროსთაჲ წმიდაო გიორგიო. შენთვის სამსახური მოუყვანია შენის წესის მიხედვითა ახალდამდგომ დასტურთა, მსახურთა. მოსულან შენს სამსახურებლად და დაწესებული წესის შესასრულებლად — შეიწყნარენ და მიიღენ, დიდო წყაროსთაჲ წმიდაო გიორგიო, შენდა სამსახურებლად. ხალიზი მიეცი და ბალინჯი საქმე აშორე, შენი სახელის ჭირიმე. თუ რამე საზიანო საქმე ეხედვებოდეს ამით კაცსა, საქონსა — მააშორე შენის ძალითა და დიდებითა, დალოცვილო წმიდაო გიორგიო-ბეგერი გყავ ორგული და მოღალატე და მაგათად დახედვებული მავნე საზიანო საქმე შენს ორგულ-მოღალატეზე გადაიღე და მაგათ სახლ-ჯალაფობას, კაცსა და საქონს მოაშორე. თუ რამე თავის უცოდინრობით გცოდონ ამ მომავალი წლის განმავლობაშია, შანაცოდვარი და შანაწყინარი შეუნდევ, შენის სახელის ჭირიმე, შანაწყინარზე ნურას საზიანო საქმეს მიაყენებ. ზღვნითა და სანთლით შაიხვეწენ და გადააჯღევიე თავისი უგნურობით შანაცოდარი საქმე. თუ რამე ჩემის უვიცობით შენს ჯსენებასა და დიდებას აკლდებოდეს, დალოცვილო წმიდაო გიორგიო, მაპატიე და შამინდევ და შენთ ახალ დამდგომ დასტურთაც შენს წყალობას ნუ დააკლებ“.

შესახელება რომ დამთავრდებოდა, დასტურები თავ-თავის საკლავს დაიჭერდნენ და ხევისბერი ყვლებს გამოსჭრიდა. მერე კიდევ დაამწყალობნებდნენ: „წყალობით იყოს თქვენს თავზე დალოცვილი, წყაროსთაჲ წმიდა გიორგი, შეიწიროს თქვენი შენაზღვენი, ნურა ავიდა ურიგო მოგცესთ. თქვენთვის დახედვებული საავო საქმე თავის მუხანათ-ორგულთაზე გადაიღოს და თქვენ უსაწყინოდ შეგინახოსთ“. ხევისბერი ამ სიტყვებს ძალიან ნელი და ტკბილი ხმით ეუბნება (ხევისურეთში კი ყველანი ხმამალა ყვირიან დამწყალობნების დროს, იქ მყოფნი ყველანი ამწყალობნებენ. ფშავში კი მარტო ხევისბერი ძლივს გასაგონი ტკბილი ხმით ამწყალობნებს. თითოთროლა ხევისბერი და

დასტური თუ ჩაურთავდა სიტყვებს: „წყალობით იყოს თქვენზედა ჩვენი სალოცავიო“). დამწყალობებული დასტურნიც ნელი ხმითვე უპასუხებენ: „თქვენიცამც მწყალობნელია დალოცვილი წყაროსთავ წმიდა გიორგი, ჩვენი სალოცავი“.

საკლავების დაკვლის შემდეგ დადგამდნენ ლუდიან ჭურჭელს, ან ღვინოს, დაასხამდნენ პატარა ყანწში და მისცემდნენ ხევისბერს, სანთლებს აანთებდნენ და იქვე დააკრავდნენ რამეზე. ხევისბერი დაილოცებოდა: „აბა გაემარჯოს ჩვენს სალოცავს წყაროსთავ წმიდა გიორგისა. გაემარჯოს კვირას ძალიან-მადლიანსა, ხთის მადლის მოკარვესა, გაემარჯოს დიდს ლაშარის ჯვარსა, თამარ ნეფესა და ყველა ხთიშვილთა და ყველა ანგელოზთა (აქ ბევრ ხთიშვილთ დაასახელებდა ხევისბერი), ფშავ-ხევსურეთის ყველა სალოცავებსა. წყალობით იყვენ თქვენს ახალ დამდგომ წყაროსთავ წმიდა გიორგის დასტურთაზედა ყველა ანგელოზნი და ყველა ხთიშვილნი. ავი და ზიანი გამოვროსთ, მშვიდობა და კეთილი საქმე მოგანიჭოთ, დაგვემარონთ დალოცვილნი ველთაყა და შინაყა, კაცსაყა და კიდენ საქონსაყა, თავისი სამსახური მშვიდობით შეგასრულებინოსთ და კვლავად უკეთესის გულით შეგახვედროსთ დალოცვილმა თავის სამსახურსა. გიმატოსთ წულსა, წულის აკაევანსა, უშველოს თქვენს კაცსა და საქონსა. წელი მშვიდობისა და ღალიან-ბარაქიანი დაგიყენოსთ დალოცვილმა ჩვენმა სალოცავმა. ნაჯსენებ-ნადიდებ ანგელოზთ და ხეთისშვილთ დიდება ჰქონდეს და თქვენ იმათი წყალობა ნუ მოგაკლდესთ“. ხევისბერი რომ დაილოცებოდა, სასმელს დაღევდა. შემდეგ ყველა აქ მყოფთ ჩამოურიგებდნენ ამავე ყანწით და ყველანი გაიმეორებდნენ ამ სახის დალოცვას, მხოლოდ ასე ვრცლად არა. საკლავებს პატრონები გაატყავებდნენ. საკლავის თავს, ერთ მხარსა და ტყავს დასტურ-ხევისბერებს გაუწირავდნენ, დანარჩენ ხორცს კი შინ გაგზავნიდნენ; გულ-ღვიძლს, ფილტვებს და თირკმელებს მოხარშავდნენ, ან შეწვავდნენ და ყვწლანი ჭამდნენ. საკლავის პატრონს თუ თავისი საკლავის ვატყავების დრო არ ჰქონდა, მის მაგიერ სხვა ვინმე გაატყავებდა, ის აიღებდა „საორახოთ“ (გულ-ღვიძლს, ფილტვებს და თირკმელებს ერთად „საორახონი“ ჰქვიან და ეკუთვნის საკლავის გამტყავებელს).

ახალ დამდგომი დასტურები ხევისბერისაგან წინასწარ გაფრთხილებულნი იქნებოდნენ და წელწლისათვის დაამზადებდნენ ლუდს შემდეგის წესით: თავ-თავის თემში აკრეფდნენ „საწულადოს“ თითო ლიტრა ფქვილს ფორისას და თითო ლიტრა სვეს იმდენს, რამდენი ქუდიანიც იყო (წული) კომლში. ე. ი. ყველა კომლი, თავის ოჯახში რამდენი წულიც ჰყავდა, იმდენ ფქვილს და სვეს იხდიდა ლიტრით (ლიტრაში ჩადის თორმეტი გირვანქა ქერის ფქვილი). ელიაგზის დასტურნი ელიაგზაში შეაგროვებდნენ საწულადოს და დაამზადებდნენ ლუდს, კიდ-

ლელნი ჰიდალში და ვაკისსოფელი და გოქცი ერთად. ლუდს სამივე თემის დასტურნი ცალ-ცალკე დააყენებდნენ. წელწადი წყაროსთაულში სამს დღეს იცოდნენ. თითო დღეს თითო თემის დასტურთ დამზადებულ ლუდს გამოიტანდნენ ხალხში და ხატშიც იმავე დასტურთ ლუდის ხარჯზე იყო დღეობა, მეორე დღეს მეორე დასტურთ ლუდი იხარჯებოდა, მესამე დღეს კი მესამე დასტურთი. ამას აწესრიგებდა თავბევისბერი, დუდილის დროსვე დაევალებდა, ვინ რომელ დღეს გაუძღვებოდა ლუდით ხალხს და ხატს.

## ლიტანია-საღამო

ლიტანია-საღამოს უკანაფშავის მთლიანი თემის ქუდიანი ხალხი შეიკრიბებოდა წყაროსთაულის ხატში (აქ სადასტურო არ იყო, რადგან დასტურები იქ არ ცხოვრობდნენ, როგორც ზოგიერთ სხვა ხატებში იცოდნენ ერთი წლით სადასტუროში ცხოვრება. აქ დასტურნი თავ-თავის ოჯახში იყვნენ, ნალახ ადგილებს ერიდებოდნენ, წმილობდნენ, მაგრამ ისე ძალიან არა, რომ ერთი წლის განმავლობაში მოწყვეტილნი ყოფილიყვნენ ხალხში მისვლას და თავის ოჯახს). ყველა მიიტანდა წულის სანთელს (ჩამოსაქნელს — ვისაც რამდენი შეეძლო, მაგ., ასი-ორასი გრამი, ან მეტი), სანთელზე გადახვეული იყო „სანთლის ჩილა“ (ბამბის ბაწარი, რაზედაც ჩამოქნიდნენ სანთელს). ყველას მიჰქონდა საწირაენი: დასტურები მიიყვანდნენ საბალახოდან მოყვანილ „სათეო“ საკლავს, მიიტანდნენ ბოთლებით თავის არაყს. როცა ხალხი მოგროვდებოდა, ხევისბრები გამოვიდოდნენ და დაამწყალობებდნენ მოსულ მეკვლეთ. ისინიც ქუდმობილნი ფეხზე ადგომით შეხვდებოდნენ და დაამწყალობებაზე უპასუხებდნენ: თქვენიცაპც მწყალობელია და თქვენის თავჯალაფისი. დასტურები წამოაყენებდნენ სასაკლაოზე სათეო საკლავს. თავბევისბერი ხელში ხანჯალს დაიჭერდა, პირადმოსავლეთისაკენ დადგებოდა და საკლავს შეუსახლებდა ჩვეულებრივად ყმათ. საკლავს ან დასტური ან ერთ-ერთი ხევისბერი დაუჭერდა ფეხებს და ხევისბერი დაკლავდა (მთხრობელმა თქვა: საკლავის ფეხების დაჭერაც კი ერთ-ერთ ხევისბერს ჰქონდა დავალებულიო. მე არ ვიცი, რამდენად სწორია, რადგან ასეთი სხვაგან არსად გამიგონია და არც შევსწრებივარ). საკლავის დაკვლის შემდეგ ხევისბერი კიდევ დაამწყალობებდა. სასმელს მიართმევდნენ, სამ ფეხ სანთელსაც აანთებდნენ და იქვე დააკრავდნენ სიპზე (რაც გამოყენებული იყო პურის, სასმელის ჭურჭლის, ხორცის და სხვადასხვა რამეების დასალაგებლად). ხევისბერი კიდევ დაილოცებოდა და უსურვებდა წმიდა გიორგის ყმათ ბედნიერ ახალი წლის დადგომას და დაღევდა სასმელს.

მერე ყველა გაიმეორებდა ხევისბერის სიტყვებს და დალევდნენ თითო-  
ქიქა არაყს. საკლავს გაატყავებდა ვინმე ახალგაზრდა დასტური. თუ  
ასეთი აქ არავინ იყო, ერთ-ერთი სოფლის ახალგაზრდა გაატყავებდა,  
რომელიც საორახოთ აიღებდა (ხანდახან დიდ დღეობაში ზოგიერთი  
კაცი, ვინც ოჯახში სუსტად ცხოვრობდა, ბევრ საკლავებს ატყავებ-  
და და იმდენ საორახოებს მოაგროვებდა, რომ ერთ სავსე ტომარას  
წაიღებდა შინ).

ამის შემდეგ ხალხი დარბაზში შევიდოდა (ცეცხლს აქ წინათვე  
დაანთებდნენ დასტურ-ხევისბრები, შეშა დამზადებული იყო დასტუ-  
რების მიერ ბლომად, რადგან ტყე აქ შორს არ არის). დარბაზში ყვე-  
ლანი დასხდებოდნენ და თავ-თავისი არყიდან ყველა ასხამდა პატარ-  
პატარა ყანწებში და ასმევდნენ ერთმანეთს. ზოგიერთ ხატებში მეკ-  
ვლენი მთლიანად ხატში ათევდნენ ღამეს, შინ წასვლა არ შეიძლებოდა.  
აქ კი ასე არ იყო. ვისაც სურდა, აქ გაათევდა ღამეს, ვისაც არა,  
მეორე დილას აღრიანად მოვიდოდა. კარგა ხანს ისხდნენ იქ; სვამ-  
დნენ. სიმღერებსაც შემოსძახებდნენ, ერთიმეორესაც ალექსებდნენ  
თავისპირით და მხიარულობა-თამაშობასაც მართავდნენ. ფშავში გარ-  
თობა და გამხიარულება უფრო თავისპირით მღერაში იყო მიღებული;  
ისე სმა და დროისტარება არ იქნებოდა, რომ ორი ან რამდენიმე კაცი  
არ შებმოდნენ. მოსწრებულ სიტყვებს უმღერდნენ ერთმანეთს და იყო  
ერთი სიცილ-ხარხარი. ამავე საღამოს გაიხსნებოდა პირველად ნაღულა-  
რი ლუდი. საკლავის ხორცი მოიხარშებოდა. დასტურები მოხარშავდ-  
ნენ. მოხარშვა ხორცისა იცოდნენ ასო-ასო, მაგალითად: მხარს მთლი-  
ანად ჩააგდებდნენ ქვაბში, ბარკალს ორად ან სამად გაჭრიდნენ. ასევე  
სხვა ნაწილებსაც დიდდიდად დაჭრილს მოხარშავდნენ, ფიცარზე  
ამოალაგებდნენ და ერთ-ერთი დააწილებდა. მიიტანდნენ ნაწილებად  
დაჭრილ საწირავთ პურებს და დააწყობდნენ ხორცთან. ანთებდნენ  
სანთლებს, დაასხამდნენ სასმელს და თავხევისბრებს მისცემდნენ ლუ-  
დიან თასს. იგი ახსენებდა დიდებით ჯერ ღმერთს, ლაშარის ჯვარს და  
მერე თავის სალოცავ წყაროსთავ წმიდა გიორგის. დალოცავდა ამ  
სუფრასაც და სასმელსაც ძველი ხევისბრებისათვის, რომლებიც აღარ  
არიან; ხევისბერი შენდობას ჭტყოდა ამთ სულებს ასე: „დიდება  
შენდა ღმერთო მაღალო, ცათა გამჩენო, კმელთა დამდგმელო, შენგან  
არის გაჩენილი ცაცა და ქვეყანაც, შენვე გააჩინენ კაცნი, შენაანა  
არიან ყველა ხეთისშვილნი და ანგელოზნი; შენს სახელს აკსენებენ  
და აღიდებენ სულნი წმიდანი. დიდება შენდა დიდო კვირავ ძალიან-  
მადლიანო, ხთის მაღლის მოკარვეო, კაცთა და ხეთის შუამდგომელო,  
დიდება შენდა დიდო წყაროსთავ წმიდა გიორგიო, ჩვენო სალოცავო,  
ზედაშე და სადიდებელი შენია, შენ გადიდოს შენმა გამჩენმა ღმერთმა  
და შენ გაძრიელოს ღმერთმა და ჩვენმა სალოცავმა. მოიგსენივნეს ამ

სანთელ-სუფრიტა და ზედაშიტა ის სულიწმიდანი, რომელნიცა იყვნენ ამ ჩვენს სალოცავშია წინანი გვეისბერნი, ემსახურებოდნენ ამ ჩვენს სალოცავსა და ასრულებდნენ მისგან დაწესებულ წესრიგსა — დღეს კი ისინი აღარა არიან, მათი დაკსომება ჩვენში კიდევ არის. კიდენა თუ ვინმე იყოს სულიწმიდა, რომა ღირსი იყოს შანდობისა, მოჯველოდებოდეს და ჩვენ ვერ ვიგონებდეთ, — გაანათლოს იმათი სულიცა ჩვენმა სალოცავმა და მაღალმა ღმერთმა. სულის მადლმა და ხეთისამა და ჩვენმა სალოცავმა უშველოს ამ თემსა და სოფელსა, წელი მშვიდობისა და მადლიან-ბარაქიანი დაუყენოს. სულებს შენდობა ჰქონდეს, ჩვენს სალოცავს დიდება და თქვენ ყველას სიცოცხლე და დღეგრძელობა“. ამის შემდეგ ხევისბერი გამოცლიდა თასს და ყველას დააღვინებდნენ ამავე თასით ასეთსავე შესანდობარს. ამ დროს დარბაზში დიდი ცეცხლი ენთო და ერთერთი ხევისბერი სანთლებს უვლიდა, — ცეცხლთ ახლოს იჯდა და სანთლებს გვერდს უქცევდა, გამლხვალ გვერდებს სთლიდა დანით და ხელში ზელდა. ჩილას ერთი წვერით ჭერში ჩამოაბამდნენ, ბოლოს ვინმე სხვა დაიჭერდა და მესანთლე ხევისბერი დარბილებულ სანთელს ჩამოქნიდა. ჩამოქნიდნენ მთლიანად, რაც წულის სანთლად იყო მოტანილი და ერთი ხელის დადების სიგრძეზე დაჭრიდნენ. წინასწარვე არჩეული იყო ხევისბერი, რომელსაც ევალებოდა წელწად-დილას გოგის შეგორება. ამ ხევისბერს ეწოდებოდა „უფროსი მეკვლე“. დღეს ის განაგებდა მეკვლეობის წესრიგს, მას ირჩევდნენ თვითონ ხევისბერები. უფროს მეკვლეს დათვლილი ჰყავდა რამდენი წული იყო ამ თემში (წული: მამაკაცია აკვნის ბავშვებიანად). წულის რაოდენობის მიხედვით დაითვლიდა წულის სანთელს და ლიტანია ღამეს სამჯერ დაანთებდა, დარბაზში გრძელი სიბის თაო იყო და იმაზე მწკრივად დააკრავდნენ სანთლებს, მოჯვოდებდნენ ცეცხლს და უფროსი მეკვლე დაილოცებოდა. ევედრებოდა წყაროსთაულს, ღმერთს და კვირას მშვიდობის წლის დაყენებას, წულისა და წულის აკვნის მომატებას, საზიანო საქმის მტერ-მუხანათზე გადაღებას და სხვა. პირველად დაანთებდა პირველ ღამეს, მეორედ შუალამის დროს და მესამედ თენების დროს. ვარსკვლავებზე ჰქონდათ დასწავლილი რომელი ვარსკვლავი სად იდგა და მათი მოძრაობის საშუალებით იგებდნენ შუალამეს, თენებას და სხვა; თუ ცა მოწმენდილი არ იყო, მაშინ ვარაუდით ასრულებდნენ ამ წესს. სუფრას სახელს რომ შესდებდნენ (შენდობის თქმა), ხალხი დასხდებოდა მწკრივად. ერთი ვინმე ადგებოდა და ხალხში ჩამოარიგებდა ზორცის და პურის ნაჭრებს — არჩევდა ისე, რომ ყველას ერთნაირი ნაჭრები შეხვედროდა, უფარდებდნენ ერთიმეორეს დიდპატარას. ზოგი შექამდა, ზოგი გუდაში ჩაიწყობდა (ყველას თან მოტანილი ჰყონდა სასაგძლე გუდა).





ლამეს ამ ამბით გაათევენ. ვარსკვლავები რომ სათენებოს მიუ-  
ახლოვდებოდნენ, მაშინ კვალს დაიჭერდნენ და გარეთ სიარულს აუ-  
კრძალავდნენ ერთმანეთს. დასტურ-ხევისბრები ლამეს ათევენ ელი-  
აგზაში, ხთიშობელში, სადაც განსაკუთრებით მათთვის იყო დარბაზი,  
ხსენებული მეკვლეც იქ ათედა ლამეს და თენებაზე წავიდოდა წმიდა  
გიორგის დარბაზში, სადაც უკანაფშავის თემის მეკვლენი იყვნენ.  
არჩეული მეკვლე რომ მივიდოდა, უკვე დღე-ღამე ირჩეოდა. იგი  
საზარესთან მუხლს მოიყრიდა და წმიდა გიორგის ევედრებ-ეხვეწებოდა  
ახალი მშვიდობიანი წლის დაყენებას, ახვეწებდა ყმათ და სთხოვდა  
მათთვის მშვიდობას და კაც-საქონის გამრავლებას. მერე პირჯვარს  
დაიწერდა, ფეხებზე ქალამნებს გაიხდიდა და წინდებიანი დიდი მო-  
ხატრებით მოვიდოდა ზართან. ზარს სამჯერ ჩამორეკდა, კიდევ მოი-  
ყრიდა მუხლს და წამოვიდოდა დარბაზისაკენ. მეკვლენი ზარის ხმაზე  
ადგებოდნენ, ქულებს მოიხდიდნენ და ევედრებოდნენ თავის სალო-  
ცავ წმიდა გიორგის: ახალი მშვიდობიანი და ღალიან-ბარაქიანი წელი  
დაგიყენო (ეს ზარის ხმა ნიშანი იყო იმისა, რომ ძველი წელი დამ-  
თავრდა და ახალი წლის ზარი დაირეკა). ხევისბერს დარბაზის კარებ-  
თან გოგას გამოუტანდნენ. ამ დროს სრული სიჩუმე იყო, მარტო  
მეკვლის ხმა ისმოდა: „ღმერთო და ჩვენო სალოცავო, წყაროსთავ წმი-  
ნდო გიორგიო, დიდო კვირავ — ხეთის მალღის მოკარვეო, ხეთისა  
და კაცთა შუამდგომელო, უშველეთ წმიდა გიორგის ყმათა უკანაფშა-  
ველთ თემსა, ფეხი ჩემი იყოს და კვალი ანგელოზისა, წელი მშვიდო-  
ბისა დაუყენეთ, თქვენს ხვეწნა-ვედრებას ნუ დაუკარგავთ, წულსა  
და წულის აკავანს უმატეთ, წლის მოსავალს ჯვარი დაუწერეთ და  
ღალიან-ბარაქიანობას მოუმატეთ. თუ რამე ეხედვებოდეს მარცხი და  
ფათერაკი, თქვენს ორგულ-მუხანათზე გადაიტანეთ, თქვენის სახელის  
ქირიმე“. ამ ლოცვის დამთავრების შემდეგ ზღურბლზე ფეხს არ გა-  
დადგამდა, მანამ გოგას სამჯერ არ მოუტანდნენ და არ შეაგორებდა.  
მესამედ რომ გააგორებდა, ფეხსაც გადასდგამდა ზღურბლზე და იტ-  
ყოდა: „ფეხი ჩემი, კვალი ანგელოზისა, შემოვდგი ფეხი, გწყალობ-  
დეთ ღმერთი და ჩვენი სალოცავი წყაროსთავ წმიდა გიორგი, მოგი-  
ლოცავთ ახალი წლის გამოცვლას, ბედნიერი წელი დაგიყენოსთ წუ-  
ლით და წულის აკავნით, კაცით და საქონით, წელი მადლიანი, ღალი-  
ან-ბარაქიანი და მშვიდობიანი მოგინიჭოსთ ჩვენმა სალოცავმა“.

ყველა გადაკოცნიდა ერთმანეთს. მოჰქონდათ თათლიანი ტყბილი  
რამე, ერთმანეთს შესთავაზებდნენ და ეტყოდნენ: „ეგრე ტყბილად  
დამიბერდიო“. მილოცვა რომ დამთავრდებოდა, მოიყვანდნენ საბა-  
ლახეში მოყვანილ ორ საუკეთესო საკლავს. ამ დროს ხატში, წყაროს-  
თავს, ყველანი მოსულნი არიან უკანაფშავის თემიდან, გარდა პატარა

ბავშვებისა და ძალიან მოხუცებულებისა. საკლავებს სასაკლავოზე წა-  
მოაყენებდნენ და ყველანი ქუდმოხდილნი დადგებოდნენ მზის ამო-  
სავლისაკენ. ხევისბერი საკლავებს შეუსახელებდა და დაკლავდა (ზე-  
მით გამოგვჩა: აქ, უკანაფშავის თემში, კიდევ იყო ერთი ხთიშო-  
ბელი ვაკის-სოფლის ზემოთ, ხთიშობელ ციხის ანგელოზი. ამ ხთი-  
შობელშიც იყვნენ დასტურ-ხევისბრები. დილას, როცა სამეკვლეს  
შეგორების დრო მოვიდოდა, აქაური მეკვლეც წავიდოდა და შეაგო-  
რებდა წყაროსთავის მეკვლეთა გოგას. მესამე გოგას თვით წყაროს-  
თავისას შეაგორებდნენ. მხოლოდ ამათში უფროსი მეკვლე ერთი  
იყო). აქ უფროსი მეკვლე ყველა მეკვლეების ქულებს მოაგროვებდა  
და არევ-დარევდა ერთმანეთში, დაათარებდნენ ნაბადს, უფროსივე  
მეკვლე ქუდმოხდილი ევედრებოდა წყაროსთავს, რომელიც ღირსი-  
იყოს, სოფლის მეკვლეობა იმას არგუნეო. ნაბდის ქვეშიდან გამოი-  
ღებდა სამ ქუდს, პირველი ქუდის პატრონს ერგებოდა ელიაგზის  
სოფელში მეკვლეობა, მეორეს — ჭიდაღში და მესამეს — ვაკისსოფ-  
ელსა და გოქციში. მეკვლეებს მიულოცავდა: „ღირსი ხარ და ღირ-  
სად გცნო ჩვენმა სალოცავმა, მრავალს დაესწარი მეკვლეობას, ნუ შა-  
განანოს დალოცვილმა, შენი ფეხი იყოს თემისა და სოფლისათვის და  
კვალი წმიდა ანგელოზისა“. ამ დროს მეზარე სამჯერ კიდევ ჩამორეკ-  
და ზარს და მეკვლეები სოფლებისაკენ გაეშურებოდნენ. დანარჩენი  
ხალხი ცოტა ხანს კიდევ სვამდა. საკლავებსაც გაატყავებდნენ, ხორ-  
ცი ჭერ მოხარშული არ იყო, რომ ყველანი წამოვიდოდნენ თავთავის  
სოფელში. პირველად წასული მეკვლე ყველა ოჯახში მივიდოდა,  
მიულოცავდა ახალ წელიწადს და შეუგორებდა გოგას. ცოტა რამეზე  
დაპატიებდნენ (უფრო თათლ-ერბოზე, რომელიც ამ დილას ყველა  
მეკომურს უნდა ჰქონოდა).

მეკვლე სოფლის მეკომურებს ყველას შემოთუვლიდა და ბოლოს  
ერთ კომლთან გაჩერდებოდა; ვისთანაც ბოლოს მივიდოდა, ისინი  
ალარ გაუშვებდნენ. მეკვლე რომ მოვიდოდა, ყველა ოჯახიდან მიჰ-  
ქონდათ წყალზე ნაყრი. ოჯახში რაც რამ ქონება არის, ყველაფრის  
ნაწილს გამოხვევდნენ თიკეში (ქსრვილის ნაჭერი), მაგალითად, ხორ-  
ბლის მარცვალი, ქერი, სვილი (კვავი) და ძროხის ნაწარმი — ერბო,  
ყველი, ხაჭო; მატყლი. წყალთან რომ მივიდოდნენ, ჩააგდებდნენ და  
იტყოდნენ: „წყალო, ნაყრი მოგიტანე და მადლი და ბარაქა გამომა-  
ყოლე, წელი მშვიდობისა და ღალიან-ბარაქიანი მოგვანიჭოს შენმა გამ-  
ჩენმა ღმერთმა“. ნაყრის მიმტანს თან მიჰქონდა წყლის ჭურჭელი,  
აავსებდა და წამოიღებდა შინ.

გოგას დასჭრიდნენ და ყველა ჭამდა თათლ-ერბოსთან ერთად.  
ცოტა ნაწილს ხარებსაც შეაჭმევდნენ, ფურებსაც და ცხვარსაც. ამის  
შემდეგ იწყებოდა ჩვეულებრივი წელიწადი. ერთიმეორესთან ოჯახებ-

ში პატივი, მღერა-თამაშობა და ხუმრობა. ერთი სოფელი მეორე სოფელს „ეცემოდა ჯარად“, მეორე მესამეს და ასე გრძელდებოდა. ხატში ხევისბერს მორთავდნენ „ხელმწიფედ“, გამართავდნენ ჯოხზე სახუმარო ალაშს. როცა სოფელი სოფელს „დალაშქრავდა“ ხელმწიფე გამოეგებებოდა აღმით და თავისი ამალით. თავდამსხმელ სოფელში ვინმე ხნიერი დედაკაცი იქნებოდა, მოხუცებული კაციც შეიძლებოდა, უფრო კი ასეთი ხუმრობის დროს ცდილობდნენ დედაკაცი ვინმე გამოსულიყო; დედაკაცი გამოვიდოდა ფალავნად და ეტყოდა: ჩვენ ყველამ რად უნდა ვიომოთ, გამოიყვანეთ თქვენი ხელმწიფე, შეეგებმი და თუ დავამარცხე ჩვენია გამარჯვება და თუ არა, თქვენ ხართ გამარჯვებულნიო. ხელმწიფე დათანხმდებოდა და გამოვიდოდა საბრძოლველად, მაგრამ ყოველთვის დაამარცხებდა დედაკაცი, წააქცევდა, სხვები მივარდებოდნენ და დროშას წაართმევდნენ. ზოგებს ტყვედ დაიჭერდნენ და აღარ უშვებდნენ, მანამ სახსარს არ მოატანიებდნენ — ლუღს ან არაყს. ხელმწიფის სახსარი იყო ერთი კოკა ლუღი, უფრო ნაკლები იყო უბრალო მებრძოლის სახსარი (კოკა — თულუხი სპილენძისა; ხეცურეთში ჩხუტით წყავენ და საზღვრავენ ლუღს, ფშავში კი იმის მაგიერ კოკა არის მიღებული). თუ ვერ მოშველდებოდნენ ტყვეების სახსარზე, სასამართლოს აირჩევდნენ და იმათ მიერ მისჯილ სასჯელს კი ყველა დათანხმდებოდა.

ასეთი ამბით ატარებდნენ დროს სამი დღის განმავლობაში და მესამე დღეს საღამოზე მთავრდებოდა წელწადი. დროშა გარეთ იყო და ზარი ყოველდღე ირეკებოდა დილით, მზის ამოსვლის დროს (მზის ამოსვლასთან არ იყო დაკავშირებული ზარის რეკვა, დაახლოებით ამ დროს ირეკებოდა). წელწადში აქაც იცოდნენ ბედისკვერის გამოცხობა ოჯახის ყველა წევრისათვის და ყველანი თავ-თავის ბედისკვერს შეჭამდნენ თავლ-ერბოსთან ერთად. დიასახლისი გოგაზე დანიშნავდა, რომელი მხარე რომელი ქონების სახელზე იყო, მაგალითად ძროხებისა, ცხვრისა, ყველ-ერბოსი, პურისა და სხვა, რომელი მხარეც ზევით ამოიწვედა, ნიშანი იყო იმისი, რომ დაბდგომ წელს ცხოვრების ეს ნაწილი უფრო იხეირებდა. ასევე ჰქონდათ დანიშნული ბედისკვერები, რომელი ბედისკვერიც აიწვედა (ფუნთუშა გახდებოდა), ის წევრი უფრო ბედნიერი იქნებოდა ოჯახში. სხვის ბედისკვერს სხვას არ მისცემდნენ საჭმელად. მარტო შეილს შეეძლო ეჭამა დედის ბედისკვერი. თუ რომელიმე ოჯახის წევრი წასული სადმე იყო და წელწადს აქ ვერ ესწრებოდა, ბედისკვერი ენახებოდა.

#### ხორციის შაბათი

წელწადის შემდეგ მოდიოდა დღეობა ხორციის შაბათი (სხვა ხატებში ხორციის შაბათის დღეობა არ გვხვდება. როგორც მთხრობელმა თქვა,

წყაროსთავ წმიდაგიორგიში ხორცის შაბათს დღეობობდნენ). ეს დღეობა არის დიდი-მარხვის შემოსვლის წინაღღეს (ამ შაბათს ხევსურულად აღებას ეძახიან, ფშავში ხორცის შაბათს). ამ დღეს დილით მოვლენ დასტურ-ხევისბრები ხატში. სოფელიც მოვა და მოიყვანენ თან სასოფლო საკლავს, რომელიც საბალახეში აყვანილი იყო საძოვარი მთის ბალახის ქირად და აქ ინახებოდა დასტურთან. მოვლის ფასად ცხვრის შემნახველი საკლავის ტყავს თვითონ წაიღებდა — გატყავებითაც თვითონ ის გაატყავებდა.

სასმელი აქ ყველას თავ-თავისი მოჰქონდა. ამ დღეობაში ლუდი არ მზადდებოდა, მხოლოდ სახლიდან ყველას მოჰქონდა არაყი. მოჰქონდა აგრეთვე ქადა-პურები, რასაც იქვე სიპზე ალაგებდნენ. როცა აღარ იყო მოსასვლელი ვინმე, მაშინ სანთლებსაც ჩამოქნიდნენ, დასჭრიდნენ თითო ხელის დადებინ სიგრძეზე, მოუკიდებდნენ და დააკრავდნენ იქვე სიპზე. ხევისბერი შეუსახელებდა სანთელს და ავედრებდა ყმათ. შესახელებისა და დამწყალობების შემდეგ ხევისბერი დაჭრიდა ქადებს (ქადის დამჭრელი ხევისბერი სხვა იყო) და დაჭრის დროს იტყოდა: „დიდება შენდა, წყაროსთავ წმიდა გიორგიო, შენ უშველე შენს მეხვეწურსა (სახელი მომტანისა), მაგათ თავ-ჯალაფობასა, კაცსა და საქონსა, ნაშრომ-ნაშვრალსა მადლი და ბარაქა დაუტანე, შინ მშვილობა მიეც და ველთ გამარჯვება“.

ამ დღეობაში ქალებიც მოდიოდნენ და ღასხდებოდნენ მათთვის განსაზღვრულ ადგილზე. აქ ქრისტიანული ეკლესია არ იყო, მაგრამ სასოფლო საკლავს, რომელიც აქ დაიკლოდა, ეკლესიის ნათვლას ეძახდნენ. ზღენები სოფლელებსაც მოჰყავდათ, ვისაც შეთქმული ჰყავდა, ავადმყოფობის ან სხვა რაიმე გაჭირვებისა და ფათერაკის დროს სამეშველოდ. ზღვენს გაატყავებდნენ, ერთ მხარსა და ტყავს დასტურ-ხევისბრებს დაუტოვებდნენ, დანარჩენს შინ წაიღებდნენ, ან ერთ აბაზ ვერცხლის ფულს მისცემდნენ ტყავის სახსრად და ტყავსაც წაიღებდა ზღვის პატრონი. ამ დღეს აქ სუფრობა არ იმართებოდა. მხოლოდ სასოფლო საკლავის ხორცს და პურის ნაჭრებს ჩამოუბრებდნენ ხელზე. ქადის ერთი მეოთხედი ხატში რჩებოდა, სამი მეოთხედი პატრონს უბრუნდებოდა. ქადის მეოთხედების ნაწილსაც წვრილ-წვრილ ნაჭრებად დასჭრიდნენ და პურთან და ხორცთან ერთად მისცემდნენ („ქადის წილობა ხატის წყალობა არის“ — იტყოდნენ ფშავლები). ხორცის შაბათს კაცი და დედაკაცი ყველა ხატში მოდიოდა. მხოლოდ დღეობა დიდხანს არ გრძელდებოდა. აქედან ერთიმეორეს დაპატივებდნენ სახლში და იქ მართავდნენ სმას.

ეს დღეობა ითვლებოდა უფრო სულის დღეობად. ფშავში ერთი წლის განმავლობაში იხდიდა სხვადასხვა ხარჯებს ახალი მიცვალებულების პატრონი და ერთ-ერთი სველდებულო ხარჯი იყო ხორცის

შაბათი (აწერილია ფშაურ მიცვალებულის კულტში). ხატიდან დაბრუნებული ხალხი ამ ხარჯში მოვიდოდა. მიცვალებულის პატრონს დაამზადებული ჰქონდა პური, სასმელი, დაკლავდა სულისათვის ერთ საკლავს და ჩვეულებრივ გადაიხდიდა ხარჯს. აქ ხორცს და პურს ხელზე ურიგებდნენ, მაგრამ სმა გრძელდებოდა დაღამებამდე. ამ ხარჯში სხვა სოფლებიდანაც მოდიოდნენ ნათესავეები, ისინი ღამით აქ რჩებოდნენ, დანარჩენი ხალხი კი წავიდოდა თავთავის სახლებში. ამით მთავრდებოდა ხორცის შაბათს ხატის და სულის დღეობა ერთად.

### შ უ ა მ ა რ ხ ვ ა

ხორცის შაბათს მოსდევდა დღეობა შუამარხვა. ამ დღეობაშიც ხატი ლუდი არ მზადდებოდა, სახლებიდან მოჰქონდათ სასმელი, სამარხვო პური და სანთელი (ქადა არ მიჰქონდათ, რადგან სახსნილო იყო). ხევისბერი სანთელს მოანთებდა, ხალხს დაამწყალობებდა და ვისაც რა მოტანილი ჰქონდა, სასმელს დააღვეინებდნენ (მარხვაში საკლავს არ კლავდნენ). ოჯახში ყველას ჰქონდა მოხარშული „ღოხანი“ (მოხარშული ხორბალი, ან თუ ჰქონდათ სიმინდის ღოხანს ცოტას ლობიოს აურევდნენ). ღოხანს და პურებს სახელს „შაზღებდნენ“ მიცვალებულთათვის და ამასვე მოიტანდნენ სუფრაზე. მიცვალებულის პატრონები პატიჟობდნენ მარტო ქალებს, ტანისამოსთ გამოიტანდნენ, სატირელს გამართავდნენ და ტირილის შემდეგ გაუმასპინძლებოდნენ პურით და ღოხანით, არაყსაც დააღვეინებდნენ მიცვალებულთა შესანდობარს. ამით დამთავრდა მარხვაც (შუამარხვა ხატში დღეობად სხვაგან არ გვხვდება, მხოლოდ ზოგიერთ ხატებში მარხვაში დილა-საღამოობით ხევისბრები მოვიდოდნენ და ხატში სანთელს აანთებდნენ, რასაც ეწოდებოდა „სანთლის მონთება“ — ეს გრძელდებოდა მარხვის დაწყებიდან შუამარხვამდე).

### ა ხ ვ ს ე ბ ა (აღდგომა)

ახვსებას დასტურები ლუდს ამზადებდნენ. დასტურ-ხევისბრები საღამოთივე მივიდოდნენ ხატში და ღამეს იქ გაათევდნენ. სანთელს აანთებდნენ და ლუდსაც გახსნიდნენ. საქმელი დიღამდე სამარხვო ჰქონდათ. დილით მეზარე ზარს დარეკავდა, სანთელს მოანთებდნენ და ხალხიც თანდათან დაიწყებდა მოდენას. სასოფლო საკლავს მოიყვანდა ის, ვისაც მორიგეობით შეხვდებოდა, ხალხი სანთელ-საწირავს და თითო ბოთლ არაყს მოიყოლებდა (ფშავეში ხატში ხელცარიელი კაცი არ მივიდოდა, თუ სასმელს არ მიიტანდა, ხევსურეთში კი მიმსვლელს თავის ხატში არაფერი არ მიჰქონდა, გარდა შორიდან მოსული

მეზღვნესა. პირიქით, ჯვარიონთ ეშარებოდნენ — ეგ ლუდი ჩვენი ნახ-  
ნავ-ნათესიდან ჩვენი ამაგია და გამოგვიტანეთ დროზე საკმარიო).

სასოფლო საკლავს დაკლავდნენ, ხევისბერი ახვეწებდა მთელ  
უკანაფშავის თემს, თემში ხალხისათვის და ხატისათვის თავდადებულ  
კაცს, სთხოვდა ყმათა, წულოს, წულის აკენის, კაც-საქონის გამრავლე-  
ბას და სხვა. საკლავის დაკვლის და გატყავების წესი ჩვეულებრივ  
სრულდებოდა. ტყავი ხატში რჩებოდა, მოხარშული ხორცი ხალხს  
ურვიდებოდა. ამ დღეობაში ქალებს მიჰქონდათ განსაკუთრებით უფრო  
მეტგულიანი ქაღები, რომელთაც განსაკუთრებული სახელი „სამგებრო  
ქაღა“ ეწოდებოდა, ქადის დამკრელ ხევისბერს — „მზარეული“. სხვა  
ჩვეულებრივი ქაღები როცა დაიჭრებოდა, როგორც ვთქვით, სამი  
მეოთხედი პატრონს უბრუნდებოდა, ხოლო ერთი მეოთხედი ხატში  
რჩებოდა. სამგებრო ქაღა კი პატრონს აღარ მიჰქონდა, მთლიანად  
დაიჭრებოდა და ჩამოურიგებდნენ ყველა იქ მყოფთ. ბავშვებს სირ-  
ბილში შეაჯიბრებდნენ, ამ ქადის ნაჭრებს მისცემდნენ — წინ მორბი-  
ნალს. მეტს და მერე თანდათანობით უკლებდნენ. ვინც უკან ჩამორ-  
ჩებოდა, გულნაკლულად არც იმას დასტოვებდნენ, მისცემდნენ ქა-  
დის უფრო მომცრო ნაჭერს, ვიდრე სხვებს. თუ დროს იხელთებდ-  
ნენ ბავშვები, ისეც გასტაცებდნენ ქადის ნაჭერს, არც ეს იყო აკრ-  
ძალული. დედაკაცებს აქ ხატიენები ყურადღებას აქცევდნენ, გაუტან-  
დნენ ლუდს, არაყი კი იმათაც მოჰქონდათ სახლებიდან და ხატში მამა-  
კაცებს უგზავნიდნენ; სამგებრო ქადის ნაწილი ქალებსაც ურიგდებოდა.  
მოიტანდნენ ფანდურს და იმართებოდა თამაშობა, მოსწრებული სიტ-  
ყვებით ერთიმეორის გალექსება. ასეთ მომღერლებს მსმენელები ბევრა  
ჰყავდა, ერთობოდნენ. მაგალითად, ფუნჩიამ შეუმღერა ყუჩიას:

აქალ დაჯე, ყუჩიას, მართალს გეტყვის ფუნჩიას,  
კომუნისტობა დაგიწყავ, მოგიპირავს ტუჩიას.  
კომუნისტობას ვერ იზამს შენფერ ბაიყუშიას.

ახვსებას წმიდა გიორგიში შეთქმული ზღვნებიც მიჰყავდათ და  
ჩვეულებრივი სუფრობა იმართებოდა. სალამოზე მოთავდებოდა დღე-  
ობა და დაიშლებოდა ხალხი.

## ათენგენა

ახვსებას შემდეგ მოვიდოდა დღეობა ათენგენა (მთხრობლის  
თქმით, წმიდა გიორგიში ამალღება რატომღაც არ იცოდნენ). ათენ-  
გენას აქ ლუდი არ მზადდებოდა. მოჰქონდათ მარტო კულუხის ღვი-  
ნო თავისი ვენახებიდან. მამული და ვენახი წმიდა გიორგის კახეთში  
ორგან ჰქონდა — მატანში და ლალისყურში. აქ ჰყავდათ დაყენებუ-

ლი თავისი ხალხი ხელმძღვანელებად. ისინი თავხევისბრის დავალებებს ლებულობდნენ აქედან და იმის მიხედვით ამუშავებდნენ ვენახებს და მამულს. მამულს და ვენახს იმდენი შემოსავალი ჰქონდა, რომ საჭირო დროს მუშას ამუშავებდნენ. მევენახეობისა ფშავლებს არაფერი გაეგებოდათ და ამიტომ საჭირო იყო ადგილობრივი ხალხის დაქირავება ვენახის მოსავლეად. გაზაფხულიდან შემოდგომამდე ვენახს რაც კი სჭირდებოდა, ყველაფერს აკეთებდნენ დაქირავებული მუშებით. მარანი ჰქონდათ ლალისყურში და ღვინოს იქ აყენებდნენ. მარანს პატრონობდა ერთერთი. ხელწმინდა კაცი, წმიდა გიორგის ყმათაგანი, რომელიც ზამთარ-ზაფხულ იქ იყო. წყაროსთავს ცალკე აშენებული იყო „საკულუხო“ — პატარა სახლი, დარბაზის მსგავსი, სადაც მოტანილი ღვინო ინახებოდა. ხევისბერი წინასწარ გამოუცხადებდა წმიდა გიორგის ყმათ, დაუნიშნავდა კულუხზე წასვლის დღეს. ხალხი მოამზადებდა ცხენებს, ტიკებს ღვინისათვის, ჩაასხამდნენ ტიკში საგზაო არაყს, წაიყვანდნენ ორ საკლავს. ხურჯინით და წაიდიოდნენ (ჩასვლა-ამოსვლის დღეები ისე ჰქონდათ გამოანგარიშებული, რომ ხუთშაბათს უნდა მოსულიყვნენ წყაროსთავს). კულუხის ხალხი გადავიდოდა უკანაფშავის მთაზე — ფუტკარაულზე. ერთ დამეს ივრის კულუხში გაათევდნენ. სადაც გაათევდნენ, იქ სანთელს აანთებდნენ და ეხევეებოდნენ წყაროსთავს, რომ მშვიდობის მგზავრობა მიეცა მათთვის. იძინებდნენ რიგრიგობით, რომ ქურდ-ყაჩაღს ან დროშა არ მოეპარა, ან ცხენები (გამოგვრჩა: მეკულუხე როცა გაემგზავრებოდა, მედროშე ხევისბერი ხელმხარს ინათლავდა ერთი საკლავით, შერე დროშას ააბამდა და მეკულუხეს დროშით გაუძღვებოდა წინ).

რომ გათენდებოდა, ცოტას ისაუზმებდნენ, სანთელს მოანთებდნენ და ისევ გაუძღვებოდა მედროშე ხევისბერი. მატანში რომ ჩავიდოდნენ: სიმღერით მივიდიოდნენ წმიდა გიორგის მამულში. „ჩვენას ბატონის კარზედა ხე ალვად ამოსულაო“ — ასე მღეროდნენ ამ სიმღერას, მაგრამ ხსენებული მეკულუხე კი ასე მღეროდა:

წმიდა გიორგის კარზედა ხე ალვად ამოსულაო,  
წვერად მოუსხამ ყურძენი, საჭმელად შამოსულაო,  
მაგის უკმელი ქალ-ვაჟი, უდროოდ დაშაულაო.

იქვე ნიში და დროშის საბძანი კვრივი იყო. დროშას მიაბძანებდნენ და დაისვენებდნენ. წმიდა გიორგის ხატიონთ მოსვლას მატანში ბევრი ხალხი გაიგებდა და მოდიოდნენ სასმლით, სუფრით და სხვადასხვა შესწირავებით, ვისაც რა ჰქონდა შეთქმული. ზოგი მიიტანდა სადროშე ბაღდადს, ზოგი ვერცხლის ფულს, ვერცხლის სამკაულს, ზოგი საკლავს მიიყვანდა. მანამ სმას დაიწყებდნენ, ჯერ თავის მოყვანილ საკლავს დაკლავდნენ, რომლითაც მთლიანად წმიდა გიორგის

ყმათ ახვეწებდნენ. სასოფლო საკლავის შემდეგ მეზღვნეების საკლავებს თითოობით დაკლავდნენ მათ სამწყალობნელოდ. საკლავების დაკვლის შემდეგ დაიწყებოდა სანთელ-საწირის შესახელება, საკლავებს გაატყავებდნენ და მოხარშავდნენ ხორცს. ღვინო ადგილობრივ მცხოვრებლებს ბევრი მოჰქონდათ საუკეთესო ხარისხისა.

ზღვნობა და საწირავები რომ მოთავდებოდა, მერე გაიმართებოდა სუფრები (აქ ხორცს და პურს ხელზე არ არიგებდნენ, იმართებოდა ქართული სუფრა, სასმელ-საჭმელი სუფრაზე იყო). შემოღამებისას სანთლებს ანთებდნენ და მთელი ღამის განმავლობაში ატარებდნენ დროს. გამოყოფილ კაცებს ღვინით უნდა გავესოთ ტიკები და საპალნეები გავმზადებინათ. ტიკები ისე დიდი იყო, რომ ცხენი ორ ტიკს ძლივს ერეოდა. რომელი ქვევრიდანაც უნდა ამოეღოთ ღვინო, მის პირზე დააწყობდნენ საწირავთ, აანთებდნენ სანთლებს და ხევისბერი (იგივე მდროშე) შეუსახელებდა ქვევრ-მარანს თავის სალოცავ წყაროსთაულს. ახვეწებდა ყმათ და სთხოვდა მათ სიმრავლესა და ჯანმრთელობას. სახატო საქმეზე თავდადებულთ და ზედაშის მოყვანადამზადებაში მშრომელთ უფრო ახვეწებდა, მოიხსენებდა ვედრებით აქ მოსულ მეზღვნეებს და წმიდა გიორგის მლოცავთ. ხევისბერი გამოცლიდა ჭიქას და ყველას დააღევიანებდა გიორგის ყმათ სამწყალობნელს. ქვევრის გახსნის შემდეგ სასოფლო საკლავის ხორცის სუფრას გამართავდნენ და იმ მიცვალებულებს მოიხსენიებდნენ, რომლებიც წინათ ყოფილან მეკულუხეში. ასეთ შესანდობარსაც ყველა დაღევიანამასობაში თენებაც მოატანდა და ხევისბერი გაუძღვებოდა ლალისყურისკენ. აქ საპალნეები და რამდენიმე კაცი დარჩებოდა. ცხენებით და ტიკებით მივიდოდნენ ლალისყურის წმიდა გიორგის მარანზე (ორივე ვენახის ღვინო უნდა წაეღოთ ზედაშე განსაზღვრული რაოდენობით, ნახევარი ერთგნიდან და ნახევარი მეორე მარნიდან). ლალისყურშიც ამავე წესით შეხვდებოდნენ წმიდა გიორგის დროშას და ხატვენებს. საპალნეები ღამით გამზადდებოდა და დილასვე დროშის წინგაძლოლობით დაბრუნდებოდნენ უკან. ცალკე ტიკებით მიჰქონდათ იმდენი ღვინო, რომ გზაში შემხვედრთანაც ჰყოფნოდათ და თვითონაც დაეულიათ. წყაროსთავს კიდევ მიჰყვებოდათ იმდენი სახარჯო ღვინო, რომ შემხვედრ ხალხს დაღევიანებდნენ, მანამ კულუხის ღვინო გაიხსნებოდა. მატანში თავის მარანზე ცოტას შეისვენებდნენ, დროშასაც თავის საბძანებელში მიაბძანებდნენ და ისაუზმებდნენ. მერე აჰკიდებდნენ ცხენებზე ღვინის საპალნეებს და წამოვიდოდნენ უკანაფშავისაკენ.

ხუთშაბათს აქ დარჩენილი ხევისბრები და დასტურები მოიყრიდნენ თავს წყაროსთავს და შოამზადებდნენ ყველაფერს, რაცკი საჭიროა ხატობაში. ამ დროს მოვიდოდა მეკულუხეც. დროშის ზარისხმა შორიდანვე ისმოდა. ქუდმოხდილი დასტურ-ხევისბრები გზაში:



მიეგებებოდნენ. შემხვედრებს მედროზე დაამწყალობნებდა: „წყალობა მგზავრის ანგელოზისა, წყალობა“. ისინიც უპასუხებდნენ: „გამარჯვებათ ჭატ-კაციანად, მოგვიხვედით მშვიდობითა“. მედროზე პირდაპირ დროშის საბძანთან მივიდოდა და დააბძანებდა დროშას, თვითონაც. იქვე ახლო ქვის სკამზე დაჯდებოდა. სხვები მიიტანდნენ ღვინიან ტიკებს საკულუხოს კარზე. საკულუხო ერთ-ერთ ხევისბერს ებარა და იმის მეტს იქ შესვლა არავის შეეძლო. დიდი მოკრძალებით და ლოცვა-ვედრებით ფეხშიშველი შევიდოდა საკულუხოში, ღვინით სავსე ტიკებს მიიღებდა და დაწყობდა სათანადო ადგილზე. ამის შემდეგ ყველანი დაისვენებდნენ. მოხსნიდნენ საჯანო ღვინიან ტიკებს და დაალევიებდნენ აქაურებს. კარგად დასვენების შემდეგ შეუდგებოდნენ ხატობის წესრიგს. მესანთლე ხევისბერი სანთელს მოამზადებდა. ღვინოს თიხის საღვინით გამოიტანდა მელვინე ხევისბერი, რომელსაც საკულუხო ებარა, მეზარე ზარს ჩვეულებრივი წესით და ხვეწნა-ვედრებით დარეკდა. თავხევისბერი კი შეუდგებოდა ზედაშეზე წმიდა გიორგის ხსენება-დიდებას. ხსენება-დიდებას წესი ზემოთ არის აწერილი და ამავე წესით ასრულებდა აქაც. ბოლოს ღვინიან ჭიქას გამოცლიდა და იტყუოდა: „გწყალობდესთ ყმათა, სადილებულო წყაროსთავ წმიდა გიორგისა იყო და სამწყალობნელი თქვენი — წმიდა გიორგის ყმათი“. ჩამოურიგებდნენ და ყველას დაალევიებდნენ. ამის შემდეგ იმართებოდა დღეობა. პირველად დაიკვლოდა სასოფლო საკლავი და მერმე მეზღვნეებისა. ათენგენას სუფრობა იცოდნენ და ბევრი მხიარულება. ხალხიც ბევრი მოდიოდა სალოცავად. დღეობა აგრძელდებოდა სამ დღეს — ხუთშაბათი, პარასკევი და შაბათი. პარასკეობით საკლავს არ კლავდნენ — ვინც მოასწრებდა ხუთშაბათს დაკლავდა, ვისაც დაუგვიანდა, ის შაბათს. მაგრამ საშურელი იყო ხუთშაბათს დაკვლა იმიტომ, რომ ბინაში ხორცი თუ არ ჰქონდათ სამი დღის განმავლობაში, რითი გაუმასპინძლებოდნენ მიპატიებულებს. ბინა თავ-თავისთვის ედოთ, ხოლო ახლო ნათესავების ერთად.

პარასკევს დღეობა გრძელდებოდა (საკლავის დაკვლის გარდა). სანთელს მოანთებდნენ, ზარს რეკდნენ და ერთიმეორეს სუფრაზე ეპატიებოდნენ. იმართებოდა თოფის სროლა. მიცვალებულის პატრონები დგამდნენ „ლაბაქებს“ თავ-თავის მიცვალებულების შესანდობრად (მთხრობელმა მიაბზო: ლაბახი დღეობის გარეშეც, ე. ი. უღლეობოდაც, მიჰქონდათ წყაროსთავს, ხატთან ახლო. სალაბახე მოხერხებული ადგილია და ვისაც პატივსაცემი მიცვალებული ჰყავდა და ემეტებოდა მისთვის, უღლეობოდაც დადგამდნენ). ერთ კაცს აირჩევდნენ ლაბახის თავად და ის განაგებდა მის წესრიგს. პირველად წილს უყრიდა, თუ ვის ერგებოდა სროლა. მერე როცა ხალხში ბოლოს გავიდოდა წილი და ვერავინ მოარტყამდა ლაბახს ტყვიას, მაშინ წილისყრას თავს დაა-

ნებებდნენ და ვისაც როგორ უნდოდა ან რამდენიც, იმდენს ესრო-  
და. ღაბაზზე აყენებდნენ: ქალბან-წინდას, საფუხარს, ფულს, ცხვიარს  
ან ქედილას, ვისაც რა ემეტებოდა. სროლის დროს ღაბაზის თავი  
ღაბაზთან ახლო იყო, და ყოველ სროლაზე სინჯავდა ნატყვიარს, მოხ-  
ვდა თუ არა. ეს მაშინ, თუ ტყვია ფიცარს მოხვდებოდა. ღაბაზის  
ფიცარი იყო დაახლოებით ერთი არშინის სიგრძე. მას შუაგულში  
ჩხირით მიკრული ჰქონდა ხელისგულზე მომცრო თეთრი ფიცარი. ამ  
ფიცარს მიაკრავდნენ თეთრ რამეს, თუ იშოვიდნენ ქალაღს, რომ  
ლიშანში გამოჩენილიყო. ხალხში ასეთი რწმენა იყო, რომ ღაბაზი რო-  
მელი მიცვალებულის სახელზეც იღვა, თუ იმ მიცვალებულს სიცოც-  
ხლეში თოფის სროლა უყვარდა, ღაბაზს ტყვია აღვილად არ მოხვ-  
დებოდა, რადგან ამ მიცვალებულს საიქიოსაც თოფის სროლა ეყვ-  
არებოდა და ღაბაზის მალე აღებას ხელს უშლიდა. უნდოდა, რომ მის  
ღაბაზზე ბევრი სროლა ყოფილიყო. ასეთი რწმენაც იყო, მიცვალე-  
ბული, რომლის ღაბაზიც იყო, ვისთვისაც თვითონ გაიმეტებდა, იმას  
ააღებინებდა, თუ არ ემეტებოდა, რამდენიც უნდა ესროლათ, ტყვიას  
სხვა მიმართულებას მისცემდა და ღაბაზს არ მოახვედრებდა. მიცვა-  
ლებულის სულს ეს ძალა ხვთიდან ჰქონდა მინიჭებული (ასეთივე რწმე-  
ნა იყო ხევსურეთშიც ღაბაზზე და სულთაყრეფის სათოფეზე). ღაბა-  
ზის თავი ბევრს წვალბოდა, მაგრამ სამაგიეროდ მიწაში დაფლულ  
ტყვიებს ის თხრიდა, ხელმეორედ გადაადნობდა და თავის თოფის ყა-  
ლიბში ჩამოასხამდა: იმ დროს ტყვიის შოვნა აღვილი არ იყო. ამიტომ  
ღაბაზისთავად დადგომას არავინ ზარობდა და წილსაც ყრიდნენ ღაბაზის  
თავად დადგომაზე. ღაბაზად ხშირდსაც აყენებდნენ ფიცრის მაგიერ;  
შუაგულში ქალაღს ან სხვა რამე თეთრს დააკრავდნენ იმავე ზომისას.  
ხშირად რამდენიც უნდა მოხვედროდა, არ ითვლებოდა, თუ განსა-  
კუთრებულ ადგილს არ მოხვდებოდა.

პარასკევი უფრო თოფოსნობაში ღამდებოდა, ღამეც ქეიფობდნენ  
და ქალ-ვაჟები ერთდაც დაიძინებდნენ ფშაური ნადობ-ნაძმობობის  
წესით. თუ ეჭვი ქონდათ, რომ ქალ-ვაჟი ერთად იწვენენ, ჩუმიად მიი-  
პარებოდნენ და რამეს მოპარავდნენ, რომ გათენდებოდა, ჯერ ჩუმიად  
ეტყობდნენ: თუ არ გინდათ, ხალხმა გაიგოს თქვენი ერთად წოლა, ჯა-  
რიმა გადაიხადეთ ერთე ბოთლი არაყი, თუ არა სახალხოდ ვიტყვი-  
თო. თუ ქალ-ვაჟი შორაახლო ნათესავი მაინც იყო და ეკუთვნოდა ერ-  
თად. დაწოლა, რომ შებზე ცუდს ვერავინ იფიქრებდა, ასეთებს გა-  
მოუქვეყნებდნენ და დიდხანსაც აწვალდნენ: ხანდახან სახუმაროდ  
სასამართლოსაც მოაწყობდნენ და სასამართლოს გამოჰქონდა მძიმე  
ჯარიმის განაჩენი, რასაც უნდა დათანხმებოდნენ და გადაეხადათ. ჯა-  
რიმა იყო უფრო არაყი ერთი ბოთლი, ან ერთი ამ ჯგუფის მიპატიყე-  
ბა თავის ბინაზე და სუფრის გამართვა. ამასობაში გათენდებოდა შაბა-

თი (დაჯარიმება შაბათსაც იყო და პარასკევსაც, რადგან ხალხი აქ ორ ღამეს ათევდა და ორივე ღამეს ასეთ ამბებში იყო ახალგაზრდობა გართული). შაბათ-დილას კიდევ დაკლავდნენ სასოფლო საკლავს, მეზარე ზარს დარეკდა, სანთელს მოანთებდნენ და გაიმართებოდა დარჩენილი საკლავების დაკვლა. საკლავის დაკვლა, სუფრის დაგება (გაშლა) და დანარჩენი წესები სრულდებოდა ისევე, როგორც სხვა დღეობებში.

ამის შემდეგ დაიდგმოდა „საყეინო“. საყეინოც იმავე წესით სრულდებოდა. ანთებდნენ სანთელს და ხევისბერი ასე დაილოცებოდა: „დიდება ძალსა ჩვენი სალოცავისასა, დიდება ღმერთსა და კვირას ძალიან მადლიანსა, ღმერთმა და ჩვენმა სალოცავმა გაუმარჯოს ლაშარის ჯვრის პიროფლიანთა, რომელნიცა მტერს ებძოდეს ლაშარის ჯვრის დროშის და სამშობლოს გულისადა, დაღალულნი და პიროფლიანნი პირწალმა და პირნათლად დაინოცნენ და მტერს ზურგი არ უჩვენეს. აქაც გამარჯვებულნი იყვნენ და თავის გრძელ ქვეყანაშიაც გამარჯვებული იყოს მათი სახელი, გაუმარჯოს“. „ამინ“, „ეაშა!“ — დაიძახებდა ხევისბერი და ყველანი ბანს მისცემდნენ. ხევისბერი წამოუწევებოდა ჩანახს, ხელს არ ახლებდა და ღვინოს დაეწაფებოდა და ა. შ. ყველაფერი იმ წესით სრულდებოდა, როგორც სხვა ხატებში.

საყეინოს სმა რომ მოთავდებოდა, საბოლოოდ ისევ ხევისბერი გამოცლიდა და ფულებს ამოიღებდა. აქვე დაითვლიდნენ და გადააბარებდნენ მეგანძურს. შაბათ-საღამოს ხალხი დაიშლებოდა. და ხატეუნიც შინ წავიდოდნენ. სუფრობა და ყველა წესი ამ დღესაც სრულდებოდა ჩვეულებრივად.

## გ ი ო რ გ ო ბ ა

გიორგობას ლუდი არ მზადდებოდა. ათენგენის შემდეგ არც დღეობობდნენ წყაროსთავში გიორგობამდე. გიორგობა-დღეს დილით ადრე მიდიოდნენ. დასტურ-ხევისბრები და თავისი მოვალეობის შესრულებას შეუდგებოდნენ, ხალხის მოსვლამდე ყველაფერს მოაწესრიგებდნენ, ამ დღეობაში არც დროშა გამოდიოდა. მლოცავი ხალხი მოდიოდა საკლავებით და სასმელით. ადგილობრივ უკანაფშაველთაც ყველას მოჰქონდა არაყი, დედაკაცებს ქაღები. ახალი წესი აქ არაფერი სრულდებოდა გარდა იმისა, რაც სხვა დღეობებში არის ნათქვამი.

## მ.ჩ.ს.ტ.ბ

გიორგობის შემდეგ იყო დღეობა ქრისტე. ქრისტეს ლუდიც მზადდებოდა და დროშაც გამოდიოდა. სოფლის საკლავი იკვლოდა და როგორც სხვა დღეობებში, ისეთივე წესით იყენებდნენ საკლავის ტყავ-

ხორცსაც და სხვა წესებსაც ისე ასრულებდნენ. ქრისტეს მოსული ხევისბრები წელიწადის გადაყრამდე რჩებოდნენ. ქრისტედან წელწდამდე ერთ კვირას „თევის კვირა“ ეწოდებოდა. ხევისბრები დღე და ღამე აქ იყვნენ. დილა-საღამოს სანთელს ანთებდნენ და თავის სალოცავს ახვეწებდნენ ყმათ. სოფელი რიგრიგობით უზიდავდა მათ მოსაკითხს და მთელ დღეს ქეიფობაში ატარებდნენ. მოსაკითხის მომტანიც მთელ დღე მათთან იყო. ქრისტეს დამზადებული ლუდი ხატიონთ თევისკვირასაც ჰქონდათ გამოზოგვილი და მოსაკითხის მომტანს ამითი უმასპინძლებოდნენ. როცა მათი ჭურჭელი გამოიცლებოდა, ამავე ჭურჭელს ლუდით უვსებდნენ და ატანდნენ სახლში.

თევის კვირის შემდეგ ლიტანია-საღამო იყო. აქედან დასტურებსაც ცვლიდნენ და იწყებოდა ახალი დღეობები.

წყაროსთავ წმიდა გიორგიში ხევისბრობა მოუდიოდა, ე. ი. თავ-ხევისბრობა, სოხურაშვილების და ბობლიაშვილების გვარებს. დასტურები კი, როგორც აღვნიშნეთ, ყველა გვარებიდან იყო — სოხურაშვილებიდან, ბობლიაშვილებიდან, მამიაურებიდან, არჩემაშვილებიდან, ჯვებლაურებიდან, კოჭლიშვილებიდან, კარატიელებიდან, ამირანაშვილებიდან, წელაურებიდან და მურლოშვილებიდან (ამ თემში მოსახლეობდნენ შემოხსენებული გვარები).

#### ც ი ხ ი ს ა ნ გ ე ლ ო ზ ი — ა ღ ბ ი ლ ი ს დ ე ღ ა

ადგილისდედა დაარსებული იყო ელიაგზის სოფელთან, დასავლეთ მხარეს. ეს იყო სოფელ ელიაგზის საკუთარი სალოცავი. როგორც ზემოთ დაიწერა, ამ სოფელში მოსახლეობდა სამი გვარი: ბობლიაშვილი, მამიაური და სოხურაშვილი. მათი საერთო სალოცავი იყო ციხის ანგელოზი ადგილისდედა. აქ იყო სალუდე, დარბაზი და პურის ბეღელი. დასტურები არ იცოდნენ. იყვნენ მარტო ხევისბრები, რომლებიც დგებოდნენ სამივე გვარიდან, ვისაც ხატი მოითხოვდა. ამ სალოცავს ჰქონდა ნაყევრალეები და საგანძური. ნაყევრალეებსაც და საგანძურსაც ხნავდნენ თანასოფლელები. თავთავის ნაყევრალას მომკიდნენ, საგანძურსაც თავ-თავის მოხნულს. ძნას თავის კალოზე მიიტანდნენ, გაღეწავდნენ, ჩალა-ბზე თვითონ რჩებოდნენ, პურს ბეღელში მიიტანდნენ და აბარებდნენ ხევისბერს, ვინც გამოყოფილი იყო პურის შემნახავად. საგანძურზე მოჰყავდათ წმინდა პური სახატო გამოსაცხოვებისათვის, ნაყევრალეებზე კი ქერი ლუდისათვის. ნაყევრალეები და საგანძური მამულები სოფელთან ახლო იყო. საგანძურები სოფლის ბოლოზეა სამხრეთ მხარეს, ნაყევრალეები — სოფლის გვერდზე დასავლეთ მხარეს.

როგორც ვთქვით, რაკი დასტურები არ იყვნენ, დღეობები იყო განაწილებული მცხოვრებლებზე. ორი კაცი ერთ დღეობაში დაამზადებდა ლუდს ან არაყს, ორი კაცი მეორე დღეობაში, ორი მესამეში და ასე შემდეგ. საამისოდ პური გამოჰქონდათ ბელლიდან, რომელსაც უწყავდა ხევისბერი, ვისაც ბელელი ებარა. რადგან აქ წლიური დასტურები არ იყვნენ და არ იცვლებოდნენ, ამიტომ პირველი ხატობა არ იყო. მაგალითად, წყაროსთავს პირველი ხატობა იყო წელწადში, რადგან დასტურები მაშინ იცვლებოდნენ და პირველად წელწადში იწყებდნენ თავისი მოვალეობის შესრულებას. ამ ხატში უფრო კარგი ხატობა იცოდნენ ამალლებას და მთხრობელმა პირველად ეს ხატობა ჩამაწერინა. აქ დროშა არ იყო, არც საზარე და ზარი. პირველ ხატობად ჩაითვლება ამალლება. ამ დღეს ყველას მოჰქონდა ფურთ ნათავრის ქადა ზედ პატარა კვერებით. კვერებიც ხავიწიანი იყო. ქადას თან მოაყოლებდნენ ბოთლით არაყს, ჩამოსაქნელ სანთელს, რომელსაც ჩილა ჰქონდა დახვეული. ქადის დამკრელი მზარეული ქადას მაშინვე დაჰკრიდა — მეოთხედ ნაწილს ხატში დატოვებდა და სამ მეოთხედს პატრონს უბრუნებდა. სანთელს ჩამოქნიდნენ ყველა მეხვეწურის სამწყალობნოდ აანთებდნენ. მლოცავები ამ ხატობაში ბლომად მოდიოდნენ, მოჰყავდათ საკლავები, დოლისთავი ბატკნები (დოლისთავი ის ბატკანია, რომელიც სულ პირველად დაიბადა ამ წელს მისი პატრონის ცხვრებში). დოლისთავი ბატკნის მოყვანა საეალდებულო იყო. თუ რომელიმე ოჯახი სიხარბის გამო არ მოიყვანდა, ცხვარში რამე ზარალი მოუვიდოდა, მაშინვე დააბრალებდნენ დოლისთავის დაუკვლევლობის მიზეზს.

სასოფლო საკლავის ხორცი, საწირავები და ქადის ნაჭრების ნაწილები დაიჭრებოდა და დაურიგდებოდა ხალხს. იმართებოდა მღერათამაშობა. ქადებზე მოყოლილ კვერებს მოაგროვებდნენ და დაურიგებდნენ ბავშვებს, რომლებიც მათ იტაცებდნენ. პატარა ბავშვებს, ვისაც კვერების ატაცება არ შეეძლო, ხელზე ურიგებდნენ კვერებსა და ქადის წილობებს.

## ათენგენა

ათენგენას აქ ლუდიანობა და სოფლის მოსვლა არ იცოდნენ. მოვიდოდა მარტო მლოცავი, ვისაც საკლავი ჰყავდა დასაკლავი. სუფრობა აქ არ იყო. მხოლოდ საკლავებს კლავდნენ მლოცავები და მათ მოტანილ სასმელს სვამდნენ. მერე მიდიოდნენ წყაროსთავში და იქ იხდიდნენ ხატობის ყველა წესებს.

მარიანობას უფრო კარგი ხატობა იყო ციხის ანგელოზ ადგილისდელაში. მარიანობა დილით მოიყრიდნენ თავს ხევისბრები. ლუდი დამზადებული ჰქონდათ. მოანთებდნენ სანთელს და გახსნიდნენ ლუდს, მლოცავენსაც მოჰქონდათ არაყი და იმართებოდა სუფრობა. ყველა ის წესები სრულდებოდა, რაც სხვა ხატობებში. დაკლავდნენ სასოფლო საკლავს, საბოლოოდ ყმაწვილებს უგორებდნენ კვერებს და არბენდნენ კიდევ დოღის სახით. აქაც წინ მომსვლელს დიდ ჭილდოს (დოღვს) აძლევდნენ, დანარჩენებს — ნაკლებს.

#### წელწადი და წყალკურთხევა

წელწადში აქ მარტო ხევისბრები იყვნენ, წყაროსთავს კი მეკვლენი მთლიანად. დილით აქედანაც წავიდოდა ხევისბერი და წყაროსთავს მეკვლეთ შეუგორებდა გოვას. აქ ცოტახანს იყო ხატობის წესი და მერე უერთდებოდნენ წყაროსთავის ხატიონთ. მხოლოდ წყალკურთხევას კი აქაც დიდი სანთლობა იყო, ანთებდნენ იმდენ სანთელს, რამდენი ხატების სახელიც იცოდა აქაურმა ხევისბერმა. ახსენებდნენ ფშავ-ხევსურეთის ყველა ხთიშვილებს, ევედრებოდნენ კაცისა და საქონის სიმრავლეს და ჯანმრთელობას ამ თემისათვის. ერთი თიკანიც დაიკვლებოდა ამ ხატობაში, ადგილისდელაში. ესეც სასოფლო იყო. თიკანის დაკვლა რიგ-რიგობით მოუდიოდათ. სხვა დროს აქ თიკანი არ იკვლოდა. თიკანს ტყავს ტიკად გააძრობდნენ და ხორცს მოხარშავდნენ. ტყავი ხევისბერს რჩებოდა.

#### ახსენება

ახსენებას ლუდი არ მზადდებოდა, არც სასოფლო საკლავს კლავდნენ. მლოცავეები თუ რამეს მოიყვანდნენ დასაკლავს და სასმელსაც ისინი მოიტანდნენ, თორემ აქ სხვა არაფერი იყო. ცოტა ხანს თუ ვინმე მოვიდოდა, ისევ სახლებში ეპატიებოდნენ ერთმანეთს.

#### ვაკის სოფლის მოხარნაღი ხთიშობალი

ვაკის სოფელი და გოქცი ერთ თემად ითვლებოდა. გოქციში ცხოვრობდნენ წელაურები, ვაკისოფელში — წელაური, კარატიელი, ამირანაშვილი, არჩემაშვილი და ცოკილაური. ვაკისსოფლის მოხარნაღე ხთიშობელი იყო ამ გვარების საერთო სალოცავი. ხევისბერი და დასტურიც ხსენებული გვარებიდან დგებოდნენ. მოხარნაღე ხთი-

შობელი სადაც იყო, ყველგან ძლიერ ხატად ითვლებოდა. ჰქონდა სანადოები (ხოდანურები), ამავე სანადოებს ეწოდებოდა ნაყევრალე-ბი.

ხთიშობლის ნიში იყო სოფლის გვერდზე, დასავლეთ მხარეს. ჰქონდა დარბაზი, სალუდე, სადასტურო, საზარე, საპურე ბელელი და წმიდად დაცული ხატის კალო. დარგული იყო ხეები — იფნები და მუხები (ხემხვიანნი). ხატის კალოზე ყველა კაცი ვერ გაივლიდა, თუ წმიდად არ იყო და ნალახში იყო ნავალი. დასტურები იყვნენ წლობით, ითვლებოდნენ „წლის ბერად“. წლის განმავლობაში ისინი ცხოვრობდნენ სადასტუროში. სოფელში ვერ შევიდოდნენ — ვერც თავის სახლში და ვერც სხვაგან, ვერც ნალახ გზაზე გაივლიდნენ, ვერც სასმელს დაღევდნენ სოფლელებთან საერთო ყანწით, თავისი ყანწი ჰქონდათ და სოფლელებს სადაც შეხვდებოდნენ სმაში, ამ ყანწით სვამდნენ; სხვის გამოძეხვარ პურს ვერ ჰკმდნენ, მუდამ თვითონ აცხობდნენ თავის საკმელ პურს. მიცვალებულთათვის ნალოც (მიცვალებულების ხარჭებში ნალოცს) სასმელს ვერ დაღევდნენ. თვითონ რომ ეთქვათ: შეიწყალოს ესა და ეს მიცვალებულიო — ასეთი ნალოცის დაღევა კი არ ეკრძალებოდათ. ქალი ვერც საფქვავს და ამზადებდა, რომლიდანაც დასტურების საკმელი პური უნდა გამოძეხარიყო. საფქვავსაც ისინი თვითონ ამზადებდნენ. ყოველ დღეობაში ხელ-მხარს ინათლავდნენ თითო საკლავით. მუშაობაში ოფლისდენა ეკრძალებოდათ. სხვის მუშაობაში წავიდოდნენ, მხოლოდ ქალებისა ახლო არ იმუშაებდნენ. ხევისბრებს იმდენი წმიდობა არ ევალებოდათ, როგორც „წლის ბერებს“.

ნაყევრალები ანუ სანადოები ჰქონდათ ჯვართთავს, ეკლესიასთან. სანადოებს უძველეს დროში ნადით ზნავდნენ და ნადით მკიდნენ. ნადში ლუდიც იცოდნენ და საკლავებსაც კლავდნენ. ხორცს მოხარშავდნენ და სუფრას გააგებდნენ. მერე თანდათანობით გადავიდნენ სხვა წესზე. დაყვეს მამულები და დაერქვა ნაყევრალები. თავთავის ხვედარ მამულს მოხნავდნენ, დათესავდნენ და მოჰკიდნენ. ძნას მამულზე ააგებდნენ. მემრე დასტურს ევალებოდა მისი მოვლა-პატრონობა, მოტანა და გალევვა.

ბელელში შესვლა და პურის ჩაყრა-გამოტანა ერთ დასტურს ებარა, ის პურს ვერ ჩაყრიდა ბელელში, თუ ხელ-მხარს არ ინათლავდა; ერთხელ კიდევ ინათლავდა ხელ-მხარს სათესლე პურის გამოტანაში. სალუდე პურის ამოღებისთვის კი ხელ-მხარს არ ინათლავდა. გაბანებოდა, სანთლებს აანთებდა და სთხოვდა თავის სალოცავს, რომ ბელელში სიარულით თუ რამეს სცოდავდა თავის უცოდრობით, ეპატიებინა და სამაგიერო სასჯელი არ მიენიჭებინა (საპურე ბელელი დღესაც ისევ არის ქვეთკირისა, მხოლოდ ცარიელი).

ხატის კალოზე ყველა კაცი ვერ გაივლიდა, ვერც ვერავინ გალენჯავდა დასტურების გარდა. დასტურები აქაც წელწადში იცვლებოდნენ იმავე წესით, როგორც წყაროსთაულში. წელწადი აქ ერთ დღეს იცოდნენ. მერე ეს ხატიონნიც უერთდებოდნენ წყაროსთავს და დღეობობდნენ. აქედანაც წელწად-დილას ერთი მეკვლე წავიდოდა და წყაროსთავს მეკვლეთ შეუგორებდა გოგას. ლუდი კი აქაც ჰქონდათ და ადგილობრივი მცხოვრებლები სვამდნენ. მეკვლენი კი, როგორც ზემოთ ითქვა, უკანაფშავის თემიდან მიდიოდნენ წყაროსთავს და წულის სანთლებიც იქ ენთებოდა, რადგან ის იყო მთავარი სათემო სალოცავი ამ თემში.

წელწადის შემდეგ იყო წყალკურთხევა. წყალკურთხევისთვისაც ლუდი ჰქონდათ დამზადებული; სანთელს მოანათებდნენ; სოფლიდან მოდიოდა ქადა-საწირავი. სასოფლო საკლავი ამ ხატობაში არ იკვლოდა. თუ ვისმე რამე შეთქმული ჰყავდა, ის დაკლავდა საკლავს. სუფრობა არ იყო. ამის შემდეგ ხორცის შაბათი იყო და მარტო სანთელს ანთებდნენ. აქედან მოყოლებით მარხოშუობამდინ. მერე ახვება მოდიოდა.

ახვებას სასოფლო საკლავსაც კლავდნენ და მლოცავიც მეტი მოდიოდა. წესი არაფრით განირჩეოდა ციხის ანგელოზის წესებთან, მხოლოდ სასოფლო საკლავი შეიძლებოდა რომელიმე ხატობაში აქ დაკლულიყო და იქ არა, ან და პირიქით.

## ამაღლება

ამაღლებისათვის ლუდს ადუღებდნენ. სოფლიდან მოჰქონდათ ფურთ ნათავარი, კლავდნენ დოლისთავს და სხვა ყველა წესს ჩვეულებრივ ასრულებდნენ, როგორც ციხის ანგელოზში. ამ ხატობაში სუფრობაც იყო ჩვეულებრივი წესით. საღამომდინ იყვნენ და საღამოზე დაიშლებოდა ხალხი.

დასტურ-ხევისბრები გაინაწილებდნენ საკლავების მხრებს, ტყავებს და ტყავის სახსრად შემოსულ ფულს, ქადა-საწირავების ნაჭრებს და ისინიც წავიდ-წამოვიდოდნენ — დასტურები იქვე სადასტუროში, ხევისბრები თავიანთ სახლებში.

ხთიშობელს ვენახი არსად ჰქონდა და არც კულუხი (ვენახები ჰქონდათ მარტო სათემო ხატებს, რომლის დროშითაც მტრებთან საბრძოლად გამოდიოდა თემი). როგორც სხვა დღეობებში, ისევე ათენგუნა ასაც ლუდი მზადდებოდა. ათენგუნაც ერთ დღეს იყო აქ. ამ ხატობაში მლოცავი მოუდიოდა და მოუდიოდათ საკლავები, სასოფლო საკლავიც იკვლოდა, იმართებოდა სუფრები, მხიარულობა, მღერა და სხვა. წასვლის დროს ფერხისას დააბამდნენ. რომელ სიმღერასაც



მოისურვებდა სიმღერისთავი, იმღერებდა და ფერხისის ერთი მხარე მას ეტყოდა ბანს; სიმღერის თავის სიტყვებს გაიმეორებდა მის მოპირდაპირე მხრიდან მეორე მომღერალი და მის მხარეზე მყოფნი მას მისცემდნენ ბანს. ხელიხელ გაკიდებულნი გარშემო ტრიალით გამოემართებოდნენ და როცა სიმღერა გათავდებოდა, დაიშლებოდნენ. ყველა წავიდ-წამოვიდოდა. აქ უნათესაო ხალხი იშვიათად მოვიდოდა, რომ ან დისწული ან დედიძა ან სხვა ვინმე ნათესავი არ ჰყოლოდა. აქაურ ხალხთან ნათესაობა აკავშირებდა აქაურ ხატებთან.

ათენგენობის შემდეგ მარიანობა მოდიოდა, მაშინაც ლუდს ამზადებდნენ და იხდიდნენ ისეთივე წესით, როგორც სხვა ხატობებში აიწერა. აქ უცხო ისეთი წესი არაფერი იყო, სხვა ხატობაში რომ არ ყოფილიყოს.

მარიანობის შემდეგ გიორგობაა. გიორგობასაც იცოდნენ ლუდი და საკლავი. მერე მოდიოდა ქრისტე. ქრისტესაც ისეთივე ხატობა იყო ერთ დღეს. თევის კვირას აქ ხევისბრები არ იყვნენ, მაგრამ სახლებიდან მოდიოდნენ სანთლის მოსანთებად. მოსაკითხი სოფელს მოჰქონდა დასტურებთან და ხევისბრებიც იზიარებდნენ მას.

ვაკის სოფლის ზემოთ იყო ქრისტიანული ეკლესია. ეკლესიას საზარე ზედვე ედგა. შენობა ძველი იყო და დიდი ხანია გაუქმებულია.

## მათურის მთავარანგელოზის დღეობები

მათურის მთავარანგელოზი იყო მათურის სათემო სალოცავი. მათურა ფშავის თორმეტ თემთაგანი იყო. ეს იყო დაფანტულად დასახლებული ერთი სოფელი — გაღმა მათურა და გამოღმა მათურა. ჰქონდა კიდევ სამთობები, სადაც ზამთარ-ზაფხულ მუდმივად მათურლებივე ცხოვრობდნენ. ასეთი ადგილები იყო: ბოროლა, მუჭა, ბახია და ჩხუბა. აქ სამ-სამი, ოთხ-ოთხი კომლი მათურელი მუდმივად ცხოვრობდა. ამ სოფელში იყო შემდეგი გვარები: ხუციშვილი, თათარაშვილი, წითელაური, ხიბლაშვილი, ბაჩუაშვილი და თადიაური. ეს გვარები ყველა ერთნაირი ყმა იყო მთავარანგელოზისა, მხოლოდ ხევისბრობა (თავკვეისბრობა) ხუციანთ მოუდიოდა. დანარჩენი ხევისბრები ყველა გვარიდან იყვნენ (მეზარე, მედროშე და სხვ.). ყველა გვარიდან ერთნაირად დგებოდნენ დასტურებიც ერთწლობით.

მათურის მთავარანგელოზი დაარსებული იყო გაღმა მათურის სოფლის ახლო, სამხრეთისაკენ. აქ დარგული იყო ხემხვიანნი: ოფნები და ცაცხვები. ჰქონდა სალუდე, დარბაზი, სადასტურო, საზარე, ხატის

კალო და საპურე ბეღელი; რომელიც დღესაც არის ხელშეუხებელი; მხოლოდ ცარიელი.

მთავარანგელოზს ჰქონდა ჯვართ ბოლოზე დასავლეთ მხარეს ნა-  
ყევრალეები, იგივე სანაღობი. სანაღობს ამუშავებდა სოფელი. იცო-  
დნენ ნადი ლუდით. ხვნა-თესვის საქმესაც და სახატო სხვა საქმეებსაც  
მართავდა თავხევისბერი. იგი წინასწარ გამოუცხადებდა სოფელს —  
ამადამ დღეს მოხანით სანადო მამულები, აგრეთვე მომკასაც და სხვა-  
როცა სახნავად დანიშნულ დღეს ადრე მივიდოდნენ ხარგუთნით სანა-  
დო მამულში, გუთანთან მომბულ ხარებს ისე დააყენებდნენ, რომ  
მარჯვენა ხარი კვალში ყოფილიყო, რომ ამა თუ იმ ხარ-კაცის მოსახ-  
ნავი მამული დაახლოებით ერთიმეორის თანაბარი ყოფილიყო. თავ-  
ხევისბერი ჯერ ხატში მოანთებდა სანთელს და შეეხვეწებოდა ყმათ  
და იმათ ხარ-გუთანს და მერე მოვიდოდა ხარნადში, მოიხდიდა ქუდს,  
დადგებოდა შხის ამოახედისაქენ, დაიწერდა პირჯვარს და დაამწყა-  
ლობნებდა ყმათა და ხარ-გუთანს: „წყალობათ ჩვენი სალოცავისა, წყა-  
ლობათ მათურელნო, წყალობა მოგცესთ ჩვენმა სალოცავმა დიდმა მთა-  
ვარმა ანგელოზმა თქვენს თავ-ჯალაფობასა და თქვენს კარ-გუთანსა,  
ნამეტნავად გწყალობდეთ სახატო და სახალხო საქმეში თავდადებულ-  
თა, სოფელში თავმდაბალთა და ნამუსიანთა, სოფლის მტერ-ორგულ-  
თან ამაყთა, სახატო საქმეში ადრე და ხალიზიანად მომსვლელთა და  
გვიან წამსვლელთა“. გუთნისდებები და მათი დამხმარეები ქუდმოხ-  
დილნი იდგნენ ხევისბრის დამწყალობნების დროს და რომ მორჩე-  
ბოდა, უპასუხებდნენ: „თქვენიცამც მწყალობელია და თქვენის თავ-  
ჯალაფობისა“. მერე მივიდოდა ხევისბერი იმ გუთანთან, რომელიც  
მამულის ბოლოზე იდგა და საიდანაც იწყებოდა მამულის გაკვალვა —  
დაიჭერდა გუთნის ხელთ (აქ გუთანი ფშაური აჩაჩა იყო). გუთნისდე-  
და ხარებს წინ გაუძღვებოდა და გაჰკვალავდნენ მამულს. გაკვალვის  
დროს ხევისბერი კიდევ იტყოდა ხმამალა: „ღმერთო და ჩვენო სა-  
ლოცაო, მათურის მცველო მფარველო მთავარო ანგელოზო, თქვენა  
სწყალობდეთ მათურის თემსა. წლის მოსავალი დალიან-ბარაქიანი  
მოჰგვარეთ, მაგათ ჭირნახულსა და კაც-საქონსა მარცხი და ზიანი  
მოაშორეთ“. ამნაირად ერთხელ გაატარებდნენ აჩაჩას, მოაბრუნებ-  
დნენ, გამოატარებდნენ და მესამედ რომ მიაბრუნებდნენ, ხევისბერ  
გუთანს ხელს გაუშვებდა და ყველანი გაიკვალავდნენ მამულსა. გაკვა-  
ლვისას ხმამალა იტყოდნენ: „ღმერთო და ჩვენო სალოცაო, გვიშ-  
ველეთ და წლის მოსავალი დალიან-ბარაქიანი მოგვაგვარეთ. მშვიდო-  
ბიანი წელი დაგვიყენეთ და ვენს ნაშვრალ-ნამუშევარს ჯვარი დაგვი-  
წერეთ“. ასეთი სიტყვებით შეუდგებოდნენ ხენას.

ნადისათვის ლუდიც ჰქონდათ დამზადებული, რომელსაც მამულში  
მიიტანდნენ, ერთი „ქართ დარეკის“ შემდეგ დაისვენებდნენ, ერთად

მოგროვდებოდნენ და დალევდნენ. ხარების დაყენება ყოველთვის და ყველგან ერთნაირად იცოდნენ: მარჯვენა ხარი უნდა მდგარიყო კვალში, მარცხენა კი კვლის თავზე. დასტური ხელ-მხარს ინათლავდა და ბელლიდან გამოიტანდა სათესლე ქერს. მიიტანდა სანადრო მამულში, ხევისბერი დათესავდა. თესვის დროს ქუდმოხდილი იყო, ქერი გულში ეყარა და მარცხენა მხარზე ჰქონდა დაკიდებული, მარჯვენა ხელით ამოჰქონდა და თესავდა. დასტურები მოუბამდნენ ფარცხს და ფარავდნენ. ფარვას რომ მორჩებოდნენ, ხევისბერი დაფარულ მამულში სამ ადგილას ჭვარს გააკეთებდა — გახზავდა მიწას შეყრილი ხელის თითებით და იტყოდა: „ღმერთო და ჩვენო სალოცაო მთავარო ანგელოზო, დასწერეთ ჭვარი ამ კარისა და კაცის ნაშრომსა და მოიყვანეთ კარგი მოსავალი, თუ რამე ციდან ზიანი ეხედვებოდეს, შენს ორგულმუხანათთ კირნახულზე გადაიტანე და შენ ყმას ნაშრვალ-ნამუშევარი ზარალისაგან დაიკუსენი, შენი სახელის კირიმე, ჩვენო სალოცაო“. მიწაში დაარქობდნენ ტოტიან ჯოხს და ზედ დაჰკიდებდნენ ბალახის ძირებს ქერის თავთაგების მსგავსად და იტყოდნენ: „ასეთ გრძელ თავთავს დაისხამსო“.

ამის შემდეგ სოფელი მოხნულ მამულს თავს დაანებებდა და დაპატრონდებოდნენ დასტურები. ნადის ხარებს გაუშვებდნენ და გარეკავდნენ შინ. თვითონ კი ხატში მივიდოდნენ და სვამდნენ ლულს. (გუმოგვრჩა: ერთი სასოფლო საკლავი დილითვე დაიკვლოდა ხატში, ხორცს მოხარშავდნენ და ხარგაშვების შემდეგ გუთნისდებებს გაუგდებდნენ სუფრას; ხორციან პური იყო საწირაგებისა, რომელიც ყველას მოჰქონდა. ხორცის სუფრას შენდობას ეტყოდნენ იმ მიცვალებულთათვის, რომელნიც ერთგულნი იყვნენ სახატო და სახალხო საქმისათვის და ესლა აღარ არიან). ამასობაში შემოლამდებოდა და დაეთხოვებოდნენ ხატს. მოუყრიდნენ მუხლს, პირჭვარს იწერდნენ და ეხვეწებოდნენ კარგი მოსავლის მოყვანას და უცოდინარობით შეცოდებების პატიებას. ბოლომდინ რჩებოდნენ დასტურ-ხევისბრები და მერე ისინიც წამოვიდოდნენ.

ამის შემდეგ მამულს დასტურები უვლიდნენ, ყანისპირა სათიბეებსა და ყამირებსაც დასტურებივე ინახავდნენ და თვითონვე თიბდნენ.

ყანა რომ სამკალად შემოვიდოდა, ხევისბერი მოიწვევდა სოფელს და დაუნიშნავდა მკის დღეს. ხატის ყანების მკა უფრო ხშირ შემთხვევაში შაბათობით იცოდნენ. შაბათ-დილით მოვიდოდა ხალხი და დაიწყებდნენ მკას. მკა ყოველთვის ნამგლით იცოდნენ (ხეცურეთში ხშირ შემთხვევაში ხელით, უნამგლოდ მკიან ყანებს, გარდა სვილისა). ზოგნი მკიდნენ და ზოგნი კონავდნენ. დასტურ-ხევისბრები კი ხატში მოვიდოდნენ, სანთელს მოანთებდნენ, საკლავს დაკლავდნენ და ახვეწებ-

დნენ მათურის თემს მთავარანგელოზის ყმათ. საკლავის ხორცს მოსახარმად გაამზადებდნენ, ხატიონნი დალევდნენ ლუღს. მერე წამოიღებდნენ ნაღში და ყველა მომკლებს მოიწვევდნენ ლუღთან. კარგა ხანს დაისვენებდნენ და დალევდნენ. მერე ერთბაშად შეუდგებოდნენ მკას. მკაში ქალებიც ღებულობდნენ მონაწილეობას, უფრო ძნის მკონავებად (ისეთი ქალები, თუ ბოსლიდან შემოსულის შემდეგ სამი დღე უკვე გათავებული იყო და მეოთხე დღე ჰქონდა. ან მოახლოებული არ იყო ბოსელში გასვლის დრო). ეჭობებოდნენ ერთმანეთს მომკლები და მკონავები. თუ ხელეულები მეტი დაგროვდებოდა და მკონავები ვერ ასწრებდნენ, მომკლები დაიწყებდნენ დაცივნით მღერას: „დაბევრდა ხელეულები, აღარა კონეულები“. თუ ხელეულები აღარ იყო და მკონავები ასწრებდნენ, მაშინ მკონავები უმღეროდნენ: „დაბევრდა კონეულები, აღარა ხელეულები“.

სამკალს რომ გაათავებდნენ, ძნის დაქუჩებაში მიეშველებოდნენ დასტურებს და „წერაად“ ააგებდნენ. წერა იყო ხუთი ძნა, ძირებით მიწაზე დააყუდებდნენ ოთხ ძნას, თავთავებით კი ერთმანეთზე იყო მიყრდნობილი, მეხუთე ძნას გადასტეხდნენ და თავთავებს ზემოდან წამოაფარებდნენ — თუ წვიმა მოვიდოდა, ის დიფარავდა თავთავებს დასველებისაგან. ძნა იცოდნენ ერთი ხელეულისა, მკის დროს კაცი რამდენსაც მარცხენა ხელში მოათავსებდა. წერაად ააგებდნენ იმიტომ, რომ ასე დაყუდებული ადვილად გაშრებოდა, ერთი კვირის შემდეგ — თუ გამოშრა, უფრო ადრე და თუ უღარობა დადგა, უფრო გვიანაც, დასტურები გადახუთლავდნენ. ხუთულა თვლით არ იყო, რამდენიმე წერას მიიტანდნენ ერთად და ერთ ძნას დადგამდნენ დაახლოებით სამი ან ოთხი ტვირთის გამოშვალს. როცა ძნის მიტანის დრო იქნებოდა, ისევე სოფელი მიეშველებოდა, შეაბამდნენ ხარს და მარხილით მიათრევდნენ. რადგან სოფლის კაცი ხატის კალოზე ვერ გაივილიდა, ძნას კალოსთან ახლო მიიტანდნენ. იქიდან დასტურ-მსახურთ გადაჰქონდათ და „მუხლის ძნებს“ დგამდნენ ხატის კალოს გვერდზე (მუხლის ძნას ფშავლები უწოდებდნენ ძნის დიდ ძირს, რომელზედაც ერთი კაცი ზედ იდგა და მეორე ძნას აწვდიდა. ასეთ ძნას ხევესურულად „სერკვი“ ჰქვია). დაწამორების პირზე დასტურები ხელმხარს ინათლავდნენ და ძნას გაღეწავდნენ. ხატის ძნის ლეწვაში ისეთი ფეხსაცმელი უნდა ჩაეცვათ, რომლითაც სხვაგან არ უვლიათ, თუ კალოდან შორს გავლა დასპირდებოდათ, იმ ფეხსაცმელს გაიხდიდნენ იქ და კალოსთან დააწყობდნენ. ხელმხარ ნანათლი და წმიდად მყოფი დასტურები პურსაც თვითონ ყრიდნენ ბელელში. ლეწვის დროს ხევისბერი ყოველ დილა-საღამოს მივიდოდა და სანთელს ანთებდა ხატში. საკალოეს რომ შორჩებოდნენ, ჩალა დასტურებს მიჰქონდათ, დალაჩაყრილი ბელელი დაიკეტებოდა და გასაღები დასტურთ ხელში იყო.

მათურის მთავარანგელოზში მისული ხევისბერი პირველად ცხრა საკლავით ინათლავდა ხელ-მხარს. ის ხევისბრად მივიდოდა დიდი ყოყმანის შემდეგ. მკითხავეები და წელწმიდა კაცები აღრიდანვე ურჩევდნენ ხევისბრად მისვლას, თუ ავად ხდებოდა, ან ოჯახის საქმე არ მიუდიოდა კარგად — დაუაუადმყოფდა ოჯახში ვინმე, ან ფათერაკი რამე შეემთხვა, ან პირუტყვი უზარალდებოდა, ან თუ მას მამითაც მოუდიოდა ხევისბრობა. ის თავს არიდებდა და არ მიდიოდა — იქნება ხატს არ უნდოვარ და როგორ მივიდო. თან ისაც აზინებდა: ვაითუ, წესრიგი ვერ შევასრულე და მაშინ ხომ სულ გამათავებს მთავარანგელოზიო. ბოლოს რომ გაუჭირდებოდა, ან ძილში სიზმარში რამე დაუწყებდა მოლანდებას, ან ისე ავად გახდებოდა, რომ მეტი გზა აღარ იყო, გულს გაუმართლებდა (ფშავლები გულის გამართლებას უწოდებდნენ და ხევისბრები გულის გამართვას, როცა აღთქმას დასდებდნენ ხატის წინაშე, რომ ამა და ამ სამსახურს შევასრულებო), ჭდეს ამოაგდებდა და იტყოდა: „დიდება ძალსა შენსა, დიდო მთავარო ანგელოზო, ეს ჭდე ნიშანი იყოს იმისი, რომ შენთან სამსახურის ღირსიც არა ვარ და მაინც თავსა ვდებ შენი სამსახურისათვის“. წაიღებდა ამ ჭდეს და ხატში გადააგდებდა. აქედან შეუდგებოდა მზადებას სახევისბროდ. აღარ გაივლიდა ნალახში, „აღარს მიჰველავდა“ უწმინდურს, რაც ხატის წესით იკრძალებოდა და სხვა.

ამ დღიდან პირველი დღეობა რომ მოვიდოდა, მივიდოდა ხატში, მიიტანდა ქადას — საწირავეებს და იმდენ საკლავს, რამდენის შესაძლებლობაც ჰქონდა. შეიძლება შეეძლო ცხრავე საკლავი ერთბაშად მიეყვანა, მაგრამ სახევისბრო ხალხი შინა მოსაქმე ხალხი იყო და იშვიათად ჰქონდათ ასეთი შესაძლებლობა. იყო მეცხვარე — მომთაბარე ხალხი, რომლებსაც შეეძლება ჰქონდათ, მაგრამ მათ ხატი რატომღაც ხევისბერად არ მოიყვანდა. ისინი შორიდან ზღვნობდნენ და სანთლობდნენ. ერთი სიტყვით, რამდენიც შეეძლო, პირველ მოსვლაზე დაკლავდა, დანარჩენი კი შეიძლებოდა დროდადრო მოეყვანა, როცა შესაძლებლობა ექნებოდა. აუცილებლივ სავალდებულო იყო ცხრით ხელმხრის ნათვლა. რამდენ საკლავსაც მიიყვანდა, წამოაყენებდნენ სასაკლაოზე. ახალმისვლელი ხევისბერიც აქ დადგებოდა — წინასწარ გაბანილ-გასუფთაებული და ახლად პირგაპარსული (ხატი თმა-წვერიანობას კრძალავდა). თავხევისბერი დაიჭერდა შიშველ ხანჯალს, ან დანას და შეუდგებოდა დიდებათ: დიდების წესი ზემოთ აღწერილია და ასეთივე სიტყვებით აღიდებდა — ოღონდ ჩაურთავდა: „უშველე შენს ყმას, შენს სამსახურზე თავდადებულ (სახელი), მოსულა შენი სახელისა და ძალის საქსენებ-საიდიდებლად, შენის ძალითა და სახე-

ლით დაეკმარე, ხალიზი მიეცი და ბალინჯი აშორე, ნუ შაანანებ შენს საშსახურსა შენის სახელის ჳირიმე. ჳორციელია, დალოცვილო მთავარო ანგელოზო, თავისი უცოდინარობით ბევრს რასმე გცოდავს და შენ შეუნდევე დალოცვილო უცოდინარობით შენაცოღარი. უშველე მაგის თავ-ჯალაფობასა, კაცსა და საქონსა. დღეიდანა შენი კელდებულია და დასდევე კელი, დალოცვილო, და დაიხსენ ყველა სატანჯველიდანა. დიდება ძალსა და სახელსა შენსა“. ამ ლოცვას ნელი ხმით, ტბილად, მუღარის კილოთი ამბობდა ამის შემდეგ დაკლავდა საკლავებს. საკლავების სისხლი იქვე თასში გროვდებოდა, რომელსაც სასისხლე ერქვა. ბოლოს ხევისბერი სისხლს ხელებზე და გულზე უწევდა. ახალ ხევისბერს და დაამწყალობებდა: „გწყალობდეს ჩვენი სალოცავი, ნუ შეგანანოს სამსახურიო“ და სხვა. წყნარის ხმით წყალობას ეტყოდნენ სხვა იქ მყოფნიც.

ახალ ხევისბერს სადიდებელი ზედაშე ექნებოდა მოტანილი, თუ იშოვა ღვინო, თუ არა არაყი. დაასხამდნენ და ისევ თავხევისბერს მიაწვდიდნენ ჳიქას. ის მიულოცავდა სახატო სამსახურს და უსურვებდა პირნათლად ყოფნას ხატის და ხალხის წინაშე. ხევისბერის დალოცვას გაიმეორებდნენ ყველა იქ მყოფნი.

საკლავებს გაატყავებდნენ, თითო მხარი და ტყავი ხატში რჩებოდა, დანარჩენს სახლში გზავნიდა. ერთი საკლავის ხორცს კი მოხარშავდა და ხატიონთ სუფრას გაუშლიდა. შენდობას ეტყოდნენ წინა ხევისბერისათვის და იმ სულწმიდათათვის, რომლებიც ახალმოსულ ხევისბერს ხელს უმართავდნენ თავის საქმიანობაში. ამის შემდეგ ხატის დავალებით მას ერთ-ერთი საქმე ჩაბარდებოდა და შეუდგებოდა თავის მოვალეობის ასრულებას.

## დასტურნი

დასტურები დგებოდნენ მარიანობას, ე. ი. იცვლებოდნენ ძველი დასტურები ახლით. დასტურობა მოუდიოდათ მორიგეობით, მაგრამ აქედან დიდი ხნის გადასულ ხალხს ბარში როცა ხატი მოამიზეზებდა, მოვიდოდნენ სამარიანობოდ და აქ რიგით დასტურს სცვლიდნენ. მოსული დასტური ერთ წელიწადს რჩებოდა და ცხოვრობდა სადასტუროში. საარსებოდ სოფელიც ხელს უწყობდა და სახატო ქონებიდანაც ეხმარებოდნენ. ხატიდან შემოსავალი ჳქონდათ ტყავ-ხორცი და ხატობიდან ხატობამდე ყოფნიდათ. შეშას თვითონ ამზადებდნენ ზამთრისათვის. ხელსაქმობა არ ეკრძალებოდათ. ამზადებდნენ საბლებს (თოკი), ცხრილებს, ცხავენს და ყიდდენ პურ-საქამანდზე. მათ დღიურად მუშაობის უფლებაც ჳქონდათ. თუ ბარიდან არავინ მოვიდოდა, აქაური მორიგეობა ხომ გრძელდებოდა. დასტური დგებოდა ყველა გვარიდან.

ზევისბრებს ზეპირად ახსოვდათ ვინ ვის შემდეგ იყო დასტურად და ისევ ისე მოაყოლებდნენ. წელიწადში იყო ორი დასტური და ყველა დღეობაში ესენი ამზადებდნენ ლუდს, რამდენი რომელ დღეობაშიც იყო დაწესებული. სხვადასხვა წესრიგსაც იცავდნენ, მაგალითად: სადასტურის ბან-კარის მოვლა, სისუფთავის დაცვა ხატში, ჭირნახულის მოვლა-პატრონობა და სხვა მრავალი. პირველდამდგომი დასტურნი მარიანობა დილას მიიყვანდნენ ორ-ორ საკლავს (ლუდი მარიანობას ისევ ძველ დასტურთაგან იყო დამზადებული), თითო საკლავი ხელ-მხრის სანათლი და თითო შესალოცი; ძველი გადამდგომი დასტურნიც მოიყვანდნენ თითო გამოსამლოცველო საკლავს.

მარიანობას მედროშე ააბამდა დროშას, მესანთლე სანთელს მოანთებდა და მეზარე ზარს დარეკდა. ეს ყველაფერი სრულდებოდა მზე-მოსვლის დროს. ზარს რომ დარეკდნენ, მედროშე ააბძანებდა დროშას, დროშის ზარის წყარუნით გამოვიდოდა დარბაზიდან, დარბაზის და სადასტუროს კარებზე გაივლ-გამოივლიდა და მიაბძანებდა დროშის საბძან კვრივთან. აქ მიიტანდნენ სადიდებელს და ადიდებდნენ მთავარანგელოზს. ასეთ სადიდებულოს ყველა დალევდა. მერე მოვიდოდა თავხევისბერი და შეუდგებოდა დასტურთ გამოლოცვა-შელოცვას (ლუდი წინასწარ იყო გახსნილი).

ხევისბერი პირველად ხელმხრის სანათლებს შეუსახლებდა და დაკლავდა. დასტურთ ხელებზე და გულზე სისხლს უწევდა; მერე წამოაყენებდნენ და დაკლავდნენ შესამლოცველო საკლავებს (ეს აწერილია უკანაფშავში, ვაკისსოფელში). ხორცი იგზავნებოდა პატრონების სახლში და მხარ-ტყავი აქ რჩებოდა. გულ-ღვიძლს ამოაცილდნენ და შეწვავდნენ მწვადად („ღვიძლი ალითაო“ — იტყოდნენ ფშავლები. ღვიძლს პირდაპირ დადებდნენ ცეცხლის ალზე და ისე შეწვავდნენ. ცეცხლის ალი ყველა ხორცს აძლევს ცუდ გემოს — „გაალავს“, ღვიძლს კი არავითარ გემოს არ მისცემს და ამჯობინებენ ალზე შეწვას). მწვადებს მოართმევენ ხევისბრებს. რადგან ლუდი ძველ დასტურთაგან იყო დამზადებული, ისინი ამ ხატობაში ისევ მონაწილეობდნენ დარბაზში, მხოლოდ ახალ დასტურთ გადააბარებდნენ სახატო განძს და სხვადასხვა ქონებას. უპირატესობაც მათ ხელში გადადიოდა. ისინი უძღვებოდნენ მოსულ-წასულ ხალხს.

სოფელი მოიყვანდა სასოფლო საკლავს და დასხდებოდნენ სადასტუროს კარზე. ქალებიც მოვიდოდნენ და თავის საჭარეში დასხდებოდნენ. ამ ადგილს ერქვა „დედაკაცების საჭარე“. დედაკაცებს მოჰქონდათ ქადა-საწირი, არაყი ბოთლებით და ჩამოუქნელი სანთელი. ქალები მთავარანგელოზში არ იჭრებოდა, აქვე ახლო ხტიშობელი იყო და ქალების დამჭრელი ხევისბერი იქ იყო, იგი დანას გაუსვამდა და იტყოდა: „წმიდაო ადგილის დედაო, ხტიშობელო, შენ უშველე შენთ

მეხვეწურთა (სახელი, ვისიც ქადა იყო) მაგათ თავ ჭალაფობასა, კაცსა და საქონსა. შენთვის სამსახური არ დაუყრავ და შენ შენს წყალობას ნუ დააკლებ“. გამოჭირდა მეოთხედს და სამ წილს პატრონს დაუბრუნებდა. სადიდებულოსაც დაასხამდა, დაილოცებოდა და გაუგზავნიდა ხატში მთავარანგელოზში მყოფ დასტურ-ხევისბრებს. საწირავებსაც მთავარანგელოზის ხატში გაგზავნიდა და ქადის მეოთხედებსაც. როცა ყველანი მოქუჩდებოდნენ და ქადა-საწირავების მოტანა მოთვდებოდა, ქადის დამჭრელი ხევისბერიც წამოვიდოდა მთავარანგელოზის ხატში. ეს ქადები იყო ხატში სავალდებულო მისატანად. თუ ფურთა ნათავარი უნდოდათ, სხვა ქადა უნდა მიეტანათ. ხატში რაც ქადის მეოთხედები რჩებოდა, აქაც კიდევ ჭრიდნენ შუაზე, ნახევარი ნამდვილად ხატიონებს რჩებოდა, ნახევარს კი ურიგებდნენ ისევ ხალხს ხორცის და საწირავთ პურის ჩამორიგების დროს. ამის შემდეგ იმართებოდა მოსული მლოცავების საკლავების დაკვლა ისე, როგორც სხვა ხატობებში გვაქვს დაწერილი.

მარიანობა ერთ დღეს გრძელდებოდა, საღამოზე მლოცავი დაიშლებოდა. მოსულებიც სოფელში გადავიდოდნენ. ახალი დასტურნი ჩაბარებულ განძს წაიღებდნენ სათანადო ადგილზე, მედროშეც დროშას დარბაზში მიაბძანებდა და ჩამოხსნიდა. მერე გაინაწილებდნენ ტყავ-მხარს, ქადის საწირავთ ნაწილს და წავიდ-წამოვიდოდნენ. დასტურნი რჩებოდნენ სადასტუროში.

## გ ი ო რ გ ო ბ ა

გიორგობასაც ისეთივე უცვლელი წესები სრულდებოდა, როგორც მარიანობას, გარდა დასტურთ გამოცვლისა. დროშა გამოდიოდა, ლუდსაც ახალი დასტურნი ამზადებდნენ, სასოფლო საკლავის წესებიც უცვლელი იყო. ქადებიც ამ ხატობაში სავალდებულო იყო მოსატანად, იჭრებოდა ხთიშობელში. დილით დაწყებული ხატობა საღამოთხ მთავრდებოდა.

## ქ რ ი ს ტ ე ნ ი

ქრისტეც ერთ დღეს არის ხატობა. დილით ხატში მივიდოდნენ ხევისბრები (დასტურნი მუდმივად ხატში იყვნენ) და ყველანი თავთავის საქმეს მოაწესრიგებდნენ. ლუდის გახსნის შემდეგ ადიდებდნენ მთავარანგელოზს, დროშას მედროშე „დაამზადებდა“ და დარეკავდნენ ზარსაც. ზარის ხმაზე სოფელში ფეხზე აღგებოდნენ, პირკვარს დაიწერდნენ და იტყოდნენ: „დიდება ძალსა შენსა, დიდო მთავარო



ანგელოზო, შენ უშველე შენთ ყმათა“. ყველანი ადრე ადგებოდნენ. ხორცს კეფავდნენ და შეუდგებოდნენ ხინკლის კეთებას. ყველა ცდილობდა, ერთიმეორეზე უკეთესი ხინკალი გაეკეთებინა და სხვაზე ადრე მიეტანა ხატში დასტურ-ხევისბრებისათვის. ზარის დარეკის შემდეგ სოფლელები დაიწყებდნენ მოდენას მოსაკითხით. თუ ოჯახში კაცი იყო, კაცი მოიტანდა, თუ ოჯახში კაცი არ ყავდათ, ქალებიც მოიტანდნენ. ხატის მსახურნი მოეგებებოდნენ; „წყალობა ხატისაო“, — ეტყოდნენ და ჩამოართმევდნენ. ქალი რომ მოსაკითხს მოიტანდა, ხატში ვერ დაუძახებდა. ამიტომ ხატის მსახურნი თვალყურით იყვნენ, რომ ქალს არ დასჭირებოდა სიცივეში დიდხანს გაჩერება. ხინკალს ერთ-ერთი ხევისბერი „სახელს შაზღებდა“ მომტანის მიცვალბულთათვის და უპატრონო მკვდრებისათვის. ჰამდნენ და რაც დარჩებოდათ, ისევე უბრუნებდნენ პატრონს იმავე სუფრით, რითაც მოიტანა. არაყის ჭურჭელსაც ლუდით უვსებდნენ, ლუდს დააღვეინებდნენ და გაისტუმრებდნენ. სასოფლო საკლავსაც დაკლავდნენ და შეასრულებდნენ ყველაფერს, რაც წინა ხატობებში გვაქვს ნათქვამი. ქრისტეში მლოცავი (ხევისურულად მეზღვნე) ნაკლებად მოდიოდა, რადგან შორეულ სოფლებში გზები არ იყო და ახლობლები საკლავს უფრო წელწადში კლავდნენ, თუ შეთქმული ვინმეს რამე ყავდა. ხატობა იყო ერთ დღეს — საღამოზე წავიდ-წამოვიდოდა ხალხი.

აქამდე მარტო დასტურნი იყვნენ აქ, ახლა კი ხევისბრებიც ხატში რჩებოდნენ წელწადგადაყრამდე. დარბაზის კარებს დახურავდნენ და ხევისბრებიც დასტურებთან სადასტუროში ცხოვრობდნენ. თუ ბევრი იყვნენ და ადგილი არ იქნებოდა საკმარი, ამ შეთხვევაში სალუდში დაანთებდნენ ცეცხლს. თევის-კვირა ზოგიერთ სხვა ხატებშიც აწერილი გვაქვს და აქაც იმავე წესით იყო. სოფელი რიგრიგობით უზიდავდა მოსაკითხს სადილ-ვახშმად: თითო ხელადა არაყს, ხინკალს, კეცეულს ან ხორცს. თუ ჰქონდათ, თაფლსაც მოუტანდნენ (ფუტკარი თავისიც ჰყავდა მთავარანგელოზს, რომელსაც დასტურები უვლიდნენ. თაფლს თევის-კვირასა და წელწადში იყენებდნენ და ხანდახან ზედაშედაც აკეთებდნენ თაფლწყალს, როცა ლუდი არ ჰქონდათ. არაყი ზედაშედ არ შეიძლებოდა ე. ი. ხატის გასადიდებლად. თუ არც ლუდი ჰქონდათ, არც ღვინო, მაშინ პურის „გურგულას“ (პურის გულს) ჩაყრიდნენ წყალში და იმას ხმარობდნენ ზედაშედ). ისინიც ნაქრისტალი ლუდით და ხორციით სცემდნენ პატივს მოსაკითხის მომტანს. თევის-კვირას ერთ-ავად სმა იყო ხატში. ქრისტეში შემოსული ხორცის ნაწილი ჰქონდათ ხატიონებს შენახული, ამ ხორცს ყოველდღე ხარშავდნენ, სუფრას გამართავდნენ და ყოველდღე შენდობას ეუბნებოდნენ უპატრონო მკვდრებს და ძველ ხევისბრებს, რომლებიც აღარ არიან. ასე გაივილიდა თევისკვირა და ლიტანიის წინა საღამოს იყო თევანი (ლიტანია ყველ-

გან ჰქვია ახალწელ ღამეს, მაგრამ მათურაში ამ ახალწლის კიდევ წინა ღამეს ყოფილა თევიანი. ასეთი სახელწოდება სხვაგან არ შემხვედრია. ქრისტედან წელწამდინ თევის-კვირა კი ყველგან ყოფილა). თევის საღამოს დაიკვლება თიკანი (სხვათაშორის, მთხრობელმა თქვა: თიკანი აქ წელიწადში ორჯელ იკვლის, ერთხელ თევსაღამოს, ერთხელ კვირისჯვრობის სწორზე ხახმატის ჯვარისათვისო). თიკნის ხორცს მოხარშავდნენ და ხელზე არიგებდნენ. თევის ღამეს, ვისაც კი ხატში მოსვლა შეუძლია, ქუდიანი ყველა მოვა. ყველას მოაქვს სანთელ-საწი-რი და არაყი. საკლავი, როგორც ვთქვით, მარტო თიკანი იკვლოდა ამ საღამოს, სხვა არაფერი. დასტურ-ხევისბრებიც მოვლენ ხალხთან. ხალხი სალუდში ათევდა ღამეს და ხატის მსახურნიც იქ მივიდოდნენ, მხოლოდ დარბაზს ყველანი თავს ვერ დაანებებდნენ, რადგან იქ განძიც იყო და არც შეიძლებოდა სულ უკაცოდ დარჩენა, რადგან ამას ხატი კრძალავდა.

ამ ღამეს აქ დიდი მხიარულება, მღერა, თამაშობა იმართებოდა. ლუღსაც იმდენს მისცემდნენ ხატიენები, რამდენის დაღვევასაც შესძლებდნენ და არაყიც ბევრი იყო ხალხის მიერ მოტანილი. დასტურ-ხევისბრები რიგ-რიგობით გამოდიოდნენ ხალხთან. ერთხელ ყველანი გამოსულიყვნენ და დარბაზი დაცარიელებულიყო. დაუყენა საოცარი მთავარანგელოზმა და ერთი ხევისბერი გაქადაგებული გავიდა დარბაზში.

## ლიტანიობა

ახალწელ ღამეს ლიტანიობა ეწოდებოდა. მზებძანების დროს ყველა ქუდიანი ხატში მივიდოდა. სავალდებულო იყო, ყველას უნდა მიეტანა შეშა, რასაც მოერეოდა მხრით. პატარებიც არ შეიძლებოდა ისე მისულიყვნენ, რომ პატარა შეშის ნაჭერი მაინც არ მიეტანათ. თან მიჰქონდათ საწულადო სანთელი და საწირავნი. სანთელი იყო ჩამოქნილი, მიჰქონდათ აგრეთვე მარილიანი ხორცი სამწვადე, პური და ყველი, თხილი და კაკალი, ვისაც რა ეშოვებოდა. მიიყვანდნენ ერთ სასოფლო საკლავს და დაკლავდნენ. საკლავი უნდა ყოფილიყო კარგი. გაატყავებდნენ და ხორცს მთლიანად მოხარშავდნენ. თუ რომელიმე ოჯახში ახალშემომატებული წული იყო, იმის მშობლებს უნდა მიეტანათ ორი თუნგი არაყი. სხვებს კი — ვისაც რამდენი შეეძლო, იმდენს მიიტანდნენ (სხვა ხატებში ფშავ-ხევსურეთში ამ საღამოს აქ მოსულ ხალხს მეკვლეთ ეძახოდნენ, მაგრამ მათურაში ერქვა — წულადობილნი). წულადობილნი ყველანი აქ გაათევდნენ ღამეს. სანთელს რომ ჩამოქნიდნენ, დასტრიდნენ, დაითვლიდნენ, რამდენნი იყვნენ წულადობილნი და იმდენ სანთელს აანთებდნენ. ხევისბერი იტყოდა

დიდებათ: „დიდება შენდა, ღმერთო მაღალო, ცისა და ქვეყნის გამ-  
ჩენო, დიდება შენდა, კვირავ ძალიან-მადლიანო, დიდება და გამარ-  
ჯება შენდა, ჩვენო სალოცაო დიდო მთავარო ანგელოზო, მათურის  
ბატონ-პატრონო. შენ უშველე შენთ ყმათა, დღეს შენს კარზე მოსულ-  
თა წულადობილთა. წელი მშვიდობისა დაუყენე, წულსა და წულის  
აკავანს უმატე, ახალი წელი მშვიდობიანი და ღალიან-ბარაქიანი გა-  
მოუცვალე, შენის სახელის ჭირიმე“. დანარჩენი დიდებაც ჩვეულებ-  
რივ ბოლოვდებოდა. დამთავრებისას იტყოდა: „გწყალობდესთ, წულა-  
დობილნო, გწყალობდესთ ჩვენი სალოცავი“.

სასოფლო საკლავის ხორციც მოიხარშებოდა და სახლიდან მიტა-  
ნილ მარილიან ხორცსაც შესწავდნენ, დასჭრიდნენ საწირავებს და  
დააწყობდნენ გრძელ ფიცარზე, ხორცსაც დააწილებდნენ წვრილ ნაჭ-  
რებად და გაამზადებდნენ სუფრას. სურაზე დააკრავდნენ სამ ფეხ  
სანთელს და ხევისბერი „სახელს შაზდებდა“ სუფრას იმათათვის, ვინც  
შარშან წულადობილში იყვნენ და წელს ველარ დაესწვრნენ. მოიგო-  
ნებდნენ უპატრონო მკვდრებსაც, რომლებიც ამ სუფრას „მოპტრუ-  
ნავდნენ“, შენდობას ელოდებოდნენ. შესანდობარ ყანწს ყველანი გა-  
მოსციდნენ და მოუსხდებოდნენ სუფრას. ამის შემდეგ იმართებოდა  
მღერა და მხიარულება.

ამასობაში მოახლოვდებოდა თენება და დაიჭერდნენ კვალს. გა-  
რეთ აღარავინ გავიდოდა. ღამე რომ გატყდებოდა და თენებას დაიწყ-  
ებდა, მედროშე ხევისბერი გამოვიდოდა დარბაზიდან. ქუდმოხდილი  
შივიდოდა დროშასთან, პირჯვრის წერით მუხლს მოიყრიდა და აკო-  
ცებდა დროშის ტარს: „დალოცვილო ჩვენო სალოცაო შემოძახილზე  
ნუ შემისაწყინდები, შენ უშველე შენთ ყმათა მათურელთა და წელი  
მშვიდობისა დაუყენე“. დროშას ააბძანებდა, დროშის ზარს დააწყა-  
რუნებდა, წამოვიდოდა და სალუდის კარზე მოვიდოდა სადაც წულა-  
დობილნი იყვნენ. სალუდის კარზე დროშის წყარუნით გაივლ-გამო-  
ვიდოდა და კარებიდან მოშორებით დადგებოდა. დროშის ხმაზე წუ-  
ლადობილნი ადგებოდნენ და პირჯვარს იწერდნენ. მედროშე შეა-  
ლებდა სალუდის კარს და ხმამოუღებლად ისევ შორს დადგებოდა.  
დროშის ტარს დაბლა დაიყუდებდა წინ. წულადობილთაგან ერთი  
კაცი გამოვიდოდა, რომელიც წინასწარ არჩეული ჰყავდათ წულადო-  
ბილთ სოფელში მეკვლედ გასაგზავნად. მივიდოდა და მიულოცავდა  
მედროშეს ახალი წლის გამოცვლას და მედროშეც უპასუხებდა. წუ-  
ლადობილნი ისევ სალუდეში იყვნენ. ხევისბერი შევიდოდა დარბაზ-  
ში, გამოიტანდა საკლავის ერთ-ერთ მხარ-გვერდს, ერთ ხშიადს და მის-  
ცემდა მეკვლეს. მეკვლე სოფელში წავიდოდა; წასულს ხევისბერი  
იტყოდა: „წყალობა და ანგელოზის კვალი გამოგაყოლოს ჩვენმა სა-  
ლოცავმა“; მერე იგივე ხევისბერი შეუგორებდა წულადობილთ გო-

გას. გოგას შეგორების შემდეგ ქუდმოხდილნი გამოვიდოდნენ ყველანი, დარბაზიდან გამოვიდოდნენ დასტურ-ხევისბრებიც და მიულოცავდნენ ერთიმეორეს ახალწელს.

მედროშე დროშას თავის ადგილზე მიაბძანებდა და ზევით წავიდოდა, წაიღებდა თან ერთ ხელადა არაყს, ან ლუდს. იქ ადგილია დანიშნული და მედროშე ამ ადგილზე დადგებოდა. წულადობილნი მოემზადებოდნენ დოღში გასაქცევად, ვისაც გაქცევა შეეძლო. მეზარეზარს დარეკდა ნელ-ნელა და მესამედ რომ დაპკრავდა, დოღის ხალხი გაიქცეოდა აღმართზე, სადაც მედროშე ხევისბერი იდგა. ვინც წინ მივიდოდა, ეს სასმლიანი ხელადა მისი იყო. დანარჩენებს დოღი არ ეძლეოდა. ამას აქ არ დაღვედნენ — ჩამოვიდოდნენ და დროშასთან დაღვედნენ. მერე დარბაზის კარზე იმართებოდა სმა და მღერა თამაშობა, ვიდრე არ მოვიდოდა სოფელში გაგზავნილი მეკვლე.

მეკვლე სოფელში ერთ-ერთ ოჯახში მივიდოდა, კარს თვითონ შეაღებდა ხმამაღლებლივ (ამ დროს სოფელში გარეთ არავინ იყო, ვიდრე მეკვლენი არ მოვიდოდნენ). ოჯახიდან ვინმე გამოვიდოდა, საკლავის მხარ-გვერდს და ხშიადს ხმამაღლებლივ ჩამოართმევდა და შინ შეიტანდა, მერე მოუტანდა გოგას და მეკვლე სამჭერ შეაგორებდა ჩვეულებრივი ღოცვით. ეს მეკვლე ითვლებოდა მთლიანი სოფლის მეკვლედ. გოგას შეგორებაში იგი იტყოდა: „ღმერთო და ჩვენო სალოცაო, მათურის მთავარო ანგელოზო, უშველე მათურელთა, ახლის წლის გამოცვლაზედა, ბედნიერი წელი და კვალი დაუყენე, წულს უმატე, წულის აკავანსა, კაცსა და საქონსა“ (ზოგიერთ სოფელში მეკვლე ყველა კომლებს შემოუვლიდა და ყველას სათითაოდ შეუგორებდა გოგას, მაგრამ მათურაში ასე არ ყოფილა). გოგას რომ მესამედ შეაგორებდა და გადღამდა ფეხს ზღურბლზე, იტყოდა: „ფეხი ჩემი, კვალი ანგელოზისო“ და მიულოცავდნენ ერთიმეორეს ახალწელს.

მეკვლე დიდხანს არ დაიგვიანებდა, რადგან ხატში წულადობილნი იმის მისვლას ელოდებოდნენ. მანამ ისინი არ მოვიდოდნენ და ყველა ოჯახს არ მიუკვლევდნენ, სოფელში გარეთ ვერავინ გამოვიდოდა. მეკვლეს ამ ოჯახიდან ხატში გაატანდნენ ხინკლით, თაფლ-ერბოთი, მწვადით და თხილ-კაკლით გაწყობილ სუფრას. მიიტანდა და ეს სუფრა დაილოცებოდა დარბაზში ამ სუფრის პატრონის მიცვალეზულთათვის. ჰამდნენ დასტურ-ხევისბრები. მემრე დააბამდნენ ფერხისას დარბაზის კარში და წამოვიდოდნენ ფერხისით სოფლისაკენ, მოვიყვანთ ერთერთ საფერხისო სიმღერას:

ტუტილს წისქვილში ატირდა ნანა თორღეაის ქალიო:  
შენ, მამაჩემო თორღეაო, ნუმც შეგიბია კმალიო,  
ნუმც გივოცია ლეკები, ნუმც გიზიღია ქელიო.  
შემიკრეს გამოსავალი, ლეკებმ წისქვილის კარიო.

ჩემ ძმა-ბიძაშვილს დაჯოცნეს, მიბრუნვენ სისხლის ტბანით,  
ძმა მელანით მომიკლეს, იმით დავიჭრენ თმანით.  
ველს დასჭრანეს, უბეს ჩამისხნეს, ღმერთო, რა დიდი ბრალიო!  
ფეკშიშველს გადამავლივნეს თვირთვილიანნი მთანით,  
ბორბლის მთას გადმავალსა უკულმა მამბრუნებს ქარიო,  
არცარა ეგეთ ქარია, რო ქალის ცოდვებრალიო.  
ჩავენაყენ საყურ-ბეჭედნი, იმით ჩავლიშნენ გზანით,  
გზის თავზე დავსხენ ზალტენი, ამით გაიგონ კვალიო,  
უთხარით ჩილოველებსა, ხახონს უჭირონ მქარიო,  
ჩემმა საქმარემ ხიწვაჲა მალსა შაირტყას კვალიო,  
სოფლად თუ ვერ მიიწონენ, მთას უღვას, უჭრან ცხვიარიო,  
იქაც თუ ვერ მიიწონენ, იმისთავ კაროვანიო.  
საქსარს ნუ დაამზადებენ, სათუშო აღარ ვარიო,  
რჯულიანთ კელუკადრები აწ ურჯულოში ვარიო,  
თორმეტი მტანავ უენო, ბაქოს საბოსლოს ვარიო.  
გადამავლო ყორანო, ჩემნი გადილენ ბრალნიო,  
უამბენ ჩემსა ღედასა ეს ჩემნი ცოდვა-ბრალნიო,  
თუ იყოს შაწუხებული, იყიდნოს ჩემნი თმანიო\*.  
არც გრძელნი, არცა მოკლენი, შვიდეკენი შვიდნი მქარიო,  
დაპკიდნოს ეკლესიასა, აფრიალბდეს ქარიო,  
ამდინარ-ჩამომდინრებსა, სწორებს რჩებოდეს თვალიო.  
აემ დროს გადმავალნენ თუშის შვილები ცხრანიო,  
სუ თავებ გასჭრეს ლეკებსა, წამოიყვანეს ქალიო.

ფერხისით სოფელს მოუახლოვდებოდნენ და დაიშლებოდნენ. აქედან ვინაც ვის სურდა, დაპატიებდნენ თავის საკუთარ მეკვლედ (ზოგიერთ სოფლებში, თვითონ თავისი ოჯახის წევრი მეკვლე შეაგორებდა გოგას, ზოგან კი ასე ხდებოდა, რომ მეზობელს დაპატიებდნენ და გოგასაც ის შეუგორებდა. სადაც გოგას თავისი ოჯახის წევრი შეაგორებდა, იქ მეზობელი მეკვლე მაინც ისევ საჭირო იყო. მხოლოდ ის გოგას აღარ შეაგორებდა, ისე მიულოცავდა ახალ წელს). გოგას შეგორების შემდეგ მეკვლეს პირველად თავლ-ერბოს მოართმევდნენ, დაბერებდნენ და მერე რითაც შეეძლო, პატივს სცემდნენ. წელწადი გრძელდებოდა ექვს დღეს. გამოილოცავდნენ წყალკურთხევა დღეს.

წელწადის მეორე დღეს თენდებოდა კ უ მ ე ტ ი. ხალხი დილიდანვე დაიწყებდა ხატში მოდენას. თან მოჰქონდათ ხატიონისათვის პატივისცემა. უფრო მიღებული იყო ხორცისგულიანო ხინკალი და არაყი. მოიყვანდნენ ერთ სასოფლო საკლავს და დაკლავდნენ კოპალასათვის. ამ დღეს მთავარანგელოზს კოპალა მეკვლედ მოუვაო და მთავარანგელოზი საკლავით დახვდებოა. ეს საკლავი სასოფლო იყო, ხორცი მო-

\* ვისაც ტყვის სახსრის შესაძლებლობა არ ჰქონდა, იმის თმას დაიხსნიდა და მოიტანდა, რადგან ის ძვირი არ ღირდა. თმის მოტანაც კი სახელი იყო, თუ ტყვეს ვეღარ მოიყვანდა. თმა მაშინ ღირდა ათი თუმანი, ტყვე კი — სამოცი თუმანი.

ხარშებოდა და სოფელს დაურიგებდნენ, ტყავ-მხარი კი ხატის-მსახურთ რჩებოდათ.

წელწად დღეს ნაყრის მიტანა იცოდნენ წყალზე. (ნაყრის მიტანის წესი აღწერილია წყაროსთაულის წელწადში), აგრეთვე დილით მიყავდათ იაბო ცხენიც წყლის დასალევად. წელწად-დილის წყალი შინაც მიჰქონდათ, ითვლებოდა იაზმის მსგავსად, რასაც ჰირუტყვსაც კი ასხურებდნენ.

წელწადში, ექვსი დღის განმავლობაში, გადაბმული იყო ერთნაირი წესით ხატობები. ყოველდღე ლუდი, ხატში მისვლა, ლხინ-მხიარულება და სხვა. სოფელიც ამ კვირის განმავლობაში მოსაკითხით მიუდიოდა ხატიონებს. ხატის მსახურნიც ლუდით და ხორცით უმასპინძლებოდნენ არაყის და სუფრის მომტანს. წყალკურთხევას ხალხიც საბოლოოდ მოიტანდა მოსაკითხს, ვისაც აკლდა და საღამოზე ხატის მსახურნიც გამოილოცავდნენ.

### ხორცის-შაბათი

ხორცის-შაბათს დილით ხატის მსახური ხატში ადრიანად მოვიდოდნენ. ლუდი დამზადებული იყო წინასწარ, დანარჩენს ყველაფერს მოამზადებდნენ და მერე მოვიდოდა სოფელიც. მოიყვანდნენ სასოფლო საკლავს. იმის სისხლს სასისხლეში ჩააყენებდნენ. „შაკონავენ სამს თოვლის კომიჭს“ (შეკრავდნენ თოვლის გუნდებს), შეღებავდნენ სისხლით კომიჭს — კვრივს (აქ ორი კვრივი იდგა და გარშემო გალავანი ჰქონდა შემორტყმული). თოვლის კომიჭები უნდა მიერთყათ ბოლოში მდგომი კვრივისათვის, რომელიც გალავანთან უფრო ახლო იყო. კომიჭის მირტყმის დროს ახვეწებდა მათურის თემს. თითოს მირტყმაზე პირჯვარს დაიწერდა და იტყოდა: „მათურის მთავარო ანგელოზო, უშველე მათურის თემსა, ბევრი ხორცისშაბათი მშვიდობისა ალოცვინე შენთ ყმათა, შენის ძალისა და სახელის ჳირიმე“.

ამ ხატობაში ხევისბერიც ერთი საკლავით ხელ-მხარს ინათლავდა. მის ხორცს სახლში გაგზავნიდა. სასოფლო საკლავის ხორცს მოხარშავდნენ და სოფელს დაურიგებდა. ლუდიც გამოჰქონდათ სოფელში და იმართებოდა სმა და მხიარულება. სოფელში თუ ვისმე ახალი მიცვალებული ჰყავდა, ისინიც მოაზადებდნენ სასმელ-საჭმელს და დაპატიჟებდნენ სოფელსა და თავის ნათესაებს (ხორცის შაბათის წესები მიცვალებულთათვის აწერილია მიცვალებულის კულტის ფშაურ წესებში). ხორცის-შაბათი ითვლება უფრო მიცვალებულთა სულის დღეობად და ამიტომ, როგორც ახალი სულის პატრონი, ისე სხვა მცხოვრებლებიც სუფრას ამზადებდნენ და გარდაცვლილის სახელს შას-

დებდნენ. ხატშიც და სოფელშიც ხორცის შაბათი ერთი დღე იყო დი-  
დი მარხვის შემოსვლის წინა შაბათს.

## ყველიერი

ყველიერი არის ხორცის შაბათის სწორ შაბათს — დიდი მარხვის შემოსვლის წინა დღეს. ამ დღეს ხევისბრები მივიდოდნენ ხატში და ანთებდნენ სანთელს, ლუდი შენახული იყო ხორცის შაბათიდან (ყველიერის შაბათს ლუდი არ მზადდებოდა, შენახული ლუდით ადიდებდნენ ხატსაც და შენდობასაც ამაზე ეუბნებოდნენ). ლუდსაც გახსნიდნენ და ადიდებდნენ თავის სალოცავს, მერე დალოცავდნენ სოფლის მიცვალებულთათვის. მოვიდოდა სოფლის ხალხიც. ხნიერებო დაღამებამდე აქ იქნებოდნენ. ახალგაზრდები კი ბერიკაში წასასვლელად მოემზადებოდნენ. ერთ ბერაკას და ერთ პაპას მორთავდნენ სასაცილოდ — შეიძლება თხის რქებით, თხის წვერებით, ჩააცმევდნენ თხის ტყავს ბეწვით გარეთ, შეიძლება კუდიც შეებათ და სხვა. პაპას გაუკეთებდნენ თეთრ წვერს გრძლად, გრძელ ულვაშებს, გრძელ სირაიაან (ტარიან) ყალიონს — ყანწს გახვრეტდნენ და იმაში გაუყრიდნენ წვრილ ჯოხს, ვითომცა ყალიონის სირა იყო. ამაში ჩაყრიდნენ ნაცარს. ხანდახან ნავთს დაასხამდნენ ნაცარზე და ისე დაჰქონდათ ყალიონი. ამასაც ჩააცმევდნენ უცხო სასაცილო რამეს. იგი დაიჭერდა დიდ ჯოხს (არგანს) ხელში და იბჭენდა, დაიწყებდა ლაპარაკს კბილდატეხილი მოხუცივით და სასაცილო სიტყვებით. ბერაკათ ყველა წვერს ეჭირა ხის ხმალი. ერთი ჩონგურს უჭრავდა. ერთ-ერთს ეჭირა კვერცხების ჩასაწყობი კალათი, მეორეს ერბოს ჩასადები ჯამი, მესამეს ყველის ჩასადები გუდა, მეოთხეს — ფქვილის ჩასაყრელი გუდა, მეხუთეს — ხატოს ჩასადები ჭურჭელი, მეექვსეს — ტიკი არაყისათვის და როცა ხატის მსახურნი ხატიდან გამოილოცავდნენ, მაშინ ბერაკანი შეუდგებოდნენ სოფლის შემოვლას. გამოუძღვებოდნენ წინ პაპა და ბერაკა, თან მეჩონგურე მოჰყვებოდათ ჩონგურის დაკვრით და ხის ხმლებით შეიარაღებული ახალგაზრდებიც თან მისდევდნენ. ხატში მისცემდნენ ერთ თუნჯ ლუდს და პირველად იქვე ხატის კარზე გამართავდნენ თამაშობას. მერე წამოვიდოდნენ სოფელში და ყველა კომლს შემოუვლიდნენ ამ დამის განმავლობაში. გზადაგზა კიოდნენ, მღეროდნენ და ევილ-ხაილით დადიოდნენ. ამა თუ იმ მეკომურის კარზე რომ მივიდოდნენ, ხმლებით კარებს დაუკაკუნებდნენ და ოჯახის პატრონიც კარს გაუღებდა, ყველანი შევიდოდნენ სახლში, დაუკრავდნენ ჩონგურს და პაპა და ბერაკა სასაცილოდ დაიწყებდნენ თამაშობას და სახუმარო ლაპარაკს. პაპა უფრო სასაცილოდ ლაპარაკობდა (არჩევდნენ ისეთ ახალგაზრდას, რომელსაც მეტი ხუმრობა და სხვებისებური ლაპა-

რაკის უნარი ჰქონდა). ყმაწვილები მას ხის ხმლებით სცემდნენ და ის იწყევლ-იკრულებოდა — რაღა მცემთო, დაგებრდი და ყველა დამხალიზდით, თორემ თქვენისთანებს ჭინჭველასავით გავსრესდით.

თამაშობას რომ მოათავებდნენ, პაპა დაჯდებოდა და ყალიონის ცეცხლს მოითხოვდა (რაც აქ იწერება, ეს საქციელი აუცილებლივ სავალდებულო კი არ იყო, მაგრამ ხშირ შემთხვევაში ასე ხუმრობდნენ, რის მნახველი და მოწმეც მე ვარ), ხანდახან ყანწში ჩაყრილ წავთდასხმულ ნაცარს მოუკიდებდნენ ცეცხლს და იქიდან ცეცხლის ალი ამოდებოდა. პაპას კი მისი ტარი პირში ეჭირა და ვითომც ეწეოდა. ხან თოფის წამალს ჩაუყრიდნენ ყალიონში და აუფეთქებდნენ. ვაჯავრდებოდა და მოითხოვდა საღებუ თამბაქოს — „ეს ბალები მალონებენ, მომეცით და პატარა თამბაქოს ჩავჩინჩხავო“ (ვითომც დავღებავო). პაპა და ბერაკა ხმასაც ისე იცვლიდნენ ლაპარაკში, რომ თუ ბირისახეზე არ აიხდიდნენ, ვერავინ იცნობდა. როცა თამაშობას დაიწყებდნენ, ერთიმეორეს ეტყობდნენ: „ადეგი-ლა, ვიცინდრიკოთო“ (თამაშობას, ცეკვას ისინი ცინდრიკობას ეძახდნენ). ასე შემოუვლიდნენ შთელ სოფელს, ვის კარზედაც მივიდოდნენ და ხის ხმლებით კარებს მიუკაკუნებდნენ, დაუძახებდნენ: „ბერაკაი კარასაო, გიმდღვრიალებს თვალათაო, ჩქარა კარები გავგიღე, თორო ვამტრევეთ კარსაო“ და აცვეთდნენ ხმლებს კარებს. სახლის პატრონი კარებს რომ გაუღებდა, უხათრავად შეცვივდებოდნენ სახლში და გაიმეორებდნენ იგივე სცენებს. ოჯახში ჭერ ხომ პაპა და ბერაკი თამაშობდნენ, მერე ახალგაზრდებიც ჩონგურის დაკვრაზე თამაშობას მართავდნენ. ოჯახის პატრონი გაუმასპინძლებოდა, ერთ ხელადამდე არაყს ბერაკათ ჩაუსხამდა ტიკში და მერე იმათაც დაალევივინებდა და საჭმლითაც გაუმასპინძლებოდა. ბერაკანი თავისი ტიკიდან დაასხამდნენ არაყს და ოჯახის პატრონს დაალევივინებდნენ.

როცა თამაშობას მოიწყენდნენ და სასმელ-საჭმელად დასხდებოდნენ, ბერაკა და პაპაც მოიხსნიდნენ ნიღბებს და დაიწყებდნენ ჩვეულებრივ საუბარს. ამ დროს დიასახლისი ყველაფერს მოამზადებდა, რაც უნდა ბერაკათათვის მიეცა: ერბო, ყველი, ხორცი, ფქვილი, კვერცხი, არაყი და სხვა. ბერაკათ მონაწილენი, ვისაც რა ებარა, იმის ჭურჭელს მოიტანდნენ და ჩაუწყობდნენ. სოფელს რომ შემოუვლიდნენ, მოატანდა თენების დროც და მივიდოდნენ იმ ოჯახში, რომელთანაც წინა დღითვე იყვნენ შეთანხმებულნი — აქ დავდგებითო. მოიტანდნენ ყველაფერს, რაც სოფელში იშოვნეს, დააწყობდნენ, გათენდებოდა და დაუძახებდნენ ქალებსაც (ბერაკაში მართო ვაყები დადიოდნენ) და გააკეთებდნენ ხინკალს: ხორციანს ცალკე, ყველ-ხაჭოიანს ცალკე. მოხარშავდნენ კვერცხებს, ხინკალს ყველა ახვევდა: ქალი და ვაჟი. როცა მოიხარშებოდა, სუფრებით დაუდგებოდნენ რამდენიმე კაცს



ერთად. კვერცხს ხელზე ჩამოურიგებდნენ. არაყს სვამდნენ და იმართებოდა მღერა-თამაშობა. საღამომდე მხიარულობდნენ და შემოღამებაზე დაიშლებოდნენ. ხატიდანაც ხატის მსახურნი გამოილოცავდნენ და წამოვიდოდნენ, დასტურთ გარდა.

## ს უ ლ თ ა კ რ ე ზ ა

სულდაკრეფას ხატში მარტო სანთელი ენთება, არც ლუდი მზადდებოდა და მარხვაში საკლავს მაინც არ კლავდნენ. ოჯახებში იცოდნენ სამარხო სუფრები, მიცვალებულთათვის სახელის შედება. მეზობლები პატივობდნენ ერთიმეორეს, ვისაც სასმელი ჰქონდა დამზადებული. ახალი მიცვალებულის ოჯახში იმართებოდა სატირელი და სამარხო სუფრით უმასპინძლებოდნენ დედაკაცებს.

## შ უ ა - მ ა რ ხ ვ ა

შუამარხვას ხევისბრები ხატში სანთელს მოანთებდნენ. აქ დანარჩენი არაფერი სრულდებოდა. სოფელში კი ისეთივე სამარხო სუფრები ჰქონდათ ოჯახებში, როგორც სულთაკრეფას სამარხო სუფრაზე იყო: პური, მარილი, მოხარშული და დაფცქვნილი კარტოფილი, კაპარი, დოხანი და სხვ. შუა-მარხვაში უქმობდნენ შვილების პატრონები, იტყოდნენ: მუშაობა არ ვარგა, თუ იმუშავა, შვილნი უსწორდებიანო, ე. ი. ნახევარი შვილები დაეხოცებო. თუ მკვდარი შვილები ცოცხლებზე მეტი ჰყავდათ, მაშინ კი მუშაობას არ ერიდებოდნენ: მე მკვდარი შვილები მეტიცა მყავს ცოცხლებზე. რალა გამისწორდებო?

## ბ ზ ო ბ ა

ბზობა იყო ქრისტიანული დღესასწაული. ხატში ენთებოდა სანთელი. მიცვალებულის პატრონი ეკლესიაში თევზს მიიტანდა და მიცვალებულთათვის სახელშედების მერე გასკრიდნენ, სუფრას გამართავდნენ და იქ მყოფ ხალხს დაპატიებდნენ. ხატში კი, როგორც ვთქვით არც სასმელი ჰქონდათ, არც საჭმელი. ხევისბრები ჩამოქნიდნენ სანთელს, მოანთებდნენ, ახვეწებდნენ ყმათ და წამოვიდოდნენ შინ.

## ა ხ ვ ს ე ბ ა

ახვსებას დასტურნი ლუდს ამზადებდნენ. დროშა არ გამოდიოდა. დანარჩენ წესს ყველაფერს ასრულებდნენ; სანთელის მონთების, ზარის

დარეკის და ლუდის გახსნის შემდეგ სოფელი მოვიდოდა, მოიყვანდნენ სასოფლო საკლავს და იმართებოდა ხატობის ყველა წესი, რაც წინა დღეობებში. ხატობა იწყებოდა დილით და მთავრდებოდა იმავე დღეს საღამოზე.

### ა ვ ი რ ა ს ჯ ვ რ ო ბ ა

ხატობა კვირისჯვრობა იყო ახვსების სწორს, კვირას. ამ დღისთვისაც მზადდებოდა ლუდი. კვირადილით მივიდოდნენ ხევისბერები ხატში (დასტურნი მუდამ აქ, სადასტუროში, ცხოვრობდნენ). ყველამ იცოდა თავისი საქმე და სოფლის მოსვლამდინ წესრიგში მოიყვანდნენ ყველაფერს. სოფელი რომ მოვიდოდა, თან მოიყვანდნენ ერთ-ორი ან სამი წლის კურეტს და ერთ სასოფლო საკლავს. ამ დღეს დროშა არ გამოდიოდა. სასაკლაოში წამოაყენებდნენ სასოფლო საკლავს და კურეტს და ხევისბერი შეუსახელებდა მთავარანგელოზს ახვეწებდნენ. ყმათ. კურეტს დაკლავდნენ, გაატყავებდნენ და ხორცს სოფელი გაიყოფდა. ტყავიც სოფელს უნაწილდებოდა შოლტებად (ეს კურეტი ნაყიდი იყო სოფლის ფასით). თავი და კურეტის მხარი ხატის მსახურთ რჩებოდათ, სასოფლო საკლავის ხორცი კი მოიხარშებოდა და სოფლებს დაურიგდებოდა ხელზე. პურად, საწირავთ ნაჭრებს არიგებდნენ მიცვალებულთათვის სახელის შადების შემდეგ. დედაკაცებს მიჰქონდათ ქადა-სანთელი და სადიდებული. ქადის ნაწილობა ხატში რჩებოდა, იმისი ნახევარი კიდევ ორად იჭრებოდა და ნაოთხალის ნახევარი ისევ სოფელს ურიგდებოდა. საწირავებს რაც კვერები მოჰყვებოდა, იმას ბავშვებს უგორებდნენ. რასაც ვინ აიტაცებდა, იმას რჩებოდა. ეს ხატობაც ერთ დღეს იყო და საღამოზე გამოილოცავდნენ (ხევისურეთში ხატებში დღეობები იწყებოდა საღამოობით, ღამის თევით. ფშავში კი ყველა ხატობა დილით, გარდა ლიტანიისა და თევას საღამოსი).

კვირისჯვრობის სწორ კვირას არის ხახმატიანთ დღეობა. ლუდს მოამზადებენ დასტურნი და აფუელებდნენ სალუდეში. ამ ხატობაში დარბაზის კარი არ ეღებოდა. დღეობა იწყებოდა კვირა დილით და სოფელიც მოვიდოდა. სოფელი მოიყვანდა ერთ სასოფლო თიკანს (თიკანზე საკლავი არ ითქმება, საკლავი არის ცხვარი, ბატკანი, ჭედლია, მაწოვარი ხბოც საკლავად ითვლებოდა). თიკნის ხორცი მოიხარშებოდა, სუფრა გაკეთდებოდა და ხახმატის ჯვარის ძველ ხევისბრისათვის „შაზდებდნენ სახელს“. დღეობა ერთ დღეს გრძელდებოდა, საღამომდინ სმა და მხიარულება იყო, საღამოზე კი გამოილოცავდნენ.

## ამალღებაც

ამალღებაც ერთ დღიანი ხატობა იყო. იცოდნენ ლუდი, მოჰყავდათ სასოფლო საკლავი. დედაკაცებს ამ დღეობაში ყველას მოჰქონდა ხთიშობელში ქადა — ფურთ ნათვარისა. ლუდს დედაკაცებსაც გაუტანდნენ. ფურთ ნათვარის ქადები იჭრებოდა და ურიგდებოდა მთლიანად სოფელს. ეს ხატობაც, დილით დაწყებული, საღამოზე მთავრდებოდა. დროშა მთავარანგელოზში წელიწადში სამჯერ გამოდიოდა: ათენგენას, მარიანობას და წელწადს. დანარჩენ დღეობებში დროშა არ გამოდიოდა. დანარჩენი ყველა ერთნაირი წესით სრულდებოდა.

## ათენგენა

ათენგენა, სწვა ხატებთან შედარებით, უფრო რთული ხატობა იყო. მათურის მთავარანგელოზი აქ მთავარი სათემო სალოცავია. ხთიშობელი იყო სამ-ოთხ ადგილას და იყო კიდევ მთაწმინდა-მთავარანგელოზი ეკლესიის ძალა, მთაზე. ეს მეორეხარისხოვანი სალოცავებიც ყველა გვარებს ერთნაირად ეკუთვნოდა. ემსახურებოდნენ მთავარანგელოზის დასტურ-ხევისბრები მათურხევის წმიდა მარიამ დედუფალს — ადგილისდელას, რომელსაც უძველეს დროს თურმე თავისი დასტურ-ხევისბრები ჰყავდნენ. ბოლოს იქაც მოისპო. უკანასკნელად ქისტები თურმე დაეცნენ წელწად-ღამეს, დასტურ-ხევისბრები დახოცეს და თას-განძი წაიღეს. ეს ისეთ უთოვლობის წელს ყოფილა, რომ წელწადში მთაზე გადმოსასვლელი გზა შეკრული კიდევ არ ყოფილა. დარბაზში მსხდარან თავისუფლად, რადგან ზამთარში აქ მტრის შიში არ იყო, მაგრამ მტრის გადმოსვლას ამინდმა შეუწყო ხელი და ზემოხსენებული დაცემა მოხდა. ამის შემდეგ აქ საკუთარი დასტურ-ხევისბრები აღარა ჰყოლიათ და იქაც მთავარანგელოზის ხევისბრები და დასტურები ემსახურებოდნენ. მთავარანგელოზის ხატი სოფლის გვერდზეა და მტრისაგან ნაკლებად საშიშ ადგილას. მარიამ წმიდა დედუფალს სალოცავი კი ერთ ვიწრო ადგილზეა და იქ მომხდარ ამბავს სოფელი მეორე დღემდე ვერ გაიგებდა. ამიტომ იყო საშიში იქ ხალხისა და თას-განძის ყოფნა. ხსენებულ სალოცავებში ყველგან იყო ათენგენას ხატობა თავთავის დანიშნულ დღეს. მთავარანგელოზის მსახურნი თავისი დროშით ყველგან მივიდოდნენ და ასრულებდნენ ყველა წესებს. ახლა ვიწყებთ ათენგენის აღწერას ყველა ზემოხსენებულ ხატებში:

## საყაჰეოცა

საყაჰე ჰქვია ადგილს. ეს ადგილი არის ყველაზე მაღალ მთაზე, სადაც მდებარეობს საყაჰეს სვეტის ანგელოზი. დღეობა ათენგენა პირ-

ველად აქ იწყება. მთავარანგელოზში ხუთშაბათ დღეს დროშას ააბამდნენ, ლუდს გახსნიდნენ, ჩაახამდნენ ტიკებში და დროშის წინამძღოლობით გაემართებოდნენ საყაჟის წვერისაკენ. ვისაც ხელისშემშლელი პირობები არ ჰქონდა, ამ ხატობაში ყველა წავიდოდა; როგორც მათურლები, ისე მოსული მლოცავები აჰკიდებდნენ ცხენებს ლუდს, ქადასაწირავს და მლოცავები საკუთარ პურ-სასმელს. რაც საკლავები ჰყავდათ, ერთმანეთში გაურევდნენ და ორი კაცი გარეკავდა დილიდანვე მთისაკენ. დანარჩენი ხალხი ცოტა გვიან წავიდოდა. იყო გზადაგზა დანიშნული ადგილები, სადაც დროშას დააბძანებდნენ და ხალხი ისვენებდა. ყველგან დაღევდნენ თავის სალოცავის სადიდებულოს და ყმათ სამწყალობნელ სასმელს. მთაზე რომ ავიდოდნენ, დაისვენებდნენ და შემდეგ შეუდგებოდნენ საკლავების დაკვლას. დროშას მიაბძანებდნენ დროშის საბძანად აშენებულ კოშკზე. სასაკლავეც აქვე იყო და სასანთლეც. კოშკი მაღლობ გორაკზე იდგა (კვრივი) და იმის ბოლოზე კარგა მოზრდილი, ბალახიანი მოედანი იყო, სადაც ხალხი დაბინავდებოდა. სანთლის მონთების და საკლავების დაკვლის დროს მედროშეს დროშა წინ ეყუდა, ნელ-ნელა აქეთ-იქით აქანებდა და ზარს აწკრიალებდა. აქ იკვლებოდა სასოფლო ბატკანი, ბატკნის შემდეგ — ერთი თიკანი, რომელსაც ხევისბერი მარცხენა ხელით გამოჰკრიდა ყელს და იქვე დიდი ქარაფი კლდიდან ხელუკუღმა გაუტყავებელს გადააგდებდა, როგორც ეშმაკებისათვის შეწირულს. აქვე კლავდნენ ცხვრის ნათავარ ბატკანს ე. ი. დოლისთავს, რომელიც ფარაში პირველი გაჩნდებოდა.

შეუდგებოდნენ ხორცის მოხარშვას. შეშად დეკას ხმარობდნენ, რადგან ამ მთაზე ტყე არ არის. ამასობაში დაღამდებოდა. ღამით თავთავის ბინაზე ცეცხლს დაანთებდნენ, ერთმანეთს ბინაზე ეპატიყებოდნენ და, როგორც უკანაფშავის ხატობაში აიწერა, ყველა იმ წესებს ასრულებდნენ.

პარასკევს საკლავს არ კლავდნენ. ყველას უნდა მოესწრო ხუთშაბათს დაკვლა. სუფრობა კი პარასკევსაც იცოდნენ. პარასკევს საღამოს ფერხისას დააბამდნენ და გამოემართებოდნენ პირთავე. ფერხისას თან ქალ-რძალიც მოჰყვებოდა, კარგა მანძილს გამოივლიდნენ, მერე დაიშლებოდა ფერხისა. პირჯვრის წერით ეხვეწებოდნენ თავის სალოცავს შენაცოდარის პატიებას და კვლავ უკეთესი გულით მოსვლას სალოცავად. ჩამოვიდოდნენ ბარში. ორშაბათს ისევ მოემზადებოდნენ მთაზე წასასვლელად. მოამზადებდნენ კარგ ცხენებს და კარგ მხედრებს დოლისათვის. მთაზე სადაც ახლა უნდა ასულიყვნენ, ეკლესიის მსგავსი ნაგებობა იყო. ნამდვილ ეკლესიას ჰგავდა, მაგრამ ძალიან პატარა იყო, კაცი შიგ ვერ შეეტეოდა, მას საზარეც ჰქონდა და ზარიც

ეკიდა. ამ ეკლესიასთან ასე ხსენდებოდა: დიდო მიქელ ეკლესიის ძალო.

ეკლესიასთან კარგა მოზრდილი ვაკე იყო და ხალხი აქ დაბინავდებოდა. ასვლისთანავე მხედრები შეუდგებოდნენ ცხენების მომზადებას, მოუჭერდნენ უნაგირის გარსაკრავებს, გაიხდიდნენ ქალამნებსა და და წინდებიანი, უქულო-უსარტყლოები დადგებოდნენ ცხენების გვერდზე. თავხევისბერი საზარისაკენ გაემართებოდა, ამ დროს მხედრები სწრაფად ცხენებზე შესხდებოდნენ და მწკრივად დადგებოდნენ პირადმოსავლეთისაკენ. მედროშე ზართან დიდი მოკრძალებით მივიდოდა, ჯერ მუხლზე დაჯდებოდა, დაიწერდა პირჯვარს და იტყოდა: „დიდო მიქელ ეკლესიის ძალო, შენ გვევრდები, შემინდევ, რომ მე შენ წმიდა ადგილზე ზარ-საზარესთან უღირსი ხორციელი მოვიღივარ. ბევრ რამეს გცოდავ ჩემის ხორციელობითა და უვიცობითა და შენ დიდი ხარ, ხეთისნასახი და მაპატიე, მიშველე. უშველე შენთ ყმათაცა მათურელთა. დაიკვნ ისინი ყველა მწარე საქმისა და საგნისაგანა. უშველე მკედართაცა, დღეს დაწესებული წესის შამსრულებელთა და ნურა მარცხსა და ზიანს მიაყენებ. დიდებულო მიქელ ეკლესიის ძალო, შეგიძლია, თუ რამე მარცხი და ზიანი ეხედვებოდეს, შენ ორგულ-მუხანათთაზე გადაიტანო, შენის სახელისა და ძალის ჭირიმე“.

ამ ლოცვა-შეძახილს რომ დაამთავრებდა და სამჯერ ზარს შემოკრავდა, ყოველ დარეკვაზე პირჯვარს დაიწერდა და ახვეწებდა მხედართ, მესამედ რომ ჩამორეკდა, ცხენებს გააქენებდნენ აღმოსავლეთისაკენ. ადგილი იყო დანიშნული პატარა კოშკითა და იქ ყველანი ჩამოვიდოდნენ ცხენებიდან და დადგებოდნენ ახლა პირხატისაკენ. ხევისბერი გაჰყურებდა და როცა ყველანი მიიკრიფებოდნენ, გაიმეორებდა ზარის რეკას. პირველად რომ დარეკდა, ცხენებზე შესხდებოდნენ, მეორე დარეკვაზე გამწკრივდებოდნენ და მესამეზე — გამოაქენებდნენ. რაც ძალი და ღონე ჰქონდათ. ჯერ სწორი წამოსასვლელი იყო და მერე ცოტა დაღმართივ ხედებოდა, სარბენი კარგი იყო. ბორტვი მძის დაბალი ბალახით დაფარული. ისინი რომ გამორბოდნენ, ხევისბერი იმათ მოსვლამდე გამუდმებულად რეკდა ზარს და ამწყალობნებდა მხედრებს, რომ არ დაზიანებულყვნენ. მოსულებს ხალხი შეეგებებოდა და კიუინით გამარჯვებას ულოცავდნენ ცხენ-მხედრებს. როცა უკანასკნელი ცხენი მოვიდოდა და მხედარი ჩამოხტებოდა, ხევისბერიც შეაჩერებდა ზარის რეკვას და კიდევ დაამწყალობნებდა მათ. მერე მუხლს მოიყრიდა, საზარეს აკოცებდა და წამოვიდოდა უკან. მივიდოდა მხედრებთან, წინ მოსულ ცხენ-მხედარს გამარჯვებას მოულოცავდა და სამ თუნგ ლუდს დაუსხამდა საკუთრად მას. დაასხამდნენ თასში ლუდს და ხევისბერი შენდობას იტყოდა იმ მხედრებისათვის, ვინც წინათ აქ ყოფილან დოღვში და აღარ არიან. ასეთ შესა-

ნდობარს ყველანი დალევდნენ, მერე მხედრები ცალკე დასხდებოდნენ, თუ სურდათ, სხვებსაც მიიპატიებდნენ და დალევდნენ ამ ლუდს.

საკლავებს, რასაც მოასწრებდნენ, იმ დღეს დაკლავდნენ, ზოგს კი დილით. სასოფლო საკლავს კი, დოღი რომ მოთავდებოდა, პირველ რიგში დაკლავდნენ. მოხარშავდნენ ხორცს, ქაღებს დასჭირდნენ, საწირავებს. ქადის ნაჭრებს და ხორცს სახელს შასდებდნენ მათურის მიცვალბებულთათვის, რომელნიც წინათ აქ ყოფილან, ულოცნიათ თავის სალოცავი, ხატისა და ხალხის საქმეში ერთგულნი და თავდადებულნი იყვნენ და აღარ არიან.

ამ სახელშადებული სუფრიდან ყველა მლოცავებზე დაარიგებდნენ ხორცის, პურის და ქადის ნაწილებს. ამასობაში დაღამდებოდა, დაანთებდნენ თავთავის ბინაზე ცეცხლს და როგორც ხუთშაბათს, ისევე აქაც ღამეს გაათევდნენ.

სამშაბათ დილას ხევისბერი დარეკდა ზარს და მთელი მლოცავი ზარის ხმაზე ფეხზე ადგებოდა. ყველა პირჯვარს იწერდა და ეხვეწებოდნენ მთავარანგელოზს — შენაწირი შეიწიროს და შეწირვისათვის ყველა გაჭირვებიდან დაიხსნას მეხვეწურის ოჯახი. თუ რამე საკლავები დარჩა დაუკლავი, იმათაც დაკლავდნენ და ჩვეულებრივი წესით სუფრები მზადდებოდა. შუადღის დროს, როცა აქ ყველა წესი შესრულდებოდა, მედროშე დროშას ააბძანებდა და ეკლესიის წინ, შუა მოედანზე გაჩერდებოდა დროშით. ამ დროისათვის ხალხი წამოსასვლელად მომზადებული იყო. დაბამდნენ ფერხისას ისე, რომ დროშა ფერხისას შუა ადგილზე რჩებოდა და მას ფერხისა გარშემო უვლიდა, მღეროდნენ ორ გუნდად. ხევისბერი დროშას აქანებდა და მის ზარს აწკარუნებდა. ერთი კაცი კიდეც სხვა იდგა ფერხისის შუაში და მომღერლებს ლუდს ასმევდა იმის შესანდობრად, ვის სიმღერასაც მღეროდნენ.

სიმღერა რომ მოთავდებოდა, ფერხისა დაიშლებოდა, მედროშე მხარზე დროშას გაიდებდა და მლოცავს ისევე წინ გამოუძღვებოდა. აქ მათურის ხევზე იყო კიდეც მარიამწმიდის ხატი და პირდაპირ ამ ხატში ჩამოვიდოდა მლოცავიც და დროშაც, სოფელი აქ სასოფლო საკლავს არ კლავდა. დედაკაცებს მიჰქონდათ ქადა-საწირავნი და სადიდებულო, საკლავებიც ის იკვლოდა, ვისაც შეთქმული ჰქონდა. დედაკაცებს უფრო მოყავდათ საკლავები, ვისაც აქ მინალახი ჰქონდა. ეს ხატი გზის პირზე იყო და დედაკაცებიც ვერსად აუხვევდნენ გზას. შეიძლება რომელიმე დედაკაცს ისეთ დროს მოუხდა შემთხვევით გავლა, რომ იმ დროს ის წმიდა არ იყო და მიილახებოდა ხატ-ხატისკარი. ამაზე მოამიზეზებდა ხატი და საჭირო გახდებოდა საკლავის მოყვანა. ასეთი შემთხვევები აქ ხშირი იყო. აქ სუფრობა არ იცოდნენ, მხოლოდ ქადა-საწირავი მოჰქონდა სოფლიდან ყველას. ქადა-

საწირავის ნაწილებს და სანმელს შეზღებდნენ მიცვალებულთათვის სახელს. შეიძლება ლუდიც ყოფილიყო მთავარანგელოზიდან მოტანილი, შეიძლება არაყითაც შაზღონ სახელი მიცვალებულთათვის. სამშაბათი მარიაშვიდაში დაღამდებოდა, აქაც ფერხისას დააბამდნენ და მღეროდნენ საგმირო საფერხისო სიმღერებს. ფერხისა რომ დაიშლებოდა, ხევისბერი დროშით წინ გამოუძღვებოდა ხალხს და წამოვიდოდნენ მთავარანგელოზში.

ხთიშობლობა კიდევ არყოვნის თავსაც იყო, სადაც მარტო კვრივი იდგა. არყოვნისთავი გამოღმა მათურის ზემოთ არის (მათურის მთავარი სოფლები ორია: გაღმა მათურა და გამოღმა მათურა. გაღმა მათურას არის მთავარანგელოზის ხატი, გამოღმა მათურის თავს ხთიშობელი). ეს ხთიშობელი ეკუთვნის გამოღმა მათურელებს: ხიბლაშვილებს და წითელაურებს. მას არც სალუდე აქვს, არც დარბაზი, არც საზარე, არც სანდასტურო. როგორც ვთქვით, აქ მარტო კვრივია — არც დროშა მოდის აქ, დღეობა მარტო ათენგენას არის და ემსახურებიან მთავარანგელოზის დასტურ-ხევისბრები. ათენგენის შაბათ დღეს წავლენ ამ ხთიშობელში დასტურ-ხევისბრები, ხალხი მიდის და მიაქვს ქადა-საწირავი, სანთელი და სასმელი. ქალებს გაჭრიდნენ და ქადა-საწირავთ ნაწილებს ჩამოარიგებდნენ ხელზე. შეიძლება საკლავი დაეკლა ვინმეს, ხორცი კი შინ მიქონდათ.

სალამოზე ყველანი ბრუნდებოდნენ უკან. სხვა ახალი აქ არაფერი იყო.

**პატარძლის გაყვანა მარიაშვიდაში.** რძლის გაყვანა ყველა თემში იტოდნენ თავის სათემო სალოცავის ახლო მდგომ ხთიშობელთან (ზემოთ ნათქვამია, რომ ხთიშობელი ყველგან და ყველა სოფელს ჰყავდა). პატარძლისა და პატარა ახლად შემომატებული ქალის გაყვანა ერთნაირი წესით ჯდებოდა, გარდა მათურისა. სხვა ხატებში და სოფლებში რომელიმე ხატობა არ იყო საამისოდ დანიშნული, რომელიც უნდა ყოფილიყო, გაიყვანდნენ. მათურაში კი ერთი დღე იყო დანიშნული — ათენგენას. მთიდან მარიაშვიდაში რომ ჩამოვიდოდნენ და ხევისბერი დროშას მიაბმანებდა თავის კუთვნილ ადგილზე, ამ დროს პატარძლები და პატარა ქალები გასაყვანად აქ ელოდებოდნენ. რძალს მოჰქონდა ერთი ხაეიწიანი ქადა, სასმელი და ერთი საკლავიც მოჰყავდა გასამყვანლო. სხვა სახატო წესის შესრულების შემდეგ ხევისბერი იგივე მდგომზე დროშას ააბმანებდა და მივიდოდა წყლის პირში (აქ პატარა მდინარე მოდის, რომელსაც ეწოდება მათურულა. მათურულას გვერდზე იყო მარიაშვიდის ხატი), დაჯდებოდა ქვაზე და და აწკარუნებდა დროშას. პატარძალს დროშასთან ახლო წყალში ჩააყენებდა ვინმე. მოხუცი დედაკაცი. ხევისბერი იტყოდა: „დალოცვილო მარიაშვიდაო ხთიშობელო, შენ გვედრებით შენნი საყმონი

კაცნიცა და დედაკაცნიცა, შენ უშველე (რძლის სახლს იტყოდა) შენს კარზე მოსულს რძალსა, შენ აბედიანე და ნუ შაანანებ შენს კარზე თავის წესით მოსვლასა და ხვეწნა-ვედრებასა. ჩაუღვევ წილი შენთ ყმათაში წულითა და წულის აკავინთა, შენთვის თავის წესი არ დაუყრავ და შენს წყალობას ნუ დააკლებ შენი სახელის ჭირიმე“.

როცა ხევისბერი დაამთავრებდა, ახლა მოხუცი დედაკაცი დაუწყებდა ვედრებას ხთიშობელს, სთხოვდა პატარძლის ბედიანობას, წულის აკვინანობას და სხვა-მერე პატარძალს მარჯვენა მხრისაკენ შემოატრიალებდა, შიგ წყალშივე ჩააწვენდა ისე, რომ მარტო მხრები დასველებოდა. მეორედაც შემოაბრუნებდა და ისევ ისე ჩააწვენდა წყალში, მესამედ, რომ შემოაბრუნებდა, ისე ჩააწვენდა, რომ წყალი მთლად ზედ გადმოუვლიდა. ბებერი მოეხმარებოდა, ააყენებდა და გამოიყვანდა წყლის პირზე. ხევისბერი დროშას ააბძანებდა, კიდევ დაამწყალობნებდა და მიაბძანებდა თავის საბძანში. მოხუცი დედაკაცი მიიყვანდა პატარძალს და ხატთან ახლო გააჩერებდა, სადამდინაც დედაკაცის მისვლა შეიძლებოდა. დაკლავდნენ რძლის გასამყვანლო საკლავს და ახვეწებდნენ ისევ ახლად გაყვანილ რძალს, რომელსაც მერე მოიყვანდნენ და დასვამდნენ დედაკაცებთან. წყალში დასველებული ტანსაცმლისა არც გაწურვა შეიძლებოდა და არც გამოცვლა, ვიდრე ტანზე არ გაშრებოდა. ტანისამოსი უნდა სცმოდა სულ ახალი, პირველად ჩაცმული. დაჭრიდნენ რძლის მოტანილ ქადას და დაურიგებდნენ იქ მყოფ დედაკაცებს მთლიანად. საკლავს გაატყავებდნენ და თავსა და ტყავ-მხარს ხატში დასტოვებდნენ, დანარჩენ ხორცს კი გაგზავნიდნენ რძლის ოჯახში. სასმელს დაალევიანებდნენ ჭერ მამაკაცებს ახლად გაყვანილნი რძლის სამწყალობნო-სადღეგრძელოდ და მერე დედაკაცებსაც. პატარა ქალებსაც დაახლოებით ერთი წლისას, ან ცოტა ნაკლებს გაიყვანდნენ მარიამწმიდაში ყველა ასეთი წესით, მხოლოდ წყალში არ ჩააწვენდნენ. საკლავი და ქადა კი ამ წესით უნდოდა.

ამ დროს მთავარანგელოზშიც მუდმივად არის ხატობა ხუთშაბათიდან. მხოლოდ მთავარი ხატობა არის შაბათს. მაშინ დროშაც აქ არის და ხატისმსახურნიც. ხუთშაბათს საყაჰეს იყვნენ, პარასკევს ჩამოვიდოდნენ, შაბათს და კვირას აქ, მთავარანგელოზში, იყვნენ, ორშაბათს ისევ ეკლესიასთან წავიდოდნენ, სამშაბათს მარიამწმიდაში ჩამოვიდოდნენ და მთავარანგელოზშიც ისევ მოაღწევდნენ. ოთხშაბათს კი გამოილოცავდნენ. მთავარანგელოზში მეტი მლოცავი იყო და მეტ დროს ატარებდნენ. აქვე ერთი ხთიშობელია, სადაც ნათავრის ქალები მიდიოდა, საკლავი კი მარტო ნაღში იკვლოდა. დანარჩენ დღეობებში ქადა და სანთელი მიჰქონდათ აქ. სასმელს მარტო სადიდებულო ქადას მიაყოლებდნენ. ხთიშობელში ერთი პატარა კვრივი იყო



სხვა არაფერ ჰქონდა, კვრივთან ერთი იფნი იდგა. იგი ეკუთვნოდა ყველა გვარებს მათურის თემში. მათურაში ასეთი წესი აიწერა. უკანაფშავის თემში კი მას ასე ასრულებდნენ: რძალს მიიყვანდნენ ხატში, მას „ალოცვებდა“ ხევისბერი კი არა, მოხუცებული დედაკაცი. რძალი მიიყვანდა გასამყვანელო საკლავს და ხავიწიან ქადას მიიტანდა, მუხლზე დაიჩოქებოდა. ბებერი დედაკაცი მასთან დადგებოდა პირადმოსაველეთისაკენ და იტყოდა: (სანთელი არ ანთია ამ ლოცვის დროს) „დალოცვილო ხთიშობელო, უშველე, მიეც ბედი და ბოლო, გაამრავლე წულითა და წულის აკავნითა, ნუ ვნის თვალსა და გულს მორევ. შენთვის თავისი წესი არ დაუყრავ და შენს წყალობას ნუ დააკლებ, დაიკუნე ყველა გაჭირვებიდან, ნურას ავსა და საზიანო საქმეს მიაწივებ შენს მეხვეწურსა, დღეს შენს კარზე ხვეწნა-მუდარით მოსულსა“. ამის შემდეგ საკლავს დაკლავდნენ და როგორც მათურაში აიწერა, იმ წესით ქადას დაჭრიდნენ, იქ მყოფ ქალებს დაურიგებდნენ. ასეთისავე წესით გაიყვანდნენ პატარა ქალსაც მამის სალოცავ ხატში.

ვაჟის გაყვანა ხატში. ვაჟის გაყვანა ხდებოდა მისი მამის მთავარ სალოცავში, ე. ი. სათემო ხატში. პირველად გასაყვან წულს მიაყოლებდნენ წულის ფულს, ვერცხლის ერთი მანეთიანიდან სამ მანეთამდე, ერთ საკლავს, სანთელს, ქადას და სასმელს. ხევისბერი ახალშემომატებული წულის სამხვეწროდ ჯერ საკლავს დაკლავდა. ამ დროს ბავშვი ვისმე თავისიან ეჭირა ხელში „მზის ამოსახედისაკე“. ხევისბერი დიდებით რომ დაამთავრებდა, საკლავს დაკლავდა და დაამწყალობებდა ახალ შემომატებულ წულს. მერე სანთელს აანთებდა წულისავე სამწყალობნოდ და დააკრავდა სასანთლეში. მივიდოდა დროშასთან ახლო (ეს ყველა დღეობაში შეიძლებოდა, როცა დროშა გარეთ იყო), მიიყვანდა ბავშვსაც. წულის ფულს და ბავშვს ორივეს ხელში დაიჭერდა, სამჯერ აიყვანდა წულს მალა და სამჯერ დაბლა დაუშვებდა. სამჯერვე მიწაზე მუხლით დასვადა, რამდენადაც მოახერხებდა მის მუხლებზე დასმას და იტყოდა: „დალოცვილო ჩვენო სალოცავო, შენთ საყმით შემომატა ეს წული (სახელი წულის), შენ იყმე და გაზარდე, გამოიყვანე კარგი კაცი, იმსახურე სხვათ ყმათან ერთადა, გამოიყვანე ბედიან-იღბლიანი, ნუვის თვალსა და გულს მორევ. შენდ წესი არ დაუყრავ და შენს წყალობას ნუ დააკლებ შენი სახელის კირიმე“. ამ ლოცვის შემდეგ ბავშვს გადასცემდა მისიანებს და ფული წულისა მას რჩებოდა. ბავშვის პატრონი ახალწულის სადღეგრიქლოს თავისი არაყიდან ყველას დააღვეინებდა. ქადასაც დასჭრიდნენ და ყველა იქ მყოფებზე დაარიგებდნენ ნაჭრებს. საკლავის ტყავ-მზარი ხატის მსახურთ რჩებოდათ. დარჩენილი ხორცი შინ მიჰქონდა წულს პატრონს.

ახალდაქორწინებული ფშაველი ხატში. ფშაველი ხალხი, როგორც ვიცით, ყველა ლაშარის ჯვარის ყმა იყო და მის გარდა სათემო სალოცავებიც ჰყავდათ. ახალდაქორწინებული ყველა მიიყვანდა თითო საკლავს დაქორწინების მოკლე ხანშივე და დაკლავდა ლაშარის ჯვარში. ამას ეძახოდნენ „საწალმართოს“. საკლავი არ უნდა ყოფილიყო არც დედალი ცხვარი და არც ბატკანი. ის უნდა ყოფილიყო ჭედილა. ერთ წელზე ნაკლები არ შეიძლებოდა. რამდენიც მეტი ხნისა იქნებოდა, უკეთესი იყო. საწალმართოს თან მოაყოლებდნენ სასმელსაც. საკლავი დაიკვლოდა მისი წალმართის სამწყალობნოდ (წალმართი: ქორწილი, დაქორწილება). ხევისბერი უსურვებდა მრავალწულიანობას და სხვა სიკეთეს. საკლავის ხორცს მოხარშავდნენ, სუფრას გაშლიდნენ და ყველა იქ მყოფ ხალხს დაპატიებდნენ.

თავის მოპარსვა. ყმაწვილს დაბადებიდანვე თმას უტოვებდნენ. ამ თმას ეძახდნენ კუჭულათ. კუჭულას არ ჭრიდნენ ორ-სამ წლამდეც, ვიდრე მშობლები არ მოამზადებდნენ სათანადო სასმელს და საკლავს. წელგათავებამდე მაინც არ მოპარსავდნენ თავს. მერე მოამზადებდნენ ლუღს, არაყს და ერთ ღირებულ საკლავს — ჭედილას. (ხევისურეთში ამ რიტუალს ეძახდნენ თავის მოპარსვის სახმთოს, ფშავში კი, როგორც მოხრობელმა ჩამაწერინა, — პატარა ქორწილს). როცა ბავშვის მშობლები სათანადოდ მოემზადებოდნენ, დაპატიებდნენ ნათესავებს შორი სოფლებიდანაც და ახლოდანაც. დანიშნულ დღეს ხალხი მოგროვდებოდა, უმრავლესობა სასმელსაც მოიყოლებდა. შეატყობინებდნენ სოფლელებსაც. ქალი და ვაჟი ყველა მოვიდოდა, ვისაც მოსვლა შეეძლო. მიიყვანდნენ ხევისბერს და გახსნიდნენ ლუღს საწლის ანთებით. ყველა წესრიგის შესრულება ხდებოდა თავმოსაპარსავი ყმაწვილის სამწყალობნოდ. ლუღის გახსნის შემდეგ დაკლავდნენ სამხვეწო საკლავს ისეთ წმიდა ადგილზე, სადაც ნალახი არ იყო. საკლავის დაკვლის დროს ბავშვი საკლავთან ახლო ჰყავდათ. ხალხი ქუდმოხდილი იდგა. ხევისბერი საკლავს შეუსახელებდა და დიდებათ დამთავრების შემდეგ დაკლავდა. ამის მერე მოიტანდნენ ლუღს სადიდებულოდ. ამაზედაც იმ ხატს ადიდებდა ხევისბერი, სადაც ხდებოდა თავმოპარსვა (რომელ თემშიც იყო, იმ თემის და სოფლის სალოცავებს), აგრეთვე ლაშარის ჯვარს. სადიდებულოს ყველანი დაკლავდნენ. ამის შემდგომ ყმაწვილს მიიყვანდნენ ხევისბერთან და დუქარდსაც მიუტანდნენ. ხევისბერი მოჭრიდა კუჭულას და ეხვეწებოდა თავის სალოცავს (მაგალითად, მთავარანგელოზს): „დიდება, ჩვენო სალოცავო მთავარო ანგელოზო, დიდი ხარ დიდად საჯსენებელი, შენ გადიდებთ, შენ გეხვეწებით. ასრულებს წესსა და თავს იპარსავს შენი ყმა (სახელი), იყმე, მიიღე შენთ ყმათაში, გაზარდე და კარგი კაცი გამოიყვანე, ამყოფე მშვიდობითა და იმსახურე, შენის სახელის ჭირი-

მე“. ამ სიტყვებით თმას მოკრეჭდა და გადასცემდა შშობლებს (ამ თმის შენახვა დედამ იცოდა). თმას და დუქარდს ჩამოართმევდნენ. ხევის-ბერი კიდევე დაამწყალობებდა: „გწყალობდესთ ჩვენი სალოცავი, გწყალობდესთ, გაგიზარდოთ და კაი კაცი გამოიყვანოს“. სხვებიც გაიმეორებდნენ ამ სიტყვებს. ამის შემდეგ იმართებოდა სმა და მხიარულება. ხორცს მოხარშავდნენ და გამართავდნენ სუფრას. სუფრის დროს ხალხი აძლევდა სანაწეოს ფულს, ვისაც რამდენი შეეძლო. სანაწეოს ფულს ახლად თავმოპარსული ბავშვის დედას გადასცემდნენ.

თუ ბერი სასმელი იყო მომზადებული, მესამე დღემდე გრძელდებოდა სმა და სტუმრიანობა. ხანდახან თავმოსაპარსოში ქორწილზე მეტი სანაწეო დადგებოდა. თავის მოპარსვა ხდებოდა თავის სახლში. საკლავიც აქ დაიკვლებოდა და დანარჩენი ყველა წესიც აქ სრულდებოდა.

### ანგელოზთ ლოცვა

ყველიერის ხუთშაბათი რომ დაღამდებოდა, ამ ღამეს ყველა ოჯახში ანგელოზთ ლოცვა იციან. ხუთშაბათს გამოაცხობდნენ ხავიწიან ქადას, შვიდ პატარა უგულო, მოზრდილი თხილის ოდენა პურებს, ერთს გააკეთებდნენ მოსახვევი ხინკლის ოდენა ცომს, პირს ოდნავ მოუვიწროვებდნენ და პატარა ჯამის სახეს მისცემდნენ. გამოაცხადებდნენ და ჩაყრიდნენ შიგ შვიდ ბროლის კენჭს, შვიდ იმ თხილისოდენა პურს და შვიდ წმიდა პურის მარცვალს. გააკეთებდნენ შვიდ ბამბის ფითილს, დაახლოებით შეყრილი ხელის სიგრძისას, ამოათრევდნენ ერბოში და ჩააწყობდნენ ქვის ჯამში თითობით. ჯამის პირზე გადმოუშვებდნენ ფითილის პირებს და მოუკიდებდნენ ცეცხლს. ამ ოჯახის ხნიერი დედაკაცი შეუდგებოდა სახლის ანგელოზთ ლოცვას. ილოცავდა, მანამ ფითილები არ დაიწვებოდა შემდეგი სიტყვებით: „დალოცვილნო სახლის ანგელოზნო, თქვენ უშველეთ ჩვენს თავსა და ჩვენს ხიზან-ჯალაფობასა, კაცსა და საქონსა, კაცსა და კაცის მარჯვენასა და იმის ნაშრომსა, გარსა, გარის ნაწნავსა, გარის საქედოსა. მიეც ჩვენს ნაშრომ-ნამუშევარსა მადლი და ბარაქა, ნურას მარცხსა და ზიანს მიჰკერძებ ჩვენს ოჯახში ნურც კაცსა და ნურც საქონსა, მადლი და ბარაქა დაგვიტანე წლის ნაშვრალ-ნამუშევარსა“. ფითილები რომ დაიწვებოდა, ლოცვასაც მაშინ დაამთავრებდა. მეგრე იმ პურის ჯამს, რაშიც ჩაყრილი ჰქონდა კენჭები, პურის მარცვლები და პატარა პურები, წაიღებდა და სადმე ისეთ ადგილს ყორეში შედგამდა, რომ იმის თავზე ქალის ფეხს არსაით გაევილო. ქადას დაჰკრიდნენ და ისინი ჰამდნენ, ვინც ამჟამად ამ ჰერქვეშ ცხოვრობდა. თუნდა ამ ოჯახიდან გათხოვილი ქალი ამჟამად აქ დასწრე-

ბოდა, ისიც ვერ ჰამდა, რადგან ამ ჰერქვეშ მცხოვრებად აღარ ითვლებოდა. ლოცვა ისეთ წმინდა ადგილას უნდა ყოფილიყო, რომ ქალის ფეხი იმ ადგილზე არ დადგმულიყო თუ ის წმინდად არ იქნებოდა.

სანთლის ანთება არ შეიძლებოდა, რადგან სახლის ანგელოზს „სანთლის ფეხნი ჰქონან და თუ სანთელი აუნთეს, ფეხნი დაზნებიან“, უფებო კი დაკარგავს ძალას და ძლიერებას. სახლის ანგელოზს ის ძალა ჰქონდა, რომ საქონელსაც ზიანსა და ზარალს აშორებდა, ხარის ნახნავსაც მადლსა და ბარაქას დაუტანდა, თუ სახლის ანგელოზი გულუკუღმა იქნებოდა, მადლიცა და ბარაქაც იკარგებოდა ოჯახში.

### ბეტისჩიდილის, ჩარგლის, ყოფჩის, მაღაროსკარის, გომეფრის სალოცავები და მათი დღეობები

მიამბო გიორგი ბეკურაულმა, 30 წლისამ, სოფელი ბეტისჩიდილში მცხოვრებმა.

ბეტისჩიდილი არის პატარა სოფელი ფშავის არაგვის მარჯვენა მთავარი გზის ზემოთ, ერთი კილომეტრის დაშორებით. აქ ცხოვრობდნენ სამი გვარის კაცნი — ხოშურაულები, ბეკურაულები, და ჩიტოშვილები. ესენი ყველანი ეკუთვნოდნენ ცაბაურთ თემს და ეყმობოდნენ ცაბაურთის სათემო სალოცავს შთავარანგელოზს. მაგრამ შიგ ბეტისჩიდილშიც ჰყავდათ ხთიშობელი, ისევე, როგორც სხვა ყველა სოფლებში. ეს ხთიშობელი აერთიანებდა ამ სამ გვარს, ისინიც ეყმობოდნენ მას. დასტურობა მოუდიოდა ოროლობით. თითო ხატობაში ორი დასტური იქნებოდა — ლუდს კი მარტო ამალღების დღეობაში ამზადებდნენ, დანარჩენ დღეობებში არაყი ჰქონდათ. სანადოები არ ჰქონდათ და არც სანატო პური; დასტური თავისი საკუთარი პურით ამზადებდა ლუდსაც და არაყსაც. წინასწარ ჰქონდათ გამოანგარიშებული, თუ კომლს რამდენი პური უნდა დაეხარჯა თავის ხვედრ ხატობაში.

ხევისბერი აქ არა ჰყავდათ, მოჰყავდა სხვა ხატებიდან, უფრო ცაბაურთიდან. თუ მარცა და მიინც სხვა ხატებიდან ვერ მოიყვანდნენ, იმ შემთხვევაში ადგილობრივი დასტური, ან ხნიერი კაცი ვინმე დაუყენებდა წესს — საკლავსაც დაკლავდა, ქადასაც დასჭრიდა და სუფრასაც შენდობას ეტყოდა.

როგორც ვთქვით, პირველი და მთავარი დღეობა იყო ამალღება. ბეტისჩიდილის ღვთისობლის ხატს ერთი კვრივის მეტი არაფერი გააჩნდა, საკლავსაც ამ კვრივთან კლავდნენ. თუ ხევისბერი იყო, კვრივში დაკლავდა, ერისგანი კი კვრივთან ვერ შივიდოდა და

შოშორებით დაკლავდა. კვრივი იდგა სოფლის შუა ადგილას და წმინდად იყო დატული (სოფელი აქ დაფანტული იყო, ძალიან შორიშორს იდგა სახლები).

ამაღლებას დასტურნი ჩვეულებრივად დაამზადებდნენ ლუდს. აქ დღეობა იწყებოდა ღამისთევით. ამაღლების წინა საღამოს დასტურნი მივიდოდნენ კვრივთან. მიიტანდნენ ლუდს ქვაბით, სანთელს და საწირავთ (ლუდს სოფელში აფუელებდნენ ისეთ სახლში, სადაც ნალახი არ იქნებოდა). ხევისბერი თუ ჰყავდათ მოყვანილი, ისიც აქ იქნებოდა, თუ არა სოფლის კაცებს მაინც ვისმე დაუძახებდნენ, სანთელს მონათებდნენ და სადიდებულო ლუდზე ადიდებდნენ ხთიშობელს. სადიდებულოს ყველანი დალევდნენ. შემდეგ დასხდებოდნენ და სვამდნენ სასმელს. ღამესაც აქ უთევდნენ. სხვა ახალი წესი ამ საღამოს არაფერი სრულდებოდა.

ღილით სოფლელები მოვიდოდნენ. ყველას მოჰქონდა ჩვეულებრივი ქადა-საწირავი, რომლის მიტანაც სავალდებულო იყო. დასტურნი მოიტანდნენ უფრო დიდ გულიან ქადას. ამას ეწოდებოდა სასოფლო ქადა. აგრეთვე, ვისაც შეთქმული ჰქონდა, მოიტანდნენ ფურთ ნათავრის ქადას. ეს ქადეები სამნაირი წესით იკრებოდა და ნაწილდებოდა: დასტურთ მოტანილი სასოფლო ქადა მთლიანად დაიჭრებოდა და ნაჭრები სასოფლო საკლავის ხორცთან და საწირავის ნაჭრებთან ერთად დარიგდებოდა. სავალდებულო სოფლის ქადეები დაიჭრებოდა და ერთი მეოთხედი ხატში რჩებოდა, სამი მეოთხედი პატრონს მიჰქონდა. ხატში რაც ნაოთხალი რჩებოდა, იმას კიდევ ორად გაჭრიდნენ, ნახევარი საკუთრად რჩებოდა ხატის მსახურთ, ნახევარს ისევ ხალხს ჩამოურიგებდნენ. ფურთ ნათავარის ქადა ამ ხთიშობელში მთლიანად პატრონს უბრუნდებოდა. ხევისბერი იქნებოდა თუ სხვა, ქადეებს გასჭრიდა. სასოფლო ქადით ახვეწებდა მთლიანად სოფელს და სთხოვდა მათთვის ბარაქიან ზაფხულის დადგომას. საკუთარ ქადაზე, რომელიც სავალდებულო იყო, ახვეწებდა ქადის მომტანს, მათ კაც-საქონს. ფურთ ნათავარის ქადით, რომელსაც ხევისბერი ზედ ქერქზე გასერავდა, განსაკუთრებით ფურებს და ფურის ნაწველს ახვეწებდნენ. ქალებს წელზე ჰქონდათ შებმული თითბრის ჯაჭვით ჯაყვა, რომლის შიბზედაც ათასი რამ საეღრიალა იყო მიმაგრებული. ხატში დაჭრის და შინ დაბრუნების შემდეგ ამ ჯაყვებით თავის ქადების ნაწილებს გამოსჭრიდნენ და დაურიგებდნენ აქ მყოფ ღედაკაცებს.

დასტურთ ხარჯზე იყო თითო საკლავი, რომელიც ითვლებოდა სასოფლო საკლავად და სამ-სამი ხელადა არაყი. როგორც დასტურობა იყო განაწილებული დღეობებზე, ეს სასოფლო საკლავიც და სასმელიც თან დაჰყვებოდა და როცა დასტურობა ერგებოდა, ყველა წესით უძღვებოდა სახატო ნაქმეს, რადგან ეს ყველაფერი მორიგე-

ობით მოუდიოდა. ამ საკლავებზე ახვეწებდნენ მთლიანად სოფელს-  
ჯერ დაკლავდნენ ერთ საკლავს სასოფლო წესით, რომელიც ყველა-  
დღეობაში იკვლოდა, და მეორე საკლავი დაიკვლებოდა უქმის საკ-  
ვეთოდ. ამადლებას კვეთდნენ უქმს და აიხსნებოდა მაშინ, როცა ჰირ-  
ნახული მოიძებოდა. უქმედ კვეთდნენ ორშაბათ დღეს (ზოგან შა-  
ბათი ჰქონდათ ნაკვეთი, ზოგან ორშაბათი, არხოტში კი პარასკევი,  
შაბათი და ორშაბათი იყო ნაკვეთი და მეოთხე დღე კვირა. კვირაში-  
სამ დღეს მუშაობდნენ: სამშაბათს, ოთხშაბათს და ხუთშაბათს, ნაკვეთ-  
დღეებში კი საკლავით ხსნიდნენ უქმს და ისე მუშაობდნენ. მუშასაც  
ამუშაებდნენ).

საკლავის დაკვლაში ხევისბერი იყო, თუ ვინც დაკლავდა უქმის-  
საკვეთო საკლავს, ის ახვეწებდა სოფელს, ბეტისჩდილელებს. სთხოვ-  
და დედა-ხთიშობელს ღალიან-ბარაქიანობას ხარის ნახნავისას, კაცის-  
ნაშვრალ-ნამუშევრისას და საქონლისას. ახვეწებდა იმათ, ვინც თავ-  
დადებული იყო სახატო და სახალხო საქმეში, ინახავდა ხატში ნაკ-  
ვეთ უქმს და ასრულებდა ხატის ყველა წესს და სურვილს. არისხებ-  
და ისეთ ურჩ ყმას, რომელიც არ ემორჩილებოდა ხატის და ხალხის  
წესს, გასტეხდა ე. ი. იმუშაებდა ნაკვეთ დღეს. რადგან ეს უქმი  
იყო ქარ-სეტყვის უქმი. თუ ამ ორშაბათს ვინმე გატეხდა,  
მოსალოდნელი იყო ან ქარი ამოვარდნილიყო, დაეშალა აგებული  
ძნა-თივა და გაენადგურებინა, ან მოსულიყო სეტყვა და მიწასთან  
გაესწორებინა ბეტისჩდილელების ჰირნახული, რაც მაინც ხშირ შემ-  
თხვევაში ხდებოდა ხსენებულ სოფელში.

საკლავის დამკვლელი დაკვლის დროს იტყოდა: „დალოცვილო  
ჩვენო სალოცაო დედაო ხთიშობელო, სწყალობდი დაწეებული უქ-  
მის, ორშაბათის შემნახველსა და წესის შემსრულებელსა, რისხვედი  
ჩვენო სალოცაო გამტეხსა დაწესებული უქმისასა, ხალხისა და ხატის  
პირის გამტეხსა. მადლი და ბარაქა დაუღიე მის ნაშვრალ-ნამუშევარ-  
სა. ნუ გამოუღევ სახლში სენსა და სნეულებასა, მარცხსა და ფათე-  
რაკსა, შენი სახელის ჰირიმე“. ამის წარმოთქმის შემდეგ დაკლავდა  
უქმის სამკვეთო საკლავსაც. საკლავებს ორივეს გაატყავებდნენ და  
შოხარშავდნენ. სუფრას გამართავდნენ ქადა-საწირავების ნაჭრებისას  
და ზედ დანაწილებულ ხორცს დააწყობდნენ. აანთებდნენ სანთელს და  
სუფრაზე დააკრავდნენ, სასმელსაც გვერდით დაუდგამენ. ერთ სან-  
თელს ხევისბერს მისცემდნენ და ბეტისჩდილელოთა მიცვალებულთა-  
თვის სახელს შაზდებდა სუფრას, ვინც ხატის წესრიგს ასრულებდ-  
ნენ, სახატო და სახალხო სამეში თავდადებულნი იყვნენ და აღარ  
არიან. ამასთანავე იმ მიცვალებულებსაც მოიხსენიებდნენ, ვისაც მომ-  
გონე არა ჰყავდა, უპატრონო იყო — შენდობას მოგველოდება და  
ჩვენ ვერა ვგონებდეთო — იტყოდნენ. შესანდობარს ყველას დააღე-

ვინებდნენ და მერე დაუბრუნდნენ ხორცს და პურს. თან სასმელსაც მოაყოლებდნენ. თუ ვისმე რამე ყავდა შეთქმული, ან ზეარა, ისინიც დაკლავდნენ საკლავს. მხოლოდ მიცვალებულთათვის საკუთარი სუფრის გამართვა არ იცოდნენ, როგორც მთავარ სალოცავეებში. სადამომდე მთელი სოფლის კაცი და ქალი აქ იყო, ვისაც მოესვლებოდა, სადამო ხანზე დაიშლებოდნენ.

ხთიშობელში იცოდნენ ახვსება, ათენგენა, მარია მობა და თევზა-წელწადი. წელწადი აქ ერთი დღე იცოდნენ. შეკვლენი არ მიდიოდნენ აქ, რადგან ეს მეორეხარისხოვანი ხატი იყო და მთავარი სათემო სალოცავი ცაბაურთის მთავარანგელოზი ჰყავდათ. თუმცა ცაბაურთა ბეტისჩდილთან ცხრა-ათი კილომეტრით იყო დაშორებული, მაგრამ შეკვლენი მაინც იქ მიდიოდნენ. ღამეს ცაბაურთაში გაათევენ და მეორე დღეს წამოვიდოდნენ ბეტისჩრდილში. ჯერ ერთიმეორეს დაპატიებდნენ შეკვლედ, ვინაც ვის სურდა და გოგას შეაგორებდნენ, მერე დასვენების და სადილობის შემდეგ ხთიშობელში მივიდოდნენ, სანთელს მოანთებდნენ და ერთს საკლავსაც დაკლავდნენ. რადგან აქ არც უწესობდა და არც დასახლოში იყო, ერთ-ერთ სახლში წავიდოდნენ, სადაც ნალახი არ იყო და იქ იხატებოდნენ, სვამდნენ და ხორცსაც იქ მოხარშავდნენ. წელწადის წესს ყველაფერს ასრულებდნენ: ბედისკვერი, წყალზე ნაყრის წალეზა და სხვა, წყალკუთხევეასაც მოანთებდნენ სანთელს. დანარჩენი ხატობები მნიშვნელოვანი არაფერი იყო, რომ სხვა ხთიშობელში სადმე არ იყოს აწერილი.

## ჩარგალის სალოცავეები

სოფელი ჩარგალი ტერიტორიულად მაღაროსკარის თემშია, მაგრამ ჩარგალები ცაბაურთის თემს ეკუთვნოდნენ. მათი სათემო სალოცავიც ცაბაურთის მთავარანგელოზი იყო და დიდ დღეობებში იქ მიდიოდნენ. ჰყავდათ მეორეხარისხოვანი სასოფლო ხატებიც (რომელიმე გვარს ცალ-ცალკე სალოცავეები არ ჰყავდა): ლაშარის ჯვარი. თამარ ნეფე და ხთიშობელი. ჩარგალი ძალიან დაფანტული სოფელია. თითო-ორი კომლი დვას ცალკე ადგილზე და სოფლების შუაში არის ეს სამივე სალოცავი ერთურთის ახლო მოთავსებული.

ხთიშობელი. ხთიშობელს ჰქონდა საზარე და საქობე (ფშავლები სალუდეს უწოდებდნენ, მაგრამ ჩარგალში ხევსურულად თურმე საქობეს ეძახიან). საქობეში მზადდებოდა ლუდი. საზარე იყო აშენებული ბელის მსგავსად და შიგ ზარი ეკიდა. ხთიშობელს სანადოები უძველეს დროს ჰქონია და მერე დანაწილებულა სოფელზე. სანადო-

ებს თურმე ნადით ხნავდნენ და მკიდნენ. მერე დასტური მიიტანდა, გაღწავდა და პურსაც ის ინახავდა. შემდეგ სანადოები დაყოფილა გვარებზე, გვარებს კიდევ კომლებზე დაუნაწილებია და თავ-თავის ჰკეაზე ხნავდნენ. მხოლოდ მამულებს ისევე შერჩენია ძველი სახელი „სანადოები“. როგორც სანადოები, ხატობებიც ისე დანაწილებულა გვარებზე — მაგალითად: ბაიათ გვარს ჰქონდა ხატობა ამაღლება, გვარში მორიგეობით მოუდიოდათ, წელს ერთი კომლი გაუძღვებოდა სახატო წესებს დასტურის სახით, მეორე წელს მეორე და ასე შემდეგ. გვარებმა თავისი ანგარიშით თვითონ იცოდნენ, ვის რომელ წელს ეკუთვნოდა. გურასპაულთ ანუ მარცვალათ ახვებდა ჰქონდა ნამრგალი და ისინიც რიგრიგობით ასრულებდნენ წესს. პირქუშანთ ჰქონდა სახუთშაბათო ამღლება. რაზიკაანნი, ზურაბაანნი და გორზამაულნი ერთურთს მიმდგარნი იყვნენ, რადგან ესენი პატარა გვარებია და ცალ-ცალკე ხატობა რომ მირგენოდათ, სხვა კაც-მრავალ გვარებთან შედარებით ცოდონი იყვნენ. ამათ ჰქონდათ მირგენილი მარიანობა. აქ დასტურის გადადგომა და ახლის დადგომა შეუმჩნეველი იყო, რადგან გვარებმა იცოდნენ და უბრალოდ სცვლიდნენ ერთმანეთს, ყოველგვარი წესების შესრულების გარეშე. როგორც სხვა ხატებში იცოდნენ შესამლოცაო და გამოსამლოცაო, აქ ეს არ იყოს საჭირო.

საქობესთან ახლოს ერთი იფნი იყო დარგული. ხატი მღებარეობდა მოედან ადგილზე და დღეობაში მოსული ხალხი ჯარობდა. წესების შესრულება აქაც ისეთივე იყო, როგორც სხვა ხატებში. ბაიანნი ამღლებას აღულებდნენ ლუდს და მთელი სოფელი მივიდოდა. ყველას მიჰქონდა ქადა-საწირავნი, სანთელი, ზოგს ფურთ ნათავარი ქადა, სასოფლო საკლავიც იკვლოდა და სუფრა ისეთივე წესით იმართებოდა როგორც სხვა ხატებში გვაქვს დაწერილი. დასტურად თუ ისეთი კაცი დადგებოდა, რომ შესაძლებლობა არ ჰქონდა საკუთარის პურით ეღულა ლუდი, გვარი დაეხმარებოდა და მოუკრეფდნენ პურს თავის კომლებზე, რამდენიც საჭირო იყო, სვე ჩარგალშივე მოჰყავდათ და თვითონ ამზადებდნენ. ხევისბერი ერთი იყო სამივე ხატში, განურჩევლად გვარისა, ვისაც მოიკითხავდა ხატი.

2. ლაშარის ჯვარი ლაშარის ჯვარს ჰქონდა პატარა საზარე, ბელელის მსგავსად აშენებული და შიგ ზარი ეკიდა. ზარი ირეკებოდა ყველა ხატობაში დილით, როგორც სხვა ხატებში. სალუდე მას არ ჰქონდა. არც დროშები ჰქონიათ ჩარგლის ხატებს. სანადო ჰქონდა და ძალიან დიდი ხნის წინ ამ მამულებს თურმე ნადით ამუშავებდნენ. მერე ესეც დაუნაწილებიათ გვარებზე და გვარებს კომლებზე. ლაშარის ჯვარის საზარეს გარშემო ეხვია სანადო მამულები. აქვე არის დარგული იფნები და მსხალი, წინათ ყოფილა პანტა და მერე ვილა-



ცას დაუმყნია. ლაშარის ჯვარის და თამარნეტის საზარეები აქ იმიტომ აუშენებიათ, რომ საერთო ფშაველთა სალოცავები შორს იყო ფშავეის ხევს და აქედან იქ ყველა ვერ წავიდოდა, არც გზა იყო ყოველთვის. ასეთ შემთხვევაში აქ შესარულეზბდნენ იქ შესასარულეზბელ წესებს. მე-რე თანდათანობით სანადოვბეც გაუჩინებიათ და დაუწყებიათ მუღდმევი ლოცვა და ხატობები. ლაშარლელეს, გარდა ზაფხულის ხატობეებისა, აღარავინ წავიდოდა. ხატობები აქაც ისეთივე წესით იყო, როგორც აქაურ ხტიშობელში.

მთავარი ხატობა იყო ამალეზბა. ამ ხატობაში მლოცავეც უფრო მეტი იყო, მოჰყავდათ დოლისთავი ბატენები და შეთქმული საკლავეები (წბოს ზვარას კი ხტიშობელში კლავდნენ). ხატობა აქაც ლამის-თევიით იწყებოდა. ამალეზბას დასტურ-ხევისბრეები აქ გაათევედნენ ლამეს და დილით სოფელიც მოვიდოდა, სასოფლო საკლავს მოიყვანდნენ. საკლავი დაიკვლოდა ჩარგალელთ სამწყალობნოდ, ზარიც დაირეკებოდა და სანთელიც მოენთებოდა. ახვეწებდნენ ჩარგალელთ კაც-საქონლს. ყველაფერს ისარულეზბდა ერთი ხევისბერი, აქ ბევრი ხევისბერეები არ იყვენენ.

წულის გაყვანა და წულის სანთელი სრულდებოდა ცაბაურთის მთავარანგელოზში. ხატობაში აქ ქალებეც მოდიოდნენ, მათ თავისი საჯარე ადგილი ჰქონდათ დანიშნული და იქ დასხდებოდნენ, მოჰკონდათ ქადა-საწირაქნი და სადიდებულო. ხატიდანაც ლუდი გაჰქონდათ მათთვის. აქ სუფრობაც იცოდნენ. მლოცავები თავის საკლავის ხორცს მოხარშავდნენ და სუფრას გაშლიდნენ ისეთ ადგილას, სადაც დედა-კაცეზბსაც შეეძლოთ მისვლა. სუფრას მიცვალებულთათვის სახელს შესდებდნენ და იმართებოდა მხიარულეზბა, მღერა-თამაშობა. აქ მოლექსე ხალხი იყო და ფშაურ სიმღერაში ისე მღეროდნენ თავისპირის ლექსეზბს, როგორც დაზეპირებულს.

ლაშარის ჯვარში ხატობები იცოდნენ: ახვსეზბა, ამალეზბა (ათენ-გენა აქ არ იცოდნენ), მარიანობა, გიორგობა, ქრისტე და თევა-წელიწადი. ხატობები სულ ერთნაირი წესით იწყებოდა და მთავრდებოდა. ქადა-საწირავენი, სანთლის მონთეზბა, სასოფლო საკლავი, ზარის დარეკა, სუფრეები მიცვალებულთათვის და სხვა. თევის-ლამეც იცოდნენ. წულის სანთელი ცაბაურთას მიჰქონდათ თავის მთავარ სათემო სალოცავეში. თუ ვისმე შეეძლო სიარული, ცაბაურთას წავიდოდა მეკვლეში. ჩარგალი შორს იყო და უძნელდებოდათ ზამთარში სიარული. ხატის წესით კი ყველა ქუდიანი ვალდებული იყო სათემო სალოცავეში მისულიყო ლიტანია ლამეს. აქედან დაბრუნებული მეკვლე შეიტანდა კვალს სოფელშიც. მაგრამ ის ხანდახან დროზე ვერ მოდიოდა, ამ შემთხვევაში სოფელში ერთიმეორეს პატიყობდნენ მეკვლედ. ლუდი ხატში ჰქონდათ დამზადებული, მოჰქონდათ სოფელში და აქ

სვამდნენ კაცი და ქალი ყველანი ერთად. მღერა და თამაშობა იმართებოდა, თავისპირის ლექსებით ალექსებდნენ ერთმანეთს. ამ ხატებში სანთელს ყრველდღე ანთებდნენ წელწადი დღიდან წყალკურთხევის ჩათვლით.

**8. თამარნეფე.** თამარნეფე ლაშარის ჯვარის ნიშიდან არ იყო ძალიან დაშორებული. აქვე ახლო, პატარა მოედანზე იყო გაშენებული ბელის მსგავსი საზარე. ნიშთან იყო ხემხვივანნი (შემოწირული და დარგული ხეები ამა თუ იმ კაცისაგან. რამე ფათერაკის, ან ავადმყოფობის დროს შეეხვეწებოდნენ ხატს: ოღონდ გვიშველე და შენს ხემხვივანთაში ხემხვივანს მივუმატებო. ხემხვივანს როცა დარგავდნენ, მაშინ სხვა შესაწირავსაც რამეს მიაყოლებდნენ. თუ საკლავი ჰყავდათ, ხომ საკლავს, თუ არა, სანთელ-საწირს მაინც). თამარნეფის ნიშთან იყო ნამყენი მსხლები, ვაშლები და იფნები.

აქაც მთავარ ხატობად ითვლებოდა ამაღლება. ხატობები აქაც ყველა ის იცოდნენ, რაც აქაურ ლაშარის ჯვარში და ხთიშობელში — ახვება, ამაღლება (ათენგენა არ იყო), მარიანობა, გიორგობა და თევაწელწადი. არც რამე გარჩევა ხატობის წესებში იყო. იმავე წესით სრულდებოდა ყველაფერი, რაც ხთიშობელში, მხოლოდ ხთიშობელში ფურით-ნათავარის ქადა მოდიოდა და ზეარაც აქ იკვლოდა. დანარჩენი მლოცავი ლაშარის ჯვარში და თამარნეფეში უფრო მეტი იყო.

მთხრობელმა ლევან ბაიაშვილმა (60 წლისამ) ამ ხატობებთან დაკავშირებით ჩამაწერინა ჩარგლის უძველესი გვარები, რომლებიც დაყოფილი არის შემდეგ ქვეგვარებად: მარცვალნი, ბუკუკანი, რაზიკანი, მარტიანი, თეფშანი, უამიანი, მთიბელანი, ზურაბაანი, პირქუშანი, ბაჩიანი, ხოხორდანი, თათარიანი, საგრილანი და აფხუშელანი. ეს ქვეგვარები, როგორც ზემოთ დაიწერა, ყველანი ემსახურებოდნენ ერთნაირი უფლებებით სამივე ხატს ერთად.

**სოფ. ყოზაჩის ხთიშობელი.**

მიამბო და ჩამაწერინა ლევან ნადირაშვილმა 72 წლისამ, გოგოლაურმა, ყობჩაში გაზრდილმა:

აქ, ყობჩაში, იყო ადგილისდედა ხთიშობელი. მას ემსახურებოდნენ დასტურობითაც და ხევისბრობითაც ნაყუტრები. ამ სოფელში სხვა გვარი არც იყო. შორეული მლოცავი მოდიოდა, გარდა ქალ-ქალიშვილისა. დასტურობა მორიგეობით იყო ერთი წლით. ხევისბერს კი თვითონ ხატი დაიჭერდა მომიზეზებით. ამ ხთიშობელს სანადოები არა ჰქონდა, ჰქონდა სალუდე და დარბაზი, კოშკი აქ არაფერი იყო, არც საზარე. ხატი ტყეში იყო მოთავსებული, სადაც დაცული იყო

მუხა, იფნი და ცაცხვები. ეს ხატი მდებარეობდა სოფლის დასავლეთ მხარეს. ეს სასოფლო ხატი იყო და იგივე საგვაროც, რადგან, აქ სხვა გვარი არც იყო. ისე კი ყობჩელები გოგოლაურთ თემს ეკუთვნოდნენ. მათი სათემო სალოცავი იყო გოგოლაურთ წმიდაგიორგი. წულის და რძლის გაყვანა, წულის სანთელი და სხვა ასეთები გოგოლაურთაში უნდა შეესრულებინათ, დანარჩენი წვრილმანი დღეობები კი აქ იცოდნენ ხთიშობელში.

აქ პირველად ახალშემსვლელი დასტურნი შეილოცავდნენ ამალლებას, რადგან ეს მთავარი დღეობა იყო ამ ხატში. სადასტურო არ იყო და არც დასტურები სადმე ცხოვრობდნენ თავისი ოჯახის გარეშე. მხოლოდ წმიდობდნენ კი თავის დასტურობის ერთი წლის მანძილზე. ნალახ ბოსელ-ბოსლისკარს ძალიან ერიდებოდნენ. რაკი სანადოები არა ჰქონდა, ლუდის დასამზადებლად სოფელზე კრეფდნენ ქერს. თითო დღეობაში კომლზე სამს ლიტრას იღებდნენ. ქერს დასტურს აბარებდნენ და ის დააფორებდა, დაფქვავდა და ადულებდა ლუდს. სვე დასტურისა იხარჯებოდა და არც უჭირდა სვის შონვა, რადგან აქვე ყველა კომლს ჰქონდა თავის სახლის მიდამოს დარგული და საკმარ სვეს ამზადებდნენ.

ღროშა ხთიშობელს აქ არა ჰქონდა, თას-განძი კი ჰქონდა, მხოლოდ ცოტა თას-განძი იყო სათემო სალოცავებთან შედარებით. ხევისბერი დაიბარებდა, ვისი ჯერიც იყო დასტურობა და დაარიგებდა, რამდენი ქერი იყო. საჭირო ფორის გასაკეთებლად სალუდედ. როგორ უნდა დაეფორათ და დაემზადათ ლუდი სვე-ფორით (ფორსაც ეძახიან, მაგრამ უფრო „ალაოს“ ამბობდნენ ფშავლები), დაიბარებდა სამი კვირით ადრე ხატობამდე და დაავალებდა — ახლავე აეკრიფათ ქერი და დაემზადებინათ ალაო. ისინი მაშინვე მოიყვანდნენ თითო საკლავს ხელმხრის სანათლად და ინათლავდნენ, მერე შეუდგებოდნენ ქერის აკრეფას, დაფორებას და ლუდის დულებას. ლუდს დასტურნი თვითონ ადულებდნენ და თვითონვე აფუვლებდნენ სალუდეში. ლუდის ფუვლებაში ხევისბერი მონაწილეობას არ იღებდა. ისე თუ მივიდოდა, სისწვენს დალევდა. ამალლებას დილას მოვიდოდნენ ხევისბერიც და დასტურნიც. განძსაც მოიტანდნენ, რადგან ისაც იმათ ებარა. განძს ცხელი წყლით გარეცხავდნენ და დადგამდნენ სიკებით გაკეთებულ თაროზე. დასტურნი ლუდს ახდიდნენ, ზედ მოდგმულ ჩამს (ჭიჭს) მოხდიდნენ; იქვე დასდებდნენ ერთ ხშიადს, სამ ლუდიან თასს თითოეულზე და თითო ფეხს სანთელს დააკრავდნენ.

ხევისბერი აღიდებდა დედა-ხთიშობელს, შეახვეწებდა ყმათ, ყობჩელთ და სთხოვდა მათთვის კაცის და საქონლის სიმრავლეს, მადლიან ბარაქიანობას. მერე თითო თასს აძლებდნენ დასტურ-ხევისბერები, ყმათ დალოცავდნენ და დალევდნენ, თუ ვინმე შემოსწრებული

იყო, იმას ამავე თასებს აუვსებდნენ და ყმათ სამწყალობნელოს და-  
ალევიანებდნენ. მერე იწყებდა სოფლის ხალხი და მლოცავიც მოდენას.  
ხალხი სასოფლო საკლავსაც მოიყვანდა და ვისაც რამე შეთქმული  
ყავდა ან ზვარა იმასაც, აგრეთვე ყველა მოიტანდა ქადა-საწირავთ. აქ  
მოსულებს ლუდს დაალევიანებდნენ, ცოტა ხანს შეისვენებდნენ და  
წავიდოდნენ სხვა ხატში. ეს ხატი იყო მოთავსებული ე. წ. საყდარ-  
ში. საყდარა იყო ხთიშობლიდან ნახევარი ვერსით დაშორებული. აქ  
ილოცავდნენ წმიდა გიორგის, ერთი კოშკი იდგა ტყეში, პატარა ველ-  
ში, გარშემო დაბურული ტყე იყო, მუხა, წიფელი, ცაცხვი, იფნი,  
თელა და სხვა. მლოცავი ხალხი რომ მიუახლოვდებოდა, ფერხისას  
დააბამდნენ და ფერხისულის მღერით მივიდოდნენ კოშკთან ახლო,  
საფერხისო სიმღერა აუცილებლივ საგმირო რამე იქნებოდა.

ფერხისა კვირივით ახლო დაიშლებოდა და ყველანი ქუდმოხდილ-  
ნი პირკოშკისაკენ პირჯვარს დაიწერდნენ. ეხვეწებოდნენ წმიდა გიორ-  
გის — გვაპატიე ჩვენის უცოდრობით, რასაც გცოდავთ და მრავალი  
ხატობა მშვიდობით გვალოცვინეო. შემდეგ შეუდგებოდნენ საკლავე-  
ბის დაკვლას (ლუდი მიჰქონდათ ხთიშობელიდან). დედაკაცებს თა-  
ვისი საჯარე ჰქონდათ და იქ ისხდნენ ხატიდან მოშორებით. მოჰქონ-  
დათ სავალდებულო ქადა, რომელსაც სასოფლო ქადასაც უწოდებ-  
დნენ და ფურთ-ნათავარის—ფურთ-სამხვეწრო ქადას მოაყოლებ-  
დნენ სანთელს და თითო ხელადა არაყს. პირველად სასოფლო საკ-  
ლავს დაკლავდნენ, მერე მლოცავების მოყვანილს. სასოფლო საკლავის  
ხორცი რომ მოიხარშებოდა, სუფრას სახელს შასდებდნენ ძველ  
ხატის მსახურთათვის, აგრეთვე უპატრონო მკვდრებსაც და მერე პური-  
სა და ხორცის წილობებს დაუფრებდნენ ყველას, ვინც კი აქ ესწრე-  
ბოდა. ქალებშიც გაიტანდნენ ამ სუფრის ნაწილს და ლუდსაც. პურს  
და ხორცს ხელზე დაარიგებდნენ და ლუდსაც ყველას დაალევიანებ-  
დნენ. მლოცავებიც გამართავდნენ სუფრებს ჩვეულებრივი წესით. აქ  
ატარებდნენ დროს „ქართ გაშვების“ ხნამდინ, მერე ფერხისით გა-  
მოემართებოდნენ და როცა ტყეში შევიდოდა გზა, მერე დაიშლებო-  
დნენ. ჩამოვიდოდნენ ისევ ხთიშობელში და ახლა აქ დაკლავდნენ სა-  
კლავებს და იმართებოდა სუფრობა. ზვარა შინ მიჰქონდათ ტყავ-  
მხარის გარდა, რაც ხატის მსახურთ ეკუთვნოდათ. ქადა-საწირავის  
წესებიც სრულდებოდა ჩვეულებრივ. საღამო ხანზე დედანი წავი-  
დოდნენ სახლში და მამანი რჩებოდნენ ხთიშობლის ხატში. მღერა-  
თამაშობით და თავის პირის სიმღერებით ათევდნენ დამეს. მეორე  
დღეს ჯერ ერიონნი (ერი: ე. ი. ხატის მსახურთ გარდა, მლოცავი ხალ-  
ხი) წამოვიდოდნენ. ხატის მსახურნი წამომსვლელთ დაამწყალობნებ-  
დნენ, მერე ისინიც გაინაწილებდნენ ნაქათრს (ნაქათრი — ხევსუ-

რულად „ნახორი“, სარჩენი ნაჭრები პურისა და ხორცისა) და წამოვიდოდნენ სახლში.

როგორც მთხრობელმა ჩამაწერინა, წელიწადში ორი მთავარი ხატობა იცოდნენ: ამალეობა და გიორგობა. დანარჩენ ხატობებშიც კი აყენებდნენ ცოცოტა წესრიგს (თუ ვინმე მოვიდოდა მლოცავი, იმათი საკლავის დაკვლა, ქადის გაჭრა და სხვა). დასტურ-ხევისბრები ამ ორი დღეობის გარდა მუდმივად აქ არ იყვნენ, თუ ვისმე რამე დასაკლავ-შესაწირი ჰქონდა, მაშინ დაუძახებდნენ, გიორგობას კი ასე არ იყო; ლუდსაც დაამზადებდნენ, დასტურ-ხევისბრებიც დღეობის დასაწყისიდან დამთავრებამდინ ხატში იყვნენ და ასრულებდნენ სახატოდ დაწყებულ წესებს. მლოცავიც მოდიოდა ქალ-ქალიშვილი და სხვა. წმიდა გიორგიშიც ფერხისით მივიდოდნენ და ფერხისითვე წამოვიდოდნენ. თას-განძი ორჯერ მოჰქონდათ — ამალეობას და გიორგობას.

#### სოფ. მალაროსკარის ბზიანა

მალაროსკარში არის ბზა. სხვაგან, ფშავ-ხევსურეთში, ბზა არ მოიპოვება. აქ კი ერთ დესეტინაზე მეტი ადგილი უჭირავს და დღესაც დაცულია. გადმოცემა ამ ბზიანაზე ასეთი არის: რადგან ფშავ-ხევსურეთში ბზა არ იყო და ქრისტიანულ ეკლესიას ბზობის დღეს სჭირდებოდა, ქრისტიანობის განსამტკიცებლად თამარ მეფემ მოიტანა და დარგო იმავე ადგილაზე, სადაც იყო წმიდა გიორგის ნიში (მთხრობელმა არ იცის, ეს სალოცავი ბზის დარგვამდინ იყო თუ მერე გაჩნდა). ბზიანაში ერთი პატარა კოშკი დგას და აქ ილოცავდნენ წმიდა გიორგის. ამ სალოცავს ეჭირა კარგა დიდი მიწები, ბზიანი ფართობის გარდა. ახლა იმ მიწაზე აშენებულია საბჭო, ფოსტა, ქრისტიანული ეკლესია (ახლა გაუქმებულია), კოპერატივის შენობა, საავადმყოფო, საგზაო შენობა და სხვა პატარ-პატარა სახლები. დანარჩენ მიწაზე აქ მცხოვრებნი თესავენ სიმინდს და მოყავთ კარგა ბლომად მოსავალი.

ბზა პირველად ცოტა ადგილზე ყოფილა დარგული და თანდათანობით გამრავლებულა. ხატისაგან აკრძალული ყოფილა ბზიანაში პირუტყვის შესვლა. თუ აქ პირუტყვი შევიდოდა, პატრონს მოამიზებებდა და საკლავს მიაყენებდა. მომიზებება ის იყო, რომ ან ავად ვისმე გაუხდიდა, ან პირუტყვის უზარალებდა. ან სხვა რამე ხიფათი მოუვიდოდა. წავიდოდნენ მკითხავთან და ისაც დანაშაულისათვის ერთ საკლავს და სანთელ-საწირს დაავალებდა. ამიტომ ძალიან მტკიცედ იყო დაცული ეს ბზა. ბზის გარდა დავასახელეთ მიწები, ამ

მიწებს ამუშავებდნენ გოგოლაური (აქაური ხალხი გადმოსახლებულია გოგოლაურთიდან). მათი სათემო სალოცავი გოგოლაურთის წმინდა გიორგი არის და ზაფხულის ხატობებში აქაური ხალხი მთლიანად მიდიოდა თავის მთავარ სალოცავში. მაღაროსკარის ხეობაზე მობინადრე ხალხს დღესაც საგოგოლაურთოს ეძახიან. მაღაროსკარში მოსახლეობენ შემდეგი ქვეგვარები: თანდილაანი, უფროსანი, ჯანანი, გიყანი, კაკაბელნი, წელანი, მუშტანი და თურმანაულნი. ეს ქვეგვარები მთლიანად ეყმობოდნენ ჭერ ხომ წმინდა გიორგის და მერე აქაც ჰყავდათ მეროქნარისხოვანი სასოფლო სალოცავეები. ბზიანას მამულს თურქე მოხნავდნენ საგოგოლაურთონი, მოპყიდნენ და გალენწავდნენ. ბზიანაში ჰქონდათ საპურე ბელელი (ახლა ნანგრევია). პურს ხევისბერს ჩააბარებდნენ და ის ხელმძღვანელობდა მის დახარჯვას.

მულმივი დასტური აქ არ იყო. ერთ დღეობაში ორი კაცი დასტურობდა, მეორე დღეობაში კიდევ სხვა ორი. მოუდიოდათ მორიგეობით. პურს ხევისბერი აძლევდა მათ სასმელის დასამზადებლად. ლუდი აქ ნაკლებად იცოდნენ, რადგან სალუდე არ იყო; უფრო არაყს ხდიდნენ და ზედაშედ ცოტა ღვინის მოტანა იცოდნენ. დასტური მართო ხატობის ხანებში ერიდებოდა ნალახს და წმინდობდა (როგორც მთხრობელმა თქვა, ესენი არც იყვნენ, როგორც დასტურნი. ესენი იყვნენ ერთ დღეობაში წესის ამსრულებელნი, მაგრამ ასეთი რაკი შემსრულებლისათვის სხვა სახელი არ არსებობს, მაინც დასტური უნდა ეწოდოს). ბზიანაში გოგოლაურთ და მათი ქალ-ქალიშვილის გარდა სხვა მლოცავი არ მიდიოდა. ხატობა წლის განმავლობაში იცოდნენ სამი: ამალეება, მარიანობა და გიორგობა. ამ ხატობებში ყველა წესი სრულდებოდა: სასოფლო საკლავი, ქადა-საწირავი (ზვარას აქ არ კლავდნენ, ზვარა ყველგან ხთიშობელში იკვლოდა). სასოფლო საკლავის და საკუთარი საკლავების წესი ისევე სრულდებოდა, როგორც სხვა ხატებში.

თას-განძი აქ არაფერი ჰქონდათ, არც დროშა. ხატობა ბზიანას წმინდა გიორგიში დილით იწყებოდა და საღამოობით მთავრდებოდა. ღამისთევა აქ არ იცოდნენ. აქვე ახლო ჰყავდათ ადგილის დედა-ხთიშობელი, აქაც სამი დღეობა იცოდნენ და ემსახურებოდნენ გოგოლაურნი. პატარა კოშკი იყო ტყიან ადგილას და იქ ილოცავდნენ ხთიშობელს. ტყეში იყო მუხა, კირცხილა, იფნი, წიფელი და წვრილი ტყე. ხატთან ახლო არავინ სჭრიდა და ამიტომ დიდი ხეები იყო გაზრდილი. ხთიშობელს არ ჰქონდა არც სანადოვბი და არც ლუდი მზადდებოდა, არც დასტურები ჰყავდათ. ხევისბერი ბზიანასა და აქ ერთიდაიგივე ემსახურებოდა. სასმელ ხალხის მიტანილის გარდა სახატო არ მზადდებოდა. მლოცავი მიიყოლებდა სასმელსაც. აქ კლავდნენ ზვარას, მიჰქონდათ ქალები ფურთ-ნათავარი და სხვა. მიდი-

ოდნენ მარტო სოფლები, სხვაგნინან სალოცავად არც აქაური ქალ-ქალიშვილი მოვიდოდა. ემსახურებოდა ხევისბერი საგოგოლაუ-როდან და სალოცავიც მარტო მათ ეკუთვნოდათ.

## სოფ. გომეწარის სალოცავები

გომეწარის მაღაროს კარის თემში ე. ი. სოფლის საბჭოში არის იმავე ხეობაზე. გომეწარში ცხოვრობდნენ საგოგოლაურონი (მაღაროსკარში და გომეწარში იგივე ქვეგვარები შერეულად ცხოვრობენ, რაც ხემოთ დაიწერა). მათ, როგორც ვიცით, სათემო სალოცავი ჰყავდათ გოგოლაუროთის წმინდა გიორგი და ეკუთვნოდნენ გოგოლაუროთ თემს. მეორეხარისხოვანი სასოფლო სალოცავები კი გომეწარშიც ჰყავდათ: მაღალსა წმინდა გიორგი, ადგილის დედახთის მობელი და კოპალა. სამივე სალოცავში ერთნაირად ემსახურებოდნენ საგოგოლაურონი, დასტურადაც ისინი დგებოდნენ წლობით, ხევისბერიც ამათივე ქვეგვარიდან იყო, ვისაც „ხელს დასდებდა“ ხატი.

კოპალა იყო დაარსებული სოფლის ახლო აღმოსავლეთ მხარეს. მას ჰქონდა: სალუდე, დარბაზი და საზარე, დროშაც ჰქონდა (წმინდა გიორგის არ ჰქონდა დროშა) ეს ხატი დაარსებული იყო მოედან ველში, აღმოსავლეთ მხარეს იყო ნაწილობრივ ტყიანი, იმის ბოლოზე კი კოპალას სახარანდე მამული, რასაც საგოგოლაურო ხალხი ნადით აწეშავებდა ხენაშიც და მკაშიც. აქ იყო საპურე ბელელი (ამჟამად დაწვრეულია) მომკილ ძნას დასტურნი მიიტანდნენ, გაღწავდნენ და პურს ბელელთან ახლო მიზიდავდნენ. ხევისბერი ხელ-მხარს ინათლავდა და პურს ბელელში შეიტანდა, როცა სათესლედ გამოიტანდა მამინაც ხელმხარს ინათლავდა. ისე, სალუდედ როცა გამოჰქონდა პური, მაშინ კი მარტო გაიბანებოდა, ფეხშიშველი ახალი ტანსაცმლით შევიდოდა ბელელში და ისე გამოჰქონდა პური.

დასტურნი დგებოდნენ ერთი წლით ორი კაცი და ყველა დღეობებში ისინი ასრულებდნენ დასტურის მოვალეობას. სადასტურო აქ არ იყო. ისინი ცხოვრობდნენ თავ-თავის სახლში, მხოლოდ ნალახ ადგილებს ერიდებოდნენ. ხატობა რომ მოახლოვდებოდა, ტანს ხშირად იბანდნენ მდინარეზე ან წყაროზე, სანთელს ანთებდნენ თავის ოჯახში თავისი სალოცავისათვის და სთხოვდნენ, თუ თავის უვიცობით რაიმე უწყმიდურობა შეემთხვეოდათ, შეცოდებება ეპატიებინა და სამავიეროდ არ დაესაჯა თავისი ყმა დასტური.

დასტური იცვლებოდა შუა მარხვაში. მაშინ აქ სანთლის მონთება იცოდნენ (საკლავს მარხვაში არ კლავდნენ). ახალი დასტურნი მიი-

ტანდენ სანთელ-საწირს, მათი ოჯახის წევრებიც ხატის კარზე მოვიდოდნენ, ვისაც მოსვლა შეეძლო. ხევისბერი სანთელს აანთებდა სასანთლეში და დაამწყალობებდა ახალ დამდგომ დასტურთ. მათ ოჯახიდან მიტანილი ჰქონდათ არაყი და ამას დალევდნენ ახალ დამდგომ დასტურთ სამწყალობნოდ. ამ დღეს აქ სხვა არაფერი იყო, გარდა სანთლის მონთებისა. ხევისბერი სახატო სანთელს მოანთებდა და დაამწყალობებდა საყმით საგოგოლაურით (სასანთლე პატარა ქვის კოშკი იყო, მას თახჩის მსგავსად ჰქონდა დატანებული. როცა სანთელს მოანთებდნენ, გარედანაც ქვას მიაყულებდნენ, რომ ნიავს სანთელი არ დაეჭრო, არც სახიფათო იყო, რომ სანთლის ცეცხლი რამეს წაჰკიდებოდა).

აქედან იწყებოდა ახალი დასტურობა და პირველ დღეობას ისინი ახვსებას გადაიხდიდნენ. ახვსებას შესამლოცაოს აღარ კლავდნენ, რადგან მარხვაშივე შეილოცეს. ძველი დასტურნი კი გამოსამლოცაოს კლავდნენ, რომელსაც სასინანულოც ეწოდებოდა. დასტურნი თუმცა შუა მარხვაში იცვლებოდნენ, მაგრამ აქ მთავარი დღეობა იყო მარიანობა და მთხრობელმაც აქედან დაიწყო ხატობების ჩაწერინება.

**მარიანობა.** მარიანობისათვის კოპალაში მოამზადებდნენ ლუდს დასტურნი და ისინივე აფუველებდნენ. მარიანობის წინადღეს დასტურ-ხევისბრები თავს კოპალას, ხატში მოიყრიდნენ, მოანთებდნენ სანთელს და გახსნიდნენ კოდს. ლუდს დალევდნენ და მოემზადებოდნენ წმინდა გიორგიში მღაწალს წასასვლელად. აბამდნენ კოპალას დროშას და გაუძფვებოდან მედროშე წმინდა გიორგის ხატისაკენ კოპალაში. ჭერ სხვა არაფერი წესი არ იყო შესრულებული. დროშას ჩაუდგებოდნენ ბიჭში და გამოჰყვებოდნენ მამანი და დედანი. ცხენებით წაიღებდნენ ლუდს. სასოფლო და მლოცავეების საკლავებს ერთმანეთში გაურევდნენ და დილიდანვე გარეკავდნენ ახალგაზრდები, ცხვრების სიარულით მთაზე ასვლა რომ არ დაგვიანებულყო, ხევისბერი და ხალხი ავიდოდნენ კარგა მღლა, სადამდინაც შეიძლებოდა ცხენით სიარული. აქ ერთი დიდი ქვა იყო და კოპალას დროშა იქ იკიდებოდა. კოქს. დროშას ამ საბძანში მიაბძანებდნენ და ხალხიც დაისვენებდა. აქ დიდი მოედანი იყო, ცხენებს ბარგებს მოხდიდნენ და საბალახოზე გაუშვებდნენ. ხევისბერი სანთელს აანთებდა, ლუდიან თასს დასდგამდნენ და ადიდებდა კოპალას და მღაწალის წმინდა გიორგის. მერე თასს გამოცილიდა და სხვებიც დალევდნენ ასეთსავე სადიდებულოს და ყმათ სამწყალობნელს. გაიმართებოდა სმა და პატარა მხიარულება. ამაზე ზევით ცხენის ასვლა არ შეიძლებოდა. გზა აღარ იყო, რადგან კლდეზე იყო სასიარულო, ბარგებს დაინაწილებდნენ და ზურგით აიტანდნენ მღაწალის მთაზე (მღაწალი იმ სიმაღლეზეა, რომ იქიდან დაბლა დაჰყურებს მთიულ-გუდამაყარს და აქეთ ფშავს).



სადაც დროშა კოქს იკიდებდა, ამ ადგილს ქვიან საზრუტუნანი. კარგა დასვენების და დაღვეის შემდეგ, საზრუტუნადან ხალხი აიშლებოდა, წინ ისევ გამოუძღვებოდა დროშა. სალამო ხანზე ამოვიდოდნენ დასახელებულ ხატში. აქ ერთი პატარა კვრივი იდგა წმინდა გიორგისა და გარშემო ბალახიანი მოედანი ჰქონდა. ხალხი დააბამდა ფერხისას და სამჯერ შემოუვლიდნენ კოშკს ფერხისით. პირველად იმღერებდნენ.

წმინდის გიორგის კარზედა ხე ალვად ამოსულაო,  
წვერად მოუსხამ ყურძენი, საკმელად შამოსულაო,  
მაგის უძველი ქალ-ვაჟი უდროოდ დაშულაო.

ამის შემდეგ იმღერებდნენ საგმირო სიმღერებს. გოგოლაურთ ძველად ჰყავდათ ლაშქრის წინამძღვარი და მეომარი კაცი გარა თურმანაული. იმაზე ნათქვამი სიმღერებიდან ერთ-ერთს იმღერებდნენ და მერე იმის შესანდობარს დაღვედნენ. ამავე დროს გარა წმინდა გიორგის ხევისბერიც ყოფილა და ლაშარის ჯვარსაც უწევდა ხევისბრობას (ერთერთი მისი შატილში ლაშქრობის სიმღარა დაწერილი უნდა იყოს წმინდა გიორგის ხატთან დაკავშირებით. მთხრობელმა იგივე ჩამაწერინა და განმეორება იმავე სიმღერისა ზედმეტი იქნება.

კოშკს სიმღერით რომ უვლიდნენ, ხევისბერი დროშით ხელში იდგა კვრივთან ჰა დროშას აწკარუნებდა; მესამედაც რომ შემოუვლიდნენ, ყველანი ქუდებს მოიხდიდნენ, ფერხისას დაშლიდნენ და კოშკის დასავლეთ მხარეს დადგებოდნენ პირ-კოშკისა და პირ-აღმოსავლეთისაკენ. იწერდნენ პირჯვარს და ეხვეწებოდნენ წმიდა გიორგის და კოპალას: გვიშველე და შენთ ყმათ მარცხი და ზიანი მოაშორე, ამრავლე მათი კაცი და საქონი, კაცი შენდა ყმად და საქონი შენდა ზღვნადა. ამის შემდგომ ხევისბერი ეტყოდა: წყალობა ჩვენი სალოცავეებისა, წყალობა, მოსულთა ყმნათაცა და სხვა მლოცავეთაცა. წყალობით მოგეგებონ ჩვენი სალოცავეები, გამრავლოსთ კაციცა და გიმრავლოსთ საქონ-საქონიცა დალოცვილმა“. ხალხიც უპასუხებდა ნელი ხმით: თქვენიცამც მწყალობელია დალოცვილი, ჩვენი სალოცავი“.

მერე დასხდებოდა ხალხი, დაისვენებდნენ და ცოცოტას სასმელსაც დაღვედნენ. მერე შეუდგებოდნენ საკლავების დაკვლას. პირველად დაკლავდნენ სასოფლო საკლავს. მას მოჰყვებოდა მლოცავეების საკლავები. იმართებოდა სუფრობა, მიცვალებულთათვის სახელის შადება, სმა და სიმღერები. მღეროდნენ თავისპირის სიმღერებს. რომ მოსაღამოვდებოდა, მოიტანდნენ დეკას, თავთავის ბინაში ცეცხლს დაანთებდნენ და მთელ ღამეს იყო ბინაზე დაპატიყება. ღამეს აქ ათევდნენ რაც უნდა ცუდი ამინდი ყოფილიყო, წვიმა და სიცივე, აქედან მაინც ვერც ერთი მლოცავი ვერ წამოვიდოდა შინ. ნაზღები

ჰქონდათ. წვიმის დროს ჯგუფ-ჯგუფად დასხდებოდნენ და ნაბადს გადაიფარებდნენ. მიუხედავად იმისა, რომ ამ მაღალ მთაზე ავდარში დიდი სიცივე იყო. მლოცავები მაინც არ უტყდებოდნენ და ღამეს ღმერთს-სიმღერაში ატარებდნენ. მეორე დღეს თუ ვისმე დარჩა და ვერ მოასწრო, ისინი გაშლიდნენ სუფრას და დაპატიებდნენ ერთმანეთს.

როცა ღმერთს-თამაშობით გულს მოიჭერებდნენ, ხევისბერი დროშასთან მივიდოდა. მის წინ მუხლს მოიყრდა და ეხვეწებოდა თავის სალოცავს: „უშველე შენთ ყმათა და მიმყოლ-მომყოლთა, ნუ შეანანებ შენს ხევწენ-ვედრებას და კვლავ უკეთესის გულით იმსახურენ შენნი ყმანი. და თუ ჩემის უვიცობით რამეს გცოდავ და ქსენება დიდებას გაკლებდე, მეც მაპატიე და მარცხ-ზიანს ნურც შენთ ყმათ რამეს მოჰყერებ და ნურც ჩემს თავ-ჯალათობასა“. მერე ადგებოდა, დროშის ტარს აკოცებდა და დაამწყალობებდა ყმათ. აქ საკუთარი მისი სკამი იყო ქვისა. ამ სკამზე ცოტახანს დაჯდებოდა, ვიდრე მიიტანდნენ სადილებულს — ლუდით სავსე ვერცხლის თასს, და დროშასთან დადგამდნენ. მერე ადგებოდა, სანთელს ანთებდა. სასანთელში დააკრავდა და კიდევ აღიდებდა წმინდა გიორგის და კოპალას, ამწყალობებდა ისევ ყმათ საგოგოლაურით და მიმყოლ-მომყოლ ქალქალიშვილს. დასტურებიც ასეთსავე სამწყალობნელს დალევდნენ ხევისბერის მიერ სადილებულს დალევის შემდეგ და მერე სხვებსაც ჩამოურიგებდნენ იმავე ვერცხლის თასით.

ხევისბერი დროშას ააბძანებდა და გაემართებოდა მარცხნიდან მარჯვნივ კოშკისათვის გარს შემოსავლელად. ხალხი ფერხისას დააბამდა და მიჰყვებოდნენ ხევისბერს. კოშკს სამჯერ შემოუვლიდნენ დროშით და ფერხისით. მესამედ რომ მოვიდოდნენ დასავლეთ მხარეს, ყველანი ქუდმოხდილნი შეეხვეწებოდნენ თავის სალოცავს: გვიშველე, ცოდვები გვაპატიე და ყველა გაჭირებიდან დაგვიხსენიო. ისევ დააბამდნენ ფერხისას და ცოტა გზას დროშას ფერხისის მღერით გამოაცილებდნენ. მერე დაიშლებოდნენ. აიკიდებდნენ თავ-თავის ბინას და ჩამოვიდოდნენ ისევ საზრუტუნაში. აქ დროშა ისევ კოჭს მოიკიდებდა, ხალხი შეისვენებდა, ხევისბერი კიდევ აღიდებდა კოპალას და წმინდა გიორგის (მოძმეთ უწოდებდნენ) და სხვებიც გაიმეორებდნენ სადილებულს. კიდევ გამართავდნენ პატარა მძას. ხევისბერი ისევ გაიდებდა მხარზე დროშას და გამოუძღვებოდა ხალხს. ჩამოვიდოდნენ კოპალას ხატში და მიაბძანებდა დროშას საბძანებელში. ახლა მარტო კოპალის ხატობა იმართებოდა. დადგამდნენ სადილებულს სამ ლუდიან თასს, ანთებდნენ სანთელს და ხევისბერი აღიდებდა გვირ კოპალას — დევ-დედაბერთად მებრძოლს. ამწყალობებდა ყმათ საგოგოლაურს. ხევისბერი და ორი დასტური გამოცილი-

ნენ თასებს და ურიგებდნენ ყველა იქ დამსწრეთ კოპალას სადიდებულს და იმის ყმათ სამწყალობნოს. ხევისბერი სანთელსაც აანთებდა ისევე საგოგოლაურთოთ სამწყალობნელოდ და მერე დაისვენებდა. სოფელი გომეწარი აქვე ახლო იყო; მლოცავებს საკლავები აქ ჰყავდათ მიბარებული, ყველა მოიყვანდა თავ-თავის საკლავს. გაიმართებოდა საკლავების დაკვლა და სუფრების მზადება. აქ ტყე გვერდზე იყო და შეშა არ აკლდათ. სუფრებს გააწყობდნენ პურით, ხორცით, სასმელ-სალაღებლით და დაუძახებდნენ ხევისბერს. ის ყველა სუფრაზე მივიდოდა. სუფრის პატრონი ეტყოდა, ეს სუფრა ვისთვის იყო გამეტებული და ვისთვის უნდა „შეედვა სახელი“. ხევისბერი ყანწს დაიჭერდა, ჯერ ადიდებდა თავის სალოცავებს და მერე მოიხსენიებდა იმ სულწმიდათ, რომლებიც სუფრის პატრონმა უთხრა, არ დაივიწყებდნენ იმათთან ერთად უპატრონო მკვდრებსაც. სუფრა რომ დაილოცებოდა, ყველას მოპატიებდნენ. პურს, ხორცს, ქადის ნაჭრებს ყველას თავის წინ გაშლილ სუფრაზე დაუწყებდნენ და ეტყობდნენ: ეს შენი წილობანია და ეს შენო. პატივსაცემ სტუმრებს და ხნიერ კაცებს კი საერთო სუფრას დაუდგამდნენ გაუნაწილებლად. აქ წვენსაც აკეთებდნენ ქონ-დუმათი და სანელი ბალახებით და ჯამებით დაუდგამდნენ ორს ან სამ კაცს, რომლებიც რიგრიგობით იღებდნენ ხელში და ჯამის პირით ხვრებდნენ. სალაღებელს ხელზე ჩამოურიგებდნენ, ამას თან მოაყოლებდა სუფრის პატრონი თავის სასმელს, უფრო არაყი ჰქონდა, შეიძლებოდა იშვიათად ვისმე ღვინოც მოეტანა, ბარში გადასულს. ერთი სუფრა რომ მოთავდებოდა, მეორეზე გადაპატიებდნენ ხევისბერსაც და ერისგანთაც.

სუფრები იმართებოდა ხატისაგან მოშორებით, სადაც ქალების მისვლაც შეიძლებოდა. ქალები უფრო სუფრის ბოლო მხარზე იხსდნენ. აქვე იმართებოდა თამაშობა. ხნიერი დედაკაცებიც კი თამაშობდნენ, რადგან სავალდებულო იყო ხატში მხიარულობა. რაც უნდა დარდიანი ყოფილიყო, ხატში მაინც არ შეიძლებოდა არ ემხიარულა. თუ ის დარდებს თავს მისცემდა და არ იმხიარულებდა, ხატი იმის შეწირულს არაფერს შეიწირავდა. ამიტომ ყველა გულგახსნილად და მხიარულად იქცეოდა ხატში. ამნაირად გაატარებდნენ დღეს. საღამოზე ქალები სოფელში წავიდოდნენ, მამანი კი ხატში გაათევდნენ ღამეს. ღამითაც ბევრად არ იძინებდნენ და მხიარულებაში ატარებდნენ დროს.

ფშავლებმა ხატში მისვლა დიდი მარაგით იცოდნენ. რომ წამოსვლამდე არაფერი დაკლებოდათ და არ შერცხვენილიყვნენ, ხევსურებს ხატში არაფერი არ მიჰქონდათ, მარტო საკლავს მიიყვანდნენ, მისი ხორციც იქ ხატში რჩებოდა და მეზღვენეს საკუთარი არაფერი არ ჰქონდა, აქ მარტო საჯარო ლუდი იყო, უპუროდ ამას სვამდნენ

და ასმევდნენ სტუმრებსაც. მეორე დილას წავიდ-წამოვიდოდნენ. ამით მთავრდებოდა მარიანობის ხატობა კოპალაშიც და მახაწალს წმინდა გიორგიშიც.

კოპალაში წლის განმავლობაში სხვა ხატობებიც იყო, მახაწალს კი მარტო მარიანობას აღიოდნენ, სადაც კოპალას ხატია, იმ ადგილს განსაკუთრებული სახელი ჰქვია — ქუჩა-ტყენი. ალბათ აქ წინათ ტყე ქუჩად (ჩგუფად, შექუჩებულად) იქნებოდა. დანარჩენი ხატობებიც ჩვეულებრივი წესით იყო: გიორგობა, თევზაწელიწადი, აღდგომა და ამალღება. აქ განსხვავებული წესით არაფერი სრულდებოდა. თევა-წელწადს კოპალაში ჩვეულებრივი წესით ასრულებდნენ, მხოლოდ ღამეს იქ არ ათევდნენ. ხატში ლუდიც იყო დამზადებული. დასტურ-ხევისბრები და ერისგანნი დილით მივიდოდნენ, საღამოთი კი შინ ბრუნდებოდნენ. მეკვლენი ხატში ღამეს არ ათევდნენ: დილით მივიდოდნენ, სასოფლო საკლავს დაკლავდნენ, ლუდს დალევდნენ და ისევ სოფელში წამოვიდოდნენ. მიკვლევა კი იცოდნენ. ვინაც ვის სურდა, დაპატიებდა მეკვლედ და გოგას შეაგორებინებდა.

წელწადში აქ ერთი ხევისბერი რჩებოდა. აქაურები ზოგიერთი გოგოლაურთაში იყვნენ ხევისბრები და შობას წასულნი იქაურ წმინდა გიორგიში იყვნენ წელწადის გადაყრამდინ. ერთ ხევისბერს დაზარებაა გოგოლაურთას წასვლა. შუალამის დროს აუყენებია ხატს და გაგიჟებულებით წინდიანი გაქცეულა, თენებაზე ფეხშიშველა მისულა გოგოლაურთას ხატში წელწად-გათენებაზე და არც ფეხები მოზრობია.

წულის სანთელი გოგოლაურთას მიჰქონდათ. სოფელი მოაგროვებდა სანთელს და გაატანდნენ წელწადში წამსვლელთ, რადგან ეს სანთელი იქ მოენთებოდა წელწად ღამეს. ბავშვი და რძალიც იქ უნდა გაეყვანათ — გოგოლაურთას.

## ფშავის სალოცავებთან დაკავშირებული სხვადასხვა ანბები

წმიდა გიორგის უნჯი ყმანია თურმანაულნი. წმიდა გიორგი მოითხოვდა ყმათაგან ძალიან დიდ სიწმინდეს, ისინი კი სათანადოდ ვერ წმინდობდნენ და ამიტომ წმინდა გიორგიმ თავისი ყმანი სამჯერ „დალიენა“ (ამოწყვიტა). ბოლოს ერთი კაცი დარჩა ოთხმოცი წლისა. ამ დროს გოგოლაურთაში იყო თანდილათ გვარში ერთი ქვრივი დედაკაცი. თანდილათ გვარი ძლიერი იყო და თქვეს: თურმანაულთ გვარი თავდება, ეგენი კარგი ჩიშის კაცნი არიან, სასოფლოდაც გამოსადეგნი, მოდი, ეს ჩვენი ქვრივი ცოლად მივუყვანოთ — იქნება შვილი ეყოლოს

და არ ამოწყდეს მავათი გვარიო. თურმანაულ ბერიკაცს რომ უთხრეს, ცივი უარი თქვა გოგოლაურთ ქვრივის მოყვანაზე, მაგრამ სოფელმა და თვით თანდილათ გვარმა არ დაიშალეს და მიუყვანეს ეს ქვრივი. ეს კაცი ცოლთან ისე ცხოვრობდა, როგორც მამა. ბოლოს ყოფილმა მამამთილმა ჰკითხა — მაგ კაცს შენთან რამე უთიერთობა თუ აქვსო. რძალმა უთხრა: — ის თავისთვის ცხოვრობს, მე თავისთვისო. მამამთილმა დაარიგა: ისე მოიქეცი, რომ გაღიზიანდეს და იქნებ არ დაილიოს ეგ გვარიო. ამის შემდეგ ეყოლათ ვაჟიშვილი და თურმანაულთ გვარი ისევ გამრავლდა თანდილათ ქვრივისაგან. ახლა თურმანაულთ გვარი ასოცი კომლია.

როგორც ვთქვით, უნჯნი ყმანი არიან თურმანაულნი და როგორც ყოველთვის და ყველგან თავხევისბრობა თურმანაულთ მოუღის წმიდა გიორგიში. ერთხელ თანდილათ გვარის კაცმა თურმანაულთ გვარისკაცს შემღერნა:

ასე, რას მეუბნებაო ეს ჩვენის ქვრივის შვილია?  
ხომსა და თურმანაულთას ჩვენ ჩაგიღევით წილია.

თურმანაულთ გვარში, ერთსა და იმავე დროს იყო ორი თავხევისბერი — ერთი დავითი და მეორე ჭრელი. ამიტომ ფშავლებმა ერთხელ სახუმაროდ შეუმღერეს:

შენ ჭრელი მოკალ, დავითო, გეცილება კელობასა!  
სუ ყველაიცი შენ დაგრჩება, საღმურთობა — სერობასა;  
იმთვენ ქალებ მოგივალის, სუ გეყოფა შენობასა,  
ღეგებ მაშინ მაინც მორჩე მეზობლების ფერობასა,  
მაშინ უფრო დაამტკიცებ მაგ შენ კვეისბერობასა.

თავხევისბერნი არიან თურმანაული და მესანთლე, მედროშე ხევისბრები შეიძლება ჭიგრაულთ გვარიდანაც იყვნენ რომლებიც ჩამომავლობით თუშები არიან.

ერთ ჩაღმა თუშს, მთათუშეთში, სოფელ ჭონთიოში შემოჰკედლობია მეზობელი, ისევე თუში. მაშინ მოსისხლეობა აქაც ძალიან მძიმე იყო და ამიტომ გამოხიზნულა და გადმოვარდნილა ფშავისხევეს. აქ მას უკითხია: რომელი თემი უფრო მძლავრია, რომ შევეხიზნოთო. ამ დროს ყველაზე ძლიერი თემი იყო გოგოლაურთა და ეს თუში აქ შემოხიზნულა. წმიდა გიორგის ერთ-ერთ დღეობაში უთხოვია ხალხისათვის: მიმიღეთ ამანათად, თქვენს წმიდა გიორგის ვეყმობი, ხატმაც შემინახეთ და დამინდეთ და ხალხმაც, როგორც ერთურთი. თუ ღირსად გამხდით ხატიც და ხალხიც თქვენის ყმობისას და ძმობისას, მიმიღეთ თქვენს თემშიო. გოგოლაურთ აწონდაწონეს და უპასუხეს: დარჩი ჩვენთან, ადგილს მოგცემთ და თუ კი ერთგულებას გამოიჩენ,

ალბათ ჩვენი წმიდა გიორგიც მიგიღებსო. ადგნენ და მისცეს ცალკე ადგილი ჭიგრაულთა. დასახლდა აქ ეს თუში და ცოლშვილიც მოიყვანა.

ამ დროს წმიდა გიორგის ჰყავდა ერთი მებაკური\*, თავისი ცხვრის უფროსი მწყემსი. ეს მებაკური იყო სახელგანთქმული ვაჟაკი, რომ შიშით ხმას ვერაფერს გასცემდა. მას ჰყავდა მტრები — ჭიჩოვლები, რომელთაც მებაკურის მოკვლა უნდოდათ, მაგრამ ვერ ახერხებდნენ. უიარალო ის კაცი არსად დადიოდა, იარაღიანს კი არაფერი დაესწრებოდა. შემოხიზნულ თუშს ჰყავდა თურმე ერთი ქალი, რომელსაც მებაკურის მტერი დაუმეგობრდა. ქალი ხომ გოგოლაურთაში ცხოვრობდა და მებაკურის ამბავი ყველაფერი იცოდა. ქალმა თავის მეგობარ ჭიჩოელს უთხრა: შენ მებაკურს ვერაფრით მოკლავ: ციდან თურამე დაეცემა, თორემ დედამიწიდან იმას არაფერი დაეკლება. მაგრამ მაგას ჩვეულებად აქვს: წელწად დილას აიყრის იარაღს და წყაროზედ წავა ტანის დასაბანად, მაშინ თუ ჩაუსაფრდებით და მოკლავთ, თორემ სხვა დროს თვითონვე დაზიანდებითო. ჭიჩოვლები ამ ქალის სიტყვით წავიდნენ და ნაჩვენებ წყაროსთან ჩაუსაფრდნენ. მებაკური, უიარალოდ, მართლაც, მოვიდა წყაროზე ტანის დასაბანად. მანამ ტანი დაიბანა და ტანსაცმელი სანამ არ ჩაიცვა, არ დაესხნენ თავს, რადგან ეს სირცხვილად გაუვიდოდათ, როგორც უწესო საქციელი. ტანისამოსი რომ ჩაიცვა, ჭიჩოვლები მაშინ დაესხნენ და მოკლეს. სოფელ გოგოლაურთის მცხოვრებთ რომ გაიგეს, მებაკური თუშის ქალმა მოაკვლევინაო, როგორც შემოხიზნულს არაფერი უყვეს, მხოლოდ აქედან აჰყარეს და გაგზავნეს ისევ უკან. მანამ აქ იყვნენ კი, წმინდა გიორგის ყმობდნენ, როგორც სხვა გოგოლაურნი.

ეს შემოხიზნული თუშები წავიდნენ, მაგრამ წმინდა გიორგი მათზე ხელს არ იღებდა, იმათაც ამიზეზებდა და ავალებდა უკან დაბრუნებას და გოგოლაურებსაც ამიზეზებდა და უბრძანებდა იმ თუშების ისევ მიღებას. თუში, რომელიც პირველად მოვიდა, უკვე ღრმად მოხუცებული იყო, უკანასკნელად რომ მოამიზეზა წმიდა გიორგიმ და დავალა დაუყოვნებლივ წამოსვლა ფშავში ოთხ იმის ვაჟს. მამას წამოსვლა აღარ შეეძლო და წელწადის წინა დღეს ოთხი შვილი საფშაოდ გამოისტუმრა. თხილამურებით გადმოვიდნენ და წმინდა გიორგის კარზე მოვიდნენ გოგოლაურთაში. წმიდა გიორგიში ხატის აღმოსავლეთ მხარეს ერთი გრძელი ქვა დევს და ოთხივენი იმ ქვაზე დასხდნენ. დაი-

\* პირიქით ზევსურეთში, არხოტში, არის მამული საბეკურა, რომელიც მებაკურს ეკირა. სიტყვა მებეკური რას ნიშნავდა, იქ ვერ მიიხრეს, მხოლოდ ის ხატის მამულებს კი აღეწებდა თვალყურს. აქ გამოიჩვენა, რომ სიტყვა მებეკური ნიშნავს ცხვრის ან ჭოგის უფროსს. სებეკური ანუ მებეკური წარმოშობილია სიტყვა „ბაკიდან“ (ბაკი: ცხვრის ან ძროხის დასაყენებელი სადგომი).

ნახეს გოგოლაურებმა, რომ ქვაზე ოთხი კაცი ზის, იარალი აყრილო აქვთ და იქ აწყვია. გაგზავნეს კაცი მათი ვინაობის გასაგებად. ის თუშები არიან, აქედან რომ ავყარეთ, იმის შვილები წმიდა გიორგის მოუყვანიან, თხოულობენ ისევ მიღებას ადგილშიც და ხატ-ხატის კარშიც როგორც ყმანიო. გოგოლაურებმა თავისთან მოიწვიეს, თვითონ საბეროში მოისაუბრეს და გადაწყვიტეს: რაკი წმიდა გიორგის სურს მაგათი მოსვლა და ამისთანა გზაზე მოსულან, უნდა მივიღოთო მხოლოდ ჭიგრაულთაში, თავის ძველ ნადგომში, დაეყენოთ. უთხრეს: — რაკი წმიდა გიორგიმ მოგიყვანათ, დადექით ჭიგრაულთაში, ეყმენით წმიდა გიორგის, მხოლოდ ეს ქვა იყოს თქვენი საზღვარი, რომელზედაც ისხედით. სალოცავად რომ მოხვალთ, მაგ ქვას ნუც თქვენ გადმოსცილდებით და ნუც თქვენი ჩამომავლობა. ჩვენ ვერ შოგიშლით ლოცვას, მაგრამ თქვენმა ქალმა ჩვენს თემს უღალატა და წმიდა გიორგის მებაკური მოაკვლევინა, მის უნჯ ყმათაში ვერ გაერევითო. იყავით ცალკე და მანდედან ილოცეთო (ამ ძველ ქვასთან იყო ხატის კალოც), სასოფლო საქმეში ნუ ჩაერევით, სოფლის და ხევისბრების გადაწყვეტილებას კი უნდა დაემორჩილოთო (ერთხელო — თქვა ლევანმა. — ბეყოშვილმა თათარათ ხთისიამ ამ თუშების ჩამომავლობის კაცი კუწათ ფოცხვერა სასოფლო საქმეზე ლაპარაკში ჩარევისათვის აიყვანა, ხალხს გააცილა, იმ ქვასთან დასვა და უთხრა: შენ ნება ვინ მოგცა ხალხში ლაპარაკისა, შენ იმ ქვასთან უნდა იჯდე და იქიდან ლაპარაკობდეო).

ამ თუშებიდან წარმოიშვა ოთხი გვარი და შემდეგ დაიყვნენ მამებად: ხმელანი, ტრუკანი, ყინწანი, ბადანი, ყაყინი, კუწანი ანუ ნადირუანი და ბაღაურნი.. ისინი დანიშნულ კლდეს არ სცილდებოდნენ, იქიდან ლოცულობდნენ და სასოფლო საქმეებში არ ერეოდნენ. პირველად. დაიწყეს მათი დასტურად დაყენება, დროთა განმავლობაში ხალხსაც დაუახლოვდნენ და ხატსაც და ხევისბრობაც დაიწყეს. მაგალითად, ნადირუათ მამიდან ხევისბერი აქნობამდე იყო საღირაი და ყინწათ მამიდან ვადიძე. სასოფლო საქმეებშიც თავისუფლად დაიწყეს ჩარევა.

წმინდა გიორგის ეყმობიან და თემშიაც შედიან მგელანი. მგელათ პაპა გამოქცევეია ბატონს კახეთიდან. მატნის მარჯვეს სოფელია ქორდი და იმ სოფლიდან გამოქცეული ფშავში მოსულა. უკითხია — რომელი თემი უფრო ძლიერია, რომ შევეხიზნოო. უთხრეს: გოგოლაურთ თემი ძლიერია და სალოცავიც ძლიერი ჰყავსო, მგელათ წინაპარი საღმურთობას ერთი საკლავით მივიდა წმიდა გიორგიში და სთხოვა მფარველობა. გოგოლაურებმა მიიღეს და დააყენეს თავის საკუთარ, მაგრამ განცალკევებულ ადგილში, სახელდობრ ჭაფნაგას, ამის შემდეგ ითვლებიან წმინდა გიორგის ყმად. დასტურობას ასრუ-

ლებენ, ხევისბრობა კი მაგათ აქ არ მოუდის, მაგათი გვარი ხევას ბრობს მათურხევს დამასტურში. დამასტე ჰქვია კახეთში ხსენებულ ერთ-ერთ სალოცავს. დამასტით აყრილა ეს სალოცავი და დაარსებულია მათურხევს, აქაც დამასტურის სახელწოდებით არის.

მგელათ პაპა ამაყი კაცი ყოფილა და ბატონის უსამართლობას გამოჰქცევია. მოსულა თავადი და ისევ წაუყვანია. მეორედ გამოპარულა. მოსულა თავადი და მოუთხოვია ისევ დაბრუნება, მაგრამ მგელათ პაპა ცივ უარზე დამდგარა და ბატონს აღარ გაჰყოლია. ამ დროს დამასტური მათურხევს ყოფილა დაარსებული — დამასტიდან წამოსული მარხამწმიდა დედოფალი. მგელათ პაპა ბატონს რომ აღარ გაჰყოლია, ბატონი დამასტურის ნიშთან მისულა მათურხევს და „შაუ-ძახნებავ“: „დალოცვილო დამასტურო, მარხამ წმიდაო დედოფალო! ეს ჩემი ყმა გამოორგულდა და ვეღარ ვიყმე. შენთვის შემომიწირავს, შენ დაიყმე და იმსახურე, შენის სახელის მადლსა და დიდებას დაუმორჩილე ჩემი ურჩი ყმაო. ამის შემდეგ ხევისბრობა დამასტურში მუდამ მგელათია. აუცილებლივ ერთ-ერთი მათგანი აქ ხევისბერი უნდა იყოს და თანაც მკითხაობაც მოუდირ.

ლადუხნი ანუ გოქიტანი, თანდილანი და მუშტანი ჩამომავლობით ქისტნი არიან.

ქისტეთში ერთ ქისტს კაცი შემოკვდომია და გადმოხიზნულა ფშავში. ის ქისტიც გოგოლაურთ შეხიზვნია. ქისტი გოგოლაურთ დააყენეს ხიშმუში და აქედან წარმოიშვა ზემოხსენებული მამები. ესენი თანდათანობით გადმოვიდნენ ფშაურ წეს-სარწმუნოებაზე და გახდნენ თავარმოწამის ყმანი, აგრეთვე წმიდა გიორგისაც ეყმობოდნენ. თავარმოწამეში დასტურობდნენ როგორც სხვა ყველა ხიშმუელნი და წმიდა გიორგიშიც დასტურობდნენ. თანდილათ მესანთლებაც მოუდიოდათ წმიდა გიორგიში. დასტურობას კი ყველა გოგოლაური ასრულებს ამ ხატში. თავარმოწამეში მარტო ხიშმუელნი დასტურობენ.

გოგოლაურთაში შედის რვა პატარ-პატარა სოფელი, ე. ი. თითო-ორი და ზოგი მეტი კომლით: თურმანულთა, ჯიგრაულთა, ხიშმუ, ზარისქალა, ხადო, კადაჩალი და ჭაფნაგა; ეს სოფლები ფშავის ხევს არის გოგოლაურთაში და აქედან გადასახლებული სოფლები სხვა არის: კიდევ ხიშმუს მკვიდრი მცხოვრებნია: ჩიტუანი, ციხენი, მგელაციგანი, ბუღურანი და ვაჩენი ესენი მთავარმოწამესთან ახლო ცხოვრობდნენ და მისი ყმანი არიან. წმიდა გიორგიში კი ესენიც მარტო დასტურობას ასრულებდნენ. მხოლოდ ამბობენ, რომ ამათი წინაპარი, ე. ი. პაპაც მოხევე ყოფილა, რადაც მიზეზით აქ შემოხიზნებია გოგოლაურთ თემს და წმიდა გიორგის. აქ, საჩიტაუროში, ერთი ქვრივი ქალი ყო-



ფილა, სახელად სალია, და ეს მოხელე შვილად აუყვანია. სალიას თავისი ერთი ქალი ჰყოლია. ნაშვილებს სახელად ბუთხა ერქვა. ერთი სახელგანთქმული ცხენი იყო და სალიამ თავის ნაშვილობს უყიდა — მისცა შვიდი ფური. მოვიდა სალიას ქალის მთხოვრები და გაათხოვეს. ყველაფერი მოუმზადეს და მზითევში ერთი რალაცა დააკლდათ. მეორე დღეს კი ქორწილია. ბუთხამ უთხრა დედას: ჩემს დას ვერ გავისტუმრებ ისე, რომ მთელი მზითვი არ გაეყალოო. შეკაზმა ცხენი და იმავე დამეს ქალაქში ჩავიდა, საყიდელი იყიდა, დილით წამოვიდა და ვიდრე ქალის წამყვანნი მოვიდოდნენ გოგოლაურთაში, მოვიდა და მოუტანა სამზითვოდ რაც აკლდა. მოსულმა ლექსი წაიკაფიავა:

იმით მიყიდა დედამა შვიდ ფურად კვიცი ცხენია,  
საცა რომ გაგიჭირდება, შინ მოგიყვანოს მთელია.

ქალის გათხოვების შემდეგ სალიამ ეს ვაჟიც აქ დააქორწილა. მისი შთამომავლობიდან წარმოიშვა ზემოთ დასახელებული ოთხი მამა. ძველი გვარით არიან ჩიტუანი, დანარჩენებიც ამათი განაყარი მამეზობა: ციხენი, ბუდურანი და ვაჩენი.

არის კიდევ შემოხიზნული ოსი, რომელიც გამოქცეულა ცხინვალისაგან (მთქმელმა არ იცის, რა მიზეზით გამოიქცა, მხოლოდ თქვა — კაცის მკვლელი უნდა იყოსო, ეს ოსიც შემოეხიზნა გოგოლაურთ თემს, დაეყმო წმიდა გიორგის, აქვე მოიყვანა ცოლ-შვილიც. ოსის ჩამომავალნი არიან: ბეყონი, ხუზარანი და ნაცარანი. ამ ოსის ჩამომავლობაში ორის სახელგანთქმული ძმა იყო მეომრობით — ლომი და ხუზარა. ერთი თუში იყო თინიბექი, რომელიც ფშავის თემებს ლაშქრავდა, მიუდიოდა ცხვარ-ძროხა, თან ფშავის თემების სალოცავები აშინებდა. ერთხელ:

თინიბექმ უთხრა მამასა — მამავ, შავყაროთ ჯარია,

ჩავიდეთ ხოზარაშია, ამოვიტანოთ ცხვარია?

— არაო, შვილო თინიბექ, ჰყავის ლაშარის ჯვარია.

— მამ მათურაში ჩავიდეთ, ამოვიტანოთ ხარია.

— არაო, შვილო თინიბექ, კლდისანი ჰქონან გზანია.

— გოგოლაურთას ჩავიდეთ, იქით მოვსხლიტოთ ცხვარია.

კიბულს\* არ ჩავეცილებენ ლომ-ხუზაურა ძმანია.

— მამ ცაბაურთას ჩავიდეთ ბელელს მოვშალოთ თავია\*\*.

ჩავიდნენ ცაბაურთასა, ბელელს მოშალეს თავია.

გოგოლაურთა ახლოა ცაბაურთასთან, აქ გაიგეს ლომ-ხუზაურის ძებებმა, რომ თუშები ცაბაურთას დაეცნენო. მიეშველნენ და თუშის

\* კიბული — მთის სახელია გოგოლაურთაში.

\*\* ამ დროს აქ ბელელს სპილენძი ეხურა.

ლაშქარი სულ გაწყვიტეს წმიდა გიორგის და მთავარ-ანგელოზის დახმარებით და ლომ-ხუზაურათ გმირობით. ერთი ბერიკაცისა გაუშვეს — თინიბექის მამა და ის როცა თუშეთში მივიდა, თავისმა რძალმა უთხრა მამამთილს: ჩემი ქმარი თინიბექი რა უყავიო? მამამთილმა უთხრა: მუჭისღელეში გავწირეო, ლომ-ხუზაურათ მომიკლესო. (მუჭისღელე არის ცაბაურთის ახლო მთა, სოფლის დასავლეთ მხარეს). ამაზე არის ნათქვამი შემდეგი ლექსი (ზემოთ მოყვანილი ლექსის ნაწილია):

სოფლის ძირს ჩამოეგება მამამთილს თავის რძალიო;  
— რა უყავ, მამამთილაო, თინიბექ — ჩემი ქმარიო?     §  
— მუჭისღელეში გავწირე, წითლის არაყით მთვრალიო \*\*\*  
თავით დაუშვე დროშია, უყრიალებდა ქარიო,  
ფეხთით დაუბი ლურჯაი, ტირიდა როგორც ქალიო.

ამ ლექსიდან ჩანს, რომ თუშებს დროშა ჰქონდათ და ლომ-ხუზაურათ თინიბექი რომ მოკლეს, დროშაც აქ დააგდებინეს.

ზემოთ ითქვა, რომ თავარმოწამეში დასტურობენ მარტო ხიზ-მუელნი და წმიდა გიორგიში ყველა გოგოლაურნი. ხევისბრობდნენ წმიდა გიორგიში მარტო თურმანაულნი, გოგოლაურთის მკვიდრნი, მცხოვრებნი და უნჯი ყმანი, ისინივე უწევდნენ ხელმძღვანელობას ამ თემსაც და ლაშქრობის დროსაც უძღვებოდნენ დროშით. ეს სხვადასხვა ლექსებიდანაც ჩანს, მაგალითისათვის ერთი ლექსი:

გარამა თურმანაულმა ფშავისხევ მოიარაო,  
შაყარა მძიმე ლაშქარი, მათურა შაიარაო,  
წითელ-ყვითელი დროშით ბოროლა გაღიარაო.  
კისტან ატირდა ბებერი — ლაშქრით საღ მიხვალ, გარაო?  
— შატილს მივდივარ, ბებერო, ვარდანამ დამიბარაო,  
მე-დ იმან უნდა ვიომოთ, უნდა იქეხოს ცამაო,  
გვერდ უნდა გადაიქციოს ვარდანის ციხის ქვაშაო.  
უნდა დავერდენ მასკვლავნი, აღარ იწვიმოს ცამაო,  
პირ ცრემლით უნდა იბანოს შუქომ, ვარდანას დამაო,  
უნდა ჰყიოდნენ გოზანი ვარდანის ციხესთანაო, ...  
უნდა ტყვებოდნენ ისარნი, ციხისწვერ ჩარდახთანაო.  
გათენებისად მიუდგენ ვარდანის ციხის კარსაო.  
ქარზე გამოდი ვარდანო, ნუ მაიმთვრალებ თავსაო:  
თას თუ გეკვიროს ველჩია, გადააწვადე სხვასაო,  
ფანდურ თუ ხელჩი გეკვიროს, ძმას მიეც მგელიასაო,  
— გამოლო, მგელიის მზემ, გამაეიყოლებ ფარსაო!  
ვთა დედა თქვენსა, მშავლებო, ველარ გადმავედ ქავსაო.  
თორ ქვიშათ ჩაგიწითლებდით, გაზიდვიებდით მკედარსაო.

გარა თურმანაული აქაც ლაშქრის წინამძღვარი ყოფილა წითელ-ყვითელი დროშით. შატილი გაუტეხია, იქაური განთქმული მეომარი

\*\*\* წითელი არაყი — სისხლი.

ვენარდანი მისსავე ციხეში მოუკლავს და მშვიდობით დაბრუნებულა. ამბობენ: როგორც ძრიელი თემის პატრონი და სახელგანთქმული გმირი მეომარი გარა თურმანაული ლაშარსაც ხევისბრობდა და თავის სათემო სალოცავში წმიდაგიორგიშიც ის ყოფილა თავხევისბერი. თავის თემს, როცა დასჭირდებოდა სადმე წასვლა, სათემო წმიდა გიორგის დროშით გაუძღვებოდა. თუ ფშაველნი სადმე გაილაშქრებდნენ, მაშინ ფშაველთა თორმეტი თემის სალოცავის ლაშარის ჯვრის დროშათ გაუძღვებოდა და გამარჯვებული ბრუნდებოდა.

გოგოლაურთაში სათემო სალოცავი იყო წმიდა გიორგი. თავარმონაშამ და მარიანგის ხთიშობელი იყვნენ სასოფლო სალოცავები. აქაური ხთიშობელი არის სოფელ ხიმშედან დასავლეთ მხარეს, თავარმონაშამსთან ახლო. ეს ხთიშობელი არ იყო მოხარნადე, ისეთი ძლიერი არ იყო, როგორც მუქუს ხთიშობელი. არც რამე ჰქონდა თავის საკუთარი, გარდა ერთი კოშკისა. დასტურ-ხევისბრებიც თავარმონაშამიდან გადმოდრიდნენ და ლუდიც თავისი მოჰქონდათ. აქ დღეობები ბევრი არ იცოდნენ. თუ ვინმე ფურთ-ნათავარ ქადას. მოიტანდა, თავარმონაშამის ხევისბერს დაუძახებდნენ და იმას გააჭრევიებდნენ. მთავარი დღეობა მარიანგაში მარიანობა იყო. გოგოლაურთაში მცხოვრებთ ამ დღეობაში ყველას მიჰქონდა ფურთ ნათავარი ქადა, ბოთლით არაყი, ზოგს ზღვნიბიც მიყავდა.

როგორც ვთქვით, ლუდი თავარმონაშამიდან გადმოჰქონდათ და დასტურ-ხევისბრებიც აქედან გადმოდრიდნენ. სხვა სოფლებიდან ამ ხატში არავინ მოვიდოდა, იშვიათ შემთხვევაში თუ ვინმე ქალ-დისწული ქადას მოიტანდა ფურთ ნათავრისას, ისაც თუ ვისმე გოგოლაურთიდან ნაყიდი ძროხა ჰყავდა ან იქაური ხბო გაზრდილი. იქაურ ხბოს რომ გაზრდიდნენ, პირველ ზვარას გოგოლაურთას ადგილისდენაში დაკლავდნენ, თუ შეთქმული ექნებოდათ. ხშირი იყო შემთხვევა: იქაურ ხბოს თუ ვინმე იყიდდა, მაშინვე შეუთქვამდა: თუ ეს ხბო გამეზრდება და ხბოს გამიჩენს, ზვარას მარიანგაში დავეკლავ და ფურთ ნათავრის ქადას მივიტანო. ეს იმიტომ, რომ ეს ხბო იქაური ადგილისდენის სამფლობელოდან იყო წამოყვანილი.

ყველა ადგილისდენა ასეთ რამეებს თვალყურს ადევნებდა. მისი ადგილიდან წაყვანილი პირუტყვის ნათავარს თუ აქვე არ შემოსწირავდნენ, ძროხა ხეირს არ ნახავდა: ან რძეს არ მოიწველიდა, ან ხბოს არ მოაწოვებდა, ან ხბო მოუყვებოდა, ან თვითონ მოკვდებოდა და იმიტომ იქვე ამსახურებდნენ ძროხის ხბო-ნათავარს, სადაურიც იყო ძროხა. მარიანგას ამ მიზნით უფრო მარიანობას მოდიოდნენ, რადგან მაშინ იყო ამ სალოცავში მთავარი დღეობა. ამ დროს საშუალებაც ჰქონდათ ხალხს ქალების გამოცხობისა. ზვარა კი მაშინვე მიჰყავდათ,

როცა ხბოს ოთხი ან ხუთი კვირა გაუხდებოდა. დაუძახებდნენ თავარმოწამის ხევისბერს და ის დაკლავდა. ხბოს ბექს და თავს ხევისბერს მისცემდნენ, დანარჩენი შინ მიჰქონდათ.

ზემოთ ითქვა, რომ მკვიდრი მცხოვრებნი და წმიდა გიორგის უნჯი ყმანი თურმანაულნი არიან და მოსახლეობენ აქვე, თურმანაულთაში. ამჟამად აქ ორი კომლიდაა, დანარჩენი ხალხი გადასახლებულია: ხომში, მაღაროში, ქალილოში და სხვა სოფლებში. თურმანაულები არიან დაყოფილი მამებად: ბლავანნი, ბუტიანი, იანვარნი, ხაჩინი, გარანი, უგონურნი, კაჭაროზანი, გიჟანი და ჯანგიარანი. ამათი მამების ხალხი უმრავლესობა ცხოვრობს ხომში, ნაწილი მაღაროსკარში, ცოტანი ცხოვრობენ ქალილოში. მათი გვარის ხალხი სხვა სოფლებშიც არიან გაფანტულნი, მაგალითად, კახეთში და სხვა. გადასულები ძველად დასტურადაც მოდიოდნენ და ზოგიერთი ხევისბერიც იყო. ახლა დასტურად აღარ მოდიან, მხოლოდ მათ გვარში მოწმიდარ-ხევისბერები კი არიან და ზოგიერთ დღეობაში მოდიან. სულხანანიც თურმანაულთა ეკუთვნიან, მხოლოდ თავისი მამის გვარზე ეწერებიან — სულხანი-შვილებად. ცხოვრობენ ხიშმუში.

ლომ-ხუზარანი რომ იყვნენ ლომას შთამომავლობა, არა ჩანს, ხუზარანი კი არიან მამებად დაყოფილნი. ამათი მამებია: ბეყონი, წიწონი, ნაცარანი და უფროსანი.

სახონნი ეყობიან თავარმოწამეს, რადგან მის ახლო ხიშმუშია ცხოვრობენ, აგრეთვე შედიან გოგოლაურთის თემში და სათემო სალოცავს წმიდა გიორგისაც ემსახურებოდნენ დასტურობით. სახონნი ჩამომავლობით არიან ხევსურნი, შატილის თემის სოფელ გიორწმიდიდან. ამათი პაპა ყოფილა საგინა გიორწმიდელი. მას ჰყოლია ცოლად შატილიდან ჯალაბაურთ ქალი. ჯალაბაურნი ბევრი ძმები ყოფილან, ძალიან ამაყები. მათი სიძე საგინა მონადირე კაცი ყოფილა. ერთხელ ჭიხვი მოჰქონებია; გაძოსულან გზაში ცოლისძმები და წაურთმევიათ. მეორედაც და მესამედაც ასე მოჰქცევნიან და სახლში ცარიელი გამოუშვიათ. ბოლოს ცოლმა უთხრა: რა ვუყოთ, რომ ჩემი ძმები არიან, კაცად აღარ გაგდებენ — შენც ხომ კაცი ხარ, ცოლ-შვილი გყავს და ცხოვრება გვინდა. მაგ ჩემს ძმებს თუ სამაგიეროს არ გადაუხდი, შენ კაცი არ იქნებიო. საგინა მარტო კაცი იყო, თავისი არავინ ჰყავდა და რას გაუხდებოდა იმოდენა ძმებს. აღუღა ლუდი და დაპატიჟა ცოლისძმები. ამის ცოლისძმებთან ფშავლებს ჰქონდა მოსისხლეობა (ზემოთაც არის მოყვანილ გარას გალაშქრების ლექსი შატილში ვარდანაზე). საგინა ჩუმად წამოვიდა და შეიპირა ფშავლებიც: ცოლისძმებს დავათრობ, თქვენ ახლო დაიმაღენით და როცა განიშნებთ, თავს დაეცენით და ამოხოცეთო. დანიშნულ ღამეს მოუგადენ ცოლისძმები. გახსნა კოდები და დაიწყეს სმა. მისმა ცოლისძმე-

ბმა დათრობამდე კი მასპინძლის პატივისცემას დაუმორჩილეს თავი და როცა დათვრნენ, თვითონ მიჰყვეს ლუდიან კოდებს ხელი, რაც მასპინძლის შეურაცხოფად ითვლებოდა. ამ დროს ფშავლებიც სახლთან ახლო დამალულები იყვნენ — გოგოლაურთ თემიდან გარას მეთაურობით. როცა ჯალაბაურნი ძალიან დათვრნენ, საგინამ ფშავლებს შეატყობინა, დაეცნენ და ამოხოცეს ჯალაბაურნი.

ერთ-ერთ იმათ ძმას გიორწმიდელი ქალი ჰყოლია სწორფერი. იმ ქალს ალბათ რაღაც ეჭვი ჰქონდა და ეს ჯალაბაურთ უმცროსი ძმა შინ წაუყვანია და ის გადარჩენილა ცოცხალი. საგინა თავის ცოლ-შვილით და ქონებით წამოუყვანიათ ფშავლებს და იმავე ღამეს ფშავში გადმოსულან. მოუყვანიათ გოგოლაურთაში და სოფელ ხიშმუში დაუსახლებიათ. საგინას ჰყოლია შვილი ხახონი და მისი შთამომავლობა ახლაც ხახონიშვილებად ეწერებიან. ამ ამბავზე ჯალაბაურნი და ხახონიშვილები დიდხანს მტერობდნენ, მაგრამ გოგოლაურები მაგარი თემი იყო. ჯალაბაურნი უკაცურად დარჩნენ და ვერ შემოუვიდოდნენ ადვილად ხახონიშვილების მოსაკლავად. მაშინ ერთი ძმაღა დარჩა ცოცხალი ჯალაბაურთი, სახელად წიქა. მისი შთამომავლობა როცა გამრავლდა, ფშავ-ხევსურების შუაკაცებმა ლაშარის ჯვარში შეარიგეს. ნაწილი დრამა მისცეს ხახონიშვილებმა, ნაწილი მათ ლაშარის-ჯვარს და ხალხს აპატიეს.

ამნაირად დასახლდა ხახონაშვილი ხიშმუში; აქ ემსახურება თავარმოწამეს დასტურად და წმიდა გიორგიშიც დასტურობენ. არიან გოგოლაურთ თემის სრულუფლებიანი წევრები. ამჟამად ხიშმუში ერთი კომლი ცხოვრობს, დანარჩენი გადასახლებული არიან კახეთის მხარეს.

გოგოლაურთ თემში შედიან კაკაბეღნი. ისინი არიან კაკაბეთიდან ბატონს გამოქცეულნი. მათი პაპა ერთ-ერთ დღეობაში გოგოლაურთ სათემო სალოცავში წმიდა გიორგიში მისულა და მიჰბარებია ხატსაც და ხალხსაც. წინათ ხალხში და ნამეტნავად ვოგოლაურთ თემში ამანათის მიღება და შენახვა ხშირი შემთხვევა ყოფილა. რამდენიც მეტ ამანათს შეინახავდა თემი, იმდენად სახელოვანი უა ძლიერი იყო. ამანათი კარგა ხანს იყო სასოფლო-სათემო საქმეებში ჩარევის უფლებას მოკლებული და მათ გადაწყვეტილებას ემორჩილებოდა. ხათრით იყო სოფელთან და ბევრ რამეში ეხმარებოდა თავის სურვილის გარეშეც იმიტომ, რომ სოფელს კარგად მიეღო და არ დაეთხოვა. უმრავლესობა კარგადაც ექცეოდა, მაგრამ ამანათი ხარ და მაგისი უფლება ვინ მოგცაო — ზოგ რამეზე ასეც ეტყოდნენ. რომელ სოფელსაც მეტი ამანათი ჰყავდა, როგორც ვთქვით, წინაურდებოდა და სახელიც ჰქონდა. ამიტომ გოგოლაურთ თემი ძლიერი იყო

და შეხიზნული ხალხიც ბევრი ჰყავდა. მან კაკაბეთიდან გამოქცეული კაცი შეეხიზნა, ცოლშვილიც აქ მოიყვანა. გახდა წმიდა გიორგის სრული ყმა და მისი თემის წევრი. ემსახურებოდა დასტურობით. პირველად გოგოლაურთაში ცხოვრობდნენ და ბოლოს გადასახლებულან მაღაროში. ახლა რომ ჰკითხოთ, გეტყვიან: მე გოგოლაური ვარ, წმიდა გიორგის ყმაო.

გომეწარ-მაღაროში და ხომში არიან გოგოლაურთ თემში შემავალი ერთიმეორის მონათესავე მამები: ქანანი, გიჟანი, წელანი მუშტანი. ესენი ერთიმეორესთან ერთობენ და მთქმელმა ასე ჩამაწერინა, რომ მაგათი წინაპრები მკვიდრი გოგოლაურები ყოფილანო. ეყმობიან თავარმოწამეს საკლავით და სანთლით, დასტურობას კი წმიდა გიორგიში ასრულებდნენ. ხევისბრობა მაგათ არ მოუდიოდა.

დღეობები წმიდა გიორგიში და თავარმოწამეში ერთი და იმავე დროს იცოდნენ, რაც გოგოლაურთის რელიგიური წლიური კალენდრის აღწერილობაში არს მითთებული. გვარებზეც დაიწერა თემებთან დაკავშირებით და ახლა ყველა გვარების დაყოფა მოხდა სალოცავებთან დაკავშირებით, თუ რომელი გვარი მკვიდრი მცხოვრები იყო, რომელი საიდან შემოხიზნული; გვარში მამა რა როლს ასრულებდა სასოფლო ან სათემო სალოცავში. აქ როგორც ჩამაწერინეს, წმიდა გიორგის ემორჩილებოდა ყველა, გოგოლაურთის მცხოვრები მკვიდრი და არამკვიდრი. მხოლოდ თავარმოწამეს უფრო ხიშმუელნი ემორჩილებოდნენ დასტურ-ხევისბერობით. ხატის მომიზეზებით კი ყველა გოგოლაურს მიჰქონდა სანთელ-საწირი, მოჰყავდა ზღვენი და სხვა. ყველა გოგოლაური ვალდებული იყო ახალშემომატებული ბავშვი გოგოლაურ კაცს წმიდა გიორგიში გაეყვანა.

#### ქისტაურნი და მათი მამები იახსართან დაკავშირებით

ქისტაურნი არიან ქისტების ჩამომავალნი. სოფელ ცხორეგოში, ფშავლების თქმით, ერთ ქისტს კაცი შემოჰკვედომია და გადმოხიზნულა. დამდგარა ცარიელ ადგილ შუაფხოში. მას ორი ძმა ჰყოლია და სამივენი გამოხიზნულან. ერთი ძმა დამდგარა მათურაში, ერთი ხევსურეთში — სოფელ ღულში, სადაც გამრავლებულა და მალე სოფელი შექმნილა. ისინი დღესაც ძველ გვარზე ქისტაურობით ეწერებიან. ფშავში დამდგარი ძმების ჩამომავლებს კი ძველი გვარი გამოუცვლიათ, მამებად დაყოფილან და გვარებიც მამების მიხედვით აქვთ. საერთოდ კი მათ ქისტაურნი ანუ საქისტაურო ეწოდება.

შემოხიზნული არიან სხვა ხალხის ჩამომავლებიც. მაგრამ თავს ქისტაურს უწოდებენ. მაგალითად, ხორცი თუ კარგად მოხარშული

არ არის, სხვა ფშავლები დასცინებენ — საქისტაურად მოხარულიაო ქისტი ხორცს კარგად არ მოხარშავს და მგელივით უმსაჭამსო-მგელი ხომ მგელია და ის კაცი ყოჩაღობით მგელსა ჰკავს, ხორცი მოხარშულია თუ არა, არ ჭიყვიაობს და მგელივით ყოჩაღად შეჭამს. მაგალითად, ყოჩად კაცს — მგელი ხარ, მგელიო, — ეტყვიან — და ისიც ამ სიტყვას თავის საქებურად ღებულობს. — ქისტი ხარ, ქისტიო — ყოჩად კაცს ამასაც ეტყვიან და ამიტომ არაქისტაურებიც ქისტაურობას არ უარყოფენ. პირიქით, იჩემებენ კიდევაც, რომ ჩვენ ქისტაურები ვართ.

ქისტაურებში იახსარის უნჯი ყმანი. არიან ბადრიანნი და ჩაქუნნანი ბადრი და ჩაქუნა ძმები ყოფილან. მათი ჩამომავლობა მამებად არის დაყოფილი და, როგორც ვთქვით, თითო მამა თავთავის გვარს ატარებს (ფშავში ადვილად იციან გვარების გამოცვლა. მაგალითად, სოფელ უძილაურთაში ბიძაშვილთაშვილები ცალკე თავთავის გვარს ატარებენ — კოკლიშვილს ერთები და მეორენი მადურაშვილს. ისე კი ერთიმეორეს თავის ჯალაფთ ეძახიან. ხევსურეთში კი გვარის გამოცვლა სამარცხვინოა და ძალიან იცავენ ძველ გვარს. მაგალითად, ერთხელ მე მახსოვს, არაბულის გვარმა გვარის ყრილობა მოახდინა: გვარი გაყაროთ, თორემ ხევსურეთში მთელ ხევსურეთის ნახევარს უდრის ჩვენი გვარი. და ცოლის მოყვანა გვიძნელდება, რადგან სხვა გვარის ხალხი ბევრი არ არისო. გაყაროთ გვარი ისე, რომ ვინც შორეული ვართ, ერთიმეორის ქალი შევირთოთო. ამ ყრილობას, რა იქმა უნდა, მათი გვარის თავკაცები დაესწრნენ; დათვისელი — მინდიათ აბა, ჯულთები: ბაბუკი და გოგიტა და მათ ჩაუშალეს გვარის გაყარის პირი: თუ ვინმე ხევსურეთში ცოლს ვერ იშოვის და თავის გვარის ქალს ე. ი. თავის დას ცოლად შეირთავს, ის კაცი კაცი არ არის, მოსაკვეთი და ჩასაქოლაგია. ან გვარისათვის რა კაცია ის და ან თავისთავად რას წარმოადგენსო. უმრავლესობამ მხარი დაუჭირა ამ თავკაცებს და არ გაყარეს გვარი).

ბადრიანნი იყოფიან შემდეგ მამებად: ბადრიანნი, ჯაბანნი, ფოცხვერანი, ავთანდილნი და თვარელანი. მარტო ბადრიანნი არიან თავის გვარზე, დანარჩენები მამების სახელს ატარებენ გვარად, მაგალითად: ჯაბანიშვილნი, თვარელაშვილი და სხვა. ბადრიანები ყველანი ესახურებოდნენ იახსარს ხევისბრებადაც — მეხატე, მესანთლე, მედროშე და სხვა, და დასტურებდაც.

მეორე ძმის — ჩაქუნას — ჩამომავლები დაყოფილი არიან შემდეგ მამებად: ჭიხვიანნი — ჭიხვიშვილი, ელიზბარაშვილი, ქოჩაშვილი, ტონიშვილი, ჯერვალძე და ყეინიშვილი. როგორც ბადრიანნი, ისევე ჩაქუნანიც იახსარს ეყმობოდნენ და ემსახურებოდნენ ყველანაირად (ხევისბრობა ყველა სახისა, თუ ხატი მოიკითხნავდა, დასტურობა და სხვა).

შუაფხვოში თემის წევრნი და იახსარის ყმანი იყვნენ ბერიკაულნი. ისინიც თავს ქისტაურად სთვლიდნენ, მაგრამ ნამდვილი ქისტაურები არ იყვნენ. ისინი იყვნენ კახეთიდან ბატონს გამოქცეულნი, თეშა და იახსარს შეხიზნულნი და გაქისტაურებულნი. იმათ თავხევისბერობა არ მოუდიოდათ, მოწმიდარნი კი იმათ გვარშიც იყვნენ და ხატს დასტურად, ზღვანობითაც და სანთლითაც ემსახურებოდნენ, როგორც ნამდვილი ყმანი.

გაქისტაურებულნი იყვნენ: ბერიანიც. ამათი პაპა გამოქცეული ყოფილა ჭავჭავთიდან ბატონის უსამართლობის გამო. მთქმელმა მითხრა მაგათი პაპის ნათქვამია ეს ლექსიო:

მე ჭავჭავთს რა მიშავდა, მთვარე იღვა მზესავითა,  
კალმახი და ქერის პური წინ მეყარა ბზესავითა.

ეს შემდგენა ერთ-ერთ დღეობაში ლექსობის დროს და იქიდან ხალხში გავრცელდაო. ბერიათას არც ხევისბრობა მოუდიოდათ, დანარჩენ წესს კი ყველაფერს ასრულებდნენ იახსარში. დასტურობდნენ, ზღვანობდნენ და თემის წევრნი იყვნენ ისე, როგორც ნამდვილი ქისტაურნი, თავს დღესაც ქისტაურს უწოდებენ.

გაქისტაურებული იყო უკანაფშაველი კაცი ყლარტიაული. ამ კაცს უკანაფშავეში კაცი შემოკვდომია და შემოხიზნულა შუაფხვოს თემში. ამათ ხევისბრობა არ მოუდიოდათ, მაგრამ იახსარმა მოითხოვა, ერთი მათი გვარის კაცი ხუმარა ყლარტიაული და თავხევისბრად იყო სიკვდილამდე. ის იყო ხელწმიდა კაცი, ხევისბრობასაც ასრულებდა და მკითხავიც იყო. დანარჩენი ამ გვარის ხალხი დასტურობას ასრულებდა, თემის წევრი იყო და მონაწილეობას ღებულობდა ყველა საჭირბოროტო საკითხებში შუაფხვოს თემში. აქ ვინც შემოხიზნული ხალხია, არავინ სხვას არ გეტყვიან, სადაურობა რომ ჰკითხო, მაშინვე გიპასუხებენ: ქისტაური ვარო, ქისტაურობენ ყველანი.

აქვე არის გაქისტაურებული ოსი ჩარბოდაშვილი. ჩაქუნათ კაცს უპოვნია უპატრონო ოსის ბავშვი და მოუყვანია. ჰკითხეს — საიდან მოიყვანეო და უპასუხა: აიქ ჩარბოდა და დავიჭირეო. გაიზარდა ეს ობოლი და რაკი მომყვანმა თქვა: ჩარბოდა და დავიჭირეო, გვარად დაერქვა ჩარბოდაშვილი. ჩარბოდაშვილი რომ გაიზარდა, ჩაქუნაურთ აქვე უთხოვეს ცოლი და დაცოლშვილდა. გახდა შუაფხვოს სრულუფლებიანი წევრი. დაიწყო მეცხვარეობა და მათი გვარი სახელგანთქმული გახდა ცხვრის სიმრავლით. გაქისტაურდნენ და იახსარს ისე ემსახურებოდნენ, როგორც ნამდვილი ქისტაურნი. ხევისბრობა არ მოუდიოდათ, დანარჩენ წესებს კი ყველაფერს ასრულებდნენ.

ხევსურეთში, სოფელ ღულში, არიან ნამდვილი ქისტაურები. როგორც ვთქვით, ისინი ერთ-ერთი ძმის ჩამომავლები არიან და მთელი



სოფელი ქისტაურად ეწერება. ისინი ეყმობიან იახსარს, მოწმიდარი კაცები არიან. ხშირად მოდიან იახსარში სალოცავად ზღვნითა და სანთლით. დასტურობას და ხევისბრობას კი აქ არ ასრულებდნენ, საერთო მტერთან კი ერთიმეორეს ემხრობოდნენ. თემის საკვირბოროტო საკითხებში არ ერეოდნენ და როგორც ამბობენ, ამ თემის ნამდვილ წევრად არც ითვლებოდნენ. თუ სადმე მთლიანად ფშაველ-ხევსურნი წავიდოდნენ სალაშქროდ, მაშინ წავიდოდნენ ღულელნიც. ასეთი შემთხვევა კი არ ყოფილა, რომ როგორც შუაფხოელთ განაყარნი, ისე დახმარებოდნენ შუაფხოს თემს, წყინოდენ კი ერთიმეორის ზიანს. მაგალითისათვის: როშეკელმა თათარამ მოკლა შუაფხოელი ხევსურა. ამაზე როშეკელებს ღულელებიც გადაემტერნენ — ჩვენი ქისტაური რად მოკალითო.

იახსარის სალოცავად ხანდახან სერობას მთელი სოფელი მოვიდოდა — კაცი და ქალი, მოიყვანდნენ ცხვარ-ჭედილაებს და კურეტებს.

როგორც ვთქვით, ერთი ძმა მათურაში დასახლდა და იქ გამრავლდა მისი ჩამომავლობა, ისინი იწერებიან ხუციშვილებად. ეყმობიან მათურის მთავარანგელოზს, დასტურ-ხევისბრობასაც იქ ასრულებენ. მთავარანგელოზში თავხევისბრობაც იმათია, მაგრამ იახსარსაც ისევ ეყმობიან, როგორც ნამდვილი ყმა ქისტაურნი. დასტურ-ხევისბრობას აქ არ ასრულებენ, მაგრამ ზღვენ-სანთელს კი აქაურობაზე მეტს სწირავენ. მთავარანგელოზში თავხევისბერი უკანასკნელად ფურჩია ხუციშვილი იყო, თანაც მკითხაობდა. მიუხედავად იმისა, რომ იქ ემსახურებოდნენ მთავარანგელოზს, — ბავშვი მაინც იახსარში უნდა გაეყვანათ ხატში გაყვანის წესით და სხვა ასეთი წესებიც აქ შეესრულებინათ, რასაც თავისი მთავარანგელოზიც არ უშლიდა.

ხუციანნი არიან ქისტაურნი მესამე ძმისა, რომელიც კოჭლი ყოფილა და შუაფხოში დამდგარ ძმას გაუგდია. შუაფხოში დამდგარი ძმა ავკაცი ყოფილა და ყველას ავად ექცეოდა — თავისასაც და სხვისასაც. ბოლოს ერთ ხევსურთან მოსვლია ჩხუბი და იმ ხევსურს მოუკლავს, ხევსური აქედან გაქცეულა და მოკლულის მეორე ძმას შეხვედრია მათურაში. ეს კოჭლი ძმა სათიბს ყოფილა და მისი ძმის მკვლელი, აქედან გაქცეული და ხევსურეთისაკენ მიმავალი, შემთხვევით შეხვდა. დაისვენა მთიბელმა და ხევსურიც დაღლილ-დაქანცული იმასთან დაჯდა. ხევსურმა არ იცოდა, რომ ეს კაცი მისი მოკლული კაცის ძმა იყო. კოჭლმა მთიბელმა ჰკითხა: სად ყოფილხარ, ძმობილო, და ეგრე აჩქარებით და გაოფლიანებული საიდან მოხვალო? ხევსურმა ჯერ დაუმალა და მერე იფიქრა: მათურაში იმ ქისტისა ვინ იქნებაო და ყველაფერი უთხრა: შუაფხოში ერთი ძალიან

ავკაცი ქისტი ცნობრობს, გამიხადა ჩხუბი, მანამდე მითრია, სანამ მთელჰკვდარი არ დამადლო. მეც გამწარებულმა ხანჯალი ვიხმარე და მოვკალიო. იმას ახალგაზრდა შეილები ჰყავს და სანამ გაიგებდნენ, მინდა პირიქითს გადავასწრო, თორემ ცოცხალს არ გამიშვებნო. კოჭლი მიხვდა, რომ ამ ხეესურს მისი ძმა მოუკლავს და პირდაპირ შებრაძოლების მაგიერ ხერხი იხმარა: ის კაცი ჩემი მტერიც იყო, კარგი გიქნია, რომ მოგიკლავს, ცუდი კაცი იყო, აწუხებდა ქვეყანასაო. ამ ლაპარაკში თან ცელს ლესავდა. იხილთა დრო, მოუხვა ცელი კისერში და ცალკე თავი გაგორდა და ცალკე ტანი დარჩა. ასე იძია შური კოჭლმა ძმამ.

ქისტაურები და შუაფხოს იახსარი შუაფხოს ხეობაზე არიან დამკვიდრებული, აქვე არის ერთი პატარა ხეობა, სადაც ორი სოფელია: ვანხევი და არახიჯა. ვანხევში ცხოვრობენ ხუცურაულები, არახიჯაში — ციგროშვილები. ხუცურაულები მთიულები გადმოსახლებულან ბორხიდან და აქ გაფშავებულან. თერთი ხარით ვაჰტიცვიან ქისტაურებს და დაჰყმობიან მათ იახსარს. შედიოდნენ ქისტაურების თემში და ყველა სათემო საქმეებში ერეოდნენ. ხვეისბრობა მათ არ მოუღიოდათ, დანარჩენ სამსახურს ყველაფერს ასრულებდნენ. ხარნადში გამოდიოდნენ და მონაწილეობასღებულობდნენ. დასტურადაცღდებოდნენ, როცა რიგით შეხვდებოდათ. ზღვენი და სანთელი ხომ სხვა ქისტაურებზე და იახსარის ყმებზე მეტი მოჰქონდათ. ბავშვი იახსარში გაჰყავდათ. ახალ მოყვანილი რძალიც თავისი წესით იახსარში უნდა გაეყვანათ. ისეც ხელწმიდა კაცები იყვნენ, რომლებიც ნალახში არ დადიოდნენ, იახსარი უბრძანებდა წმიდობას და წმიდობდნენ. როგორც ვთქვით, ხარნადში მონაწილეობასღილებდნენ (ხარი ნიშნავს ხენას, ნადი კი ორივეჯერ არის ხენაშიც და მკაშიც), ისინი ორივეჯერ გადმოდიოდნენ და როგორც სხვა ქისტაურნი ხნავდნენ, მკიდნენ და დასტურობდნენ.

არახიჯაში ცხოვრობდნენ დიგროშვილები. ჩამწერინებმა არ იცის, საიდან მოსულან ისინი. სხვებმაც ასე გადმომცეს, რომ მკვიდრი მცხოვრებნი არიან, ნამდვილი ფშავლებიო. ამ გვარში ცოტა ხალხი ყოფილა და საკუთარი თემი არ ჰქონიათ. რადგან შუაფხოს თემი ახლო იყო და იახსარიც, ამათაც ქისტაურების ნებართვით მოიყვანეს ერთი თეთრი ხარი, ძმად გაეფიცნენ იახსარის ყმა ქისტაურთ და იახსარს დაეყმნენ. ერთი ხატის ყმებში ქალის თხოვა-გათხოვება სასტიკად აკრძალული იყო და ერთიმეორეს დაძმას ეძახოდნენ. თუ ასეთს ვინმე გაბედავდა, გააძევებდნენ თემიდან. ერთი ხატის ყმების დაქორწინება მთელს ფშავში აკრძალული იყო. ეს ვრცელდებოდა სათემო ხატის ყმებზე. თორემ ლაშარის ჭვარის ყმანი იყვნენ მთლი-

ანად თორმეტი თემის ფშაველნი და მაშ სად ითხოვდნენ ქალს, თუ  
ჰერთმანეთში არა?!

ციგროშვილები ემსახურებოდნენ იახსარს დასტურობით, ხარ-  
ნადით, ზღვნითა და სანთლით. ხევისბრობა არც ამათ მოუდიოდათ და  
ხელწმიდა კაცები კი იყვნენ აქაც (ნალახში არმოსიარულენი და ყო-  
ველწლიურად რომ ინათლავდენ ხელ-მხარს). ვანხევ-არახიჯელ ხელ-  
წმიდა კაცს ჩაბარდებოდა მარტო შემწიწილი ქადა-პურის დაჭრა,  
ან მესუფრობა, ე. ი. დიასახლისობა, ხატში ხორცის მოხარშვა, სუფ-  
რის გამზადება და მიტანა დასტურ-ხევისბრებისათვის. ეს ორივე გვა-  
რი ვანხევისა და არახაჯისა ერთნაირი უფლებებით სარგებლობდა,  
თემის ყრილობაზე მონაწილეობას ღებულობდა და ქისტაურობდა.

### მათურის თემი. მათი სალოცავი მთავარანგელოზი და ბასთან დაკავშირებული მამები და გვარები

მათურის თემი ეყმობოდა მათურის მთავარანგელოზს. ამ სალო-  
ცავის უნჯნი ყმანი და მათურის მკვიდრი მცხოვრებნი იყვნენ ზურა-  
ბაულნი. ზურაბაულთ გვარი განაყარა წითელაურთ გვარისა — წი-  
თელაურთიდან მოსულან, დასახლებულან მათურაში და დაყმობიან  
მთავარანგელოზს. ამათი ჩამომავლობა იყოფა შემდეგ მამებად და  
გვარსაც თავთავის მამებისას ატარებენ: თადიურნი ეწერებთან თა-  
დიურებად, ავთანდილანი — ავთანდილაშვილი, ხიბლანი — ხიბლა-  
შვილი. თუთულანი — თუთულაშვილი, დუსხაჩი — დუსხაშვილი,  
ბაჩუანი — ბაჩუაშვილი. ამათი გვარი პირველად ზურაბაული ყო-  
ფილა და მერე დაშლილან ცალკე გვარებად. ყველა მამაში მოუდი-  
ოდა ხევისბერობა, ვისაც ხატი მოიკითხავდა და რაიმე საქმეს ჩააბარებ-  
და (დროშა, ზარი, საკლავის დაკვლა, ქადების დაჭრა და სხვა). ხა-  
ტი ხევისბრად მკითხავების თქმით ვისაც მოიკითხავდა, დაემორჩი-  
ლებოდნენ ხატის სურვილს. მკითხავივე ეტყოდა, რა თანამდებობა-  
საც აბარებდა ხატი და რჩებოდნენ იმ თანამდებობაზე. ყველა ამ თემ-  
ში შემავალი გვარი დასტურობდა მორიგეობით. დასტური ერთ წელს  
ცხოვრობდა ხატში (ამაზე მათურის სალოცავის აღწერილობაში გვექ-  
ნება ლაპარაკი). ესენი ზღვნით, სანთლით და ხარ-ნადითაც ემსახუ-  
რებოდნენ მთავარანგელოზს.

მათურაში არიან მოსული გვარები, რომლებიც ეყმობოდნენ მთა-  
ვარანგელოზს და შედიოდნენ მათურის თემში. მაგალითად: ქისტა-  
ურნი — გვარად ხუციშვილნი: ამათი პაპა არის შუაფხოლან გადასული  
(პაპა: წინაპარი). შუაფხოლნი ბადრიანთ ბავშვი დაობლებულა, მამი-  
და ჰყოლია მათურაში გათხოვილი. ობოლი ძმისწული წაუყვანია და

მათურაში გაზრდილა. იქ დაცოლშვილებულა და ხუციშვილად დაწერილა (ამაზე ზემოთაც გვექონდა საუბარი). ეს გვარი გამრავლებულა და ისე ყოფილა, როგორც ნამდვილი მათურელთ თემის წევრი და მთავარანგელოზის ყმა. ამათ მამიშვილობას მთავარანგელოზში ხევისბრობაც მოუდიოდა და დასტურობასაც, როგორც სხვა მათურელები ისე ასრულებდნენ. მაგრამ ამათ მამაშვილობას შუაფხოს იახსარიც თავს არ ანებებდა. იქ არც ხევისბრობდნენ და არც დასტურობდნენ, მაგრამ ბავშვი და ახალმოყვანილი რძალი იახსარში უნდა გაეყვანათ. ზღვენი და სანთელიც ჩვეულებრივ უნდა მოეტანათ. ხელმხარს კი მათურის მთავარანგელოზში ინათლავდნენ, სადაც დასტურობდნენ. ქალის გათხოვებაც იყო მაგალითი ერთიმეორეში, რადგან ისინი მთავარანგელოზის ძირითად ყმად ითვლებოდნენ და დასტურ-ხევისბრობაც იქ მსახურობდნენ. მათურის თემის წევრადაც ითვლებოდნენ. ამიტომ ალბათ არ ეკრძალებოდათ ერთიმეორეში თხოვა-გათხოვება.

იახსართან დაკავშირებით გვექონდა საუბარი, რომ ერთ ძმა მათურაში დამდგარა და ხუციშვილები იმათი ჩამომავლები არიან, ე. ი. ქისტაურთ განაყრები. ამათაც ბავშვი შუაფხოს იახსარში გაყავდათ, დასტურ-ხევისბრობას კი მათურაში ასრულებდნენ. ამიტომ შუაფხოველები და ხუციანნიც თხოულობენ ერთიმეორის ქალს. მაგალითად, მთავარანგელოზის უკანასკნელი ხევისბერი ფუნჩია შუაფხოელი ჭიხვიშვილების დისწული იყო. ხელმხარსაც მათურაში ინათლავდნენ და უნჯ ყმად ითვლებოდნენ მთავარ ანგელოზში.

აქვე არიან თათარანი — თათარაშვილები. ესენი არიან თათრები. მათი წინაპარი საიდან მოვიდა, მთქმელმა არ იცოდა, მხოლოდ დანამდვილებით იცის, რომ თათრის ჩამომავლები არიან. აქ გაქრისტიანებულან, დაჰყმობიან მთავარანგელოზს და მათურის თემის წევრნი გამხდარან. ამათ გვარს ხევისბრობა არ მოუდიოდა, დასტურად კი დგებოდნენ, როცა რიგით შეხვდებოდათ, მთავარანგელოზს ზღვენ-სანთლით ემსახურებოდნენ, ბავშვის და რძლის გაყვანა და ყველა აქაური წესის შესრულება ევალებოდათ, გარდა ხევისბრობისა.

გახუტელათ შესახებ მთქმელმა თქვა, რომ ისინი არც ხუციანთანი არიან და არც ზურაბაულთანი, ვიცი, რომ მოსულნია, მაგრამ საიდან, არ ვიციო. თემის წევრნი არიან და მთავარანგელოზის ყმანი. დასტურობას ასრულებენ. ხევისბრობა გახუტელთ გვარს არ მოუდიოდა. დანარჩენ ყველა სახატო წესს ასრულებდნენ.

ხომარები პირველად ატარებდნენ გაბილოურს გვარად. ხომარის თემი ერთ-ერთი გვარძლიერი თემი იყო. სათემო სალოცავი ამათი ყოფილა ღელე, თამარ-ნეფის ხატი. ეს ხატი რამდენიმე სოფელს აერთიანებდა, მაგრამ უნჯი ყმანი იყვნენ გაბილოურები. გაბილოურები ძველად ორ ადგილზე თურმე ცხოვრობდნენ — ხომარაში და ღელეს, სადაც ეხლა თამარ — ნეფის ხატი.

ხომარის აღწერილობაში ნათქვამია, რომ აქ წინათ ხატი არ ყოფილა, ცხოვრობდნენ გაბილოურები, მაგრამ ღამე რომ კალოს ლეწავდნენ, ხარებს რქებზე თურმე ცეცხლი უჩნდებოდა. შეშინდნენ გაბილოურები და მიმართეს მკითხავს. მკითხავის თქმით, აქ გაჩნდა თამარ-ნეფის ხატი, ე. ი. თამარ-ნეფეს ხატად ილოცავდნენ (ზოგის თქმით. თამარ მეფემ შესწირა ხატი და ამაზე ილოცავდნენ. ზოგის თქმით, აქ იყო საფლავი, რომელსაც თამარ მეფის კუბოს ეძახდნენ და ამაზე გაჩინეს სალოცავი). სოფელი აიყარა და ყველანი გადასახლდნენ ხომარაში. სასოფლო მამულები დარჩა ხატის სანადგობად ანუ ზოდანებულად. გაბილოურები ხომარიდან ემსახურებოდნენ თამარ-ნეფის ხატს. წლის ბერები აქედანაც დგებოდნენ, ახადიდან და ჭიჩოდანაც. ხევისბერებიც უფრო გაბილოურებიდან იყვნენ. ის კი ხატის მოკითხვით ხანდახან სხვა სოფლებიდანაც დგებოდნენ.

გაბილოურები დაყოფილი არიან გვარებად: მამიერანი — მამიერაშვილი. ამ ქვეგვარს მოუდიოდა ხევისბერობა; მგელუანი ან აფშინანი, ესენი ერთი და იგივენი არან. ამათაც ჰყავდათ ხელწმინდა კაცები და ხევისბერობაც მოუდიოდათ. დასტურად ამათი გვარიდანაც დგებოდნენ. იყვნენ კიდევ ზეზვანი — გაბილოურების ქვეგვარი. ესენიც ისე მონაწილეობდნენ სახატო და სათემო საქმეებში, როგორც სხვა გაბილოურები. როგორც ვთქვით, ამათი სათემო სალოცავი იყო ღელეს თამარ-ნეფე. მათ სასოფლო ხატიც აჰყავდათ (აწერილია რელიგიურ წლიურ კალენდარში) — სახუთმეტო თავადი ძელის ანგელოზი, და ამავე ხატში იყო გიორგი კოშკის ანგელოზი. ეს სალოცავები იყო გაბილოურთა თემის ანუ ხომარის სასოფლო სალოცავები.

ხომარის თემში შედიოდნენ გაფიცული გვარები: ნაკვეთაურნი, რომლებიც არიან თათრის ჩამომავალნი. რატომ წამოსულა, არ იციან, ჯავახეთიდან წამოსულა მაგათი პაპა და შემოხიზნულა ხომარის თემში აქ დაჰყმობია მათს სალოცავს. გაბილოურებს სოფელში დაუყენებიათ და მიუღიათ თავისი თემის წევრად. ბოლოს თამარ-ნეფეს ისე ხელი დაუდვია ამათი გვარისათვის, რომ გვარში თითო ხევისბერი მულამ იყო.

ერთი ხნიერი კაცი იყო ბეჟანა ნაკვეთაური — მიაშობო ბასილმა — ჩემს ბაღბობისას და ის ამბობდა: ჩვენი ნაციხვარი ჭავახეთში ისევ არის, საიდანაც ჩვენი პაპა წამოსულაო.

ხახანი არიან ქისტის ჩამომავალნი: ამის შესახებაც მოთხრობილია რელიგიურ დღეობების კალენდარში ხოშარის სალოცავეების აღწერასთან დაკავშირებით. მაგათი პაპა ყოფილა ქისტეთიდან გადმოხვეწილი, ალბათ მკვლელობაზე. ეს ქისტი, სახელად გეზელი, დასახლებულა ახლანდელ მდაროსკარის თემში შემავალ სოფელ კაწალხევში. აქ მოსულა სტუმრად მეფე ერეკლე, დაღლილს დაუძინია. მხლებლებს ხალხისთვის უთქვამთ: მეფეა, ღმერთის სწორი კაცი და რასაც მოითხოვს, უარს ვერ ეტყვიო; რომ გაიღვიძებს, ქალს მოითხოვს და ერთი ისეთი ლამაზი ქალი მოამზადეთ, რომ მეფის საკადრისი იყოსო. ქისტი გეზელის ცოლზე ლამაზი აქ არავინ ყოფილა. ეს ქალი გამოუწყვიათ სუფთად და მეფესთან მიუყვანიათ. დარჩენილა იმ ღამეს მეფესთან. დაბადებულა ხახა, გაზრდილა და დაეაქაცეებულა ისეთი, რომ ამ ქვეყანაზე ცალი არ ჰყოლია. ერეკლემაც იცოდა, რომ ხახა მისი იყო და ხშირად იბარებდა თავისთან. მას ქალაღლებიც ჰქონდა მამულებისა ერეკლეს მიერ მიცემული. მამული ჰქონდა. ახმეტაში და გომბორზე. ეს ქალაღლები ხახათ გვარში გვიანობამდე ინახებოდა. ხახა რომ მოკვდა, ეს ქალაღლები ხელში ჩაუვარდა მისრიათ ბეწინტურას, რომელიც ხახათ ედავებოდა ღელეს მამულებს. გაირკვა, რომ ეს ქალაღლები ბეწინტურას მიუცია მღვდელ ფარნაოზ ზაბახიძისათვის და იმან არ ვიცით, სად წაიღო (საუბარია ბიჭუა ხახაშვილისაგან). ხახას ერთი შვილი გომბორში ჰყოლია, თავის მამულში, სახელად გიორგი. სხვა ცოლშვილი კი აქ ჰყავდა.

კაწალხევში ცხოვრების დროს ხახა არცერთ ხატს არ ეყმობოდა და არც რომელიმე თემის წევრი იყო. ბოლოს მოამიზეზა ლაშარის ჭვარმა, ისე მძიმე ავად გადა, რომ ლოგინიდან ვერ იძვროდა. მკითხავა უმკითხავა ლაშარის ჭვარზე წასვლა და თავხევისბრად დადგომა. ხახას არც ფეხით შეეძლო წასვლა და არც ცხენზე დადგომა. ერთ-ერთ დღეობაში, როცა ეს კაცი ავად იყო, მკითხავი ურჩევდა. თუ არ წახვალ ლაშარის ჭვარში, ვერ მორჩებიო. საკაცით მიიყვანეს ლაშარის ჭვარში. ცოტა ხნის შემდეგ ხახა გამორჩა და გახდა ლაშარი; ჭვრის თავხევისბერი. ლაშარის ჭვარის და თამარ-ნეფის ბრძანებით გაბიღოურებმა მიიღეს სოფელ ხოშარაში; მისცეს ადგილი და სახლი; გაკეთებამი თვითონ გაბიღოურნი დაეხმარნენ. ვარდა გაბიღოურთ თემის სრული წევრი და ლაშარის ჭვრის ხევისბერი. ემსახურებოდა ადგილობრივ სასოფლო სალოცავეებსაც. ამის შემდეგ ხახა იყო ფშავში თავკაცად, რადგან ერეკლე მეფის ჩამომავლად ითვლებოდა და თვითონაც ძალიან ყოჩაღი კაცი იყო. როგორც ლაშარის ჭვრის თავხევის-

ბერს, მას, მართლაც, ჰქონია მისვლა-მოსვლა მეფეებთან. მისი ჩამომავლობა შეუერთდა გაბილოურთ თემს და განდნენ ლაშარის ჯვრია ხელდებული ყმანი. მათი გვარიდან ერთ-ერთი უეჭველად უნდა ყოფილიყო თავხევისბრად.

ხოშარაში ცხოვრობენ ტეტიანი — ტეტიაშვილები. ტეტია გამოქცეულა კახეთიდან, სოფელ მატნიდან, და შემოხიზნულა ხოშარას, ანუ გაბილოურთ თემში. შეხვეწნია ხატსაც და თემსაც მიეღოთ თემში და თავისი სალოცავის ყმად. გაბილოურებმა შეასრულეს მისი თხოვნა და დაასახლეს ხოშარაში. თამარ ნეფესაც ისე ემსახურებოდნენ როგორც ნამდვილი ყმანი. მხოლოდ ამათ გვარს ხევისბრობა არ მოუდიოდათ, შემოხიზნული ხალხი რომელ გვარსაც შეეხიზნებოდნენ, იმათ ძირითად გვარს იჩემებდნენ. მაგალითად, აქ შემოხიზნულებისათვის რომ გეკითხათ: რა გვარი ხარო, გეტყვოდნენ. გაბილოური ვარო.

ვარდანაშვილები სოფელ აფშოში არიან გადასახლებულნი (აფშო მალაროცკარის სოფ. საბჭოში შემავალი სოფელია). ისინი ამბობენ: ჩვენ ძირითად გაბილოურები ვართ, ხოშარიდან გადმოსულიო. ესენი თამარ-ნეფეს შორიდან ეყმობოდნენ, მაგრამ რატომღაც ცაბაურთ თემში შედიოდნენ და იქაურ მთავარანგელოზს უფრო ემსახურებოდნენ, როგორც მისი ნამდვილი ყმანი. აქ დასტურობასაც ასრულებდნენ და ამათ გვარიდან ხევისბრებიც იყვნენ მთავარანგელოზნი.

ამის გარდა ხოშარასთან ახლო, წყალს გაღმა წაწადის ხეობაზე, არის სოფელი მისრიანთკარი. იმათთან ახლოა თამარ-ნეფის ხატიც, ზევით ვთქვით, რომ ღელეს, სადაც ახლა თამარ-ნეფის ხატია, წინათ ხოშარლები მოსახლეობდნენ. თამარ-ნეფის ხატი რომ გაჩნდა, იქიდან აიყარნენ და ხოშარაში დასახლდნენ. მათი ადგილი დარჩა თამარ-ნეფის სანადოვბად; ეხლა სადაც მისრიანი მოსახლეობენ, ის ადგილიც თამარ-ნეფის მამული იყო.

მისრიათ ჰაპის მოსვლას ორგვარად ხსნიან, შატილიდან კი ნამდვილად არიან, ჯალაბაურნი. ზოგი ამბობს: ფშავლებმა რომ ჯალაბაურნი „დალივნეს“, იმათი ბავშვები გაიზარდნენ და ფშავლებს დავა დაუწყეს. კაც-შუაკაცით შეარიგეს და ფშავლებმა დრამა მისცეს. შეირიგება მოხდა ლაშარის ჯვარში და ლაშარის ჯვრის ბრძანებით იმათი ორი ყმაწვილი აქ დარჩა მხეველად, რათა ჯალაბაურთ ფშავლები-სათვის აღარაფერი დაეშავათ. ის ყმაწვილები თამარ-ნეფის ახლო დასახლდნენ და იმაზე გაჩნდნენ მისრიანი. ერთი მათგანი გუდამაყარში წასულა და იქ დასახლებულა. ახლა იქაც არიან ჯალაბაურნი, ხოლო გვარი შეცვლილი აქეთ — თვარელათ ეძახიან.

ფშავის, შატილისა და გუდამაყრის ჯალაბაურები შორიდან ისევ თავისობენ ერთიმეორეს და საჭირო დროს იცავენ კიდევ. მაგალითად, შატილის ჯალაბაურებს ამ ორმოციოდე წლის წინ გუროვლებ-

თან ჩამოუვარდა დიდი მოსისხლეობა. უკანასკნელად ორი ძმაღა იყო  
ჯალაბაურთი — ბაჰყია და ლევანი; ისინიც მტრებმა დახოცეს და დარ-  
ჩნენ მათი ობლები. ყმაწვილებსაც მოსისხლეები ემუქრებოდნენ, რომ  
გაიზრდებიან და იარაღს აიღებენ, ეგენიც უნდა დავხოცოთო. ფშავის  
ჯალაბაურებმა ეს ამბავი რომ გაიგეს, დააპირეს მათი გადმოყვანა  
თავისთან და აქ დასახლება მათი, მაგრამ გუდამაყრის ჯალაბაურებმა  
დაასწრეს, წაიყვანეს ბავშვები და რამდენიმე წელიწადი იქ იზრდე-  
ბოდნენ. გუდამაყრელები ამ ბავშვების მტრებს მუქარას უთვლიდ-  
ნენ, თუ ამათ რამე დაუშავდებოდა მათგან. ბოლოს მოხდა შერი-  
გება.

მეორეები ამბობენ: ამათი პაპა ჯალაბაური განთქმული მკედელი  
ყოფილა. თურმე მისრეთში ყოფილა მკედლად (მისრეთი სად არის, ეს  
ვერ მითხრეს). თამარ მეფეს გზაში შეხვედრია. ნეფეს უკითხავს — ვინა  
ხარ და სად მიდიხარო. მან უთხრა: მე მკედელი ვარო. ამოიღო ჯიბიდან  
თავის გაკეთებული ხმალი (დაგირგვლული (დახვეული) ყოფილიყო და  
ჯიბეში სდებოდა), გახსნა და გაიშალა, გასწორდა. დაგირგვლა ისევ და  
ჯიბეში ჩაიღო. თამარ-მეფემ ჯერ ნებით უთხრა. ჩემთან წამოდიო და  
იქ იმუშავეო. რომ არ დათანხმდა, დაიჭირა და წამოიყვანა. ცოტა  
ხანს კი იმუშავა და გაიპარა ისევ. წავიდა თამარ მეფე და მივიდა  
იმასთან და ერთი დიდი ბორკილი გამოკეთეო — უთხრა. გაუკეთა იმა-  
ნაც ბორკილი. თამარ-მეფემ ეს ბორკილი ყელზე ჩაუდვა, წამოიყვანა  
და ლაშარის ჯვარში დააბა. მანამდე ჰყავდა დაბმული, სანამ ფიცი  
არ მისცა — აღარა წავალო. შეფიცვის შემდეგ წამოიყვანა და თავის  
ადგილში დაასახლა. რადგან ის მისრეთით მოყვანილი იყო, მათი  
გვარი მისრიაშვილია და სოფელი მისრიანთკარი. ამის შემდეგ დაი-  
წყო აქ მკედლობა და მათ გვარში არ შეიძლება, რომ ერთი მაინც  
კარგი მკედელი არ იყოს და ერთი ხევისბერი; ეს ორივე მოდენილო-  
ბით აქვს, მოლოცვილი თამარ-ნეფისა და ლაშარის ჯვრისაგან. ზემო-  
ხსენებული ბორკილი ლაშარის ჯვარში ინახება და ახლანდელი კაცის  
თავი კარგად ძვრება იმის ყელზე ნაღებ ბორკილშიო.

მისრიანი მას აქეთ გახდნენ თამარ-ნეფის მკვიდრი ყმანი, ე. ი.  
უნჯი ყმანი. მათ საკუთარი თემი არ ჰქონდათ, შედიოდნენ ხოშარის  
თემში. ხევისბრობა მოუდიოდათ და დასტურობასაც, ე. ი. წლის  
ბერობას კი ისე ასრულებდნენ, როგორც სხვა ყმანი. გაბილოურთ თემ-  
ში შედიოდნენ, მაგრამ თავს გაბილოურს არ უწოდებდნენ, რადგან  
ისინი შეხიზნულნი კი არ იყვნენ, არამედ ხატის მიერ მიყვანილ —  
დაბინავებულნი. რომ გეკითხათ, ვისნი ხართო? გიპასუხებდნენ: ჩვენ  
მისრიანი ვართ, გაბილოურთ თემისანიო.

ჭიჩო ხოშარის მოპირდაპირე მხარეს მთაზე მდებარეობს. მაგათი  
მთავარი გვარი არის სოფლის სახელწოდებით ჭიჩოელნი, მაგრამ მერე



დაყოფილან მამებად — ქვეგვარებად. ჩოლოგაურნი, ამათ მოუდი-  
ოდა ხევისბრობა და დასტურობასაც ასრულებენ. ჭამიანი, ელყიანი,  
ჯღუთანი, ფეტვიანი, მინდოლაურნი, ქეშიკანი, ჩაქიანი — ეს ყველა  
ჭიჩოელთ ქვეგვარებია და ხატში ერთნაირად სარგებლობდნენ. ამათი  
სათემო სალოცავი, როგორც ხოშარლებისა, თამარ-ნეფეა, მაგრამ,  
როგორც ხოშარლებს, ამათაც სოფელში ჰყავდათ კიდევ სხვა სალო-  
ცავები.

პირცეცხლი დიდ სალოცავად არ ითვლებოდა, ის იყო როგორც  
პატარა სასაფლაო სალოცავი. ჭიჩოელნი წლის ბერად ემსახურებო-  
დნენ თამარ-ნეფეს, ხევისბრობა კი მოდენილობით ამათ არ ჰქონდათ,  
ხევისბრობდნენ მარტო თავის პირცეცხლში, სათემო საქმეებს კი  
ლელეს ანუ თამარ-ნეფეში არჩევდნენ. პირცეცხლში სასოფლო უბრა-  
ლო საქმეები ირჩეოდა.

ჭიჩოს თემში არის შემოხიზნული ბურღული. რა მიზეზით მო-  
სულა, არაინ იცის, უფრო ამბობენ: კაცის მკვლელი გამოხიზნულა  
და ჭიჩოს თემს მიჰკედლებიათო. ეს კაცი წამოსულია ქმოსტიდან. მა-  
გათი განაყრები თავბერაულნი ახლაც ცხოვრობენ ქმოსტის ახლო  
ღელისვაკეში. ბურღული ჭიჩოს თემს პირველად ისე მიუღია, რო-  
გორც ამანათი, მერე ადგილიც მიუციათ და თავის სასოფლო და სა-  
თემო სალოცავების ყმად გაუხდიათ. დასტურობას და სხვა სახატო  
სამსახურს ჩვეულებრივი წესით ასრულებდნენ, ხევისბრობა კი მათ  
არ მოუდიოდათ. შედიოდნენ ჭიჩოს თემში სრულ წევრად (ახლა ჭი-  
ჩოში ზემოხსენებული გვარებიდან ცხოვრობენ მარტო ჩოლოგაურნი,  
დანარჩენი გვარები გადასახლებულან იორზე, კახეთში და სხვა).

ჭოჩოში შემოხიზნულა ოსი ხიზანა. ამბობენ მწყემსად მოსულა  
და აქ დაკოლმევილებულა. გაუხდია ჭიჩოელებს თავისი თემის წევრად  
და დაყმობია იმათ სალოცავებს. ისინი დასტურობას ანუ წლის ბერო-  
ბას ასრულებდნენ, მხოლოდ ხევისბრობა არც ამათ მოუდიოდათ. აქვე  
იყვნენ კინთურნი. კინთა ადგილის სახელია თიანეთის და ახმეტის  
საშუალო ადგილზე, კახეთის ტყეში. აქ წინათ დიდი სოფელი ყოფილა,  
რომელიც ლეკებს გაუნდგურებიათ. ერთი კაცი გამოქცეულა, ჭი-  
ჩოში მოსულა. ჭიჩოელებს თავისი სოფლის პირდაპირ ჯვართლეღეში  
მიუციათ სასახლე ადგილი. იქ დასახლებულა, იქიდან შეერთებია  
ჭიჩოს თემს და დაყმობია მათ სალოცავებს, გვარად ეწერებოდნენ თავი-  
ძველი სოფლის სახელის მიხედვით: კინთური. ჯვართლეღედან ბო-  
ლოს ჭიჩოში გადმოსახლებულან და აქ ცხოვრობდნენ, თავის თავს  
ჭიჩოელს უწოდებდნენ და ასრულებდნენ ყველა სახატო და სათემო  
საქმეებს. მხოლოდ ხევისბრობა არც იმათ მოუდიოდათ.

ცაბაურთა არიშ ერთი თემი. მათ თემს ეძახდნენ ცაბაურთ ანუ გოგოჭურთ თემს (გოგოჭური ხეესურების გვარია და ალბათ მათა მონათესავენი იქნებოდნენ; აქ ვერავინ მითხრა, რატომ არიან გოგოჭურნი). უძველესი გვარი მაგათი არის გოგოჭური და ამ გვარში ბევრი ქვეგვარები შედის მკვიდრი და შემოხიზნული. ამაზე ბევრ გვარებს არც ერთი თემი არ აერთიანებდა.

გოგოჭურის შემდეგ გვარი იყო: ბეკურაული; ამათში შედიოდა ქვეგვარები: ჯალანი, ანუ ძალლიანი, გოგნელანი და ჩიტონი. ამთ ქვეგვარებს მოუდიოდათ ხევისბრობა, ემსახურებოდნენ წლისბერადაც თავის მთავარანგელოზს; ითვლებოდენ ცაბაურთის მკვიდრ მცხოვრებად. აქვე არიან ხოშურაულნი. ცხოვრობენ სოფელ ბეტისჩრდილში. როგორც ამბობენ, მოსულნი არიან ხეესურეთიდან მისახიდან. შესულან ცაბაურთ თემში, დაყმობიან მთავარანგელოზს. ემსახურებიან წლისბერად. ხევისბრობა მათ არ მოუდიოდათ. ცაბაურთაშივე არიან ჰყრუნანი. როგორც მთხრობელმა ჩამაწერინა, ჰყრუნანი ოსნი არიან. მათი პაპა შემოხიზნულა და მიჰყედლებია ჯერ თემს და მერე ბეკურაულთ ქვეგვარებს. ამჟამად ბეკურაულად თვლიან თავს. ჰყრუნათ ხევისბრობა არ მოუდიოდათ, წლისბერობას კი ასრულებდნენ. იყვნენ ცაბაურთ თემის წევრნი და მთავარანგელოზის ყმანი (მიუხედავად იმისა, რომ ეს თემი სულ სხვადასხვა გვარებს და სოფლებს აერთიანებდა, მთავარანგელოზის ყმათაში სასტიკად აკრძალული იყო ქალის თხოვა და გათხოვება ერთიმეორეში).

სოფელი აფშო, ცაბაურთიდან დაახლოებით ათი-თორმეტი კილომეტრის დაშორებითაა. ესენიც მთავარანგელოზის ყმანი არიან და ცაბაურთთემის წევრნი. მათი უძველესი გვარიც გოგოჭურია, მაგრამ აფშოში დასახლების შემდეგ მიუღიათ საერთო ქვეგვარი მჭედლური. აშფოელნი ჯერ შედიან გოგოჭურთ თემში და გვარში, მერე მჭედლურთ ქვეგვარში და აქედან დაყოფილი არიან მამებად და გვარსაც თავ-თავის მამებისას ატარებენ. ყველა აფშოელი მთავარანგელოზს ემსახურებოდა წლისბერად, როცა რიგით შეხვდებოდა. ისე მოწმიდარი კაცებიც იყვნენ, მაგრამ ხევისბრობა მათ არ მოუდიოდათ. ამათი მამებია შემდეგი: დაქუზანი, ვარდანანი, რომელნიც მჭედლურებთან შედიან, მაგრამ თან გაბიდოურებად ითვლებიან, ნახევარნი, შამაქიანი, მაჩურნი, ყბაილანი, ტურანი, ლომანი, წვერონი. ამ მამებს ყველას თავ-თავის მამის გვარი აქვს, მაგალითად: დაქუზაშვილი ვარდანაშვილი და სხვა.

სოფელი ჩარგალი შედის გოგოჭურთ თემში და გვარში, მაგრამ აქაც არის დაყოფა ქვეგვარებად: რაზიკანი, მარცვალანი, ბუკუკანი,

მარტიანი, მთიბელანი, ბაჩიანი, პეტრიანი, თათარიანი, საგრილანი, ზურაბაანი, პირქუშაანი, აფხუშელანი, ხოხორდანი. ხოხორდათ მოუ-  
დიოდათ მთავარანგელოზში თავხევისბრობა, დანარჩენები კი ემსა-  
ხურებოდნენ წლისბერებად და მოდიოდნენ სალოცავად ზღვნით და  
სანთლით. ყველანი მკედლურის გვარში იყვნენ გაერთიანებულნი,  
მთავარანგელოზის ყმანი და ცაბაურთ ანუ გოგოჭურთ თემის წევრნი  
(ჩარგალი ცაბაურთას დაშორებულია თხუთმეტი კილომეტრით).

ამავე გოგოჭურთ გვარში და თემში მთავარანგელოზის ყმად ით-  
ვლებოდა სოფელი მიგრიულთა. ეს სოფელი ცაბაურთას დაშორებუ-  
ლია ოც კილომეტრამდე მანძილით. აქ პირველად გოგოჭურის გვარი  
იყვნენ, მერე გადასულა მთელი სოფელი — მიგრიულად. ახლა და-  
ყოფილი არიან ქვეგვარებად. ატარებენ თავისი მამების გვარს: ბუთ-  
ხანი, მაჩხონი, თევდორანი, კუჭანი, ციოლანი, ბალიანი, ხელდადგმუ-  
ლანი. ამათ მამებში მოწმიდარი კაცები იყვნენ, წლისბერადაც ემსა-  
ხურებოდნენ, მთავარანგელოზს, ნადშიც მოდიოდნენ და ყველა წესს  
ასრულებდნენ რაც ხატს მოუდიოდა, მხოლოდ ხევისბერი ამათი არავენ  
ყოფილა. იყვნენ გოგოჭურთ გვარის ქვეგვარიდან, ცაბაურთ თემიდან  
მთავარანგელოზის ყმანი, მთხრობელი ამბობს, რომ რაზიკანი არიან  
ლეკნი, ე. ი. ლეკის ჩამომავალნიო. (მაგათი პაპა თუ მართლა ლეკა  
იყო, საიდან და როგორ, ან რა მიზეზით მოსულა, მთხრობელმა არ  
იცის). გოგოჭურთ გვარის ხალხის ზოგიერთი მამების წარსული  
ამბები აწერილია მთავარანგელოზის წლიურ დღეობებთან დაკავში-  
რებით. მაგალითად: ხუხუნაშვილები, რომელთაც ბევრი ბრძოლები  
გამოუვლიათ ხატის მოყვანაში, ცაბაურთ სოფელთან ახლო დასახ-  
ლებაში და სხვა.

ზემოსხენებული სოფლებიდან მამები და გვარები დღეობებში  
ზღვნით და სანთლით მოდიოდნენ, ნადშიც მონაწილეობას ღებულობ-  
დნენ და ყველა მათგანი მორიგეობით მოდიოდა წლისბერად და ერთი  
წლის განმავლობაში ორი კაცი მუდმივად ცხოვრობდა საბეროში,  
რომლებსაც არცერთ სოფელში არ შეეძლო გავლა და არც თავის  
ოჯახში მისვლა.

უძილაურთა, — მათი ჰვებგარეზი, სათემო სალოცავი კოპალა

ამათი თემის საერთო გვარი იყო უძილაური. ამ თემში მოსული  
იყო მარტო ჩორხაული ხევსურეთიდან, სოფელ ბაცალიგოდან. რო-  
გორც მთხრობელმა გადმოცა და თვითონ ჩორხაულნიც ამბობენ,  
ჩორხაული მოყვანილია ხატისაგან. კოპალას ისინი მუდმივ დასტურად  
ემსახურებოდნენ და ხატის თას-განძის მეთვალყურეობაც მათი მოვა-

ლეობა იყო. ყველა მათი მამაკაცები მოწმიდარნი იყვნენ, დედაკაცებიც კი. მათი არც კაცი და არც დედაკაცი ცივთან და ნაცივარ სახლში არ გაივლიდა. თუ შემთხვევით გაივლიდა, აუცილებლივ ხატში უნდა მიეყვანა საკლავი და ეთხოვა პატიება დანაშაულისათვის. ხატამათ ყმობაში უპირატესობა ჰქონდა და სათემო საქმეშიც ბევრი რამ ეკითხებოდათ, საერთო გვარსაც უძილაურს იჩემებდნენ, მხოლოდ გეტყოდნენ: ძირად ხევსურები ვართ. დასტურობის გარდა ხევისბრობაც მოუდიოდათ.

დანარჩენი გვარები ერთიმეორის განაყრებია და კოპალას უნჯ ყმები. უძილაურთის მკვიდრი მცხოვრებნი არიან შემდეგი ქვეგვარები ან მამები: ლოსეურანი, ლაშქარანი, ბაზიერანი, კოჭლიანნი და მადურანი. ახლო ბიძაშვილები არიან და თავთავად გვარზე ეწერებიან: მადურაშვილი და კოჭლიშვილი. სხვადასხვა გვარს ატარებენ და ერთიმეორეს „ჩვენ ჯალაფთ“ ეძახიან. ამათ გვარში არის მუდამ თავხევისბერი. ერთ-ერთი ყველაზე უფროსი ხევისბერი მათია, იგივე ყოველთვის მკითხაობდა კიდევ, როგორც ხატისაგან დაჭერილი. სოფელს ამის გამო ყოველთვის მათი ხათრი ჰქონდა და სასოფლო საქმეების გარჩევაში თავკაცად ითვლებოდნენ. დასტურადაც ისე ემსახურებოდნენ. როგორც სხვა ყმანი, გარდა ჩორხაულთა. როგორც ვთქვით, ჩორხაულნი მუდმივი დასტურნი იყვნენ კოპალაში. იყვნენ კიდევ ცუბერანი, ანუ თათარაშვილები. თათარაშვილებსაც მოუდიოდათ თავხევისბრობა — მხოლოდ კოჭლიანთ კაცი კი პირველი იყო ხევისბრობაში, დანარჩენები მის სიტყვას ემორჩილებოდნენ. ამათ სამი გვარი აქვთ და ხან ერთზე ეწერებოდნენ, ხან მეორეზე და მესამეზე: ცუბერაშვილი, ბაზიერაშვილი და ამჟამად ეწერებიან თათარაშვილებად.

აქედან გადასახლებულან ბაზალეთში და ამჟამად ატარებენ გვარად ნათელაშვილს, მათი ძველი გვარი უძილაური ყოფილა. ნათელაშვილები წინათ სალოცავადაც მოდიოდნენ კოპალაში. დასტურობას, ნაღში მოსვლას და ხევისბრობას კი ამათგან არავინ ასრულებდა.

#### • უკანაფშავის მოსახლეობა და ხატები

უკანაფშავი არის ერთ-ერთი თორმეტი თემთაგანი. ამ თემის საერთო გვარი არა ჩანს, მხოლოდ ადგილის სახელს იტყოდნენ — უკანაფშაველიო. სერთო სალოცავი ჰყავდათ წყაროსთავშიდა გიორგი. საკმაოდ დიდი თემი იყო და დიდი სალოცავიც ჰყავდათ. ამ თემში შედიოდა ხუთი პატარა სოფელი: ელიაგზა, ჩალახევი, ჭიდალი, ვაკის-სოფელი და გოქცი. ამ სოფლებში ცხოვრობდნენ სხვადასხვა გვარები. ელიაგზაში — ბობლიაშვილები, სოხურაშვილები და მამიაურები.

როგორც ამბობენ, ბობლიაშვილი მოსულია თუშეთიდან. ჩაღმა თუში გამოხიზნული კაცის კვლის გამო და პირდაპირ უკანაფშავის თემს შეხიზვნია. იმათაც ჭერ ისე მიუღლიათ როგორც ამანათი, მერე ხატს მისი ყმობა უთხოვია და დაყმობია. გამხდარა თემის წევრი და ლებულობდა თემის ყველა საჭირბოროტო საკითხებში მონაწილეობას. ბობლიაშვილები წყაროსთაურს (ასე უწოდებდნენ) ემსახურებოდნენ დასტურობით, ზღვნით და სანთლით. გარდა ხევისბრობისა, ყველა მოვალეობას ასრულებდნენ. ხევისბრობა კი მათ არ მოუდიოდათ. სოხურაშვილების გვარში კი თავხევისბრებიც იყვნენ. მამიაურები დასტურობით ემსახურებოდნენ თავის სალოცავს, ხევისბრობა კი არც იმათ მოუდიოდათ.

ელიაგზა თავის სათემო სალოცავთან — წყაროსთაულთან ახლოა, ნახევარი ვერსით იქნება დაშორებული. სოფლიდან აღმოსავლეთ მხარეს — ერთ პატარა ვიწრო ხეობაში დაეკებულ ტყეველიან ადგილზე სათემო საქმეები ირჩეოდა.

დასავლეთ მხარეს მეორე სოფელია — ჩალახევი. ამ სოფელში ცხოვრობდნენ მურღვაშვილები. ისინი საიდან მოსულან, მთხობელმა არ იცოდა, მხოლოდ თქვა — მგონი მაგათი პაპა ქისტეთიდან უნდა იყოს მოსულიო. მურღვაშვილები ემსახურებოდნენ თავის სათემო სალოცავს დასტურობით, ზღვნით და სანთლით. მაგათგან ხევისბერი არავინ ყოფილა.

მაგ სოფლის ახლოსვე, აღმოსავლეთ მხარეს, არის სოფელი ჭიდალი. აქ ცხოვრობდნენ ჭვილაურები და კოჭლიშვილები. ჭვილაურების გვარიდან წყაროსთაულში იყვნენ თავხევისბრები. მათი გვარის კაცებს ევალეობდათ წყაროსთაულის ქონების მოვლა — პატრონობა. ამავე გვარის ხევისბერებთან, როგორც გადმომცეს, მეფეებსაც ჰქონიათ მიწერ-მოწერა: ავალებდნენ თურმე ხარჯის აკრეფას, სალაშქროდ ხალხის გაყვანას და სხვა. ისინი ხევისბრობის გარდა დასტურობითაც ემსახურებოდნენ, როცა წილით, მორიგეობით შეხვდებოდათ. ამავე სოფელში მცხოვრები კოჭლიშვილები კი მართო დასტურობით. ზღვნითა და სანთლით ემსახურებოდნენ წყაროსთაულს. ხევისბერობა არც ამათ გვარში იყო მოღვენილობით. დანარჩენ წესებს კი ისინი ყველაფერს ასრულებდნენ და იყვნენ თემის სრულუფლებიანი წევრნი (სრულ წევრს მე მთხრობელის ენით ვწერ. ის ამბობს: ზოგიერთი წევრი მოსულთაგანი იყო და მას საჭირბოროტო საკითხებისა სათემო საქმეში ბევრი არაფერი ეკითხებოდათ).

აღმოსავლეთ მხარეს არის ვაკისსოფელი. ამ სოფელს, მართლაც, შესაფერისი სახელი ჰქვია. ის აქაურ სოფლებთან შედარებით, ვაკე ადგილზე არის გაშენებული. აქ ცხოვრობენ: კარატიელი, არჩემაშვილი, ამირანაშვილი და წელაური. კარატიელი არის უფრო დიდი გვა-

რი, ისინ არიან აქაური მკვიდრი მცხოვრებნი. წყაროსთაულში ხევისბრობის გარდა ამათი გვარიდან ლაშარის ჯვარშიც ყოფილა ხევისბერი. ამათი გვარიც აქ ცნობილი ყოფილა და როგორც გადმომცეს, ამათ სევსბერებსაც მეფეებთან ჰქონიათ კარგი განწყობილება. მეფეების მოწერილი საბუთები კარატიელის და ჯვრელაურის გვარების ხევისბრების ხელში იყო ამ ბოლო დრომდე, ახლა არა ჩანს. კარატიელი, გარდა ხევისბრობისა, დანარჩენ სახატო წესებსაც ასრულებდა (დასტურობა, ზღვენი, სანთელი და სხვა).

აქვე მცხოვრები არჩემაშვილები წყაროსთაულს დასტურობით ემსახურებოდნენ ზღვნით და სანთლით. ხევისბრობა მათ გვარში არ იყო.

წელაუთა გვარიც ამ სოფელში საკმარისად ძლიერი იყო. მხოლოდ ესენი მკვიდრი მცხოვრებნი არ იყვნენ. ამათი პაპა ყოფილა ჩაღმა თუში. ისიც შემოხიზნულა ამ თემში, დაემოხია წყაროსთაულს და გამხდარა ამ თემის წევრი. დასტურობით ემსახურებოდნენ წყაროსთაულს, მხოლოდ ხევისბერი მათი არაეინ ყოფილა, რაღაც შემთხვევით ამათი გვარი თემს კარგად ვერ შეუთვისებია. მამულები დროზე არ მიუციათ და თითქმის ჩვენამდე მოაღწია, რომ ამათ გვარის კაცებს ამანათებს ეძახოდნენ. ეტყოდნენ — შენ აქ რა გეკითხება, ამანათი ხარო. მამულებიც გვიან დაიჭირეს, ხალხი არ ანებებდა: საიდანაც მოსულხარო, იქ წადით, აქ თქვენ მამულს ვინ მოგცემსო, განა აქაურ მიწა-თიხათ შვილები ხართო. დღეს მათი გვარი საკმარისად გამრავლებულა. აქაც ბევრნი ცხოვრობენ და კახეთისკენაც არიან გადასახლებულნი. აქვე, ვაკისსოფლის ზემოთ, ჩრდილო მხარეს არის ერთი, ორკომლიანი სოფელი გოქცი. გოქცი თითქმის ვაკისსოფლის ნაწილია და აქაც წელაურები ცხოვრობდნენ.

წითელაურები და მათი სათემო სალოცავი კობიას წმინდა გიორგი.

უკანა ფშავიდან ორი-სამი კილომეტრით დაშორებულია წითელაურთ თემი. ადგილსაც წითელაურთა ეწოდება და გვარიც ამათი ძველად წითელაური ყოფილა. როგორც გადმოგვცემენ, წითელაურთ თემში შემოხიზნული არაეინ არის, გარდა მოკვერაშვილებისა. ეს თემი ერთიმეორის მონათესავე ხალხით იყო დასახლებული. აქ შედიოდა სამი პატარა სოფელი: ნაკვალესავი, ჰეშე და ქინო. ნაკვალესავში ცხოვრობდნენ: გულბათაშვილები და ჩიანაშვილები — ერთიმეორის ახლო ნათესავება. იყვნენ წითელაურთის მკვიდრი მცხოვრებნი. თავის წმიდა გიორგიში მოუძლიოდათ თავხევისბერობა და ემსახურებოდნენ დასტურებითაც. ჰეშეში ცხოვრობდნენ ბაიდაურები. თავის სალოცავს დასტურობით, ზღვნით და სანთლით ემსახურებოდნენ. ხევისბრობა მათ არ მოუდიოდათ.

ქინძომი ცხოვრობდნენ: გამიაშვილები, მოკვერაშვილები და ჩოფანიშვილები. ამათ გვარებშიც ხევისბრობა არავის მოუდიოდა. ემსახურებოდნენ დასტურებით. მოკვერაშვილები გადასული ყოფილან მუქუს ახლო პატარა სოფლიდან — მოკვერაანთკარიდან, ემორჩილებოდნენ წითელაურთ თემს და სალოცავს.

კოტიას წმიდა გიორგი იყო ერთ-ერთი ძლიერი, წითელაურთ თემის საერთო სალოცავი ხატი. ჩვენ შევეხეთ აქაურ გვარებს და ქვეგვარებს, რომლებიც ემორჩილებოდნენ და ემსახურებოდნენ მას. როგორც გადმომცეს, აქ ხევისბრობა მოუდიოდა გამიათ და ჩიათ მამებს. ერთი ხევისბერი სახელად ქავთარა ჩიათ მამაში იყო, რომელსაც ხატი პირად ელაპარაკებოდა. ამ ხატს ჰყავდა ორიათასი სული ცხვარი და მისი მწყემსები. სწორედ ამ დროს იყო ქავთარა ხევისბერი. ის ხშირად იყო ცხვარში და ხელმძღვანელობდა წმიდა გიორგის ფარებს. წინასწარ იცოდა, რომელ ღამეს მოვიდოდა წმიდა გიორგი ცხვრის დასათვალეერებლად (ქავთარას თქმით, ხატი ღამე მოდიოდა და ათვალეიერებდა თავის ფარებს). იგი ხშირად ეტყუოდა მწყემსებს: ამაღამ წმიდა გიორგი მოვა ცხვრის დასათვალეიერებლად და ცხვარი რომ შეფრთხვეს, ან დაიკვილოთ, იცოდეთ — ის წმიდა გიორგი იქნებაო. ეს ხევისბერი ბოლოს პანკისში მოკვდა და მკვდარს თურმე ციდან სვეტი ედგა. ის რომ გაასვენეს, სვეტიც თან მიყვებოდა და საფლავში რომ მიწა მიაყარეს, სვეტი მაშინ გაქრაო.

ერთხელ ქავთარა კოტიის გორს ყოფილა წმიდა გიორგის ცხვარში. მისულა იმის საზარესთან, დამჭდარა და დაუწყია ხატთან პირად ლაპაკარი. ხან ნელა ესაუბრებოდა ხატსა, ხანდახან კიდევ გაუჭავრდის ქავთარაიო. ამ დროს ქისტები ყოფილან გადმოსულნი ქავთარაის მოსაკლავად და ცხვრის გასარეკად. საზარესთან ახლო ყოფილან ჩასაფრებულნი, რადგან სცოდნიათ, რომ ქავთარა საზარესთან ხშირად მოდიოდა. „გადაუსხამ“ ქისტებს თოფები მოსაკლავად. მაგრამ როცა დაუმიზნებდნენ თოფს, ქავთარა თურმე გაქრებოდა, მოაშორებდნენ „ლიშანს“ და იქვე იჯდა და ხატს ესაუბრებოდა. ეს რამდენჯერმე გაიმეორეს და, ბოლოს, იგრძნეს, რომ ვიღაც წმიდა კაცი იყო და შეშინებული ქისტები უკან დაბრუნდნენ, ვერც ქავთარა მოკლეს და ვერც ცხვარი გალაღეს. (კოტიას წმიდა გიორგი შესახებ ცნობები დამთავრებულნი არ არის).

### ხ ა ხ ა ბ ო დ ა მ ი ს ი წ მ ი დ ა გ ი ო რ გ ი

მეთორმეტე თემად ლაშარის ჯვარში გაფიცული იყო ხახაბო (პირიქით ხევსურთით); ისინი ყოველთვის მონაწილეობას ღებულობდნენ — როცა მთაზე გზა იყო გადმოსასვლელი — ფშაველთა თორმეტი თე-

მის ყრილობაზე. ისინი დღესაც ამბობენ: ლაშარის ჯვარის მეოთხედი ნაწილი ჩვენ გვეკუთნოდა, ხევსბრობაც მოგვიდიოდა და სხვა. აქ არიან შემდეგი გვარები: მინდიაურები — მათი მამები: ტურანი და ნადირნი; მამიაურები — ქვეგვარი არ ჰყავს; ხახიურები და ხოსიტაურები; ბატარანი. ამ ოთხივე გვარის სათემო სალოცავი წმიდა გიორგია. — ლაშარის ჯვარში ერთნაირი უფლებებით სარგებლობდნენ. სიშორის გამო დასტურად ვერ დგებოდნენ.

## ГРУЗИНСКИЕ НАРОДНЫЕ ПРАЗДНИКИ В НАГОРНОЙ ЧАСТИ ВОСТОЧНОЙ ГРУЗИИ (ПШАВИ)

### Резюме

Настоящая книга является продолжением издания «Календарь грузинских народных праздников». В ней представлена часть собранного Ал. Очаури в Пшави материала на религиозную и социальную темы в 30-х, 50-х годах нашего столетия, среди которых значительное место занимает тема празднества.

Этнографическое наследие Ал. Очаури сохраняет особое значение в настоящее время, поскольку цену первоисточника имеют не только собранный автором уникальный материал, но и его непосредственные наблюдения над спецификой этнографического быта Пшави. Собрать подобного рода материал в настоящее время невозможно. Цельная картина календарного быта Пшави, описанная Ал. Очаури приобретает еще большее значение на фоне существующего фрагментарного и скудного этнографического материала данного региона.

В книге можно проследить формирование обрядов с древнейших времен до первых десятилетий XX века.

Упомянутый материал является обязательным условием для полного, всестороннего изучения народного календаря и развития теории о нем.

Кроме описаний празднеств, в работе приводятся истории сельских и общинных святилищ, мифологические предания и разного рода обычаи.

Богатый этнографический материал публикуется впервые из этнографических архивных фондов Института истории, археологии и этнографии им. И. Джавахишвили АН Грузинской ССР.



## ს ა ძ ი ე ბ ე ლ ი \*

### გეოგრაფიული სახელები

- აბულელაურის ტბა — 45, 46, 98  
ალაზანი — 151  
ალვანი — 38  
ათანდილის საქანი — 144  
აქუშო — 121  
აქუშოს ხეობა — 96, 104  
არბაჩხანი — 180  
არახიჯა — 49, 71, 282  
არყოვანის თავი — 247  
არხოტი — 171  
ასთაჭურის გორი — 4  
აფშო — 131, 142, 144, 287, 290  
აფხოშო — 150, 152  
აჩხოტის მინდორი — 172  
აზადი — 12, 45, 52, 155, 157, 165,  
197, 199, 285  
ახალსრფელი — 114  
ახიელა — 171  
ახმეტა — 11, 65, 68, 69, 126, 145,  
286  
ბაზალეთი — 180, 192.  
ბაჩალი — 178  
ბახია — 225  
ბახტრიონი — 149  
ბაკალიგო — 44, 100, 155  
ბეტისჩილი — 144, 252, 255, 290  
ბელელთანა — 98  
ბოროლა — 36, 225, 274  
ბოქორმა — 150  
ბურსა — 127  
გამხვეურთ-კარი — 41, 42, 45, 49  
გიორგწმიდა — 276  
გოგოლაურთა — 35, 37, 40, 197, 198;  
199, 259, 262, 263, 273.  
გომბორი — 286  
გომეწარი — 189, 190, 197, 263, 267,  
278  
გულამაყარი — 287, 288.  
ელიაგზა — 201, 203, 205, 210, 270,  
292  
ერევანი — 128, 129, 130, 141  
ვაქისოფელი — 210, 222, 292  
ვანხევი — 49, 53, 282  
ვანხეე-არახიჯა — 84  
ზარისკალა — 272  
თურმანულთა — 272  
თხილიანა — 41, 45  
ივრის კედები — 157, 201, 214  
ივრის ფშავი — 178  
ივრის ხეობა — 151  
იორი — 42, 43, 44, 65, 71, 95, 96,  
98, 127, 150, 272, 289  
ირემთ-კალო — 42, 43, 95, 96, 121  
იხინკა — 44, 104, 114, 115, 116, 161  
კადაჩალი — 5, 272  
კარატის წვერი — 46, 48  
კართანა — 44, 95, 98  
კაწალხევი — 128, 286  
კახეთი — 38, 39, 70, 276, 287  
კიბული — 40, 273

\* საძიებლები შეადგინა ელენე ფარქოსაძემ.

- კინთა — 289  
კისტანი — 36, 274  
კოტიის ვორი — 295  
კოშკის კარი — 11  
კუდო — 35
- ღალის ყური — 202, 214, 216
- მათურა — 36, 130, 197, 226, 249, 273, 274  
მათურბევი — 191, 197, 198  
მათურულა — 247  
მასთალა — 15, 16, 90, 26, 28, 29, 40  
მატანი — 214, 216, 271, 287  
მალარო — 276, 278  
მალაროსკარი — 37, 150, 261, 262, 287  
მალაწალი — 264  
მაშარა — 93, 99, 125  
მზილა — 128, 141  
მიგრიანულთა — 144, 291  
მიტხო — 36, 78, 164  
მისახი — 290  
მისელური 71  
მისრეთი — 288  
მისრიაანთკარი — 193  
მუქუ — 179, 180, 199, 295  
მუქისდელე — 273  
მუნრანი — 182  
მცხეთა — 177, 184
- ნაროულა — 40, 128  
ნინახი — 41, 42, 83, 92  
ნოჯა — 180
- პანკისი — 180
- საპარავის ყელი — 43, 96, 98  
საყაქე — 243, 248  
სწროფაევი — 49
- ტილიანი — 114  
ტუშურთ სოფელი — 66
- უბისთავი — 46, 72, 93  
უძილაურთა — 42, 49, 78, 85, 96, 99, 100, 197, 279.  
უკანაფშავი — 178, 187, 201, 209, 216, 223,, 289
- ფშეისწევი — 36
- ქალილო — 276  
ქალქვისთავი — 48  
ქმოსტი — 289  
ქმოსტ-როშკა — 45  
ქუთხი — 93, 142  
ქუშევი — 13
- ღელე — 289  
ღელისკაქე — 289  
ღული — 278, 280  
ღუნხევი — 129, 145, 146, 148
- ყვარელი — 127  
ყოფჩა — 285
- შარახევი — 13  
შატილი — 36, 274, 287  
შუაფხო — 40, 41, 42, 45, 46, 49, 69, 71, 72, 94, 98, 116, 159, 190, 197, 199, 278, 283.  
შახეტილა — 99, 125
- ჩაბანო — 126, 150  
ჩალახევი — 292, 293  
ჩარგალი — 131, 144, 150, 255, 255, 257, 290
- ცაბაურთა — 94, 128, 130, 131, 135, 137, 145, 148, 152, 188, 190, 255, 273, 290  
ციხეგორი — 42, 43, 49, 95, 96, 97, 98, 104, 117
- წაწადა — 196  
წაწადის ხეობა — 287  
წითელაურთა — 190, 197, 224
- ჭაფნაგა — 271, 272  
ჭეშე — 294  
ქიდალი — 289  
ქიჩო — 12, 285, 187, 288, 289  
ქონთიო — 269
- ხალო — 272  
ხაღუ — 126  
ხატხევი — 13, 42, 76.

ბაშარი — 42, 98

275, 276

ბიშპე — 15, 16, 20, 29, 40, 108, 272,

ბოდაშენი — 38, 178

ბომი — 43, 276

ბორხი — 49, 54, 84

ბოშარა — 4, 9, 10, 11, 38, 42, 142,

192, 193, 197, 273, 285, 287

ჭაენეთი — 280, 285

ჭვართლელე — 289

ჭიგრაულთა — 270, 271, 272

### საკულტო სახელები

ადგილის დედა — 83, 93, 145, 161, 168, 175, 177, 220, 222, 231, 258, 263, 275

ათენგენა — 38, 48, 214, 217, 221, 224, 225, 243

ამალღბა — 12, 20, 25, 26, 55, 64, 78, 190, 113, 144, 158, 159, 172, 176, 177, 214, 221, 224, 252, 256, 257, 253, 261, 262

აღდგომა — 35, 92, 177, 176, 213

აღება — 18, 93, 112, 142, 167, 212

ახალკვირე — 189

ახალი წელი — 90, 165

ახესება — 12, 35, 113, 143, 174, 213, 214, 222, 224, 241, 257, 264.

ბედისკერა — 166, 211, 255

ბერიკა — 142, 239, 240

ბერმუხა — 200

ბელელი — 17, 42, 51, 97, 99, 101, 103, 128, 129, 133, 158, 177, 178, 220, 223, 226, 273

ბელლის კარი — 128, 129, 138, 141, 145

ბზიანა — 261, 262

ბზობა — 241

ბზობის კვირა — 187

ბორტვის ნაკვეთი — 52

განძი — 97, 136, 140, 149, 162, 181, 200, 231

ვიორგი კოშკის ანგელოზი — 4

გიორგობა — 6, 12, 29, 50, 85, 158, 160, 176, 177, 185, 189, 219, 232, 257, 258, 261, 262

გოგა — 34, 89, 91, 109, 110, 112, 138, 164, 165, 166, 187, 208, 209, 222, 236, 237, 255, 268

გოგოლაურთის თავარმოწამე — 14, 15, 16

გოგოლაურთის წმ. გიორგი — 262

ღამბადებელი — 44, 53, 95, 129, 200

ღამასტური — 81, 191, 196, 197, 198, 199, 272

ღანაღები — 52

ღარ-ავდართ მოურავი — 198

ღარბაზი — 15, 16, 51, 92, 99, 115, 138, 155, 181, 183, 194, 195, 201, 207, 208, 209, 223, 225.

ღასტური 4, 5, 7, 14, 15, 17, 19, 20, 21, 22, 25, 26, 29, 30, 32, 49, 51, 52, 53, 56, 60, 62, 65, 67, 75, 79, 80, 85, 87, 99, 107, 109, 110, 112, 113, 114, 131—135, 158, 160, 162, 165, 172, 174, 176, 178, 190, 204, 223, 262.

ღევ-კერპნი — 41, 43, 45, 48, 74, 122,

ღედაკაცების საჯარე — 231  
154, 122, 266

ღიღმარხვა — 113, 212

ღოლისთავი — 221, 224, 244, 257

ღოლი — 123, 213, 222, 236

ღროშა — 33, 36, 54, 65, 66, 67, 71, 72, 73, 74, 75, 78, 80, 82, 115, 116, 115, 117, 134, 140, 148, 176, 183, 189, 195, 197, 198, 214, 262, 274, 283

ერიონნი — 280

ერისგანი — 252, 269

ვენახი (ხატისა) 65, 69, 183, 202

ჯარის მცველი ანგელოზი — 77

ზელაშე — 38, 51, 58, 59, 66, 74, 77,  
81, 131, 145, 148, 262  
ზეარა — 82, 92, 168, 175, 185, 258,  
260, 262, 275  
ზღვენი — 47, 55, 61, 63, 146, 275,  
278, 283

თაგე-ჩიტო უქმი — 113, 168  
თავარმოწამე — 18, 17, 18, 19, 20, 21,  
23, 28, 29, 30, 31, 32, 33, 35, 36,  
39, 40, 86, 274, 276, 278  
თაემასაპარსაო — 251  
თამარ-მეფე || თამარ-ნეფე — 189, 190,  
205, 258, 261, 285, 287, 288, 289  
თას-განძი — 52, 54, 63, 82, 85, 100,  
159, 176, 181, 212, 260  
თახევისბერი — 8, 13, 35, 50, 53,  
60, 61, 65, 80, 86, 109, 111, 134;  
140, 147, 158, 161, 173, 192, 203,  
206, 217, 215, 286, 292  
თეანი — 234, 258, 268  
თევის კვირა — 225, 233, 186, 220

იასაულნი — 18  
იასარი — 40, 41, 42, 44, 46, 47, 49,  
50, 52, 53, 54, 56, 57, 60, 60, 61,  
63, 66, 68, 71, 72, 74, 75, 77, 81,  
83, 90, 97, 98, 103, 108, 129, 189,  
195, 199, 278, 279, 280, 282, 283,  
284

კარატე — 46, 49, 71, 72, 80  
კვირა — 43, 44, 58, 69, 78, 86, 87,  
96, 107, 108, 109, 122, 131, 196,  
139, 143, 147, 157, 167, 186, 194,  
195, 204, 205, 207, 209.  
კვირაცხოველი — 55, 57, 61, 63, 66,  
74, 77  
კვირიჭვრობა — 144, 134, 142  
კერივი — 191, 195, 238, 247, 248,  
249, 252, 253, 260, 265  
კოდი — 20, 25, 51, 52, 57, 92, 100,  
105, 179  
კოპალა — 41, 42, 43, 44, 46, 49, 73,  
75, 96, 97, 101, 103, 104, 106, 108,  
124, 128, 129, 263, 264  
კოპალას კურეტები — 104, 125  
კოქის მოკიდება — 265, 266

კოქლაურა — 63  
კუდიანი — 172, 173, 174  
კულუხი — 38, 64, 65, 68, 70, 74, 75,  
115, 145, 184, 189, 214  
კუმეტი — 33, 50, 167, 237  
კუქულა — 230

ლაშარის ჭვარი — 89, 36, 78, 141, 152,  
171, 178, 189, 190, 192, 194, 199,  
200, 205, 207, 256, 257, 258, 273,  
275, 277, 287, 288

ლაშარის ჭვარის პიროფლიანნი — 78,  
79, 120, 123, 153, 177, 219,  
ლაშარის ჭვარის საბუკო — 195  
ლახტი — 26, 43, 44, 45, 46, 65, 96,  
97  
ლიტონია — 107, 154, 206, 220, 234

შარანი — 39, 65, 67, 115, 145, 178,  
202, 214  
მარიამ-წმიდა — 198, 243, 246, 247,  
248

მარიამობა — 12, 20, 28, 82, 82, 93,  
125, 177, 178, 180, 199, 222, 225,  
230, 231, 258, 258, 257, 262, 264,  
268, 27.

მარიანა — 26, 29  
მარიანა — სოიშობელი — 275  
მარხვა — 86, 170, 172, 263  
მარხუშობა — 171, 224  
მალაწლის წმ. გიორგი — 263, 264

ნაცილი — 136, 147  
მგელთ უქმი — 169  
მებაკური — 270, 271  
მეგანძური — 82, 117, 134, 136, 140,  
148, 149, 155, 219

მედროშე//მედროშავე — 80, 178, 190,  
197, 215, 231, 236, 279  
მეზღენე — 22, 49, 61, 62, 67, 72, 81,  
121, 154, 160, 175, 181

მეკელე || მეკელენი — 34, 89, 90, 91,  
107, 108, 109, 111, 112, 136, 137,  
138, 162, 164, 184, 200, 222, 224,  
236, 237, 255, 257

მეკეზისწერე ანგელოზი — 175  
მეკულუხე — 64, 65, 67, 70, 73, 75,  
75, 115, 145, 178, 215  
მეკურატე — 125

- მთავარანგელოზი — 94, 127, 128, 129, 130, 131, 133, 135, 136, 137, 138, 152, 125, 181, 199, 232, 243, 248, 283, 284, 287  
 მთაწმილობა — 129, 145  
 მირონი — 188  
 მიქელ ეკლესიის ძალა — 245  
 მეთოხავი — 17, 22, 38, 45, 47, 48, 52, 62, 130, 180, 203, 283, 285  
 მოგზაური ანგელოზი — 66, 68, 70, 71, 72  
 მოწამართე ანგელოზი — 124, 148  
 მორიგე ღმერთი — 63  
 მოხარნადე ხთიშობელი — 178, 201, 222  
 მხემე — 171, 172  
  
 ნალი — 37, 84, 99, 100, 101, 104, 124, 131, 157, 179, 191, 256  
 ნათავარი — 20, 28, 116  
 ნათავარის ქადა — 178, 290, 248  
 ნათავარი ღვინო — 67, 74, 76  
 ნაყევრალეები — 16, 37, 50, 157, 158, 226  
 ნაყრი — 111, 180, 210, 238, 255  
 ნაცივარი სახლი — 134, 292  
 ნაწილიანი ისარი — 193  
 ნაწილიანი ჯვარი — 200  
 ნიქი — 90  
  
 ოქროს შიბი — 188, 200  
  
 პაპა — 239, 240  
 პიროფლიანნი — 154  
 პირკუში — 49, 52, 129, 144, 155, 157, 160, 161, 162, 163, 164, 167, 175, 177, 190  
 პირცეცხლი — 190, 289  
  
 რიოში — 88, 114, 126, 135, 139, 170  
  
 საბეკურა — 270  
 საბერო — 8, 16, 26, 40, 41, 49, 51, 52, 62, 89, 92, 100, 104, 105, 107, 108, 109, 116, 117, 135, 137, 141, 155, 157, 160, 271, 278, 291  
 საგმირო — 98, 105, 106  
 საღასტურო — 13, 18, 22, 25, 36, 40, 49, 157, 159, 160, 173, 178, 180, 206, 223, 225, 230, 272  
  
 საღიდებელი — 66, 82, 106, 195, 196, 198, 207, 231, 246, 266  
 საზარე — 15, 16, 33, 40, 43, 46, 49, 53, 60, 76, 77, 81, 96, 98, 104, 109, 115, 116, 121, 122, 123, 129, 137, 157, 161, 163, 178, 184, 195, 199, 200, 223, 225, 256  
 საკვირაო — 194, 195, 196, 199, 206  
 საკიდლის ნათელა — 94  
 საკოდე — 57, 92  
 სალაღებელი — 23, 63, 124, 181, 182  
 სალიტანიო თიკანი — 186  
 სალდე — 16, 20, 26, 40, 49, 51, 86, 104, 108, 109, 116, 115, 136, 155, 157, 200, 201, 220, 223, 225, 235, 242, 258  
 სამანანულე საკლავი — 36  
 სამკელეო — 34, 290  
 სამხოთო — 93, 144, 191, 193, 198  
 სანადო — 40, 49, 50, 85, 99, 111, 125, 129, 157, 178, 189, 200, 223, 226, 255, 256, 257  
 სანთლობა — 222  
 საორახო — 205, 207  
 საოცრის დაყენება — 234  
 საპურე ბელელი — 17, 157, 160, 177, 179,  
 სასანთლე — 60, 115, 137, 176, 184, 191  
 სასინანულო — 264  
 სასოფლო საკლავი — 122, 144, 146, 155, 156, 179, 185, 187, 196, 198, 212, 213, 214, 216, 217, 223, 231, 253  
 საღმერთობა — 12, 26, 38, 269, 271  
 საყაქეს სვეტის ანგელოზი — 243  
 საყეინო — 38, 72, 76, 77, 78, 79, 80, 118, 119, 120, 123, 144, 153, 184, 219  
 საწირავნი — 57, 67, 68, 81, 84, 100, 105, 135, 136, 140, 159, 161, 176, 179, 185, 203, 206  
 საწულადო — 162, 205, 224, 234  
 სახარბაქე — 50, 52, 83  
 სახარნადე — 131, 132, 133, 263  
 სახატო ფეტკარი — 51  
 სახლის ანგელოზი — 176, 251  
 სახუთმეტო ძელის ანგელოზი — 285

სახულო კოკობი — 57  
საჯარე — 103, 157, 160, 161, 162, 175,  
177, 183, 192, 194, 260  
სერობა — 12, 38, 64, 71, 75, 114, 176,  
177, 189, 129  
სვეტის ანგელოზი — 18  
სიმური — 45, 46  
სოფლის ჯარი — 161  
სულთაქრეფა — 170, 218, 241  
სულის დღეობა — 112, 170  
სულწმიდანი — 15, 23, 58, 63, 166, 167,  
108, 208, 230

ტალის ქვევრი — 65  
ტანისამოსის გაშლა — 171  
ტახტის ყმა — 117  
ტყაევის სახსარი — 75, 81, 106, 121, 148,  
199, 213, 224

უნჯი ყმა — 271, 274, 276, 288  
ურწყენი — 168, 169  
უქმის კვეთა — 254  
უქმის სანათლაგი — 254

ფერხისა — 27, 28, 73, 80, 177, 182,  
183, 195, 235, 244, 246, 260, 261,  
265  
ფურთ-ნათავარი — 161, 220, 224, 253,  
256, 258, 260, 275

ქადაგი — 97  
ქადა-პური — 61, 140, 180, 202, 203,  
204  
ქადა-საწირავი — 80, 106, 137, 175, 181,  
182, 246

ქერ-ოქრონი — 84, 133  
ქვევრი, ქვევრ-მარანი — 64, 68, 69, 70,  
79, 82, 116 188, 202, 215  
ქვევრ-მარანის მცველი ანგელოზი — 68  
ქრისტე — 12, 55, 57, 77, 86, 106, 140,  
186, 202 219, 225, 132, 257  
ქრისტეშობა — 35, 155

ლაზახი — 217  
ღმერთი — 55, 57, 69, 77, 108, 109,  
122, 131, 136, 139, 143, 154, 167,  
170, 178, 168, 204, 207

ყველიერი — 142, 239  
ყმა || ყმანი — 39, 45, 46, 49, 53, 54,  
55, 59, 66, 67, 72, 84, 90, 99, 103,  
125, 129, 131, 132, 146, 147, 155,  
157, 164, 178, 179, 214

შესახელება — 203, 212, 250  
შობა — 30, 86, 92, 106, 125, 155, 161,  
185

შუა-მარხვა — 171, 213, 241  
შურის ციხე — 189

ჩიტფათა — 168  
ჩხუტი — 22, 59, 79, 108, 120, 131, 132

ცაბაურთის მთაწმინდა — 124  
ცათა არხნი — 55  
ცარეალი — 55, 68, 74  
ციხეთგობობა — 104  
ციხის ანგელოზი — 219, 220, 223, 224

ძელის ანგელოზი — 11, 38—39  
ძმობის სამანი — 10

წელშუის კვირა — 31, 107  
წელიწადი — 12, 33, 35, 52, 83, 112,  
123, 140, 153, 142, 186, 187; 202, 203,  
205, 210, 211, 222, 224, 258

წლის ბერი — 13, 14, 15, 17, 31, 49,  
159, 181, 223, 289, 290, 291  
წმ. გიორგი 33, 34, 39, 190, 200, 203,  
209, 274, 260, 261, 264, 272, 275,  
276, 278

წულადობილნი — 234, 236  
წული — 110, 111, 112, 135, 147, 163,  
205, 209, 214, 248, 249

წულის აჯავანი — 111, 119, 163, 205,  
209, 214, 245, 249

წულის გაყვანა — 147, 247, 248, 257  
წულის სანთელი — 257, 268  
წყალკურთხევა — 140, 187, 22, 224,  
238, 258

წყაროსთავ წმ. გიორგი — 156, 157, 201,  
203, 204, 205, 207, 291, 293, 294

ჭიკაიკონა — 113, 174  
კდის ამოგდება — 229  
კირნახულის ნათავარი — 171  
კირნახულის სამხეყრო — 197

- ხარ-ნადი — 178, 179, 226, 283  
 ხატიონნი — 26, 214, 224, 233, 237  
 ხატის კალო — 5, 16, 50, 139, 168, 223, 224  
     ხატის მამული — 37, 38, 43, 49, 99, 203  
 ხატის ქალები — 13  
 ხატის ცხვარი — 54  
 ხახმატის ჭვარი — 234  
 ხახაბოს წმ. გიორგი — 190  
 ხევისბერი — 4, 7, 13, 15, 20, 30, 33, 31, 36, 38, 49, 59, 60, 61, 62, 67, 73, 75, 79, 82, 84, 75, 86, 87, 94, ოჩიაური 13 06 ზოროგლიანი 133, 136, 138, 164, 167, 172, 174, 176, 179, 191, 204 191, 204, 217, 231, 233, 235, 264, 266, 279.  
 ხელმზრის ნათელა — 17, 38, 65, 101, 105, 133, 134, 158, 161, 176, 177, 179, 189, 214, 223, 227, 238, 263, 283, 284.  
 ხემზიევიანი — 22, 134, 201, 223, 225, 258  
 ხოისკარი — 44, 47, 54, 126  
 ხოიშვილნი — 17, 18, 39, 44, 45, 46, 56, 77, 78 126, 141, 144, 152, 159, 169, 172, 196, 172, 196, 198, 205  
 ხოიშობელი — 1, 82, 83, 87 161, 162, 168, 175, 177, 178, 179, 181, 184, 130, 209, 222, 223, 247, 248, 252, 255, 257, 258, 260, 262, 275.  
 ხმალა — 188, 189  
 ხოდაბუნი//ცოდაბუნი — 104, 157, 178, 223  
 ხორცის შაბათი — 211, 212, 224, 238, 239  
 ჯარის დედა — 90  
 ჯვარიონნი — 121  
     99, 101, 110, 118, 121, 123, 131,

## შ ი ნ ა ა რ ს ი

რედაქციისაგან	4
დღეობები ხოშარის თემში	4
გოგოლაურთის მთავარმოწამე	14
ქისტაურების სალოცავი იახსარი	41
უძილაურთის სალოცავი კოპალა	91
ცაბურთის მთავარანგელოზი და მისი დღეობები	127
დღეობები პირქუშში	155
მუქუს სალოცავები და მათი დღეობები	178
წყაროსთავ წმ. გიორგისა და მოხარნადე ღვთისმშობლის დღეობები	201
მათურის მთავარანგელოზის დღეობები	225
ბეტისნდილის, ჩარგლის, ყოფჩის, მალაროსკარის, გომეწრის სალოცავები და მათი დღეობები	252
ფშავის სალოცავებთან დაკავშირებული სხვადასხვა ამბები	268
მათურის თემი, მათი სალოცავი მთავარანგელოზი და მასთან დაკავშირებული მამები დ გვარები	298
რეზიუმე (რუსულ ენაზე)	296
საძიებელი	297



Очиаური Алекси Александрович  
ГРУЗИНСКИЕ НАРОДНЫЕ ПРАЗДНИКИ  
В НАГОРНОЙ ЧАСТИ ВОСТОЧНОЙ ГРУЗИИ (ПШАВИ)

(на грузинском языке)

«МЕЦНИЕРЕБА»

ТБИЛИСИ

1991

დაიბეჭდა საქართველოს მეცნიერებათა აკადემიის  
სამეცნიერო-საგამომცემლო საბჭოს დადგენილებით

სბ 4580

გამომცემლობის რედაქტორი რ. ფეიქრიშვილი  
მხატვარი ნ. გაბუნია  
მხატვრული რედაქტორი გ. ლომიძე  
ტექნიკური რედაქტორი ე. ზოკერია  
კორექტორი ც. დევიდარიანი

გადაეცა წარმოებას 17. 7. 90; ხელმოწერილია დასაბეჭდად 25. 5. 91;  
ქალაქის ზომა 60/90; ქალაქი № 2; ბეჭდვა მაღალი;  
გარნიტურა ვენური; პირობითი საბეჭდო თაბახი 19.0;  
სააღრიცხვო-საგამომცემლო თაბახი 17. 22;  
ტირაჟი 2000; შეკვეთა № 1897;

ფასი 6 მან.

---

გამომცემლობა „მეცნიერება“, თბილისი, 380060, კუტუზოვის ქ. 19  
Издательство «Медниереба», Тбилиси, 380060, ул. Кутузова, 19

---

საქართველოს მეცნ. აკადემიის სტამბა, თბილისი, 380060, კუტუზოვის ქ. 19  
Типография АН Грузии, Тбилиси, 380060, ул. Кутузова, 19